






24,153/A/3



42530
INSTITUTIONES
PATHOLOGICÆ

MEDICINALIS,

AUCTORE

H. D. GAUBIO.

Editio altera.



LEIDÆ BATAVORUM,

Chez THÉOPHILE BARROIS, Libraire,
Quai des Augustins, N° 18.

M. DCC. LXXV.

INSTITUTIONS


PATHOLOGIC

MEDICINALS

LECTURE

H. D. GAUSTO

Third class




LIBRARY

APOL SAMUEL & JOSEPH LINDHART
Academic Typographers

1880

M. D. C. LXXX



AUDITORIBUS SUIS.

H. D. GAUBIUS.

S. P. D.

Quo vobis animo primam hujus opusculi editionem obtuli, eodem & alteram nunc offero dicoque, curis secundis utcunque emendationem & paucis aliquot locis auctam. Debuisset, fateor, magis expolita prodire; ut qui agnoscam ipse non uno vitio laborare. Obscuritatem certè intulit materiæ concisâ dictione exponendæ multitudo, plurimæque facile fuisset interferere, quæ lumen adhiberent. Sed voluminis rationem in enchiridio ad institutionis domesticæ usum destinato habendam esse, quis non intelligit? Eoque magis, cum viva auctoris vox illustrationem promittit. Illud gravius videri possit, quod lacunas mei systematis benè multas magnasque, quasi non viderim, explere prætermisi. Equidem vidi & cum maximè video, nec inficior plura me silentio præterisse, in quibus Pathologi plerumquè exercere ingenium solent; alia dubitanter proposuisse, quæ tanquam certa assumuntur; alia in medio reliquisse, de quibus cum inter Doctores controversia sit, sententiam dicere oportuisset; multoties denique cum enodatio requiri poterat, confessionem ignorantiae pro ratione attulisse. Quæ si vos, optimi Auditores, si ceteros, qui fortè fuerunt, lectores meos offenderunt, non tam remedium quæro, quam justam excusationem in promptu habeo.

Nimirum, quod vobis sæpè dixi, quia dicendum est sæpius, repeto, existimare me, quid-

quid in Pathologiâ , id est in status morboſi hominis Theoriâ docetur , ejus aliquam debere in Praxi , quam vocant , Medicinali eſſe utilitatem quâ cognoscendi curandique morbos ratio perficiatur ; nec idcirco ad medendi artem , ex ſe nimio latiùs patentem , temerè eſſe referenda , quæ nihil ad eam pertineant. Neque hoc ſolummodo : ſed multò etiam magis in eo elaborandum eſſe , ut ejusmodi tantum proponantur theoremata , de quorum veritate per fideles obſervationes legitimumque ratiocinium , ſola Medicinæ Dogmaticæ fundamenta , liquidò conſtet ; atque adeò exulent , quæcunque incerta , dubia , fallacia , ex merâ hypotheſi ducta , certam parere ſcientiam nequeant ; ſaltem pro talibus modo , qualia reverà ſunt , nec ultra pretium iuum venditentur. Novi equidem iſta ſæpenumerò credulæ juventuti perplacere , avidè arripi , mordicùs teneri , maximè cum ingenioſè confictâ , dextrè perpolitâ , ſcientificâ , ut ajunt , methodo , aut perſuaſoriâ elocutione confidenter a Doctore exponuntur. Scilicet pulchrum eſt rerum quarumvis reddere rationem poſſe , nodos difficiles ingenii acumine ſolvere , locis obſcuris , ubi prudentia , errorem aut præcipitium metuens , timido pede incedit gradumve ſiſtit , ſolem quaſi manibus geſtare : pulchriùs etiam , quæ ſenſuùm aciem cautæque rationis ſolertiam fugiunt , naturæ arcana conjecturis & quâdam veluti divinatione explicare , ut qui per ſomnium detegat , quod vigilantì incomprehenſibile ſit : pulcherrimum denique , ſyſtema concinnare atque apponere totum teres , rotundum , omnibuſque numeris abſolutum , in quo tirones nihil non exæquatum inveniant. Laudarem & ego , ſi morbi opinionum commentis cederent ; ſi quò loquacior Medicus , eò perfectior eſſet ; ſi ad hypotheſin

sele natura flecti fingique fineret : saltem ferenda putarem , si sola Medicum contemplatio faceret , neque cum Praxi Theoria aliquid haberet commune , suisve erroribus , sibi servatis , morborum curationes non contamineret. Verum nimis profectò manifestum est , quamplurima nec parvi momenti mala ex hoc fonte in artium præstantissimam invehì. Quodsi tristissimas mecum reputo , quæ ex incauto pertinacique hypothesium atque falsorum dogmatum usu in faciendâ Medicinâ profluunt , consecutiones , tot sanitates perverso regimine pessumdatas , tot morbos incongruâ medicatione in longum protractos , tot illatas mortes ; non sine animi dolore quandoquè dubius hæreo , plus ne emolumentum , an noxæ , humano generi medendi scientia afferat ? Sed mitto hæc , ne ejus osoribus nimio plus instructis arma ministrem. Illud autem hujus loci est meique muneris ut vos moneam , dùm in Academiâ , tanquam in doctrinarum emporio , versamini , quam quisque sibi studio ac labore comparet , supellectilem non tam multitudine rerum , quam soliditate & ad usum præstantiâ esse æstimandam ; ne domum reduces impedimenta potius , quàm instrumenta ad operis tractationem vobis ad manum esse doleatis. Præterquam enim quod valdè injucundum sit ex iis , quæ magna plurium annorum industriâ tibi paraveris , nullos percipere fructus , oleumque & operam perdere , est & plerisque perdifficile , quæ adolescentes didicerint , ætate maturiore dediscere. Quo fir , ut , posito tandem tirocinio , Praxin ineuntes ad falsa futiliaque , quibus imbuti sunt , theoremarum , tanquam ad saxum adhærescant , acriter ea defendant , cæcique ad experientiæ lucem , nec argumentorum pondere mobiles , rerum peritis garrulitate suâ risum , arrogantiam

etiam indignationem moveant. Hi tamen veniam merentur atque miserationem. Sed quam probabilis excusationis specie infidi illorum duces, quam sibi imputare debent, istius sortis culpam abstergeant, ipsi viderint. Utinam & ars id genus artificum peccata luere non cogere-tur ! Etenim, ne dicam in contemptum, quâ satis superque laborat, adduci, damnosius hoc est, quod masculum illud observandi studium, veteribus tantoperè excultum, a quo cum inter initia deducta & deinceps aucta est Medicina, tum hodièque incrementa capere ac perfici debet, tantò ferè magis frigescat, quantò ratiocinatorum ejusmodi fervidior est ad argutandum pruritus, atque in fingendis hypothesebus licentia effrenatior. Animus quippe, suis ipse commentis pollens, extraneo sensuum ministerio facilè caret negligitque adeò nimis operosam naturæ explorationem; aut præceps oculo fugitivo observata ratione statim inventâ explicando sic sibi commodè satisfacit; alias & præjudicata captus opinione phænomena, nec quomodò sese habeant, curiosè inquirat, nec omnia & singula notat, sed ex multis illa tantum, quæ hypothese favent, præcoxve ratiocinium confirment. Quæ res cum universæ scientiæ incredibiliter officit, tum verò imprimis impedimento est ad perfectionem historiæ morborum, quam uti Theoria artis rationalis integerrimam desiderat, ita qui lacunas ejusdem opinionibus explere non verentur, cum & incerta pro certis interserant, & nævis fucò duntaxat tectis, falsâ absoluti operis persuasione stimulum ad ulteriores conatus obtundant, duplici calamitate proprium fundum afficiunt.


Neque hic malorum finis est. Perspicaciores alii, postquam à contemplatione ad res tractandas sese contulerunt, seriùs ocyùs disciplinæ

suorum magistrorum vitia quidem animadvertunt atque cordatè abjiciunt; non omnes tamen eâ, quâ decet, prudentiâ & moderatione. Videas certè, qui cum in suâ & quibusvis aliorum Theoriis inutilia, dubia, falsa inesse deprehendunt, inconsideratè mox clamitant, nullam dari Medicinæ Theoriam, quæ fidem mereatur, inutiles igitur omnes esse, frustra aut desiderari, aut adhiberi: artem enim rationalem, quæ salutifera sit, jactari quidem, neutiquam existere, missisque adeò Theoris *Εμπειρίας* acquiescendum esse, quæ viam monstret tutiorem. Dissimulant hi, aut ignorant, inter multiplices Theorias vix unam esse tam omni ex parte falsam, ut non aliquid veri habeat; in eo maximè peccari, quod certis incerta misceantur, & quæ nonnullis modo morborum generibus competunt, ultra, quam par est, extendi ceterisque omnibus perperam accommodari. Triticum itaque, quod a lolio duntaxat repurgandum erat, barbaro impetu una cum hoc evellunt, & cum recolere deberent, quantos Theoria progressus indè ab institutione Medicinæ rationalis ad nostra usque tempora continuatis clarorum virorum laboribus fecerit, acceptique beneficii memores suis & ipsi conatibus incrementum ulterius promovere, partis recusant bonis frui ac repudiatis veluti, quæ offeruntur, frugibus, quia glumis & furfuribus obnoxia sunt, ad glandes malunt reverti. Longè sapientius est, quod suo jam tum ævo Corn. Celsus judicium interposuit, cum de rationalis & empiricæ artis sectatorum dissensione ageret: usque profectò credibile est, præstantissimos illos veteris *Εμπειρίας* professores, si cum maximè ad vitam redirent, aliter fore sensuros. Tantò igitur imprudentius videri consilium debet recentiorum, qui hodiernam Theo-

riam, tot sultam adminiculis, tot incrementis auctam, cum *Ἐμπειρία* commutandam esse contendunt. Quodsi enim temerariæ vulgarium Empiricorum, id est agyrtarum, turbæ sese addicere in animo habent, quid probrosius? Si verò Empiricen rationalem excolere, quæ experientia ita rationem adjungat, ut cujusvis generis doctrinarum, quæ lumen afferre queant, apparatu adjuta, ex certis curatèque factis experimentis & observationibus, casti ope ratiocinii, eliciat, quæcunque ad rem Medici pertineat, quid magis ridiculum est, quam nomine solum mutato eandem proponere disciplinam, quæ nobis sano sensu Theoria audit?

Sed tædiosum foret & ab instituto meo alienum isti materiæ diutius immorari. Neque enim alio hæc in medium protuli, nisi ut illud primum intelligeretis, Theoriam opinionum commentis confarcinatam fucoque hypothesium expolitam, etsi specioso habitu incautis arrideat, non solum usu carere, sed multis etiam modis cum arti, tum artifici obesse: deindè & hoc, quamobrem, quod initio lacunosum vobis systema proposui, nunc denuò sui simile, neque completius exhibeam. Equidem candidè dicam, plura me in dies, dum in artis usu versor, dediscere, quàm discere, & incremente ætate minui mihi potius, quàm augeri scientiam, tantumque abesse, ut de auctario cogitem, ut etiam, si ad hunc laborem redire unquam dabitur, nonnulla forsàn a me rescissum iri credam. Valete!

D. Leida Batav. c1775 cclxxv.



INTRODUCTIO A D PATHOLOGIAM.

DE DISCIPLINA MEDICA.

I.

VITA, Sanitas, Morbus, Mors, stadium Medicum Naturæ humanæ in hoc terrarum orbe absolvunt.

2. Priores duæ conditiones (1) secundum naturam dicuntur; cum iisdem frui dulce sit: præter, aut contra naturam reliquæ, illis oppositæ, illætabiles, quas idè averſamur.

3. Utrumque tamen genus (2), pro latiore vocabuli NATURA ſignificatione, naturale eſt, & ſuas agnoſcit cauſas phyſicas, determinatas, quibus naſcitur, durat, viget, minuitur, deſinit, ſecun-

cundum cujusque diversitatem variantes, etiam contrarias, tum homini insitas, tum à foris advenientes.

4. Mens quidem humana, vi commercii, quod cum suo corpore habet, multa, & voluntate consciâ, & cœco instinctu operatur, quæ vitam ac sanitatem juvant, morbisve, aut morte illatis opprimunt.

5. In corpore etiam, pro partium, ex quibus coaluit, mixtione, fabricatione, compositione, animatione, inest & inertia, & mobilitas, & mutabilitas, & incitatio, & conspiratio, undè aliæ atque aliæ, tam salubres, quam insalubres, causæ jugiter enascuntur.

6. Versatur præterea homo inter res innumeras, suâ singulas agendi potestate præditas, multumque perpetuò variantes quarum aliis carere, alias evitare, aut pro arbitrio sibi accommodare semper non potest. Hæ verò sive intrò devertant, sive foris admoveantur, pro suâ quæque materie, virtute, concursione, successione, corpus, perque corpus mentem aliter atque aliter afficiunt, internas Naturæ humanæ vires (4. 5.) diversimodè determinant, incitant, opprimunt, in rectum perversumve agunt, suasque vicissim ab his mutationes patiuntur. Ex quo fonte plurimi perpetim secundæ adversæque valetudinis fomites, alimenta; venena, remedia profluunt.

7. Triplex istud virium genus (4. 5. 6) sicubi lege Naturæ humanæ consentanea conspiraverit, vegetâ longævitate fruïtur homo: sin minus, morbis, aut præmaturâ morte affligitur.

8. Atque hæc materies est, quam tractat Medicus; eo quidem proposito, ut hominem suæ curæ commissum justo moderamine virium (7) quam diutissimè vivum sanumque præstet.

9. MEDICINA igitur, quo hodie colitur ambitu, est scientia ac prudens directio virium Naturæ humanæ ad vitæ & sanitatis a morbis & morte tutelam.

10. Ea (9.) cum olim ægris duntaxat sanitatem promiserat, ampliata deinceps erga sanos quoque benefica, duplex cum maximè imponit Medico officium, alterum servandæ vitæ & sanitatis, alterum morborum curandorum.

11. Debet adeò exponere I. conditionem hominis, in quibus aut conservandis aut avertendis versatur (1. 9.), naturam, causas, sedes, differentes modos, gradus, effectus. II. Vires naturæ humanæ utrique principio inditas (4. 5.) conservatrices, destructrices, medicatrices. III. Potestates rerum salubres, noxias, medicatas (6.). IV. Regulas denique & præcepta his (III.) utendi, illas (II.) dirigendi ita, ut finis Medico propositus (8. 9.) obtineatur.

12. Quandò autem generalis istorum

omnium (11.) doctrina non sufficit, sed ad singulos etiam homines, prout ætate, sexu, temperamento, vitæ genere, &c. inter se discrepant aptari debet; manifestum est, quam latè pateat disciplina medica.

13. Quæ materiæ pertractandæ multitudo cum justum exigit ordinem, is quidem commodissimus videtur, qui ex diversitate conditionum (2) duplicique Medici officio (10) petitus, quæcunque in homine sano cognoscenda aut agenda sunt suo quævis loco disposita, primùm enarrat, subjungit deindè, quæ ad ægrum pertinent, omnia & singula ritè digesta.

14. Universum proindè systema Institutionum Medicinæ in duas partes distribuitur, quarum prior doctrinam omnem de rebus, quæ secundum naturam in homine sunt, exhibet; posterior de iis, quæ præter, aut contra naturam dicuntur (2.). Hanc ΙΑΤΡΙΚΗΝ, illam, ΤΙΕΙΝΗΝ, ex vario fine appellare licebit.

15. ΤΙΕΙΝΗ, lato sensu, totum Medici officium circa hominem sanum complexa, tradit

I. Œconomiam humanam, vitæque & sanitatis naturam, causas, effectusque declarat: quæ pars **PHYSIOLOGIA**, sermo de Naturâ humanâ, audit.

II. Signa, quorum ope vita & sanitas in genere, earumque varii status & gradus in homine singulari cognoscuntur,

hæc SEMEIOTICA PHYSIOLOGICA.

III. Auxilia & regulas , quibus vita & sanitas quam diutissimè incolumis servari possit : quæ DIÆTETICA.

16. ΙΑΤΡΙΚΗ , itidem tripartita , simili ordine suam materiem (14.) pertractat , exponendo

I. Quæ de naturâ , differentiis , causis , effectibusque morborum scire expedit. Hæc PATHOLOGIA.

II. Doctrinam signorum , quibus , quidquid in morbis ex se obscurum cognosci debet , præsens , præteritum , aut futurum detegitur : undè SEMEIOTICA PATHOLOGICA dicitur.

III. Præsidia adversæ valetudinis , modumque illis rectè utendi : hæc THERAPEUTICA.

17. Utriusque partis æqua necessitas & nexus individuus est : prior tamen ordine ΤΙΕΙΝΗ. Ut curvi norma rectum , ita morbi sanitas : & qui servare sanos novit , bonâ parte eorum , quæ ad tractandos ægros pertinent , instructus est.

18. Præcipuum autem universæ Medicinæ fundamentum in ipsâ hominis Naturâ situm est. Suis hæc viribus , sola , sine Medico , plerorumque tuetur sanitatem , morbis medetur. Hac deficiente aut repugnante irrita artis molimina. Curiosa Naturæ observatio , imitatio , ut primam arti originem , ita incrementa

dein dedit, dabitque. Porrò Medici Naturæ ministri.

29. Itaque doctrina omnis Medica bonæ frugis ad hanc componi normam debet, ut, quid Natura faciat, aut ferat ex fideli observatione quam diligentissimè enarretur. Nec tamen satis est, vires ejusdem motusque, prout in sanis se produnt, in Physiologiâ (15. I.) exposuisse: luctans cum morbis Natura, quam Pathologia (16. I.) exhibet, facultates affectionesque suas etiam explicatiùs producit.

20. Undè liquet, quid de certo in Medicis sentiendum? Natura humana, statim a Creatore legibus finita, per similia individua sese multiplicans, omni tempore eadem, sub iisdem conditionibus eodem semper modo agit, ac patitur. Quidquid, ergò de ejus œconomia, integrâ vel afflictâ, prudenti sensuum ministerio clarè cognoscitur, id firmum ratumque censendum, nec quidquam eo certius in Physicis. Par ratio est illorum, quæ de poteratibus rerum externarum in hominem agentium (6) fideli observatione comperta habentur. Quæcunque porrò ex observatis, ad congrua demonstrationis principia applicatis, casti ope ratiocinii, legitimè deducta sunt, quanquam per se in sensus non cadunt, non minorem profectò fidem merentur.

21. Nullo proindè jure, quæ malè se-

duli doctores , aut perperam observando , aut vitiosè argumentando invexerunt , erronea , falsa , incerta , imputantur arti ; quasi merè conjecturalis foret . Non aliis , nec firmioribus , gaudet quævis Naturæ scientia fundamentis .

22. Haud tamen dissimulandum est , premi dubiis , obscuris , conjecturalibus , nunquam prorsùs extergendis Medicinam : neque enim datum mortalibus aut suam , aut rerum , inter quas versantur , naturam penitus comprehendere . At communis ista ingenii humani imbecillitas quem non stringit ? Graviùs quidem Medicum ob inexhaustam materiæ , quâ occupatur , amplitudinem (11. 12.) .

23. Privatum insuper evidentiae obstaculum hoc est , quod singuli homines a singulis tantoperè differant . Nec verò sufficit Medicum communia modò intueri : oportet & cuivis homini propria ; ut qui singulorum saluti præsit (12.) . Quæ quidem diversitas tam immensa occurrit , ut nullâ observationum vi exhaustiri possit .

24. Solâ denique contemplatione non licet acquiescere , inque obscuris rebus suspendere iudicium , donec lux affulgeat . Actionem exigit officium (9. 10.) . Captanda hinc agendi occasio , quæ sæpè præceps per conjecturam cogit determinare , quod per scientiam fat citò nequit .

25. Pro eâ igitur parte (22 ad 25) Medicinam dici conjecturalem non obsta-

mus ; ut quæ , cum certissima invenire
semper non possit , probabilia sectetur ,
rectâ tamen ubique ratione utens , atque
à vagis & temerariis commentis pericu-
lisque alienissimâ.

26. Audiant hæc obtrectatores , & cum
didicerint scientias puras ab iis , quas ap-
plicatas vocant , contemplativas à practi-
cis , distinguere videant , quo jure Medi-
cinam præ aliis , ut omnis certi expertem ,
infament !

27. His prælibatis , pro instituti ra-
tione , primas PATHOLOGIAE (16 I.) lineas
ducere aggredior : quod ut compendio
fieri possit , cognita prius ponere liceat ,
quæcunque de statu hominis sano in
ΥΓΙΕΙΝΗ tironi , ut scitu necessaria , enar-
rantur (17).





P A T H O L O G I A .

28. **O**FFICIUM Medici circa hominem ægrum est sanare (10).

29. Sanatio autem ægri est morbi quo tenetur in sanitatem mutatio.

30. Pathologia igitur , quæ hominis ægri cognitionem eo quidem fine exponit, ut viam sternat ad medendi methodum (16 I.) , docere debet , ægrum inter & sanum quid intersit , quid morbus distet à sanitate.

31. Spectandus adeò morbus est , ut status hominis sanitati oppositus , naturæ ab hac diversæ particeps , suis ex causis profluens , suosque vicissim effectus producat.

32. Sed & quid morbus à morbo differat , explicandum : quando ab unâ sanitate , in medio positâ , deflexiones multivarie esse possunt.

33. Undè liquet , agendum hîc esse de morbi naturâ , differentiis , causis , effectibus , &c. primum in genere , deinde

in specie, semperque comparare ad conditiones sanitatis, quarum ideò plena notitia in antecessum postulatur.

PATHOLOGIA GENERALIS.

De Naturâ Morbi.

34. STATUS ille corporis humani viventis, quo fit, ut actiones homini propriæ non possint appositè ad leges sanitatis exerceri, Morbus dicitur.

35. Generali quidem *status* vocabulo complectimur, defectus, excessus, ac permutationes quascunque eorum, quæ in ipso corpore hujusque partibus ad legitimam functionum exercitationem requiruntur. Horum igitur notitia, ut decet (27), imbutum nihil admodum obscuri, aut æquivoci, in istâ voce offendere potest. Nec facilè quis impedimenta externa hoc retulerit, nisi qui ludere in re seriâ velit.

36. Non alios tractat Medicina morbos hominis, nisi qui in corporis aberrationibus siti sunt, hisque correctis tolluntur: habent tamen, mutui nexus lege, primam sæpè originem in mente, hujusve operationes suâ efficaciâ perturbant. Hi limites regiminis mentis quod Medicorum est.

37. Vitæ mentio facta in hac definitione non eâ solum de causâ, quod mor-

bus vitæ sit affectio, nec magis, quam sanitas, sine illâ concipi possit; sed ut constet etiam, dari principium agens in ægris, à morbo ipso distinctum, cujus motus observare, discernere, dirigere, præcipua Medici in opere versantis cura esse debet (18). Facit vis vitæ in ægro superstes, ut rerum huic admotarum facultates tam salubres, quam insalubres, longe diversâ ratione agant (6).

38. Quum verò morbus conditionem corporis ponat à statu sano deflectentem (35); eo præsentem effectus, ex sanitate, ut ex suâ causâ profluentes, id est actiones quoque alienari necesse est. In omni proindè ægro aliqua ferè datur actionum læsio, major, minor, vario gradu, modo, numero, extensione, duratione. Hanc siocyus, ferius non intulerint vitia corporis, quæ præter consuetam naturæ ordinem sunt, turpitudines potius, aut deformitates, quam morbi dicantur; tamen à curâ Medicorum haud prorsus semoventur.

39. Omne autem genus actionum, quæ ad hominem pertinent, hic volumus, ne illis quidem exceptis, quæ solius animi esse videntur; quando in has etiam morborum corporis magna potestas est.

40. Imperfectiones tamen functionum, quas ætas, sexus, temperamentum, &c. ferunt, hujus non sunt loci; quando quidem sanitatis latitudine continentur.

Uti nec illæ , quas infuetudo habet , impotentia , aut , quæ ex Naturæ humanæ necessitatibus fluunt , hujus modum non excedentes affectiones.

41. Ut igitur actiones integræ se habent ad sanitatem , ita læsæ ad morbum : nec decet Medicum rationalem , quod abnorme in actionibus est , ipsum morbum dicere ; ne notiones causæ & effectus temerè confundendo , curatio exquisita negligatur.

42. Ex quibus (34 ad 42) liquet ; naturam morbi generalem sitam esse in malè affectis corporis vivi illis conditionibus , quibus id aptum natum est suam conferre symbolam ad actiones humanas ; eoque morbos omnes & singulos inter se convenire , quòd in corporis facultatibus sedem habeant. Alieni proindè a foro Medico censendi , quicumque , si modo dantur , ad solam mentem pertinent ; nisi statos Medicinæ fines removere volupe est.

43. Medica ergo morbi cognitio ponit intellectum eorum , quæ in corpore humano ita à statu sano aberrant , ut actiones indè lædantur. Uti nec sanatio aliud quid postulat , quam eorundem restitutionem in integrum : hac quippe obtentâ pristinum quoque actionibus rediturum vigorem jure confidit Medicus , nihil reliquum in arte suâ habens , istâ si spe exciderit.

44. Morborum adeò singularium , prout in hominibus occurrunt , naturas exposi-

turus id exquisitè indicare debet, quod in præsentis ægri corpore mutatum in causâ est, cur is suis muniis ritè fungi nequeat. Id verò plerumque à sensu remotum latet, nec per se clarè cognosci potest. Undè, ut ex voto detegatur, accurato opus est scrutinio ac cautâ ratiocinatione; quum error hîc commissus plures, eosque non semper innocuos pariat. Prudentissimi hîc sæpè cæcutiunt, maluntque cohibere gradum, quam per tenebras illidere.

45. Huic quidem investigationi (44) fundamentum præbent, quæ in ægro sensibus se manifestant, *φαινόμενα*; quorum primaria sunt actiones læsæ. Hæ enim justo examine perspectæ, cùm ex morbo profluant (38), hujus, ut causæ suæ, naturam legitimâ argumentatione demonstrant.

46. Plenissimam verò lucem affundit notitia exacta status gradusque naturalis singularum actionum, tum modi, quo quælibet exercetur, & conditionum ac virium, quibus instructum in suis partibus corpus ad eas perficiendas concurret. Ita nimirum, comparando actionem quàmque integram, unâ cum suis requisitis, ad eandem in ægro vitiatam, innotescere potest, quisnam & quantus sit à sanitate recessus.

47. Constat hinc, Physiologiam (15. I.) maximæ hic utilitatis esse, æque nemi-

nem carere posse, qui naturas morborum rectè eruere, aut intelligere velit. Sed & quæcunque in expositione œconomix humanæ supersunt loca obscura, vexata, dubia, aut quæ erronea, conjecturalia, ficta, temerè admittuntur, ea omnia in detrimentum Pathologiæ redundare: ut meritò Bonus quisque repurgatissimam tandem omnibusque numeris absolutam doctrinæ Medicæ eam sibi partem desideret.

48. Nec minoris in istâ indagatione momenti est scientia virium, quibus, quæ geruntur ab homine, aut ingeruntur, eive quovis modo admoventur, corpus afficiunt ac mutant. Causas hæc atque occasiones morborum in se habet (6); quibus examussim intellectis facile est de naturâ effectus indè nati iudicium. Quâ in re, præter observationes, quas ex proprio penu Medicina promit, Mechanicorum quoque, Physicorum, Chemicorum demonstrata apprimè conducunt: quanquam multiplex idiosyncrasix diversitas & infinitus possibilitium combinationum numerus optare magis, quam sperare plenam istius doctrinæ perfectionem jubet.

49. Præcipuè tamen necessarium est ante oculos habere historias omnium ac singulorum morborum integras, ex plenis atque intaminatis Practicorum observationibus accuratè concinnatas. His uti-

nititur universa morborum cognitio (45.) ; ita , cum conferuntur illis , quæ in præ- sente ægro sagax examen detegit , mali , quo is laborat , indolem pulchrè decla- rant. Nec sanè eertius aliud datur subfi- dium , quo obscurata clarescant , dubia enodentur , corrigantur falsa , controver- sa dirimantur ; sicubi vel priores etiam scientiæ (47, 48.) non satis tutò prælu- xerint. Hac ideò regiâ viâ incesserunt olim , hodièque incedunt veri quique Medici , dolentes interim , tot hiatibus etiamnum abruptam , & inanium narra- tionum sordibus conspurcatam esse.

§0. Ex quibus (45. ad §0.) ritè per- pensis pronum est colligere , quantis hoc scrutinium prematur difficultatibus. Qui verò & simul considerat multiplices mor- borum in eodem homine complicationes. & metaschematismos , non mirabitur , quamobrem vel peritissimis etiam toties hîc aqua hæreat. Quo quis diutius in arte cum curâ elaboravit , eò circumspectius de morborum naturâ pronunciare solet.

§1. An igitur morbus rectè dicitur cer- tamen Naturæ propriam salutem propu- gnantis ? Ex intimis Medicinæ penetrali- bus petita hæc notio sapienti cuivis in arte magistro jure probatur. Inest pro- fectò sua Naturæ humanæ virtus pervi- gil , quâ vitæ ac sanitatis sui corporis conservationi perpetuò studens his neces- saria procurat , nocitura repellit. Indè

motus spontaneos atque molimina in ægris animadvertere licet, nec causæ morbi, nec adhibitis quibusvis demùm remediis adtribuenda, quæ tam apertè in salutem tendunt, ut datâ operâ aptius excogitari, aut felicius dirigi non potuisse videantur. Rectissimè proindè Naturam morborum medicatricem, Medicum Naturæ ministrum esse, artisque universæ summam ad Naturæ observationem, imitationem, directionem redire inculcatur (9, 18, 19.). Aurea ergò loquendi formula medentibus semper ante oculos versetur. Eandem verò pro generali morbi definitione obtrudere nefas. Neque enim in omnes & singulos quadrat. Nec morbum cum remedio decet confundere. Naturæ certamen ideam adversarii includit: hic morbus est: huic suos Natura opponit conatus medicatos, quibus si nomen morbi dederis, an morbum abesse dices, cum languens fortè Natura huic non obluetur? An, quos Naturam imitans Medici solertia similes per remedia producit motus, pariter ad morbum ipsum referes? Largimur tamen morbos dari, quorum bonam partem, si universum decursum spectes, ista molimina constituunt: alios item, quibus cum superveniunt, in aliud genus mutantur: multis deniquè accedere specie symptomatum, quæ ut accuratè a propriis morbi effectibus discerni debent, ita ad ipsam

morbi naturam nullo jure referuntur.

52. Eadem (51.) quoque ab illis perpendi velim, qui in Naturæ locum Animam, Archeum, aut quodvis aliud principium, rationis particeps, in morbis actuosum substituere malunt. Vocibus hi tantum, non re ipsâ, dissentiunt: quandò autem nihilo plus lucis indè nascitur, non est, cur vocabulum a veteribus introductum abrogemus.

De Causa Morbi.

53. MORBUS cum ponat mutationem corporis a statu sano (34. 35.), quæ adefse aut abesse potest, effectus erit corporeus determinatæ potentix, cujus vi existit.

54. Id autem qualecunque, quo fit, ut morbus existat, causa morbi vocatur.

55. Ad hujus (54.) investigationem molesta læsarum ex morbo functionum perceptio mortales ægros ab omni ævo compulit; ut indè primùm nata videatur Medicina. Officii ratio eò compellit Medicum, qui tum demùm verè cognovisse morbum dicendus est, cum causam ejus detexerit. Sanatio etiam non, nisi succisâ morbi causâ, exquisitè obtinetur.

56. Statuendus tamen huic (55.) labori certus limes; ne ultra, quam ex usit est, aut subtilius, quam verius, exerceatur. Indè ad ultimas metaphysicas,

primæve physicas causas non adscendendum. Ars ex se nimium longa, suo tamen fine conclusa, in causis etiam secundis progressum vetat ulteriorem, quam qui felicius perficiendæ sanationi conducatur.

§7. Quocirca nec minutis causarum differentiis, quas schola invexit, hic inhærendum. Disputationum hæc materies, a sanioribus etiam Philosophis hodiè repudiata, artem, quæ opere potius, quam verbis demonstranda, dedecet.

§8. Distinguunt Medici, nec inutiliter, inter causam externam & internam. Interna vocatur vitium quodcunque in corpore radicum aliquamdiu, priusquam in morbum erumpat. Si quæ verò gesta, ingesta, aut foris admota homini, suâ vi agentia morbum pariunt, is ab externâ causâ natus dicitur. Prior ergo aliquem ponit ante præsentem morbum sanitatis defectum, sed latentem, aut tam levem, ut absque notabili functionum læsione ad tempus feratur: potestque is in firmis partibus, æquè ac in humoribus hæerere. Posterior etiam sanissimos morbo afficit, & cum plerumque sensibus manifesta sit, satisque citò noxium effectum edat, ab ipsis ægris sæpè animadverti solet. Undè & Evidens audit, nec priscis quoque neglecta Empiricis, qui contra internarum, quod obscuræ sint, ac incertâ tantum conjecturâ

cognosci queant , quæstionem supervacuum esse contenderunt.

59. Memorabilis porrò est causa προηγεμένη seu prædisponens , & προκαταρκτική , πρόφασις , occasio etiam aut occasionalis dicta. Prædisponens dicitur conditio quævis corpori inhærens , qua illud aptum est , natâ occasione , morbum suscipere. Occasio est quidquid prædisponenti superveniens hanc excitat , ut una morbum pariant. Neutra ergo sola producendo morbo sufficit , sed ambarum concursus requiritur. Prædispositio si abest , occasio non nocet : & vicissim si prædispositio ab occasione caves , caves à morbo. Distinctionem docuit observatio , quâ constat , non omnes homines ab iisdem rebus æqualiter affici , & valetudinarios proprio regimine servari incolumes.

60. Præcipua deniquè & maximè generalis est causarum divisio in Remotam & Proximam. De utriusque tamen conceptu non convenit inter Auctores. Remota aliis dicitur , quæ sola non sufficit , sed intercedentem aliam requirit causam propiorem , ut morbus fiat. Proxima ergo his est , quæ , remotis superveniens , momentum addit , ut illicò morbus exoriat , adeoque hunc nascentem proximè antecedit. Ita vix discrepat hæc causarum sectio a priori (59.) : confunditur proxima cum occasionali (59.) ;

more vulgi, cui causa morbi illud est, quod hunc proximè antecessit: quin remota solo gradu augescens, ut tandem in morbum habeat, eadem & proxima evadit. Rectiùs alii remotas vocant, quæ singulæ quidem aliquid conferunt ad morbum producendum, nec tamen, nisi conjunctæ, totum producunt; quemcunque cæterum locum teneant in ferie causarum ad morbi generationem confluentium. Undè proxima est, quæ ex concursu omnium remotarum nata, sola, integrum morbum ita constituit, ut indissolubili nexu cum eo cohæreat. Quare & Continens dicitur, ut quæ universam rationem originis morbi in se contineat, quâ positâ is continuò se manifestat, adeòque & ablatâ tollitur. Hujus uti pars modo est remota quæque, ita & partem morbi tantùm producit. Qui omnes & singulas remotas, ut una conspirant, intelligit, notitiam proximæ habet: qui tollit cunctas, proximam quoque destruit, & cum hac morbum: qui aliquas modo, relictis aliis, partem quoque proximæ duntaxat deterit, nec perfectè sanat.

61. Missis aliis minoris momenti causarum differentiis, ex hucusque (58 ad 61) propositis constare potest, eam solam quam sano sensu dixi proximam aut continentem, veræ causæ physicæ ingenium præ se ferre, quæ morbum ita efficiat, ut illâ positâ hic ponatur, durante durer,

mutatâ inutetur , ablatâ tollatur. Reliquis idem tribui non posse , nec ideò nomen causæ propriè competere. Medicis igitur , suo loquendi more , causæ titulo venire id omne , quod quocunque demùm modo ad morbi generationem concurrat , sive ut vera causa , sive ut hujus pars , aut conditio sine qua non , &c. litigandi , cavillandi , ridendi , materiem nasci , quasi causa sine effectu , hic sine causa esse , eadem causa effectus oppositos producere , aut idem effectus diversis ex causis oriri possit.

62. Consultum itaque videtur morbi causam solummodò vocare id exquisitè , cujus vi totus morbus existit. De hac porrò quidquid de causis physicis , affirmare licebit.

63. Indè ut quilibet morbus suam habet causam determinatam (54) , quâ necessariò efficitur ; ita hæc alia atque alia erit in morbis natura diversis , & contra eadem in illis , qui naturâ conveniunt ; tametsi diversas corporis partes occupant , ideòque nec easdem præcisè functiones turbant. Quod magnæ utilitatis in arte compendium.

64. Nec mera tamen privatio dici ea causa semper debet , quasi morbus , ut defectus sanitatis , ex absentia conditionum ad hanc requisitarum modo oriretur. Aliena sæpissimè in agris insunt , quæ impedimento aut stimulo morbos creant.

65. Quum verò morbus non nisi in corpore sedem habeat (36), causa ejus quoque ad corpus duntaxat pertinebit, inque hoc solo quærenda erit; quanquam ex mente forsan, vi mutui commercii, eò devenit: quod observare quidem Medici est, explicare Philosophi.

66. Ità porrò cum morbo cohæret, ut ab eo inseparabilis abesse nequeat, quin & ille tollatur, nec, hoc absente, adesse. Distinctio igitur causarum in continentes & non continentes nulla est. Morbus ultra causam suam, i. e. sine causâ, non perdurat.

67. Imò hæc causa totam morbi, effectus sui, naturam constituit, ideòque ab hoc re ipsâ vix discrepat. Quidquid in morbo est, in causâ ejus inveniri debet. Utilissima ergò & maximè necessaria illius indagatio habetur (43), Ea demùm solida est morborum cognitio, quæ, quomodò in suis singuli determinatis causis consistant, demonstrat.

68. Rarò tamen simplex est, sed plerumquè ex pluribus conditionibus una concurrentibus composita: Morborum nempe, ut sanitatis ipsiusque corporis humani notiones multitudinem in unum collectam quoque involvunt. Itaque ex quotnam partibus diversis totum illud, quod morbum vocamus, constat, totidem distinctæ dabuntur conditiones aut potentia in ejus causâ, quarum singulae partem

modò aliquam morbi efficiant, conjunctæ demùm totum.

69. Quotiescunque ergò earum conditionum, quæ mutuo concursu causam morbi componunt (68), aliqua deficit, mutatur, gradu augetur; aut prius positæ novæ quædam accedunt; aut aliæ in aliarum locum substituuntur; toties analogæ quædam imminutio, mutatio, aut augmentum in ipso quoque morbo eveniet: uti plena demùm hujus abolitio, cum omnes & singulæ exquisitè tolluntur.

70. Quo posito fundamento (69) ratio reddi potest originis morborum lentæ vel subitæ durationis, incrementi, decrementi, paroxysmorum, remissionum, periodorum, mutationis ex alio in alium, perfectæ aut imperfectæ sanationis, reversionis, status denique neutrius inter sanum & ægrum fluctuantis.

71. Quare, ut causa morbi rectè cognoscatur, oportet eam resolvere in simplices, ex quibus composita est, potestates, harumque singulas primò, dein omnes conjunctas, quid seorsim, quid simul valeant, examinare. Quæ res difficillima quidem est, at utilitatis tamen plenissima, ac Medico dogmatico apprimè necessaria.

72. Perficitur autem curiosâ indagatione eorum, quæ ità morbum antecesserunt, ut credibile sit ad illius generatio-

nem aliquid contulisse : five ea priùs in homine extiterint, five pridem, aut nuper à foris accesserint (456). His quippe vires (71) continentur, quarum confluxione causa morbi nascitur) ut adeò hujus originem ritè considerata declarent.

73. Atqui hæc ipsa (72) sunt, quæ Medicis nomine causarum remotarum (60), prædisponentium, procatarcticarum (59) veniunt. Harum ideò quam utilis & necessaria sit inquisitio, patet. Quodsi vetus Empiricorum Schola in his solis malè acquievit, magis etiam culpandi sunt recentiores, qui, remotis insuper habitis. proximæ (60) tantùm scrutinio sese addicunt. Hæc tamen sæpè inaccessa est, nisi evidentiores remotæ præluxerint.

74. Quamvis igitur verarum causarum ingenium non habeant, adeòque cum malè confundantur (61); omninò tamen merentur à Pathologo expendi, possuntque morborum principia vocari, & ad duo summa capita referri, quorum alterum Seminia morborum comprehendat, alterum Potentias nocentes.

75. Seminia voco dispositiones quas-cunque corpori insitas, quæ morborum generationi favent, sicubi potentia nocens analoga accesserit. Prædisponentia alias, aut *προνέμερα*, dicuntur.

76. Potentiæ nocentes sunt res quælibet eâ præditæ facultate, ut morbos
producere

producere possint in corpore per seminum (75) apto, i. e. prædisposito. His *προκαταρκτικά* dicta conveniunt.

77. Utrisque opus est concurrentibus, ut causa morbi isque ipse nascatur. Neque enim potentia efficax est, nisi in corpus inciderit impressioni ejus recipiendæ aptum; nec diathesis seminalis in morbum erumpit, nisi vi quadam appropriatâ excitetur.

78. Mutua insuper utriusque speciei conditionum requiritur affinitas, ut junctæ in eundem effectum conspirent, nec altera alteram destruat. Non quælibet potentia cuiusvis seminio evolvendo par est. Nec prædispositio datur universalis ad omne morborum genus: uti nec perfectissima sanitas æquâ vi sese ab omnibus & singulis insalubribus tuetur. Hinc eadem diathesis alias faver, alias obstat, pro diversâ potentiae nocentis indole.

79. Patet igitur non sufficere superficialiam istorum principiorum notitiam; sed requiri cognitam cujusque tum semini, tum potentiae naturam; ut mutua eorundem sympathia, antipathia, quidque invicem agere ac pati possint, perspicatur.

80. Ita demùm methodo syntheticâ pervenitur ad cognitionem causæ morbi, quam illa junctim constituunt. Quin & eadem operâ, a priori, quod ajunt, erui-

tur natura morbi (67); ut, institutâ collatione, eadem per methodum analyticam (45.) inventa comprobari, aut error in alterutro argumentandi genere commissus detegi, ac corrigi possit.

De Symptomate.

81. SYMPTOMA, quum vi vocis id denotet, quod ægro accidit; universus autem morbus, una cum causâ & effectibus suis, inter res accidentes referri possit, multam Systematicis litigandi materiem dedit, Practicis tamen super hac quæstione non æquè inter se dissentientibus. Facilius plerumquè est rem præsentem discernere, quam verbis exactè definire.

82. Quacunque latitudine veteres hoc vocabulum usurparint, certum est hodiè symptoma tantum de homine ægro prædicari; de sano nunquam. Ponit ergo præsentem morbum, adeoque & hujus causam: sed & aliquid, quod præter naturam accidit, & quomodocunque cum his ipsis cohæret; dum interim ut distinctum ab iis concipitur. Nequaquam igitur pro omni eo, quod homini præter naturam evenit, aut pro levioribus affectionibus, quæ nomen morbi non merentur, sumi potest.

83. In ægro variæ a statu sano alienationes (38.) sensibus sese manifestant;

sive actiones spectes, seu eorum, quæ foras prodeunt, molem, indolem, aut corporis etiam sensibiles qualitates.

84. Hæc phænomena (83.) cum percipit æger, animadvertit Medicus, uterque concludit morbum adesse, certus ex sanitate non oriri. Desinunt & homine in integrum restituto.

85. Malè tamen illa quis morbum ipsum dixerit (41.), quia cum hoc cohærent, nascuntur, durant, abeunt. Non is, nisi rarissimè, in sensus incidit (14.): plerumque ratiocinio tantùm detegitur, nec ægro priùs, quàm Medico, innotescit. Quum nihilominus præter naturam sint, atque in morbo radicata, rectè vocantur symptomata, ut quæ una cum morbo incidant.

86. Symptoma proindè notat quamcunque sensibilem a statu naturali alienationem, quæ homini ex præsentem morbo ita nascitur, ut tamen ab hoc ipso hujusque causâ distingui possit, nec ultra morbum duret.

87. Tria nimirum in se æger habet, quæ præter naturam sunt: morbum, hujus causam & symptoma. Mutuus inter hæc nexus datur. Uti morbus non sine symptomate esse potest: nec hoc vicissim sine illis. In omni morbo apparens aliqua vel actionum, vel excretorum, vel qualitatum sensibilibum mutatio evenit (38.). Nec symptoma porrò dicendum, quod

suo morbo superstes est, sed morbus.

88. Ita symptomata illam præcipuè status morborum partem efficiunt, quæ in sensus sive ægri, sive Medici incurrit apertissimam, dubiis hinc minimè obnoxiam, quæque observanti spontè pater, nec signis adeò aut arrificiofa conjecturâ eger, ut detegatur.

89. Quum verò non omnia, quæ in ægro præter naturam eveniunt phænomena, veram symptomatis indolem (86) referant, nec eandem semper originem agnoscant, necessum est alia ab aliis probè distinguere, prout ex diversis fontibus promanant.

90. Alia nimirum statum morbosum præsentem directè pro suâ causâ habent, ex quo ut totidem effectus fluunt, hinc nexu physico indissolubili cum illo coherant. Et hæc quidem genuina sunt symptomata, atque pro triplici genere rerum, quæ præter naturam in ægro insunt (87), trifariam distinguuntur in symptomata morbi, causæ, & symptomatis.

91. Morbi symptoma dicitur effectus sensibilis vi præsentis morbi proximè productus. Ejus ergò similis est relatio ad morbum, ut hujus ad suam causam (66). Et cum ex plurium conditionum confluxu morbus nascitur (68), multorum quoque id genus symptomatum syndrome stiparus esse solet.

92. Horum (91) itaque utilissima est &

maximè necessaria inquisitio. Testantur enim morbi præsentiam non modò , sed naturam quoque. Effectus certè ingenium suæ causæ declarant. At causa morbi causa etiam est huius symptomatum.

93. Quodsi verò origo symptomatis propiùs ex causâ morbi derivari possit , causæ symptoma audit ; vocabulo *causæ* latiore sensu accepto (61). Id contingit , quoties illius rei quæ morbum efficit , vires ita multiplices sunt , ut aliqua modo pars earum ad morbum producendum concurrat , hinc propria huius causa fiat ; pars altera verò occasione nati morbi quoque , ocyùs , seriùs in actum deducta , effectus prodat diversos , morbo supervenientes quidem , non tamen ità nexos , quin hic sine illis esse potuisset. Symptomata causæ igitur ut intelligantur , ad potestates causæ morbi accessorias adscendendum est.

94. Quare liquet , isthæc symptomata (93) & perdurante morbo tolli nonnunquam posse , & eodem ablato superesse ; aliquandò longè plus periculi inferre quam morbus quem comitantur ; imò indicare alias morbum morbo superadditum , quorum alter , quia aut tempore prior est , aut manifestior , aut magis urget , tantùm pro morbo habetur , altero non adeò in se ipso , sed in effectibus modo suis spectato , aut & prorsùs prætervifo. Undè cum princeps morbus de-

finit, symptomate causæ remanente, hujus idea evanescit, morbusque latens, à quo pendet, se demùm prodit. Quæ quidem ritè perpensa ostendunt, distinctionem istam, sano sensu acceptam, nec paradoxam esse, nec supervacuam, utilissimam potius in faciendâ cùm diagnosi, tum prognosi morborum.

95. Utrumque porrò symptoma (91 93) si suâ vi aliam rursus produxerit affectionem sensibilem, hæc symptoma symptomaticis vocatur. Quo nomine etiam veniunt reliqui omnes, qui longâ sæpè serie alii ex aliis deinceps profluunt, effectus morborum; modò symptoma aliquod antè pro causâ habeant, nec hoc sublatò persistant (86).

96. Habent ergo & ista (95) primam suam originem in morbo hujusve causâ, indè cognoscuntur, his remotis tolluntur, & licèt plurium fortè aliorum interventu cum iis saltem cohæreant, legitima tamen analysi ad cognoscendam morbi aut causæ ejus naturam & efficaciam quoque facere possunt. Nec plena his neglectis exsurgit morbi historia.

97. Notandum verò, dari non infrequenter in agris effectus sensibiles, quos si in ortu suo spectes, omninò ad aliquam trium specierum (91, 93, 95) referas; at qui tam tenaciter corporis partibus impressi sunt, ut ultrà morbum perdurent. Undè non symptomata adèò, sed morbi

potius secundarii audiunt , eòque magis considerari merentur , quòd singularem sibi curam reposcant.

98. Aliud insuper phænomenon genus in morbis occurrit , quæ cum & ægris eveniant , & à sanitatis norma deflectant (82) , generali quidem symptomatum titulo comprehendi possunt ; at longè diversam à prioribus originem habent , adeoque cum iis confundi minimè debent.

99. Non bruta homo machina est , quæ injurias à rebus noxiis sibi illatas iners excipiat ac pariat. Mens intus est , quæ molestiis ex morbo sibi natis exagitata , anxia , quas habet in corpus agendi vires , intendit ad repellendum hostem (4). Corpus ipsum & suâ præditum est incitatione , quæ , moderata quidem in sanis , acriùs insurgit præsentè malo irritata , inque enormes sæpè impetus abripitur , ut morbi insultibus sese opponat. Consensus etiam hic datur , ac mutua partim conspiratio , quâ uti unum aliquod constituunt idemque integrum , collatâ quæque suâ symbolâ , conservare nituntur , ità cum earum alicui noxa imminet , aliæ , nec rarò omnes , junctis viribus , laboranti succurrunt , communem in privatâ cujusque , & propriam in sociarum salute propugnantes (5). His itaque viribus instructa hominis Natura causis morborum non modò resistit , sed cum his etiam congruitur , initoque conflictu (51) vim vi op-

ponit. Quod cum æquabili, quo in sanitate fluunt, actionum tenore efficere nequeat, insolitos faciet motus, turbasque facit turbis à morbo concitatis sæpè majores, undè alia super alia symptomata accumulantur.

100. Hujus quidem generis (99) plerumque sunt alienati rerum ingerendarum appetitus & averfationes, motus spasmodici, convulsivi, circuitus humorum perturbationes, febres, exanthemata, abscessus, hæmorrhagiæ, vomitus, alvi profluvia, sudores, & alia plurima, quæ, etsi morbos comitantur hisve superveniunt, nequaquam tamen continuè ut effectus ex iis eorumve causis directè profluentes æstimare, aut ad symptomata propriè dicta (86) referre fas est.

101. Naturæ ergo molimina potius, aut symptomata activa auxiliaria, vocentur; quum ab actuosâ Naturâ excitentur, hujusque viribus exhaustis aut oppressis deficiant, nec eadem semper in eodem morbo se manifestent, & pedissequas sæpè habeant sanationes benignissimas, quin arte inimitabiles, aut saltem ritè attendenti salutares plerumque fines prodant. Veteres ἐπιγεγοµενα, ἐπιγενήµατα, dixêre, non sola tamen, nec omnia, his vocibus complexi.

102. Ea verò si in omni latitudine suâ spectes, rari sunt morbi, quibus se non adjungant: imò multi, quos non minùs

constanter & certò comitantur , quàm quævis alia symptomata ; ut verè dicas , eos ex junctis potentia morbosæ & contranitentium Naturæ propriam salutem propugnantis appellare liceat (51). Nec horum is ritè explicuerit ingenium , aut quibus stipantur phænomena , qui , solis inhærens primi generis (90) symptomatibus ; istos Naturæ motus neglexerit.

103. Undè patet , quam utilis Practico & necessaria sit eorundem accurata cùm observatio , tùm distinctio ; ne vano trepidet metu ad innoxia , aut medicatis Naturæ moliminibus temerè resistat , quæ non turbanda , sed prudenter regenda (9 , 18 , 19).

104. Falluntur tamen , qui ex hoc fonte non nisi salutifera proficisci existimant. Patitur suos & Natura errores , impetusque concipit , qui quod modum excedant , justove debiliores sint , aut minus congruenres in partes directi , plurimum sæpè damni , & vel exitium quoque inferunt. Ut adeò prudentis Medici sit , non mirabundum modò *ἀυτοπατείας* Naturæ spectatorem agere , sed & præcipitem refrenare , excitare torpidam , errantem in viam reducere.

105. Nec suis etiam istud genus caret effectibus morbosis , qui ex turbis indè concitatis , ut symptomata symptomatum (95) , oriuntur , pariterque , ut hæc (97) , tam altè nonnunquam inhaerent ,

ut in morbos secundarios abeant. Et vel victrices quoque Naturæ motus (101) ab his non immunes sunt. Rara sine vulnere victoria.

106. Superest & tertius fons eorum, quæ agris supervenire observantur, à binis prioribus probè distinguendus; quam cum iisdem cohæret. Fortuita hæc aut accidentalialia dici possunt; quum viribus rerum, quas casus offert, debeantur.

107. Versatur nimirum æger, ut sanus (6), in perpetuâ ambientium, ingestorum, applicatorum, quin & propriarum actionum vicissitudine. Difficile autem est hæc omnia & singula tam exactè statui morbofo semper accommodare, ut Naturam & Medicum vel juvent in faciendo, vel saltem non impendant. Ista tamen cum vel sanos pro suâ quævis potestate diversimodè afficiant (6) multum læpè mutant, in ægrotos etiam, quorum non integræ vires minus resistunt, plus valebunt. Undè necessum est effectus prodire, qui, licèt symptomatibus, primi secundique ordinis (90, 98) intermixti, morbo tamen aut Naturæ non rectè attribuantur.

108. Nec sanè id genus phænomena, ut fortuita sint, momento carent. Alias enim morbum acuunt, ex miti lævum, exitialem reddunt, novo morbo aggravant, in aliam speciem commutant, benignos Naturæ motus turbant, perver-

tunt remedium operationes, agendi occasiones ac tempora occupant. Alias & adjumento sunt, & tam prosperè nonnunquam cedunt, ut iis solis recuperata salus debeatur.

109. Est &, ubi eadem persistunt, inhaerentque diutiùs, quàm morbus cui supervenêre; tùmque manifestiùs demùm originem suam declarant.

110. Quocirca sedulò notari ac distinguere merentur, ut eventus ad suas quique causas referantur, nec alieni effectus morbo, Naturæ, aut administratis remediis impurentur, magno historæ Medicæ dispendio. Caveant præcipuè confusionem, quibus hoc etiam genus ad communem *ἐπιγενομένων* titulum (101) redigere placet.

111. Ex quibus (90 ad 110) ritè intellectis pronum est colligere, quæ ex memoratis fontibus manant, symptomata ægris quidem evenire occasione morbi, non tamen omnia & singula eodem nexu aut inter se, aut cum morbo, contineri: ut adeò quævis nec idem argumentandi genus admittant, nec momentum habeant æquale, cùm ad naturas morborum quos comitantur dignoscendas, ad prædicendos eventus, aut ad eruendas agendorum indicationes, ut par est, adhiberi debent.

112. Alia certè dixeris Necessaria, quæ cum morbo ita coherent, ut eodem posito suasque vires evolvente non pos-

sint non , ocyùs , seriùs , sese manifestare. Cujus quidem generis sunt quæcunque ex morbo , ut ex suâ causâ fluunt , inque hujus naturâ universam sui ortus rationem habent suam. Vocantur etiam Essentialia aut Primaria.

113. Huc referantur ex fonte primo (90) potissimùm symptomata morbi (91) horumque effectus (95). Ex altero fonte (98 99) plurima quidem nascuntur variabilis ingenii, nec certi cum morbo nexus, quæque hinc , pro naturarum diversitate , in eodem morbo aliter atque aliter eveniunt. At quotiescunque ad ipsam morbi constituendam speciem una concurrunt & potestates conditionum morbosarum , & oblucentes irritatæ naturæ vires (102) , toties & necessaria haberi debent , quæcunque sic oriuntur symptomata activa (101) , ut , si abessent , morbus in aliam speciem transiret. Tertius fons (106) nulla quæ hujus loci sint , exhibet.

114. Reliqua igitur, quorum laxior est cum morbo cohæsiō , ut abesse aut adesse possint , Non-necessaria vocare liceat.

115. Necessariorum (112.) porrò varii gradus sunt , nec una omnium ratio. Morbus , ut sanitas , non simul & oritur & perficitur , nec puncto temporis , quidquid mutationum potest , producit , sed successione quadam alios post alios effectus explicat. Habent nimirum sua

incrementa vires physicæ conditionum morbosarum : pro horum portione suos variat intenditque nisus Natura : per gradus etiam ex aliis in alias partes facultatesque provolvuntur turbæ ac confensiones cientur : ut adeò nec eadem semper facie, nec eodem symptomatum satellitio stipatum se in universo suo ambitu offerat morbus.

116. Indè alia quidem simul cum morbo oriuntur, durant, desinuntque, perpetui ejus comites, quæ idcirco Individua, Perpetua, Simultanea, dicenda. Alia, ut necessariò eveniant, non tamen indivulsa sunt, nec quovis morbi tempore, sed suo tantùm apparent, hinc Temporaria vocari possunt.

117. Utriusque generis (116) fedula collectio, a non-necessariis (114.) distinctio, & curiosum examen, quodvis modo ad suum morbum sese habeat, præcipuum ritè instituendæ cùm diagnosi, tum prognosi, fundamentum præbet. Ex iis signa pathognomonica petuntur & notæ characteristicæ, quibus morbi a morbis discrepant. Nec certiores aliundè conduntur aut definitiones, aut historiæ morborum, quàm ex hoc fonte. Iisdem quoque nititur, quam methodus analytica parit, solida naturæ morbi cognitio (45.). Temporaria insuper diversis morborum temporibus ac gradibus rectè

38 DE SYMPTOMATE.
discernendis apprimè inserviunt.

118. Non necessaria (1), nequaquam ideò negligenda, quod minùs cohærenter superveniant, quantæ utilitatis esse possint accuratè observata, ex dictis (94. 100. 113. 108. 110.) liquet. Momentosa materies cruditatis in morbis, coctionis, crîsum, variorumque exitûum, his magnam partem continetur.

119. Ceterum quidquid in symptomatibus cujusvis generis a statu sano alienatum se manifestat, id omne ad actiones, excreta, & qualitates sensibiles facîle reduci potest, ac sub his titulis, cum opus est, inveniri.

PATHOLOGIA SPECIALIS.

De Naturis singulorum Morborum.

120. GENERALIS morbi notio ante (34.) data cum id tantùm comprehendat, quod morbi omnes & singuli inter se commune habent, non nisi eorundem a statu sano discrepantiam edocet. Differunt autem & inter sese, & suo quisque modo vitiatam ponit sanitatem: quod examussim cognoscere præprimis ad Medicum pertinet (44); ut cui in praxi singularium cura duntaxat demandetur (23). Undè à generalibus ad specialia procedendum.

121. Id, quo morbi a morbis discrepant, situm est vel in naturâ cujusvis pe-

culiari , iisque attributis , sine quibus esse nequeunt ; vel in conditionibus extraneis , quæ adesse , aut abesse possunt , naturâ morbi adeoque & nomine non mutatis. Hæ accidentariæ , secundariæ : illæ essentiales , primariæ differentiae audiunt. Utriusque generis utilissima est cognitio. Prius exhibet diversas possibilium morborum naturas : posterius morbos considerat , suis terminis circumscriptos , ut in ipsis hominibus Medico cognoscendi & curandi offeruntur. Liquet hinc simul , quo ordine pertractari debeant.

122. Jubet autem ingens morborum numerus & multivaria complicatio Geometrarum sequi methodum in exponendis eorundem naturis , tironemque præmissis simplicioribus ad intellectum compositorum evehere.

123. Necessum itaque erit quamplurima vitia seorsim considerare , quæ nunquam singula in ægris occurrunt , & multos simplicioris ingenii affectus inter morbos referre , qui , pervulgato loquendi more , pro morbis non habentur aut quos Pathologi etiam causarum titulo adscribunt. Nimirum universalis quædam datur inter partes humani automatis conspiratio , qua uti in sanitate mutuam sibi opem præstant , atque aliæ alias naturæ legibus adaptant , ita in statu morbofo unâ patiuntur , suasque

affectiones invicem communicant. Unde in praxi rarò veri occurrunt morbi, quorum simplicissima idea nihil mixturæ habeat. Inest etiam in sanitate robur aliquod, quo se adversus vitia singularia tuetur, nec a solitariâ ejus vis partis alienatione functionum suarum tenorem mox perturbari sinit : ut adeò plerumquè morbus tum demùm erumpat, cum latius se diffudit malum.

124. Non tamen est, cur eapropter doctrina de isto morborum genere hoc loco prætermittatur. Facit certè plurimum ad intelligendos compositos, qui ex confluxu simplicium oriuntur. Quin & feminiis morborum (75.) post tradendis lucem affundit. Nec verò refert, an morbos velis, an potiùs affectus, vitia, diatheses, appellare.

Morbi Simpliciores.

125. QUUM morbus corpori inhæreat (36. 42.), in partibus, quæ id constituunt, sedem habebit, proque harum diversitate & ipse diversus erit.

126. Indè continentes occupabit, aut contentas, firmas partes, aut, quos continent, succos. Hæc prima morborum differentia.

127. Utrumque porrò partium genus suis instructum est conditionibus, quibus ad sua quodlibet munia aptum red-

ditur. Istarum verò aliæ communes sunt, aliæ ad singulas cujusvis generis species plus minus restrictæ; prout hæ diversis modis ad functiones sanitatis conferre debent. Neutris carere sani possumus: nec priorum alienatio minùs, quàm posteriorum nocet. Undè altera nascitur morborum differentia.

128. Est & mutua quædam partium ad partes, conditionum ad conditiones, relatio ac proportio, quâ ultra citrave aberrante non symmetria tantùm, sed functionum quoque iusta harmonia viariatur. Ex quo respectu ulterior morborum subdivisio profluit.

129. Secundum has classes (126 ad 129.) morborum simpliciorum historiam ordine exponemus. Dicenda autem plenius intelligentur, si, quæ de materie corpus humanum constituyente casta Chymia demonstrat, præmittantur.

*Analysis Chemica generalis corporis
humani.*

130. CORPUS humanum, si contrecrabilèm materiem spectes, ex humido & sicco exquisitè mixtis constat.

131. In diversâ horum (120.) proportionem ac compositionem multiplicium consistentiæ graduum, quibus partes corporis humani inter se discrepant, ratio potissimùm sita est.

132. Humidum mera constituit aqua, durissimis æquè ac fluidissimis indita partibus, quâ ablatâ nil nisi siccum superest.

133. Mobilissima hæc materies, leni calore fugax, maximam universi corporis molem conficit, fluidumque in ejusdem succis, molle ac flexile in firmâ compagine producit.

134. Siccum cohærentius, inertius, calore ægriùs dissipandum, in triplicem materiem differentis naturæ resolvitur; inflammabilem, quæ ignis pabulum; salinam aquæ amicam; terream denique sedes, acrimoniæ temperamentum, tenacitatem per firma & fluida diffundit.

135. Salinum, phlogisto adhærentes obtusum, aquâ dilutum, suo interventu hanc illi conciliat.

136. Terreum, totius machinæ basis ac firmamentum, adversus aëris, ignis, aquæ, injurias præsidium, hinc per omnes corporis partes, non æquâ tamen proportionem, distributum, fluidis suam singulis densitatem, firmis stabilitatem infert consentaneam.

137. Quatuor ista (132. 135. 136. 137.) etsi multum inter se diversa, in statu sano nihilominus exactissimè permixta sunt; ut nullâ in particulâ firmâ vel fluidâ, alterum sine altero, ubique invenias omnia, nec nisi nocivo im-

petu sincerum aliquod a reliquorum consortio abstrahi possit. Quocirca nec credibile est, Naturam in fabricando corpore, augendo, nutriendo, elementis uti disparatis, quæ primùm inter se misceat, atque alia cum aliis componant eo ordine ac proportionem, ut cujusvis partis indoles exigit. Imò verò moleculas adhibet Jam mixtas, congruaque harum aggregatione ac varia densatione suum opus perficit. Hujusmodi profectò sunt &, quæ de corpore decedunt, detrimenta reparanda, & quæ insuccis nutritiis fluitant, aut ex alimentis eliciuntur, particulæ alibiles. Nec major virium Naturæ humanæ modus esse videtur.

138. Mixtionem (238.) insuper firmat cohærentia, quâ heterogenea inter se continentur, ne spontè divortium faciant, nec vi externâ, nisi ægrè a se mutuò avellantur.

139. Vis tamen cohærendi uti non eadem est inter atomos cujusvis materiæ seorsim spectatæ, ita nec inter diversas commixtas æquè magna promiscuè viget. Aliæ aliis affiniores sunt: dantur &, quæ se invicem repellunt, nec, nisi proxenetæ interventu, consortium stabile subeunt.

140. Humidi, (132.), quam sicci (134.), levior cohæsiō est. Quo fit, ut ex diversâ alterius cum altero mixti.

proportione diversi consistentiæ gradus emergant.

141. In siccâ materie terreum (137.) præ aliis cohærentissimum est, atomorum suarum in proximos contactus compactione duritiem daturum vix edomandum; nisi aliorum interventu molliretur. Id solum superest, cum ignis & æris violentiâ cetera disjuxit, dissipavit. Duriora ossa, igne ad alborem calcinata, suam tuentur cohæsiorem ac formam; tametsi prata meram terram nihil reliquum habeant. Et quo pars quælibet plus terræ congestum addensatumque continet, eo firmitus cohæret. Quod corpus humanum ex multis junctis unum quid sit ac permaneat, singulæque ejus partes tamen inter se non confundantur, terræ potissimum debetur. Hic hominis sceletus Chemicus: hoc principium cohæsiõis, quietis, inertię.

142. An autem glutine opus est interposito, aqueo, pingui, quo terreæ particulæ, spontè dilapsuræ, inter se conferruminentur? Imò verò opus est, quoties cohæsiõ fluida, mollis, flexilis, friabilis, i. e. minus firma requiritur, quam intractabilem terra mera facit. Sufficit huic proximus suarum particularum contactus ad cohærendum: alienorum interventus cohæsiõem modò attemperat, quæ tantò laxior est, quò istorum ad terram major ratio. Et ipsa glu-

tina suam terræ, quam continent, coherentiam debent.

143. Cur igitur partes corporis humani, igne tostæ, in cinerem fatiscunt non coherentem? Excussis volatilibus vacui nascuntur in massâ terreâ loculi, quibus fit, ut hujus moleculæ à proximis contactibus longiùs absint. Quin & bonam terræ portionem unâ in auras dissipari, docet fuligo, tùm spiritus, salis, olei, quæ prodeunt, depuratio. Indè partes magnâ materiæ volatilis copiâ suffertæ hoc phænomenon duntaxat exhibent, non item quæ terrâ compactiore sunt stipatæ (152).

144. Aquæ & terræ, ad opposita coherentiæ extrema constitutis (141, 142), nec nudè sociabilibus, salinum (16) & inflammabile (125) interponitur, hoc terræ, illud aquæ amicum, alterum quoque alteri facilè coalescens; ut adeò horum interventu dissidentes materiæ concilientur. Aqua sic sali nubit, sali phlogiston, huic denique terra, & mixtio omnium stabilis emergit, gradu cohæsionis, quâ inter se ligantur, eundem ordinem sequente, ut privato singulorum ingenio ac mutuis affinitatibus consentaneum.

145. Quare constat, partium humani corporis materiaturam ubique eandem esse, elementa eadem; differentiam verò diversæ horum proportioni deberi. Abun-

dans siccum cum paucò humido firmitatem efficit; fluorem contrà, opposita utriusque mixtio. Nec aliter dura pars à molliori, aut humor crassus à tenuiori discrepat.

146. Auctâ igitur proportionè sicci, humidum, hujusve ad illud humor in partem firmam converti, aut hæc vicissim in humorem redire poterit; pars firma durior, mollior; humor crassior aut tenuior reddi. Cohæsiõis gradum ipsa mixtarum materierum proportio determinat. Naturæ humanæ familiare hoc opus diversum genus elementorum non exigit.

147. Nec difficile est videre, quamobrem homo in vegetantibus ac animantibus materiem inveniat corpori suo nutriendo, augendo, reparando idoneam? Aqueum, salinum, phlogiston, terreum, in his omnibus eadem sunt, nec dispar mixtio generalis. Undè & vicissim illis in pabulum cedit corpus humanum.

148. Liquet etiâ, cur idem tam proclive in putredinem sit? Humidi ac inflammabilis abundans copia, compagis firmæ laxior pro magnâ parte cohæsiõ, succorum per hanc undique diffusorum multitudo, id genus corruptionis faciliè admittit. Ut meritò admirabilis habeatur vitæ potentia, quæ machinam à morte statim parrescentem, aëri proprioque

calori, instrumentis ad putredinem efficacissimis expositam, per tot annos tamen incorruptam tueatur.

Morbi partium solidarum simplicissimi.

149. IDEA solidi simplicissima est, cum spectatur, in quantum à fluido discrepat. Id omni solido commune. Reducitur autem ad solam materiem constituentia utrobique eadem sunt (ibid), variatâ tantum proportionem (ibid). Hæc in firmis partibus à Medico præcipuè attendenda respectu cohesionis, cujus divesos gradus terminat (147).

150. Vitiorum igitur, quæ in solidis cognosci ac tractari possunt, simplicissima quoque ad cohesionem pertinent. Nec alia hic in elementis aut temperaturâ inveniuntur, quorum utilis & necessaria cognitio. Hæc prima linea Pathologiæ.

151. Cohærentia quidem duobus modis peccat, imminutione, vel excessu: hæc rigiditas, illa debilitas vocatur. Hi bini morbi similes. Tertio solutæ unitatis nullus hic locus est; cum eo posito ablata cohæsiō concipiatur, adeoque solidi idea evanescat.

152. Utriusque morbi (152) ingenium declarat notitia justæ cohærentiæ gradûs, quo firma compages muniis sanitatis ap-

tatur. Corpori, innumeris partibus composito, quarum singulæ suis agitari motibus, nec mutuïs tamen nexibus elabi debebant, humoribus insuper perfuso non continendis tantum, sed & diversimodè movendis, dirigendis, mutandis, nec lapidea durties, nec mollitudo quævis, congruere poterat. Ut adèdè medius quidam inter opposita extrema gradus tenacitatis sanum robur constituat.

153. Cohæsió etiam non in omni parte eadem est, sed cuiusvis suo data modo, diversa pro vario cui destinatur usu. Firmitatis linea, indè à termino fluiditati contiguo, inque hanc velut absorpto, ad ossis usque durtiæm protensa, quamplurimos intercipit minoris majorisque cohæsióis gradus, suis singulos paribus convenienter assignatos; quorum permutatio œconomix humanæ intolerabilis.

154. Est etiam, uti generatim sanitatis, ità roboris legitimi solidorum, latitudo quædam, si diversorum hominum corpora, similesque horum partes firmas inter se comparaveris, ut ætate, sexu, temperamento, &c. à se mutuò discrepant. Vis cohæsióis in homine singulari congruentiam magis proportio harmonica quam absoluta mensura, determinat.

155. Undè patet, eundem cohærentiæ gradum alias naturalem, alias morbosum esse

esse, nec vitia excessus aut defectus, nisi ex symetria reliquarum corporis conditionum, dijudicari posse.

157. Debilitas itaque dicatur materiae solidum componentis nifus in cohæsionem tam parvus, ut ferre motus nequeat quos vitæ ac sanitatis munia exigunt, quin nimis cedat.

158. Nec tamen sana habetur corporis partis-ve cohæsiō, quæ exquisitissimæ tantum vivendi rationi respondeat, modicos errores impunè non fubeat. Beneficio Creatoris homini in tantâ rerum vicissitudine constituto, atque ad altiora nato sanitas contigit, quæ nec minoribus injuriis statim labefactetur.

159. Debile (157) autem, vi majore actum, aut salvâ cohæsione nimis distrahitur, recursui impar, aut ruptum planè dissolvitur. Undè duo nascuntur hujus vitii genera, quorum quodvis suas iterum species sub se habet pro partium diversitate discrepantes.

160. Ad primum genus referatur

1. Laxum, Flaccidum, in partibus mollibus quæ vi minore ultrâ modum se extendi aut dilatari patiuntur.

2. Iners, in partibus naturâ elasticis; cum cereâ mollitie lentè impressos motus suffocant, nec insito nifu in statum pristinum resiliunt.

3. Flexibile, in ossibus, quæ amissâ stabilitate, potentiis distorquentibus aut

prementibus nimis facilè cedunt, nec formam suam sat tuentur.

161. Genus posterius (159) comprehendit

1. Tenerum, Gracile, in mollibus partibus, quarum fibræ, quia justo exiliores sunt, distractæ, citiùs quam par est, rumpuntur.

2. Tabidum itidem in mollibus, quæ corruptis quos continent succis maceratæ, aut aqueis, oleosis, mucilaginosi diu fotæ, acribusve erosæ, contabescunt & friabiles redditæ omnem tenacitatem amittunt. Putredo, concitato motu intestino, aqueum, salinum, phlogiston agit, de terræ interstitiis evoluit; ut hinc cohæsiò minuatur. Docet carniùm ex incipiente corruptione nascens delicata teneritudo.

3. Fissile, in partibus naturâ tenacioribus, quum ob contextum sicciorem minus obsequiosæ distrahi nequeunt, quin rimas trahant & cohæsiòne laterali fibrarum solutâ findantur.

4. Fragile, in ossibus, quorum materies pingui & glutine emuncta, acri exesa, destructâ cohærentiæ firmitate, ad leves motus frangitur.

162. Omnium istarum debilitatis specierum (160, 161) generalis causa sita est in elementi terrei, quod basin solidorum constituit (142), particularum contactibus justò paucioribus, nec sat arctis: ho-

rum eum numero & proximitati vis co-
hæſionis respondet. Indè connata aut vi-
tæ regimine acquisita fibrarum exilitas ,
succorum præ solidis multitudo ; aquæ ,
muci , pinguis copia inundans ; aut &
eorundem absque terræ compactione de-
fectus ; violenta partium ultrà tonum dis-
tractio ; acre varium , firmis per humores
insinuatum , amicam aquam trahendo ,
retinendo , phlogiston solvendo , gluten
attenuando , terram exedendo , omnia
inter se commovendo , eo deducunt.

163. Qui verò duplicem considerat no-
xam, cui debile solidum exponitur (159),
& cum requisitis sanitatis in diversis par-
tibus comparat, isfacilè videt, seminium
in hoc vitio dari innumerorum magni
momenti morborum ; maximè sicubi ex
incongruâ vivendi ratione aut aliundè
potentiæ nocentes accesserint.

164. Rigiditas (152), affectio priori
opposita , hinc intelligitur : ponit enim
excedentem in solidis cohærentiam , quâ
distractioni suæ plus resistunt , quàm mo-
dus sanitatis (153) requirat, aut ferat.

165. Efficit autem , prout in diversis
partibus vario gradu inest , aut insupera-
bilem firmitatem , aut fragilitatem flecti
nesciam. Quocirca & hic duplex distin-
guere genus licet , & sequentes horum
species internoscere.

1. Tenax, in partibus mollibus , cum
ægrius sese distrahi ac discerpi patiuntur.

Exemplum in carnibus annosorum animalium.

2. Durum in mollibus quoque, sicubi præter naturam in cartilaginem aut os mutatae sequaces esse desinunt.

3. Fragile, Vitreum, in ossibus, à fragili (161, 4) spongioso diversum, nascens ex majore materiae condensatione, quâ fit, ut impetu fortiore rumpantur potius, quam tantillum cedendo cohaesionem tueantur. Docent ossa hyeme fragiliora. Nec molles etiam partes ab hoc vitio prorsus immunes sunt.

166. Ponit hic status (165) elementum terrestre in solidis ultra modum abundans nimisve compactum; ut hinc propiores justo ac numero auctos habeat contactus mutuos, interfluentis humidi defectu laborans. Quo nativitas, sexus, ætas temperamentum, vitæ ratio, ambientia, &c. conferunt.

167. Efficit autem multiplicia circuitus humorum, secretionis, excretionis, nutritionis, incrementi, motuum ac sensuum impedimenta; prout vel in universo corpore, vel in singulari hujus parte obtinet.

168. Utrumque vitii genus (159, 164), tam latè patet, ut firmarum partium nulla iis non obnoxia sit; quum id afficiant, quod omnes inter se commune habent. Itaque non tantum pertinent ad solidum minimum, simplicissimè specta-

tum, five id fibrillam esse finxeris, five informe coagulum; sed etiam ad membranas, canales, viscera, carnes, ligamenta, tendines, cartilagines, ossa, &c. quibus solidum minimum pro communi materiaturâ est. Nec excipiuntur, quæ ex canalibus compressis, siccatis, exhausto densatove suo liquore concretis, compinguntur magis aut crassescunt partes; nec quæ per epigenesin quovis demùm modo accrescunt.

Morbi Solidi vivi.

169. SOLIDUM vivum dico, quod vi vitali pollet.

170. Vis vitalis solidi est, qua id ad contactum irritamenti se contrahit, crispatur.

171. Irritamentum est, quidquid contactu suo vim vitalem (170) ad agendum ciet. Eo autem non tantùm acria referuntur, sed & alia multùm diversæ virtutis, quæ solidis intùs, vel foris admota aliquam statum spontanei mutationem inducunt. Sunt autem occasiones duntaxat, nec adeò veræ causæ contractionis; quum hæc actioni irritamenti minimè, tanquam effectus, respondeat, nec ab eodem in solido vitâ destituto producat.

172. Duas itaque in solido vivo concipere facultates licet; alteram quasi sentiendi, quâ stimuli actionem suo quodam

modo percipit; alteram movendi, quâ sese contrahendo vim vi opponit ac repellit veluti, quod quietis suæ statum turbat.

173. Indè, cùm vita in solido agit, series datur trium conditionum; irritationis puta, perceptionis ac contractio- nis, quæ successione subitissimâ inter se confluunt, ac alterâ alteram excitant, quamquàm non æquâ virtute, nec semper eadem lege.

174. Perceptioni quidem constanter proportionata videtur contractio, pro minore vel majore illius gradu & ipsa minor majorve futura. At irritationem inter & perceptionem haud similis semper obtinet ratio, sive stimuli naturam spectes, seu quas afficit partes. Imoverò discrepantia hic datur multiplex, nec ad certas leges redigenda.

175. Quamvis enim credibile sit, vim istam per universum corpus vivens diffusam esse; ratio tamen & experimenta suadent, non æqualiter in singulis partibus vigere, sed aliis acutissimam, tenacissimam insidere; aliis diversimodè tùm efficacîâ, tùm duratione minorem, nonnullis etiam minimam, quæ vix apertè se prodant. In hujus scalæ summo gradu cor stare, proximè sub hoc ventriculum & intestina, dein diaphragma, tandemque ceteros musculos, sagax HALLERI industria nuper detexisse videtur.

176. Diversi quoque istius virtutis gradus in toto homine notantur pro variâ ætate, sexu, temperamento, vitæ genere, graviditatis, puerperii, &c. Facit & idiosyncrasia differentiam, & consuetudo.

177. Undè fit, ut cujuscvis irritamenti applicati actionem non quisque homo aut quælibet hujus partes, pari gradu sentiant, eademque res & stimuli loco esse, & non esse possit in diversis.

178. Est & consensus aliquis ac conspiratio inter vivas partes, quâ mutuas sibi suppetias ferunt, atque altera alteram in communes contractiones ciet, cum una modò laceffitur; ut adeò pars singularis irritata nonnunquam universum corpus exagitet.

179. Animalis etiam vis, quæ sensus regit, cum vi vitali communicat, & vehementer affecta huic pro irritamento esse potest, ut hæc vicissim illi. Quocirca mentem hominis isti commercio implicitam esse constat.

180. Hæc (169 ad 180) consideranti obscurum esse nequit, quanti momenti cum in sanitate, cum in morbis, ex principio vitali profluant. Nititur eo magna pars virium naturæ humanæ conservatricium, destructivum, medicatricium (4, 5, 37, 51, 99 & seq.) In hoc dum agunt stimuli morbosæ, aliæ atque aliæ nascuntur affectiones, prout diverso ejus

gradu homo ab homine (176), pars à parte (175) discrepat. Huic potissimum debentur naturæ illa molimina, quæ fontem alterum symptomatum (101) constituunt.

181. Hoc Ἐννομήων Hippocrati dictum, quicumque ad mentem hominis referunt, haud satis appositè explicant, cur id sine conscientia agat, nec obediat voluntati, & vel in partibus de corpore vivo resectis aliquamdiù supersit. Rectius itaque corpori videtur tribuendum, nec sensu proprio accipienda est, quam in eo distinxit, difficultas quasi sentiendi (172).

182. Quum verò ejusdem actio non adeò in humoribus, sed in solidis se manifestet, his potius quàm illis, id insidere dixeris: ita tamen, ut credibile sit, aliquid ejus in ipsis humoribus, undè solida nascuntur, jam occultè inesse; nisi mavelis, sub ipsâ statim concretione indi.

183. Adesse verò, aut abesse cum possit, solido integro, ad hujus in se simpliciter spectati naturam id referre vix licet. Quocircà malè in firmarum partium elementis, horumve mixtione, aut glutine quæritur; ut quæ à morte supersunt, nec admodum mutari videntur. Fibræ, ut simplicissimâ (150) mente concipitur, vivere nemini observatum.

184. Nec juvat precariò assumere fictitiam in solido fabricationem, ut vis istius fundamentum; quum legibus mechanicis non adeò locus hic detur (174).

185. Elasticitas quoque, gravitas, attractio, repulsio, effervescentia, explosio, & reliquæ corporum inanimorum vires, Physicis Chemicisque celebratæ, cum aliquâ veri specie huc trahi nequeunt. An vis electrica? Dies doceat.

186. Quare vim vitalem meritò ab omni aliâ corporum vi motrice hucusque detectâ distinguimus, ut principium sui generis, viventibus inditum, quod privas sibi in agendo leges sequatur solâ observatione detegendas.

187. Quando autem nulla assignari fibra potest, quæ, dum vitâ gaudet, mero constet solido, nec materie fluidâ plus minus perfusa sit (181), & molli-tudo fibræ magis etiam, quàm durities, favet vi vitali; hæcque ipsa, nisi jugiter reparetur, fugax citò evanescit; dubitare profectò licet, utrum solida in semetipsis habeant, an verò potius subtili cuidam fluido debeant inhærenti, aut saltem absque novo hujus qualicumque demùm influxu diu conservare possint. Cave tamen, ne hic de contrectabili humore cogites!

188. Ex quibus (169 ad 188) consequitur, tanti hoc motûs principium momenti esse, ut non à Physiologis modò, sed & vel maximè à Pathologis attendi mereatur; & sua id vitia pati posse, quæ & frequentissima sint, & sive solitaria, sive cum aliis morbis complicata, mul-

tivarias functionum perturbationes inducere queant, nec tamen inter similes, elementarios, temperiei, totiusve substantiæ, aut & organicos solidorum morbos, veteribus dictos, neque etiam inter humorum vitia à recentioribus addita, sat commodum inveniant locum, atque adeò singularem sibi titulum repossant. Quidni præeuntem sequamur HIPPOCRATEM? qui præter continentia & contenta, etiam τὰ ὀρμηῶντα in homine contemplari cum ratione iussit.

189. Vis vitalis duplici modo peccare potest; excessu puta & defectu. Hunc torporem vocabo, illum irritabilitatem. Medius inter hæc extrema status sanitatem ponit. Cohærentiæ debilitatem, aut rigiditatem (151) nonnulli malè cum duobus istis affectibus confundunt

190. Irritabilitas mihi dicitur solidi vivi tanta sensilitas (172), ut levibus stimulis in motus erumpat enormes, quibus æqualis functionum tenor perturbetur.

191. Enormitatis motuum mensuram dat nota vis, & applicatio irritamenti, collata cum intensitate, duratione, reciprocatione, extensione contractionum, quæ indè consequuntur. Ut ideò huic vitio obnoxiiis intolerabilia sint, quæ sani faciliè ferunt.

92. Notetur tamen, quæ intrà limites sanitatis consistit, sensilitatis differentia in diversis cum hominibus, tum par-

tibus ejusdem hominis (175 ad 178). Nec singularis etiam cujusdam stimuli intolerantia mox pro morbosâ affectione habeatur, quamvis inferre morbos possit.

193. Occupat autem iste excessus aut universum corpus, quod unâ mentem quoque irritabiliorem sibi plerumquè junctam habet; aut partem modò singularem, cui, quod suo toti non ritè attemperata sit, levi quâvis occasione turbæ nascuntur.

194. Difficile est in tantâ naturæ virtutis vitalis ignorance fontes detegere, ex quibus id vitium promanat. Docet tamen observatio, ut plurimum simul adesse 1. delicatam solidæ compagis teneritatem (161, 1); alias & 2. strictam fibrarum tensionem, mobiliore elatere comitatam; 3. magnam sensuum agilitatem; 4. sæpius & acrem humorum tenuitatem; 5. systema circulationis agitatius. Undè hæreditas, ætas junior, temperamentum mobile, sexus sequior, clima calidius, vitæ genus lautum, sine exercitatione, aut rectius regimen, cum meticulosâ omnis insoliti evitatione, morbi acuti, febriles calidi, eò disponunt. A mente corpus irritabilius reddi (193) non magis probabile est, quàm illam ab hoc incitari.

195. Generales, qui ex irritabilitate oriuntur, effectus reducere licet ad solidorum vibrationes tremulas, crispatio-

nes, tensiones, spasmos; convulsiones; ex quibus iterum dolores, anxietates, cavitatum contractiones, obstructions, inflammationes, & multiplex circulationis, secretionis, excretionis, aliarumque functionum impedimentum ac alienatio consequi possunt: uti facile est eruere, si quis irregulares illos motus ad varias corporis partes, membranas, vasa, viscera, glandulas, musculos, fibras motrices, organa sensuum, &c. applicat, habitâ simul consensûs (178. 179.) ratione. Undè dubites, utrum huic par affectio detur alia, quæ tot tantisque hominem malis obnoxium reddat.

196. Torpor (189.) solidi vivi ponit imminutam vario gradu sensilitatem, hinc ad irritamenta nîsus in contractionem tam parvos, ut non sufficiant iis producendis motibus, quos œconomix salus postulat.

197. Obtinet adeò vel in toto corpore, vel in parte singulari, & minore quidem majoreve recessu a vigore naturali. Abolitio plenaria, universalis, vel particularis, mors est.

198. Comitari eum solet 1. rudior fibrosi contextûs crassities, delicatæ gracilitati (161. 1.) opposita, ob molem majorem ægrius mobilis; 2. rigiditas partium tenax, vel dura inflexibilis (165. 1. 2.) superpondio ac compactione terræ gravis; sed & 3. laxitas ac inertia

(160. 1. 2.), ex colluvie aquosâ, mucosâ, pingui; 4. indè & crasis humorum frigida, aquosa, viscida, aut terrestris densior; 5. eorundem lentior per vasa motus; 6. sensuum denique ac animi motûum tarditas. Quæcumque igitur istas affectiones in homine producere possunt, torpori quoque inferendo apta habentur. Sunt autem contraria memoratis (194), adeoque ex his intelliguntur.

199. Nec difficulter perspiciuntur mala, quæ ex hoc vitio in omne genus functionum redundant; quandò harum nulla est, quæ principii vitalis influxu impunè carere possit. Morbi præsertim chronici indè nascuntur valdè refractarii, quin insanabiles; quum ob naturæ virium languorem & medicamenta parùm valeant (18 & 180).

Morbi Solidorum continentium.

200. Non alia datur generalior eademque evidentior firmarum hominis partium constructio, quàm illa, quâ cavitates efformant magnitudine, figurâ, decursu, diversissimas, admittendis, continendis, transmittendis, vehendis, discernendis, expellendis, variis materiis idoneas: ut ideò univèrsa corporis compages solida continentium titulo comprehendatur.

201. Cavorum verò singula suum ha-

bere modum, qui sanitatis muniis maxime conveniat, docet Physiologia. Ab hoc igitur si ultrà, vel citrà recedunt, morbi nascuntur & notabiles, & valdè frequentes ob magnam cum parietum, tum contentorum mutabilitatem.

202. Hos inter præcipuè exponi merentur, qui ad cavitatis suis lateribus interceptæ, aut luminum, quibus admittit vel emittit, magnitudinem pertinent excessu defectuve peccantem: sunt enim præ ceteris manifestiores, & multiplici magni momenti noxâ graves, variorumque malorum quæ indè oriuntur naturam declarant.

203. Magnitudo cavi ostiive præter modum aucta, suas in species distributa, ponit.

1. Dilatationem, *Ἐκπύση*, cum parietes cavitatis, nimium inter se distantes, spatium justo capacius circumscribunt. Obtinere potest in quibuscumque cavis corporis majoribus, minoribus, quorum parietes distensionem admittunt, sive canales fuerint, sinus, aut receptacula. Oritur autem, si contenta materies majore vi in latera agit distendendo, quam hæc superare contra nitendo queant. Quo facit congesta uberior moles, volumen expansione auctius, impeditus trajectus, impetus advectorum enormis; parietum robur imminutum, aut eorum quibus à foris fulciuntur ablatio.

2. *Αναστομωσις*, quæ hic vocatur ostii cavitatis, quod admittit aut emittit, immodica laxatio. Undè fit, ut plus aut aliud quid, quam lex sanitatis exigit, introeat, exeatve. Efficere hanc eadem possunt, quæ dilatationem (1); sphincterum præterea, si quos orificia habent, resolutio.

3. *Διαπύδισις*, quæ adesse dicitur, cum fibræ membranas cavitatum contextentes, distractæ, à mutuo contactu ita recedunt, ut, absque continui solutione, intersticia hiantia nascantur, quæ, textilis ad instar, transfudare sinant humorem, qui contineri debuerat. Producitur id malum ab iisdem conditionibus (1), sed majore gradu applicatis, & quidem ad cava, quorum parietes contextu subtiliore gaudent, aut vitio laxiores sunt (160, 1).

4. *Διάρρηξις*, cum ob cohæSIONEM fibrarum verè solutam parietes cavorum, quâ integri requiruntur, perforati sunt, aut ostiorum margines nimis ampliati. Quod effici potest vi mechanicâ externâ secante, pungente, contundente, lacerante; aut ruptione à contentis distendentibus illatâ, quæ *ρήξις* audit; aut erosione ab acribus, quam *διάρρωσις* vocant.

204. Quod si potentiis nocentibus modò enumeratis accesserit naturalis aut morbosadebilitas (157), vel torpor (196), universi corporis partive singularis (154,

155, 175, 176, 197), faciliùs hæc mala [203] producuntur.

205. Priores quidem tres affectiones (203, 1, 2, 3) non adeò planè præter naturam sunt, ut non in statu sano, modico gradu quoque obrineant, & faciliè ferantur, imò ad diversa vitæ munia etiam requirantur: uti varias partium per ætatem mutationes, impositas sexui sequiori functiones, &c. consideranti patet. Undè tum demùm pro morbis haberi possunt, cùm modum excedunt, aut ordine, tempore, materie, partibus incongruis eveniunt.

206. Innotescit etiam, quatuor hæc vitia (203, 1 ad 4) gradu potissimùm inter se differre, & quodvis posterius ex priore semel nato produci posse, dilata-tione, cùm ad ora meatuum usque se extendit in anastomosis, aut, cum auge-tur, in diapedesin, hæc denique in di-eresin abeunte. Quod notatu apprimè utile, ut venienti malo in tempore occurratur; quandò species anteriores facilem sæpè sanationem admittunt, non item vera continui solutio.

207. Effectus autem multiplices indè consequuntur, qui, ritè animadversi ac singulis corporis partibus applicati, plurimorum graviumque morborum originem declarant.

Dilatatio quidem tumores producit;

eosque sæpè immanes, si parietes tenaciores vim lentè distendentem diu experiuntur: tum verò natura quoque, ne tenuati rumpantur, quandoquè cavet densatione, incrassatione, novisque laminis appositis, cavitatum latera roborando. Multiplex hinc conformationis à statu sano recessus incautos fallens. Violentior distractio rupturas infert: undè contentorum elapsio, & quæ ex hac sequuntur, innumera. Materiæ in cava distenta protrusæ impetus major, impedito transitu, crescente æstu, concitatâ putredine, vi pressionis intercepto in vascula parietum partiumque vicinarum influxu vitali, mortificat. Si tenuior pars materiæ, in cavum amplius congestæ, per os angustius, aut per laterum diapedesin (206), transadat, retenta crassior, paulatim densata, tumores solidos, molles, duros efficit.

Anastomosis, ex protractâ dilatatione tandem nascens (206), subito nonnunquam dimittit aggestam diu cohibitamque materiem, lethumque, finem malo tristem, imponit. Ex alienâ materie per oscula meatuum ampliora intrante, aut exeunte, errores loci, obstructions, ecchymoses, secretionum ac excretionum turbæ, varii tumores oriuntur.

Nec dissimilia sunt, quæ diapedesis aut diaeresis, ocyùs, seriùs superveniens producit.

Quandò autem fibræ corporis diu fortiterque distractæ vim sese restituendi demùm amittunt, aut in eo statu obriescunt, non est, cur quis miretur, noxas ex hoc fonte nascentes haud raîo tam diuturnas, quin insanabiles esse; quamvis & potentia distendentes tandem auferantur.

208. Est tamen in his morbis etiam aliquid medicati, quo Natura utitur in salutem sui corporis, cum nociva materies e massâ humorum separari, expelli debet. Criticæ evacuationes ac metastases hoc potissimùm adminiculo nituntur.

209. Alterum cavorum malè affectorum genus morbos angustia promit, quorum & species cognoscere expedit pro diverso, quo fiunt, modo distinguendas.

1. Obstructio, Ὕμφοραξις, notat cavum congestâ materie spissiore, quæ transmitti nequeat, ita repletum, ut pervium esse desinat. Quocirca parietes cavi non in vitio sunt, sed quæ his continentur. Hæc autem diversimodè peccant. Liqueor sanus, legitimi floris, at errore propulsus in dilatata ora meatuum, qui naturâ angustiores vehendæ tenuiori materiæ tantùm dicati sunt: quod per anastomosin [207] evenire potest. Materies indigena, degener, pinguis, amurcosa, empyreumatica, terrea, grumosa, pul-tacea, purulenta, feculenta, &c. Ma-

teries aliena, calculus, gypſum, vermes, & ſimilia, vel in corpore morboſè generata, vela foris ingeſta, applicata, cavis ductûum aut orificiis impacta; ut nec ipſa, nec, quæ decet, alia transmitti queant. Huc & referre licet partis intra partem receptionem, volvulum, &c. de quibus poſt.

2. Obſtipatio, στενοχωρία, viæ anguſtatio, quæ fit, cum parietum craſſities æquabiliter aucta, aut tuber intus prominens, cavitatem minuit, tollit.

Congeſti in vasculis aut interſtitiis membranarum humores, chondrogenia, osteogenia, lithogenia, emphyſema, tumores inflammatorii, purulenti, ſarcomata, ſi cavo imminet, huc faciunt.

3. Compreſſio, πίεσις, quando externa vis, cedentia cavitatum latera introrſum urgens, diametro per gradus imminuta, tandem diſtantiâ eorundem per mutuû intus contactum prorfus tollit. Tumores, oſſa fracta, luxata, ligaturæ, pondera, potentiæ compri- mentes, contundentes, diſtrahentes, contorquentes, &c. id vitium creant.

4. Collapſus, Συνίζησις, cum latera cavorum, ob defectum materiæ contentæ non diſpanſa, ſubſidendo ad ſe mutuò accedunt. Ponit ergo parietes aut naturâ, aut diuturnâ ultra tonum diſtenſione, aliâve cauſâ, flaccidos, infirmos, & ſubitam depletionem; ut, ſuſtentaculo ſuo

orbati, proprio robore tueri cavitatem nequeant, quam tamen novo influxu facile recuperant; nisi subsidentiae compressio etiam [3], aut concretio accesserit.

5. Contractio etiam huc referenda, quâ parietes insitâ suarum fibrarum vi contractili sua cava aut ostia arctant, occludunt. Id vel lentè & paulatim fit, vel subitò & vehementer. Inest nimirum in solido, quod cavitatum latera format, vis cohærentiæ [139. & seq. 150], quæ uti resistit elementorum separationi, ita propriorem reddere contactum perpetuò nititur. Inest & in multis, vario gradu, vis elastica. Accedit insuper vis vitalis [170, 175]. Nec desunt, quibus & muscularis potentia pro adjumento concessa est; si modo hanc a priore diversam credere libet. His viribus internis cavorum parietes se tuentur adversus contentorum impetus extrorsum, sibi que a nimia distensione aut ruptione cavent. Ut adeò continentium & contentorum oppositi nisus antagonismum exercent mutuum, quo cavorum diametri determinentur, majores minoresve futuræ, si alteruter horum nisuum a justâ æquilibrata recesso ferit. Indè contractionis lentæ ac subitæ origo ac discrepantia intelligitur. Quod si vis cohærentiæ & elateris in parietibus ultra modum augeatur, non incrementum pariter materiæ contentæ mole, volu-

mine, pondere, motu; aut, versâ etiam vice, hæc minuuntur, non item imminuto potentiæ contrahentis momento; pro hujus ingenio paulatim & leniter in sese coëunt parietes, fibrisque adductis cava sua arctant, donec cum contentis ad æquilibrium deveniant, aut his expulsis vel deficientibus, quam possunt, maximam contractionem assequantur. Vis autem vitalis & muscularis irritata, violentius agit, nec adeò in statu æquilibrii cum contentis quiescens, ad stimulum multiplicem [171] subitò in spasmos [175] ruit, quibus stricti parietes aut distractionem non, ut decet, admittunt obrigescentes, aut cava ultra modum angustant, quin penitus occludunt. Innotescit hinc, quam variæ causæ utrumque id vitium inducant; & cum prior contractio sequatur distensionem imminutam, ex hac etiam nimium auctâ, ut stimulo, posteriorem oriri posse; nec tamen ambas tantoperè inter se differre, ut non quandoquè in eadem parte simul nasci queant, aut altera alteri supervenire.

6. Coalitus, Συμφορισ, denique ponit abolitam cavitatem ob parietes, quibus formatur, intùs consolidatos. Quod affectionis genus aut post continui solutionem nata cicatrix calusve infert, aut compressio [3], collapsus [4], contractio [5], diuturna, fortior, ut ex contactu interno

laterum perdurante concretio demùm consequatur. Quin & obstipans tumor [2] id efficere valet. Quandoquè & obstruens materies [1], solidescens, internæ parietum superficiei coalescit. Undè constat, omnes angustationum species, ad extremum deductas, tempore tandem in symphyisin abire posse : quò cum devenitum est, frustra ut plurimum tentatur sanatio, nisi manus opera adhiberi possit.

210. Uti verò haud rarum est plures memoratarum specierum [208] una concurrere; ita sæpissimè huic vitio comes aut pedissequum sese adungere solet prius [203], idemque cavum parte angustius, parte amplius justo esse ob impeditum materiæ affluentis transitum.

211. Facile hinc perspiciuntur innumera mala, quæ ex hoc fonte in œconomiam humanam redundant; quum ad omne genus cavitatum maximarum æquè ac minimarum pertineat, & a legitimâ harum ad sua contenta ratione pleræque omnes quarumvis partium functiones plus minus pendeant. Complicatio autem frequens cum vitioso excessu [210] etiam noxas indè oriundas multiplicat, aggravat.

Morbi Solidorum instrumentarii.

212. CORPUS humanum in partibus suis firmis, quæ sensûum ope cognos-

cuntur, systema esse instrumentorum diversissimorum, quæ cum secundum naturam se habent, suo singula numero, magnitudine, conformatione, proportionem, situ, nexu, continuitate determinatis gaudeant, docet Anatome. Physiologia autem demonstrat, vi hujus fabricæ suo unamquamque partem aptari operi, quod sanitas postulat, peragendo, ideòque aliam atque aliam cuivis contigisse, prout diversæ functionis instrumentum esse debebat.

213. Ceteris ergò integris, sola etiam istarum conditio (212) permutatio ac de naturali statu decessio actionibus sanis impedimento esse potest. Indè morbi instrumentarii, organici nascuntur perquam notabiles, adeòque ordine nunc pertractandi.

214. Monendum verò priùs, non omnia, quæ hic occurrunt, vitia, licet a naturæ modo recedant, functionibus ita obesse, ut morbis verè accenseri mereantur (38): multa etiam, strictiore sensu, potius ad classem symptomatum pertinere; quum ad horum similitudinem ab aliis morbis pendeant (86): plurima denique ex solidorum & fluidorum affectionibus composita esse; uti & ipsæ partes instrumentariæ hanc mixturam constanter habent. Hunc tamen circulum evitare nec Physiologia, nec Pathologia potest.

215. Ut partium similiarium (150), ita & dissimilarium primaria dos est co-hæsiō. Hac nititur materiæ firmitas, continuitas, hinc & aptitudo ad reliquas dotes mechanicas recipiendas, conservandas. Vitiata igitur morbos infert, eosque diversos, prout, vel ad partis in se seorsim spectatæ substantiam pertinent, vel ad ejusdem cum vicinis nexum.

216. Prioris generis sunt continui solutiones, quo sequentes species referuntur.

217. Fractura, quæ solutio continui est in parte durâ, osseâ, cartilagineâ, a causis mechanicis facta. Hæc lato sensu comprehendit Fissuram, "Εδρην, Præcisionem, Attritionem, &c. Producitur ab injuriâ, quam vis percutiens, pungens, secans, tundens, cohæsione ossium major, infert. Undè tanto levioribus causis nascitur, quo ossa ex senio, acri gelu, lue venereâ scorbuto, arthritide, rachitide, carie, aliove vitio, fragiliora sunt (161, 4, 162, 165, 3); ut ideò, absque vi externâ, sola musculorum actio ossium, quibus infiguntur, fracturas quandoquè efficiat. Mala, quæ hinc sequuntur, innumera facilè eruuntur tùm ex multiplici usu, quem ossa œconomix humanæ præstare debent, nec possunt tamen, nisi integra; tùm ex perturbatione, irritatione, distractione, pressione,

pressione, laceratione, quam fracta partibus vicinis necessariò inferunt.

218. Vulnus, quod notat continui solutionem in parte solidâ, non durâ, recentem, a vi mechanicâ ita factam, ut sanguis aliufve succus e vasis prodeat. Potentiis ergò similibus, ut fractura, oritur, proque harum, &, quas hæ lædunt, diversitate plurimas habet differentias & varia nomina, cælionis, excisionis, puncturæ, rupturæ, fissuræ, contusionis, &c. Quidquid adeò sanarum functionum ab integritate partium & succis legitimè intra sua cava contentis aut motis pender, nato vulnere vitari necesse est. Unde, quæ hinc oriuntur, turbæ numero & varietate infinitæ perspicuntur. Accedunt autem & salutare Naturæ motus, qui vulnus ad sanescendum disponunt.

219. Hujus etiam loci sunt solutiones continui siccæ, quarum hiantia labia epidermis, callus, cicatrix ita obduxit, ut nec de extremis vasculorum humor elabatur, nec coalescere separata etiam sub mutuo contactu possint. Palpebra, labium, lingua, auricula, &c. fissa huc pertinent. Nec duræ etiam partes ab hoc vitio immunes sunt, quod alias congenitum est, alias ex vulnere, ulcere, fracturâ, carie, &c. utcunque sanatis contrahitur.

220. Posterius genus (215) vitia habet

incongrui nexus, quæ cum legitimam partium mobilitatem aut firmitatem pervertant, plerumquæ non impunè feruntur. Peccant autem excessu vel defectu.

221. Connexio excedens dicitur, cum, quæ disjuncta esse oportet, coalescunt, aut quorum laxior requiritur cohæsiō, justo strictior est. Symphyfes ductūum, ostiorum, hiatūum, naturalium (209, 6) huc retuleris. Undè Ἀτρητοὶ ad podicem, genitalia, urethram, meatum auris, nares, &c. Digiti, labia, muscoli, tendines, viscera, &c. sic inter se, vel cum vicinis coalita in suis muniis impediuntur: quæ affectiones aut ab ortu insunt, aut ex aliis malis (209, 6) consequuntur.

222. In articulis præcipuè notabile hoc vitium Ἀγκύλην, Ἀγκύλωσιν, veteres appellant, cum articuli ita obrigescunt, ut eorum motus prohibeatur. Ponit aded malè affectas illas partes, quæ ad articulum formandum tuendumque faciunt, & variâ occasione nascens læsis ex fracturâ, luxatione, vulnere, contusione, abscessu, ulcere, tumore, dolore, articulis crebrò supervenit; siquidem ligamenta quacunque de causâ interdum violentantur, contrahuntur, rigescunt, cum internis partibus coalescunt; alias axungia deficiens siccitatem, aut eadem abundantior, sive inspissata, quandoquæ etiam alienus humor in cavum articuli effusus, tumorem infert; alias extrema ossium

commissorum labe rachiticâ tumescunt, aut callus fracti propè articulum ossis, exostomosis, fungusve intus luxuriat; ulcus vel caries serpens partium firmitatem, cohæsiorem, lævorem, figuram, pervertit, &c. Rarò autem quædam istarum affectionum diu inhæret, quin & aliam atque aliam sibi comitem adsciscat: undè malum insanabilius evadit.

223. Hujus etiam generis sunt Ἀγκυλόγλωσσον & Ἀγκυλοβλεφαρον, quorum illud linguæ adstrictionem notat, qua ejus motus ad suctum, deglutitionem, loquelam, necessarii impediuntur, ob frenulum a nativitate durius, magisque contractum, latiusve in apicem linguæ productum, aut ob cicatricem ex vulnere vel ulcere sub linguâ relictam: hoc similem in palpebris affectionem, quâ inter se, & quandoque etiam cum albo oculi, vel cum corneâ, ita cohærent ac coalescunt, ut, quum diduci nequeant, visui obsint. Oritur ex interpositâ materie glutinante, aut ex cicatrice minus cautè inductâ.

224. Nexus deficit (220), sicubi, quas cohærescere decet, partes disjunctæ sunt, aut laxiùs inter se nectuntur, quæ arctiùs debebant. Quo pertinent cartilaginum, epiphysium ab ossibus secessiones; vitia, quæ medium quid inter fracta & luxata habent; dentium vacillatio, articulorum ob ligamenta flaccidiora infirmitas, lin-

guæ cohæſio juſto laxior , hinc nimia mobilitas , &c.

225. Eſt etiam plerarumque partium certa quædam inter ſe collocatio , naturæ maximè conſentanea , quæ ſola cum pervertitur , functiones integræ eſſe non poſſunt ; etiamſi cetera ſe rectè habeant. Undè nova iterùm morborum claffis exſurgit , qui quidem , ut ſæpiùs cum vitiis cohæſionis (215) complicentur , ab his tamen diſtincti ſeorſim conſiderari merentur pro ſpecierum , in quas abeunt , diverſitate. Referatur huc luxatio , hernia prolapſus , aberratio.

226. Luxatio dicitur , cum oſſa , qua inter ſe commiſſa ſunt , de ſede ſuâ naturali decedunt. Committuntur autem vel per articulum , cum manifeſtâ , obſcurâve mobilitate , vel per coitum , quo diverſum motum non habent , ſed , quaſi unum atque idem ſint inter ſe , junguntur. Hic modus *ὀρθοσις* , ille τὸ ἄρθρον , veteribus audit. Pro hâc igitur diverſitate luxatio etiam in duas ſpecies diſtinguitur.

227. Ἐξάρθρημα , quaſi dearticulatio , luxatio propriè dicta , eſt articuli de ſede ſuâ in locum alienum diceſſio , qua motus pervertitur. Levior hujus vitii gradus ſubluxatio eſt , παράρθρημα , cum os pro parte modò , nec planè extra crepidinem ſui acetabuli , elapſum eſt : quo etiam diſtorſio referatur , ſiquidem & oſſium ſi-

tum turbat. Infert hæc mala vis externa varia, expellens, intorquens, distrahens, major robore naturali articuli. Alias & intra cavitatem nata muci, feri, puris, aliusve fucci congestio, aut partium exsuperantia, os pedentim e sede suâ protrudit. Favet his potentiis, quidquid conditiones, quæ articulis pro munimento sunt, infirmat. Undè ligamentorum, musculorum, tendinum imbecillitas aut soluta continuitas, processuum, qui propè adstant, ossium ipsorum, quæ contra sese sita sunt, cartilaginum interpositarum, molliumque partium, quæ intus sunt, varia vitia, tumores, deformitates, relaxationes, ulcera, caries, fracturæ, contusiones, &c. eo disponunt; ut etiam solâ suorum musculorum actione quandoquè articulus solvatur. Hinc multiplex luxationis cum aliis morbis complicatio.

228. Quum verò in σύνταξι ossium tanta detur varietas, & nullus articulus tam similis alteri sit, ut non aliquid diversi habeat, nec æquale omnibus robur natura concefferit, aliorumque in alias atque alias partes faciliior aut difficilior sit luxatio; oportet eum, qui de his vitiis rectè judicare velit, non solum singulorum ossium positus ac figuras nosse, sed etiam comperta habere, quæcunque aut communia sunt omnibus articulis, aut propria singulis, ligamenta, cartilagine, glandulas, musculos, tendines,

apophyses, epiphyses tum cartilaginofas, tum offeas, harumque in variâ ætate mutationes, nec non vasa, nervos, viscera, quæ adjacent. Nec aliter intelligi possunt mala innumera, quæ ex luxatis consequuntur.

229. Altera situs ossium perversi species est, si, quæ sine articulo per coitum juncta sunt, inter se dehiscunt (226). Hæc singulare nomen non obtinuit, & parte ad nexûs vitia (224) referri potest, in iis certè ossibus, quæ media quædam materia inter se connectit. Ceterum ex (227, 228) intelligitur.

230. Hernia (225) adesse dicitur, cum functio sana læditur, quia pars mollis, interna, ex sede suâ naturali egressa, intra cavum partis mollis morbosè recepta est. Hoc nomen genericum, ut satis multas sub se species habeat, abusivè tamen transfertur ad varios tumores, quos hernias spurias vocant, eo quod iisdem locis, quibus hernia vera familiaris est, eveniant; quanquam origine, & naturâ sunt dissimillimi, nulloque proindè jure huc referri possunt.

231. Partium, quæ abdomine continentur, herniæ præ aliis & frequentiores sunt, & præcipuè memorabiles. Iis opportunitatem dat parietum qui abdomen circumdant, pro magnâ parte mollitudo, peritonæi quod intus succingit natura quidem tenax, at maximam distensionem

admittens; viscerum, quæ isto sacco continentur, moles ingens, laxitas, mobilitas, multùmque perpetuò varians ob diversam contentorum quantitatem dimensio, nec certa semper in omni suo ambitu sedes; eorundem hinc vi respirationis aliorumque corporis motuumque agitatio, pressio, major, minor, perpetua, nec tamen semper ab omni parte æquabilis, adeòque & continuus ferè nifus ad erumpendum de coërcente suo sacco, si qua detur rima, aut ad eundem dilatandum. Huic ut resistere peritonæi membrana posset, ossibus, musculis, aponeurosibus, integumentis, &c. foris impositis fulcitur, introrsùm urgeatur. Ita nato inter oppositas potentias æquilibrio, nec de angustis suis prorumpere interanea possunt, nec nimis cedere peritonæum. At si quâ parte istud externâ suâ vi destituitur, aut contentorum impetus, inæqualiter directus, aliquam ejus sedem, quæ minùs reniti queat, vehementer extrorsùm trudit; cedens ibidem peritonæum aut in appendicem cavam dilatatur, aut, quod rarissimum, rumpitur: utroque autem modo, quæ intùs vicinæ sunt, partes mobiles de suo cavo emigrare sinit & extrâ abdominis peripheriam subter communia integumenta sese effundere, crescente in dies tumore, si eadem causæ perduraverint. Hæc generalis est idea herniarum, quæ ad abdo-

men oriuntur. Undè differentias multiplices intelligere facile est.

232. Umbilicus, post partum præcisus, cicatrice occlusus, si minùs firmo constat circulo tendineo, quo olim vasa umbilicalia transmiserat, ea sedes peritonæi, quæ subest, in centro motûs abdominis constituta, nec satis à foris suffulta, ab adjacente tum epiploo, tum intestino propulsa se remittit, diducitur, cutim & ipsum umbilicum attollit faccumque format, in quem vicinæ intûs partes morbosè recipiuntur. Ita tumor nascitur, quem communi nomine ἐξόμφαλον, vel ἐξόμφαλον πάθος, vel ὀμφαλοκήλην, herniam umbilicalem, vocant, vitium infantibus fœminisque ex graviditate ac partu difficili frequentius.

233. In utroque inguine, quâ sede funiculus vasorum, contextu celluloso comprehensus, sub peritonæo emergens, per annulum, rectiùs arcum tendineum musculorum abdominis obliquorum, externi & interni, super os pectinis descendit, inque viris ad testes, in fœminis ad pudendorum oras, nomine incongruo ligamenti uteri rotundi, deferitur, ibidem membrana peritonæi nudior, minùsque extrinsecùs suffulta, frequentissimè herniam patitur. Quod si enim foramen illud arcuatum quâcumque de causâ diducitur, pressum à contentis, atque distractum peritonæum per id descendit, se-

cumque unâ abducit propinquas partes ,
 omentum , intestinum , &c. nascente ad
 inguen tumore , qui hernia inguinalis ,
βοιζωνοκήλη dicitur , quamdiu in hâc sede
 consistit. Si verò ocyùs , seriùs , ad infe-
 riora etiam se protendit , in viris quidem
 diducto scroto hernia scrotalis , *δσχεοκή-*
λη , vocatur , in fœminis autem ad labia
 naturalium devolutus peculiare nomen
 nondum obtinuit. Hæc tamen etiam in
 utroque sexu quibusdam hernia inguina-
 lis completa , illa incompleta audit.
 Infantibus , præsertim masculis , quan-
 doquè connasci , nullâque vel leviori
 causâ evidente etiam ab ortu persæpè ac-
 cidere hoc vitium , observatio docet :
 quod quâ ratione eveniat , ex partium
 conformatione ac evolutione , quæ ea
 ætate obtinet , intelligitur.

234. Præterea ad externum inguinis
 latus , quâ proximè subest femoris cum
 coxâ articulus , simile vitium quandoquè
 oritur , cui nomen herniæ cruralis , fe-
 moralis , inguinalis externæ , *μυροκήλης* ,
 à recentioribus impositum. Eâ nimirum
 sede cruralia , materie cellulosâ involuta ,
 ex abdomine , per sinum ossis ilium , sub
 aponeurosi musculi obliqui externi &
 interni crassescence , inque speciem liga-
 menti , quod à FALLOPIO vel POUPARTIO
 denominatur , indurata , educuntur & ad
 femora ac pedes descendunt. Id ligamen-
 tum itaque si quâ de causâ distrahitur , vel

laxatur, peritonæum hoc loco debilius cedit, extenditur, inque appendicem producit, cavam, quæ omentum ac intestinum recipit, cumque his secundum supradicta vasa, in anteriore femoris regione, paulatim descendens, integumenta communia in tumorem elevar. Sexus sequior hoc malum frequentius, quàm viri experitur.

235. Istis quidem locis (232 ad 234.) venter ita à naturâ comparatus est, ut minus ad resistendum robur habeat. Nec ideò mirum, sæpissimè ibi hernias incidere, si vehementior corporis nexus, spiritu cohibito, casus ab alto, præceps saltus, ictus abdomini illatus, valida succussio, &c. ventre simul cibo, potu, fœtu, aëre, aquâ, admodum distento, aut supernè per fascias, thoraces, vestesve arctiores valdè compresso, aut feminibus multum diductis, occasionem dederit. Magis tamen his vitiis obnoxii sunt homines ætate, temperie, morbove debiles, flaccidi, humidi, obesi: undè immodicus quòtidie lactis, olei, butyri, pinguedinis, aquæ calidæ, usus eo disponit.

236. Rarior est, nec tamen prætermittenda, quam ventralem vocant hernia, quæ in quibusvis aliis abdominis sedibus oriri potest, quotiescunque peritonæi membrana, ob musculos, præcipuè transversum dictum, quo proximè contegitur,

aliquâ parte relaxatos, collisos, incisos, ruptos, adhesos, sustentaculo suo orbata, infirmior foràs prorumpit, atque distenditur, aut ipsa quoque continui solutionem passa, prohibere nequit, quo minùs ea, quæ intùs sunt, foràs emergant. Per universum ideò ventris mollis ambitum accidere solet, si qua hujus regio ex vulnere, contusione, abscessu, sinu, recente cicatrice, distractione debilior, pressione justò majore (235.) urgetur.

237. Huc igitur & referre licet ab observatoribus memoratas hernias lumbales, dorsales, tùm eas, quæ ad foramen magnum coxarum ossis, & ad perinæum, visæ, & internis quoque variis sedibus ita natas, ut extrinsecùs nullo tumore sese probant, & si quas alias imposterum praxis detexerit. Diaphragmate laxato, læso, vicina abdominis contenta versùs pectoris cavitatem propelli posse, inque hanc irrumperè observatio docuit.

238. Uti autem sede differunt abdominales herniæ, ita non minùs partibus elapsis. Undè varias quoque denominationes obtinuêre. Frequentissimè omentum, aut intestinum, aut utrumque includunt, dicunturque ἐπιπλοοκήλη, ἐντεροκήλη, ἐντεροεπιπλοοκήλη. Nonnunquam & ventriculus subest: quam κήλην πυελοκήλη vocare licet. Aliàs vesicæ urinariæ pars in viris ad inguen, & vel ad scrotum usque protruditur; in fœminis etiam quando-

quæ ob graviditatem pressa descendit, vulvamque inter & anum lotio turgens prominet : hæc κυσικήλη; cujus species etiam prolapso utero sese adungere solet. Nec vel uterus ab hoc vitio immunis dicitur : quæ ὕσερωκήλη. Aliarum partium similis ratio est.

239. Scire etiam expedit, intestinum quandoquæ non toto sui cavi ambitu, sed parietis sui aliquâ tantum sede in processum diductâ, intrâ saccum herniæ recipi, complicato dilatationis (203, 1) situs perversi vitio. Id ipsum & vesicæ, & fortè matrici quoque accidere potest, labe congenitâ, aut post inductâ.

240. Impedimenta functionum, quæ ex his vitiis (232 ad 240) profluunt, innumera sunt & pro diversitate dimotarum partium valdè diversa, tùm verò præsertim periculi plenissima, cum strictius sacci hernialis ostium & reversionem partis intus susceptæ prohibet, & huic compressæ morbum angustiae (209, 3) inducit, quo tùm meatus occludatur, tùm motus humorum per vascula supprimatur : undè, præter alia gravissima mala, inflammatio nascitur, quæ plerumquæ brevi in gangrenam transit.

241. Prostant & exempla Ἐγκεφαλοκήλης in recens natis infantibus, parte quâdam encephali per hiatus calvæ extorsum protrusâ, atque in tumorem integumentorum receptâ. Cranii ossium

mollitudo nimia, inæqualis, aut defectus; hydrocephalus; pressio capitis intra uterum & in partu protractiore violenta, inæqualis, in causâ esse possunt.

242. Γλωσσοκήλη, linguæ hernia, dici potest, quandò lingua justò mobilior, in fauces revoluta, nixu deglutitionis intra ostium pharyngis impacta hæret in cavitate non suâ, hancque & proximam spiritus viam quandoquè obturat non sine præsentis vitæ discrimine. Linguæ, ob frenulum brevius, aut ultra modum & præter necessitatem sectum nimia mobilitas (224) in recens natis fugendi cupidis, hoc malum infert. Memorantur & oculi vitia, nomine ὀφθαλμοκήλης huc referenda. Uvea cum intra sinum corneæ relaxatæ sese immittit, staphylomatis ea species ad hernias pertinet: uti & lentis crystallinæ, per pupillam in anteriorem oculi caveam propulsæ, ponè corneam decubitus, in utroque oculo observatus.

243. Musculi deniquè & horum imprimis tendines, si de suis sedibus exsiliunt, ob laxata aut rupta, quibus continentur, vincula ac fascias, insequente ut plurimum violento spasmo, situs vitium patiuntur, quod hujus etiam loci est.

244. Aliud herniæ genus est, quandò pars in semetipsam revolvitur, ac suum intra cavum recepta hæret, ideòque in opere suo turbatur. Quod malum volvulus aut intus susceptio dicitur, nec nisi

in intestinis locum habet, quum aliqua pars istius tubi contractior in vicinam ampliorem compulsa irrumpit, hujusque cavo conclusa retinetur.

245. Laxa mobilitas intestinorum, magna sensilitas, facilis & dilatatio à contentis, & vicissim à spasmis contractio, faciunt hoc vitium crebrò nasci, si quæ violenta commotio, vomitus, irritatio ab acribus, inflammatis, lumbricis, &c. accesserit. Nec tenuia tantùm, sed crassa etiam ei obnoxia.

246. Susceptio autem vel fursùm vel deorsùm fit, eademque ad variam profunditatem varioque numero. Aliàs plenaria, vel perfecta est, cum universus fistulæ ambitus, unà cum suo mesenterio subintrat: aliàs imperfecta ac levior, quandò pars peripheriæ modo, præsertim à sede mesenterii remotior, implicatur.

247. Pertinax malum, productâ obstructione (209, 1.) tubi intestinalis, omnem primarum viarum functionem turbare, natoque ileo celerem inducere mortem potest. Sæpiusculè tamen etiam innocuè fertur, si spasmus, inflammatio, impedimentum materiæ ejiciendæ, abest.

248. Procidencia, πρόπτωσις, (225), ab herniâ differt, eò quòd ponat partem mollem, quæ secundam naturam intùs recondita est, è sede suâ ita dimotam,

ur per hiatum aliquem, vel naturalem, vel vitio natum, nuda foras effundatur. Undè simul patet, non omnes vulgò dictos prolapsus hujus loci esse.

249. Propriè huc referatur Ani procidentia, cum postrema tubi intestinalis pars, cui recto nomen, relaxata per podicem descendit atque inversa excidit, bursulæ aut farciminis in modum foras propendens. Ex quo, præter alias noxas, etiam dolor, inflammatio, gangrena, consequuntur, maximè si quod elapsum est, sphinctere ani valentiùs contracto stringitur. Producent hoc vitium, quæcumque aut intestinum ipsum, aut nexum ejus cum vicinis & stabilem positum infirmant, diarrhœa diuturna, dysenteria, tenesmus, creber acriorum purgantium usus, fex dura, sicca, ægriùs, nec nisi validis conatibus extrudenda, hæmorrhoides, escarides, ulcera, vulnera levatorum ani, &c. His quidem debilitatum intestinum leviores etiam nixus ferre non potest, quin remisso sphinctere elabatur.

250. Uteri procidentia, ubi simile priori (249) vitium patitur in fœminis uterus, qui per vaginam devolutus foras protuberat, isque vel inversus, vel non inversus.

251. Inversi uteri prolapsus dicitur, cum ejusdem fundus inversus intrà apertum os internum sese dimittit, ac per

vaginam descendens, formâ plerumquë globosâ, ex partibus naturalibus propendet. Cujus mali varii sunt gradus ad summum usque, ubi totus uterus elapsus tumorem facit, qui etiam vesicam illi adhærentem intus comprehendit. Puerperio sæpissimè supervenire subitò hæc affectio solet, cum aperto etiamnum post partum ore interno, uteroque nundum condensato, rudiore manu valentius protrahuntur secundæ: rarissimè, si unquam ex doloribus partum insequentibus. Aliàs tamen & virginibus mulieribusque nunquam puerperis, paulatim & tardiore progressu, accidit marcescente ob ætatem provectam utero, multâque pinguedine aliâve materie intrâ ventrem accumulâtâ deorsum truso. Multiplex autem, quæ ex hoc vitio nascitur, functionum læsio facilè patet. Si pars prolapsa contrahente se ore interno premitur, inflammatio, gangrena, mors inopina sæpè instat.

252. Quod si verò sic dicta ligamenta, quæ uterum in suâ sede continent, hujusque & vaginæ contextus, ac ceteræ partes vicinæ relaxantur; uterus totus, præeunte ore interno, descendit, & ex pudendis prolabitur, tumorem intrinsecus creans, qui os internum prodit. Hic uteri non inversi prolapsus (250) major, minor, & virginibus & maritatis infestus, quandoquë congenitus, tumque falso nonnunquam ad ambigui sexûs confor-

mationem relatus. Nascitur omni causâ, quâ, aut universum corpus, aut speciatim partes genitales præter modum flaccescunt. Undè calidæ abusus, flores albos diuturnos, partum laboriosum, neglectum à partu decubitum, &c. consequi solet. Uterus quoque in modum schirri induratus, tumefactus, valdè ponderosus, vi vaginæ illatâ, sibi viam ad descensum parat.

253. Vaginam præsertim prolabi frequentissimum est, & modo quidem duplici. Vel enim ora circum circa relaxata, in modum botuli, variâ longitudine, ex pudendis dependet: vel pars tantum aliqua tunicæ ejus resoluta descendit, quæ non maturè reducta, aëre, attritu, pressione irritata, nonnunquam in vastum tuber, sarcomati simile, augetur, incautisque specie prolapsi uteri imponit. Iisdem ceterum causis (252), necnon rudiore cunni tractatione, oritur hoc vitium, multisque incommodis molestum est.

Facilè autem perspicitur, memoratas (250 ad 253) procidentias multimodis inter sese complicari posse, aliamque ex aliâ consequi.

254. Oculus, *πρόπτωσις*, aliis *ἐκπίεσις* patitur, cum inflammatione, hydrophthalmiâ, aliâve causâ distentus, aut nato intrâ orbitam tumore pressus, è sede suâ prorsum, vel ad latus propelli-

tur, ut palpebris contineri nequeat. Lingua similem in modum ore extruditur.

255. Multæ præterea internæ partes, uti encephalon, pulmo, omentum, intestina, splen, &c. per vulnera & ulcera in cavitates penetrantia foras prodire possunt. Quo pertinet uveæ oculi prolapsus, cum hæc tunica per corneæ ruptæ, incisæ, erosæ, aperturam protrusa tuberculum excitat, *σαφέλωμα*, *μυοκέφαλον*, *μήλον*, *ήλος*, pro variâ similitudine dictum.

256. Aberrationum (225) denique multiplex genus superest, quæ partibus mollioribus eum in modum accidunt, ut nec herniis, nec procidentis, annumerari possunt, haud minùs tamen memorabiles, quia sanitatis functiones sæpè magnoperè pervertunt. Viscerum situs alienati, intestinorum contorsiones & nodi, testium intrà abdomen, aut ad inguina retentio, oris uterini obliquitas, &c. hujus loci sunt. An & incongrua fœtûs sub partu collocatio? An conceptus extrauterini?

257. Fatendum nihilominùs, haud rarò occurrere id genus errores, qui, ut enormes videantur, œconomiam tamen nequaquam turbent, nec adeò inter morbos referri mereantur (38).

258. Porro numerus partium vitiosè excedere aut deficere potest. Exuperantia rarò morbus est, cum functiones non

admodum lædat , ut sextus digitus , tertius testiculus , &c. Rerum verò , quæ præter naturam sunt , ratio hoc loco haberi non potest. Defectus tamen plerumquè impedimento est , hinc morbis accensendus , si in unica cadit instrumenta , aut in illa quorum gemina quidem , vel plura corpus habet , sed quæ , si quod consortium deest , hujus vicem reddere nequeunt. Levioris autem & maligni ingenii est ex eo , quod partibus quibusdam haud ægrè caremus , inferre præter omnem utilitatem nobis à naturâ datas esse.

259. Conformatio uti primariò ad usum , deindè & ad pulchritudinem comparata est , ita cum deflectit à naturæ ordine , aliàs turbatis functionibus morbos parit , aliàs deformitates tantùm innoxias , quæ rarò Medicum occupant. Hæc igitur vitia qui dijudicare volet , cogitet , dimensionis limites non in omnibus & singulis partibus adeò strictos esse , quin multiplex varietas sanitate illibatâ feratur ; neque idem cuivis homini vel nationi pulchrum aut deforme videri.

260. Magnitudo etiam suos excessus ac defectus patitur , aut morbis , aut turpitudinibus adnumerandos , qui tamen magis in singulis partibus , quam in universo corpore spectari debent. Sanitas ingentem staturæ humanæ diversitatem admittit , pumilioni aptè conformato

haud minùs propitia, quàm vasto gigante. Nec, quæ ex variâ ætate solummodò profluit, quantitatis differentia in toto corpore hujusve partibus; etsi functionum imperfectionem creat; morbosa dici potest, quum naturæ legibus consentaneâ sanitatis latitudine contineatur.

261. Simplex auctæ quantitatis vitium est enormitas, cum pars immodico materiæ propriæ appositu ultrà, quam par est, augefcit, conformatione ac substantiâ illibatis. Debetur itaque excessui nutritionis, quem affluxus humorum ad partem justò major, trajectus difficilior, vasculorum inertia, hinc nutrimenti accumulatio, aut & detritio solito minor, producit. Eò autem, præter alia multa, defectus nutritionis in aliis partibus etiam conferre potest. Datur fortè & ab ortu quædam dispositio singularis huic incremento favens.

262. Tumorum natura magis composita est: ponit enim ferè alienum quid, sive fluidum, sive firmum, partibus impactum, vitia humorum, meatuum, morbos instrumentarios alios, &c. diversimodè inter se complicata, quorum efficaciam non tantum volumen partium augeatur, sed substantia quoque, figura, aliæve qualitates sensibiles præter naturam mutantur. Undè hoc loco nondum intelligi possunt.

263. Par ratio est minutæ quantitatis,

quam aut mutilatio inducit tollendo partem instrumenti, aut multiplici vitio nascens succorum replentium, nutriendum defectus, aut causa ipsam materiem solidam liquans, deterens, corrodens, dissipans. Comitatur adeò morbos varios infra demùm exponendos.

264. Denique & partes, quæ in se spectatæ vitio magnitudinis non laborare videntur, collatæ cum aliis, proportionem (212.) excedere, aut deficere ita possunt, ut eâ de causâ homini major ad certos morbos proclivitas nascatur, dicique debeat, si quidem id morbi nomen non meretur, seminium tamen morbi esse, quod aliàs ab ortu adnascitur, aliàs post demùm ex ossium præcipuè affectionibus contrahitur. Constans proportionis diversitas, quam sexus & ætas monstrat, non pulchritudini tantùm, sed & utilitati servit.

Morbi Fluidorum.

265. HUMANI corporis molem longè maximam ex fluidis constare, uti Chemia docet; ità his ad exequenda vitæ & sanitatis munia haud minùs opus esse, quàm firmis partibus, ex Physiologiâ certum habetur.

266. Nec perindè est ad functionum integritatem, qualis humor corpore contineatur, aut quâ copiâ, quove loco sit,

moveaturne, an stagnet; retineatur, an excernatur: sed habent ista omnia suum quoquè à naturâ constitutum modum, à quo si deflectunt, morbus imminet.

267. Itaque, expositis solidorum vitiis, affectionum, quæ in humores cadere possunt, doctrinam simili methodo (122) nunc quoque tradi oportet. Fatendum quidem, veteres haud adeò malè iisdem inter morborum causas locum dedisse; quum solitariae plerumquè illibatâ sanitate ferantur, nec nisi læsis demùm solidis in morbum erumpant. Rationes tamen (123, 124.) datæ prævalere videntur.

268. Humores corporis humani à Pathologo, vel in seipsis seorsim, vel comparatè ad partes firmas, quibus continentur, spectari possunt. Utroque modo ingens vitiorum numerus occurrit, quorum illa absoluta, hæc relativa dicere, singulasque classes in sua porrò genera distribuere liceat. Ordinem pertractatio prodet.

Morbi coherentiæ in humoribus.

269. OMNIBUS fluidis commune est differre à solidis. Differunt autem solâ materiæ cohæsiōe (150.), cujus exiguum quidem, at tamen aliquem habent gradum. Cohæsiō nulla non fluidi minùs, quàm sòlidi conceptum tollit: uti con-

trâ auctior fluidum in solidum mutat. Hujus igitur dotis, ut simplicissimæ, manifestissimæ & maximè universalis, hîc primùm ratio habenda.

270. Vis cohæſionis non eadem secundùm naturam obtinet in omnibus & singulis humani corporis humoribus : sua cuique data est, quâ, quibus destinatur, muniis aptissimus reddatur. Fluiditatis ideò scala haud secùs, quàm firmitatis (155, 155.), multos comprehendit gradus valdè differentes, sive succos diversos ejusdem hominis inter se compares, sive eosdem spectes in diversâ ætate, sexu, temperamento, vitæ genere, &c. Nimirum suos sibi humores propriis viribus fabricat corpus sanum, hinc suum ad modum fingit. Hæc sani morbosique in isto genere mensura (155, 156.)

271. Cohærentiæ inter particulas humorum duo sunt vitia, excessus ac defectus. Hæc tenuitas, dissolutio ; illa tenacitas, spissitudo, lentor dicitur. Utraque aut universos humores, aut singularem quemdam occupat, toti corpori, aut parti modò nociva.

272. Qui considerat Naturam non frustrâ hominis sani liquoribus diversissimos cohæſionis gradus tribuisse (266.) ; his auctis aut imminutis prorata decreſcere aut augeri fluiditatem, pro hujus autem ratione pariter minùs, magisve expeditos reddi humores ad motum, transitum per

canales , divisionem , mixtionem , abstersionem , excretionem , &c. dein cum his confert multivaria munia , quæ pro œconomix humanæ ejusque functionum integritate obire debent: eum latere nequit damnosa utriusque mali (271.) potestas. Ut meritò quis miretur potuisse & hujus rei inter Medicos controversiam esse.

275. Conditionum , à quibus fluiditas nostrorum humorum pender , idea ad intelligendam ejus vitiorum naturam prælucebit.

274. Humores corporis humani omnes & singuli , quos sensuum ope examinare licet , ex diversâ materie mixti ; parte tantum aliquâ ex se fluidi sunt , alterâ parte solidescunt ; ut crassamenti fluor vehiculo interfluenti debeatur , hujusque ad illud varia proportio diversos fluiditatis gradus constituat , altero alterius cohæSIONEM moderante.

275. Pars fluida mera ferè aqua est (132 , 133.) , quâ demptâ reliquum spissescit. Undè quò tenuior , crassiorve humor est , eò plus minusve aquæ exhibet.

276. Crassamentum ex triplici materie , salinâ , inflammabili , terreâ (134 ad 137.) coalitum , per aquam variâ proportionem diffusum , indè concrefcere non potens , hanc vicissim suâ quoque spissitudine plus minus inviscat.

277. Differentiam itidem facit mutua proportio trium materierum (276.) , quæ
crassamentum

crassamentum efficiunt. Abundans terra & phlogiston magis inspissant.

278. Est & mucosum quid in humoribus, lentum, in fila ductile, gummi vegetantium simile, crassamenti portio minus oleosa, mixtione singulari blanda, renax, simulque aquæ amica & bibula, quæ adhæsione suâ fluorem lubricum efficit, eò quidem viscidior, quò magis abundat.

279. Legitimæ istarum materierum (274 ad 278.) proportioni accedens mixtio æquabilis, quam motus & calor præcipuè conservant, suam cuivis humori consistentiam determinat.

280. An etiam sphærica molecularum figura, quam microscopium detegit, minimos contactus admittens, ad leviores cohesionem disponit? Multa sunt, quæ subitare jubent. Videas & globulos sanguinis, cum pressi aliam induunt formam, non cohærescere: nec certè, nisi influente vehiculo disparati, fluiditatem tuentur. Oleum non ideò fluidius est, quia sese in sphærulas colligit cum aquoso latice subactum. Ceterùm qualem particularum figuram fluida homogenea præ se ferant aut exigant, Physici determinent: de humanis liquoribus quod Medico scitu utile videtur, meum est hoc loco proponere.

281. Liquet hinc multa esse, quorum concursione iusta humorum fluiditas nas-

citur, hujusque adeò vitia in varias abire species, à Medico probè distinguendas.

282. Spissitudo (271.) quidem aliàs defectum ponit aquæ, quo fit, ut crassamenti particulæ inter se nimis propinquæ tenaciùs cohærescant. Potus parcior, excretiones lymphaticæ auctiores, dissipatio humidi per motum, calorem, &c. absorptio, aut restagnatio ejusdem à crassamento separati, id malum producant.

283. Nascitur & iners gluten in humoribus, cùm crassamenti pars mucosa (278.) ultra modum increfcit. Hæc, aquæ amans, hujus quoque abundantem copiam imbibere ac inviscare potest. Undè species hæc tenacitatis à priori (282.) diversissima ortum habet ex alimentis glutinosis, coctione debiliore, circuitu humorum languente, intermisso motu animali, frigore, retentis excrementis mucosis.

284. Crassamentum porrò superpondio suæ terræ (276.), in quâ vis cohæsionis maxima (142.) laborare potest, atque hinc tenacitas nasci pessima, sicubi & aquæ defectus (282.), ut fieri assolet, accesserit. Discrepat autem hoc vitium pro vario terræ cum materie salinâ aut oleosâ connubio. Acor inhærens stipticum producit concrementum, quo vel aquosus etiam latex solidescit. Pingui obvoluta terrâ piceam in amurcam abit, quæ, resinæ in modum, aquam respuens re-

naçissimè vasis adhæret ægrè abstergenda. Terrestria, dura, sicca, austera, adstringentia, farinosa non fermentata, glutinosa, pingua, coagulantia, refrigerantia, stupefacientia, titulo cibi, potûs, medicamenti, veneni ingesta materiem dant, cui si junguntur causæ (282-), quæ mobilia expellunt, crassiora figunt, tantò citiùs, certiusque humoribus ista labes inducitur.

285. Effectus generales spissitudinis facile perspiciuntur: primarii sunt tardior humorum per canales transitus: hinc stagnatio, obstructio, infarctus, secretionum ac excretionum impedimenta, multifarium denique tumorum genus.

286. Alterum cohærentiæ vitium, tenuitas humorum (267.), quæ fluiditatis excessum ponit, haud minùs multiformis est, hinc pro differentiis suis ordinatè exponenda.

287. Prima eaque simplicissima species aquosa dici potest, cum ortum debeat aquæ humores inundanti, quâ reliqua principia nimis soluta & diffusa in moleculas justò minores, laxiùs cohærentes tenuantur. Sequitur abusum aquosorum, maximè calidorum, internum, externum; vitam desidem in aëre humido; solidorum debilitatem (157.), torporem (196.); evacuationes nimias; hinc circuitus vitalis languorem; caloris nativi defectum; retentionem excre-

menti aquosi. Producit autem suas vicissim causas, solida inundata infirmando (262.), torpesciendo (198), hinc tumores aquosos, frigidos, omniumque functionum lentorem.

288. Altera tenuitatis species, composita, acrimoniam aquæ junctam habet, cujus vi solvente terreum ac oleosum crassamenti magis divisum, vehiculo aqueo æquabilius solutum dilutumque, arctiorem cum hoc copulam init, atque adeò à mutuâ cohæsione prohibetur. Acre insuper, sicubi salinæ est indolis, amicum aquæ, hanc trahit, ægriusque dimittit. Nascitur dissolutio hæc ex acri multum variante, vel inquilino abundante magis evoluta, corrupto; vel alieno cibi, potus, æris, medicamenti, veneni, miasmatis, contagii, ingesto vel foris admoto, noto vel ignoto: quâ de differentiâ suo deinceps loco dicetur. Tum quoque de effectibus indè oriundis constabit, ut qui pro acrimonix diversitate multum discrepant. In genere tenuis humor, valdè meabilis, acri suo simul irritans, rodens, facili e vasculis elapsu hæmorrhagias, diarrhœas, ptyalismum, urinas & sudores colliquantes, ecchymoses maculas, exanthemata, pustulas, pluresque alias circulationis, nutritionis, secretionum ac excretionum turbas inducit.

Acritates Morbosæ humorum.

289. QUOD SI porrò humores spectentur, uti in homine sano insunt, facile liquet, non solâ fluiditate suis aptari muniis; sed requiri alias insuper dotes, easque vel communes omnibus, vel singulis proprias, quibus & ab aliis liquoribus non humanis, & inter sese discrepent.

290. Communium princeps est blandities, quam, paucissimis exceptis, omnes nostri humores sani præ se ferunt. Huic igitur oppositum vitium acrimoniæ, cum frequentissimum sit, & multiplex, multisque modis damnosum, singularem meretur attentionem.

291. Acre in genere ratione corporis humani dicitur, quidquid pungendo, secando, rodendo, solidorum cohæSIONEM solvere, partibus vi sentiendi præditis dolorem inferre, & vi vitali (170) animatas ad contractionem stimulare valet. Aliud Mechanicum est; aliud Chemicum, hujusque obscurior vis agendi ex manifestiore illius utcunque intelligitur.

292. Acris Mechanici vis solvens, dolorifica, stimulans, ponit corporeæ massæ 1 figuram angulosam acutam, quâ penetrabilis sit & omnem sui motus vim in pauca modo puncta corporis, quod ferit,

imprimat ; 2 duritie gradum , comparatè ad corpus feriendum , majorem ; 3 motum , quo in sese mutuò incurrant.

293. Chemicæ acritudinis quanquam subtilissima fabrica aciem sensuum effugit ; ob effectuum tamen similitudinem par ratio esse videtur. Rigiditatis , acuminis , motus , ideæ & hic concurrunt , sed sano sensu , nec subtilius , quàm veriùs , adhibendæ. Actioni hujus acris favet fluor : ut adeò rigiditas nequaquam in universâ massâ , sed in minimis ejusdem particulis duntaxat ponenda sit. Nec & harumce figura exactè determinari potest , quæ fortè in alio atque alio acris genere diversissima est , nec profectò tam absolutè angulosa requiritur , quin & alia concipi queat. Motum denique hæc acria non tam aliundè præstolantur , quam infitâ suâ vi excitant , vi tamen vitali (170) simul adjutâ.

294. Quocirca patet posterioris tantum acrimoniæ (292) rationem hoc loco haberi , ut quæ sola humores ita inficere possit , ut partem eorum constituat.

295. Hujus verò multiplex origo clariùs innotescet , si , quibus ad eam averrendam Natura utitur , adminicula prius intelligantur.

296. Primùm quidem , quos homini cibos potusque in alimentum destinavit Natura , blandi sunt , mites , nec eminenti quodam acrimoniæ gradu pollent.

Doceant fructus , cerealia , legumina , carnes , pisces , aqua , &c. Luxus demum acris , aromatica , spirituosa , salina , amara , rodentia , &c. in culinas ac cellas convexit , gulæ irritamenta malis innumeris famosa.

297. Corpus prætereà , qua ostiis porisque patens introitum alienis concedit , janitore sensu custoditur , qui ab appulso acris irritatus motus ciet , quorum efficacia constrictis viis hostilis materies excludatur , aut aliquo usque admissa rejiciatur , saltem diluta ac obtusa utcunque mitescat.

298. Quum tamen & personata acritas subdolè irrepat , quæ positâ intus larvâ sese explicet ; & blanda quoque tum vi actionum vitalium , tum errore multiplici , intra corpus degenerare queant ; imò materie salinâ , cui acre potissimum debetur , etiam secundum naturam (136) undiquè perfusi simus ; huic quoque inevitabili periculo remedium præsto est sollicita blandi & acris permixtio , hujusque paucioris per abundantem illius copiam facta velut suffocatio. Etenim , si quatuor spectes principia (275 , 276) , nuspiam in humoribus micula datur salis , quam non & terra obtundat , & phlogiston molliat , & plurima diluat aqua. Lenis insuper mucus (278) per omnia se diffundens , acris mitificando , oblinendis solidis aptissimus. Nec dispar est

pinguedinis humoribus remixtæ utilitas. Idcirco etiam ad ingerendos cibos potusque fame ac siti compellimur. Crudum verò, quod in his est, itidem nonnisi per subtilissima oscula, hinc minimâ sensim quantitate, in interiora corporis admittitur, ut plurimo mox humore inquilino obrutum, tectam, quâ fortè pollet, acritatem exserere nequeat. Motus denique perpetuus, moderato calore adjunctus, mixtionem æquabilem curat conservatque, nec acre sine blando seorsum esse finit.

299. His verò omnibus nondum satistutum corpus sua etiam obtinuit emunctoria, per quæ, quod ingressum domari nequit, aut quoquo modo intus subnascitur acre, maturè, priusquam noceat, eliminari possit.

300. An & Naturæ humanæ facultas inest, moleculas acres, detritis aut intropressis angulis, in sphaerulas tornando blanditiem creandi? Non satis constat speciosam ideam æqualiter in fluidam solidamque acrimoniam quadrare. Credibilius profectò, mixtione Chemicâ (298) magis, quàm Mechanicâ rotundatione, id opus perfici.

301. Ex his itaque perspicitur, primum morborum acris fontem situm esse in multiplici commercio, quod homini vivo cum rebus externis intercedit (6). Aër, cibus, potus, medicamenta, venena,

miasmata, contagia, multivarium acre sic in humores a foris per diversas vias modosque invehunt; maximè, si blando sub vehiculo clam irrepit, aut variâ corruptione, mixtione, secessione, intus evolvitur, aut, quâ intrat, torpidior est vis vitalis (297), impetuve majore superatur.

302. Nascitur & acre cum sanum corpus necessariâ alimoniâ (298) non reficitur, eoque citius, quo vigor vitalis major: neque enim dissipat modò blandiora, sed & materiem salinam evolvit acuitque; ut adeò pabulo demulcente egeat.

303. Huc porrò referatur humorum circuitus naturæ modum excedens, cui immoderatio calor se comitem jungit. Neuter diu tolerabilis, quin aqua avolet, & inite oleum cum sale acrescat.

304. Stagnatio itidem nascentem ex æquabili mixtione blanditiem (298) tollit. Indè promptuaria acrimoniæ in partibus singularibus oriuntur, quæ noxas quaquaversum diffundunt.

305. Nihil tamen acrimoniæ ingenerandæ magis faver, quam anomalia illorum motuum, quibus coctiones, secretiones ac excretiones perficiuntur. Cruditas hinc, multiformis per spontaneam corruptionem degeneratio, incongrua separandorum permistio, aut miscendorum separatio, retentio materiæ excrementitiæ, majorque exasperatio, utilium

excretio aut ob confusas sordes depravatio, & quæ ex his profluunt, innumera humorum vitia.

306. His fontibus ortum acre, motu ac calore vitali incitatum, pruritus infert, dolores, spasmos, convulsiones, irritatis solidis motus humorum irregulares, constrictis canalibus immeabilitatem, erosis ecchymoses, evacuationes nimias, pustulas, ulcera, cariem, atrophiam, multasque alias functionum perturbationes. Hæc quidem omni humorum acrimoniæ communia sunt. Habet autem & unaquæque, ut natura discrepat ab aliis, suam sibi privatam insuper efficaciam. Quin & origo singulis non eadem est. Undè, præmissis generalibus, speciatim deinceps pertractari merentur.

307. Acor primis maximè viis infestus, tempore & sanguinem humoresque indè deductos subiens, nascitur ex usu diuturno acidorum aut acefcentium, quæ viribus corporis non subiguntur; aut quia ex se indomabilia sunt naturæ humanæ, aut ob virtutis coëtricis impotentiam. Debilitas igitur (157) solidorum universalis, aut privata viscerum primæ digestionis; irritabilitas (190) regulares horum motus turbans; inertia, defectusve succorum præparantium; circulationis & caloris naturalis languor; neglectus motus animalis, eò disponunt: ut pateat

cui maximè ætati, sexui, vitæ generi, hoc acre frequentius eveniat.

308. Qui hoc vitio laborant, his, præter modo memorata (306), acido aquam trahente, retinente, phlogiston supprime, terram solvente, pallet, friget corpus, laxantur solida, flexile (160, 3) fragile (161, 4) in ossibus nascitur, vigor circulationis, virtutisque vitalis, minuitur: undè crasis humorum vitiata, ineptitudo, ad æquabilem circuitum, assimilationem, nutritionem, aliaque mala innumera.

309. Acerbi hinc perspicitur natura, materies, & nocendi vis. Nascitur enim ex acido in multam terram defixo, jungitque acrimoniæ spissitudinem, quâ humorum coagula, obstructions refractariæ, vasorum constrictiones, &c. creantur (284, 285).

310. Acre alcalescens, volatile, purum, in humores inducitur abusu vegetabilium acrium, quæ hoc sale scatent; tum & eorum quæ nativo sani corporis sali admista alcali volatile ex eo evolvunt: cujusmodi sunt sales lixivi, sapo, &c. Aromata quoque calidiora, multum quotidie ingesta, dum perpetuo stimulo exagitant, igneâ vi sales nostros in id acrimoniæ genus acuunt. Fortè & venena quædam huc referenda. Actioni eorum favet calor intensior.

311. Proprium huic acri est humores,

dissoluto crassamento , nimis attenuare , ut incitato simul motu , irritatis solidis , erosus canalibus vix coërcendi hac illac effluant : undè quæ porrò consequantur mala , pronum est eruere (288.).

312. Putredo , affinis quidem priori vitio (310.), nequaquam tamen confundenda , compositum notat acrimoniæ genus , quo affecti humores simul & salem habent volatilem alcalinum , & oleum huic permistum acre , foetidum. Utriusque materiæ corruptio demùm putredinem constituit , & maximè quidem posterior , quam simplex alcali volatile etiam antevertere potest.

313. Ex diversis ideò causis etiam nascens pro fundamento habet spontaneam corporis nostri in hoc vitium proclivitatem (149.), in quâ tùm fovendâ , tùm ab excessu prohibendâ , mirabilem perpetuò solertiam Natura ostendit. Materiem itaque huic corruptioni præbent ipsi humores sani; victus deinde animalis , spontè aut vi præparationis in putredinem propior ; aquarum , aëris , putror corpore susceptus ; nidulantes in primis viis vermes; fomites ulcerosi , cariosi , cancrofi , gangrænosfi , &c. tabo in humores effuso inficientes. Excitant autem & accelerant motum septicum calor ingens , calor subito succedens frigori glaciali , agitatio nimia , stagnatio, aër non renovatus, cibi potûsque vigente vitâ defectus, suppressa

excrementorum ejection, medicamenta, venena, miasmata, contagia, quæ, etsi per se neutiquam putrescant, vi tamen fermentali, aut stimulante, admista humoribus, solidis vivis applicata, ociùs seriùs putredinem inducunt.

314. Nata hæc acrimonia, vitæ infestissima, humores dissolvit, ad nutriendum ineptos reddit, pingue eliquat, rancore inficit, solida irritat, erodit, tabefacit; hinc febres acutas, inflammationes, exanthemata, gangrænas, sphacellos, circulationis, secretionis, excretionis, omniumque functionum turbas creat sæpè nec naturâ, nec arte superandas.

315. Salis cibarii abusus, maximè cum potio aquæ parcior est, acrimoniam muriaticam per humores diffundit. Horum indè dissolutio, gravitas major, aquosæ mucosæque partis exasperatio, circulationis, calorisque nativi augmentum, pruritus, rubores, erosiones, putrida carnum tabitudo, aut majore excessu, impacto in terram sale, durities inflexibilis.

316. Par ferè ratio est acrimoniæ ammoniacalis, quæ salis nativi, aut huic adfinis, superpondium in nostris humoribus ponit, nascique potest, cum excretio salium legitima quoquo modo supprimitur, aut exsuperans alcalescentis vel acidi salis copia (307, 310, 312.) oppositi salis usu cicuratur.

317. Hæ quidem manifestiores sunt & frequentiores, quibus humorum massa inficitur, acritates. Multæ supersunt aliæ, quæ aut ad singulos tantum humores pertinent, suo deinceps loco exponendæ, aut commodiùs inter morborum causas recensentur.

Morbi humorum ex secessione particularum.

318. Si porrò cogites, requiri, ut inter diversas materias, ex quibus humores constant (274 ad 280.), aliquis detur adhæSIONIS gradus, qui mutuum mixtionem tueatur, caveatque divortium; novum sese offert vitiorum communium (289.) genus, quod nimis facilem ponit aliarum ab aliis secessionem. Ex quâ difcrasiâ multorum morborum origo ac natura intelligitur.

319. Fac portionem aqueam cum crassamento (274.) laxiùs justo cohærere; mutuâ secessione nascetur hujus inspissatio, inertia. & reliqua mala, ante (285.) recensita. Tenuis contra pars, vasculis haud ritè cœrcenda, perspiratione, sudore, urinis, alvi excretionem, salivationem, præter modum auctis è corpore, non sine multiplici noxâ, effluet (288.), aut in cavitates majores minoresve congesta, stagnans, varias hydropum species producit.

320. Prout autem crassamentum quoque diversimodè à naturali suâ crasi deflectit, vitiatâ aut proportionè, aut indole suarum partium (276.); ita ex secessione nascens concretio (319.) alia atque alia erit. Exsuperans mucus (278.) viscida, gummosa, pultacea dabit spissamenta: abundans evolutumque phlogiston pingua, sebacea, resinosa, amurcosa: copiosior denique terra, ob parcius oleum macilentior, infixo propius sale acido stiptica, haud sat solubilis; cùm de aquoso latice elabatur, calculos, tartaros, osseas lapideasque partium indurationes generabit.

321. Difficile fuerit omnes explanare modos, quibus ista affectio in humores invehitur: credibile tamen magnam partem deberi erroribus in diætâ diù multùmque admissis, coctionum vitiis, vehementibus aut diuturnis circulationis ac motuum vitalium turbis, spasms, excretionibus inordinatis, &c. Quo & re-
tuleris fortè hæreditatem.

Morbi humorum singularium.

322. PLURIMA sunt, quibus fucci C. H. inter sese discrepant, eaque præcipua; quum suis quemque muniis aptum reddant. Quocirca & multivarii in hoc genere occurrunt à statu naturali deflexus, tam ob frequentiam, quàm ob perpe-

tuum ferè cum vitiis universalibus nexum, apprimè notandi; ut ideò ordine pertractari mereantur.

Chyli vitia.

323. CHYLUS primarum viarum pro materie habet succum ex cibo potuque ingestis prolectum, liquoribus inquilinis, qui in hanc officinam confluunt, permistum aëre, calore, virtute organorum primæ digestionis mutatum. Naturam ergò eorum, quibus constant, & virium, quibus mutatur, gradum sequitur, duplicique ex hoc fonte vitiosas non minùs quàm laudabiles trahit qualitates.

324. Quum verò nutritioni destinatus per universum corpus distribui debeat, vitiatus non primis tantùm viis nocet, sed labem quoque suam in omnes humores diffundit; ut meritò plerarumque cacochymiarum origo indè repetatur.

325. Acrimonia acida, suis ex causis nata, (307.), in chylo frequens, ventriculo ac intestinis irritatis producit ructus acidos, cardialgiam, voracitatem, flatum, tormina, spasmos, pyrosin: bilem præcipuè enervat, virore inficit & acore, qui hinc ad feces etiam alvinas deducitur: acri denique in systema circulationis delato oriuntur mala (308.) enumerata.

326. Chylus austerus generatur ex ingestis similibus, immaturis, acerbis, vinis austeris, abusu absorbentium, adstringentium, coagulantium; maximè sicubi copioso liquore non diluuntur, inque debili corpore, nec vi saponaceâ bilis, nec valido motu animali, tenuantur. Producit dolores in primis viis stringentes, algentes, anxietatem: introitum in lactea sibimet impedit, hinc restagnans, cum fece mistus immeabili, suo privat nutrimento corpus, aut introadmissus glandulas mesenterii obstruit, vitioque in reliquos etiam humores diducto noxas (285, 310.) infert.

327. Putridi, nidorosi, in hoc succo multiplex origo (312, 313.) Id semel susceptum ubi menstrua primæ digestionis, præsertim bilem infecit, tubique alimentaris parietes suâ mephiti imbuit, vi septicâ dein in ingesta grassatur, latèque per corpus se spargit. Indè ructus nidorosi, fordes oris, linguæ, faucium putridæ, fitis, prostratus appetitus, nausea, vomitus, anxietas, calor molestus, diarrhœa putrida, aphthæ, raptoque in interiora putrore mala suprâ (314.) memorata.

328. Acre oleosum, rancidum, ambustum, innascitur chylo ex ingestis pinguibus, rancidis, tostis, frixis, per menstrua primæ digestionis non subactis, calore nimio interno adustis. Facit autem

cardialgiam urentem , ructus ac vomitiones materiæ amaræ , pinguis , rancidæ , acris , igneæ , horrorem ciborum , sitim summam , siccitatem , calorem anxium , feces alvi pingues , fervidas , fœtentes , urinam flammeam , acrem , calidam , spumofam , febres ardentes , erysipelas , inflammationes acres , vix resolvendas hisque longè pejora symptomata , sicubi & pinguedinem corporis simili tandem vitio imbuerit.

329. Chylum nimis glutinosum creant farinacea cruda , pultacea , frigida , tenacia , gelatinosa , pinguis , diù multumque ingesta , defectu aut inertia liquorum digerentium , imminutis viribus coëctricibus , languore circulationis , omisso motu animali , non ritè subacta (283 , 284.) Ex quo prostratus appetitus , repletionis sensus , nausea , vomitus glutinis , salivæ , bilis , ceterorumque hujus menstruorum inviscatio , ventriculi ac intestinorum laxitas , inertia , secretio & absorptio chyli impedita , alvus tarda & sine dolore tumens ; acida , putrida , rancida ex stagnatione corruptio , mesenterii obstructio , muci in omnibus humoribus abundantia (283) , & qui hinc profluunt effectus (285.) nascuntur.

330. Chylus porrò in sanguinem delatus , uberum muliebrium fabrica in lac mutabilis , huic ideò similis , triplici quoque constare videtur mate-

rie, fero, cremore, caseo, æquabiliter inter se mistis, proportionatis, cohærentibus. In fero aqua, in cremore phlogiston, in caseo salinoterreum dominatur. Singulis suus est ad nutritionem usus. Credibile igitur posse & proportionis vitia in his nasci, quæ requisitas chyli doctes pervertant, & cohæfionis mutuæ gradum augeri nimis, minui, ut tardiùs aut citiùs, quàm par est, à se mutuò secedant. Applicentur huc suprâ exposita (274 ad 280, 282 & seq. 318 ad 321.)

331. An pingue in chylo abundans, laxiùsve cum ceteris hujus particulis cohærens, causa nimix obestitatis? Pinguedinem certè corpori ex oleo chyli venire in mollem cellulosam deposito, multa docent. Cremorem quoque simplici potius mixtione, quàm verâ solutione, cum lacte cohærere, spontanea ejus per moram secessio indicat. Alimenta igitur pingua largè ingesta si chylum copiosâ obruunt adipe, quam nec vis humorum, bilis maximè, saponacea, nec vegetus circuitus, auctiorve calor & motus animalis, ritè subigant, eâdem facillè fecedente farciri corpus necesse est.

Sanguinis affectiones.

332. SANGUINI par alius liquor extra corpus animale, aut naturâ, aut arte productus non invenitur. Est ergò solius

vitæ animalis effectus eò singularior, quòd exsanguia etiam alimenta pro materie habeat.

333. Constat quidem, ut ceteri nostri humores, parte tenui & crassâ (274.), similiaque etiam principia examine Chémico prodit (275., 276.); quin & communis eorum veluti mater est: at multùm tamen discrepat à singulis. Undè operæ pretium fuerit, quæ sibi priva habet, prout absque violento experimentorum apparatu se manifestant, priùs proponere, ut discrasiae ejus deinceps clariùs intelligantur.

334. Sanguis, ex sani hominis vase sincerus fluens, calens, pelvi exceptus, crassiusculum refert liquorem, homogenei ruboris, opacum, ad tactum pinguem, glutinosum.

335. Halitus tùm spontè assurgit foetidulo odore percipiendus, qui campanâ frigidâ exceptus, densatus, in laticem abit excolorem, non nisi odore ab aquâ purâ distinguendum. Hæc pars sanguinis volatilior, mole paucâ est, quam sui generis spiritum dixeris.

336. Frigescens interea, qui restagnat, sanguis, quâ aëri contiguus est, totus in spissamentum cogitur tremulum, æqualiter rubrum, sevo simile igni liquato, quod frigore iterùm consistit: ut pateat motu ac calore vivi corporis fluorem ejus æquabilem conservari.

337. Dein ex superficie ac ambitu coaguli undèquaque tenuis exsudat humor, qui paulatim adunatis guttis auctior seorsim circum placentam rubram diffluit, hancque pro ratâ jam contractiorem, à contactu pelvis undiquè semotam, in modum insulæ natare facit. Hic alter secessus in serum & crassamentum, materias diversissimas.

338. Serum spontè fluens, quantavis aquæ copiâ facilè, æquabiliter diluendum, diaphanum, subflavescens, saporis leviter falsi, mucosâ materie (278.) valdè dilutâ viscidulum, igne 150 graduum thermometri Fahrenheitiani, infar albuminis ovi, citò absque multâ dissipatione concrescit in massam albidam, seissilem, quæ porrò calore modico fota in duas partes secedit; alteram volatilem, fluidam, excolorem, aquæ simillimam, copiosissimam; alteram solidam, corneam, cum tenacitate fragilem, ex cinereo subflavam, nunquam ex sincero sero rubram aut rubro-atram, mole exiguam, aquâ insolubilem. Hæc tertia separatio, quæ aquam & gluten sale imbutum, naturamque albuminis in hoc sero prodit.

339. Crassamentum rubrum, etsi homogeneum videtur, facili tamen operâ in diversa abit. Quod si enim super linteo expansum adfusâ iterùm iterùmque aquâ non calente abluitur, rubor tandem

omnis per aquam se diffundit , cumque hac per poros lintei transit , relictâ immeabili massâ , ruboris experte , fibrosâ , membranaceâ. Hæc quarta secessio in partem rubram & fibrosam.

340. Fibra sanguinis , iteratâ ablutione albescens , ex filamentis velut in membranas contexta , aquâ non solubilis , fero igne coacto (338.) haud absimilem refert materiem. Hæc crassamenti basis , à portione rubrâ longè diversa ; diversa etiam à fero ; quum spontè solidescat sanguine frigente , stagnante , ab fero semet segreget , rubrisque particulis amicior has trahat sibi que adunet. An igitur inest etiam in sanguine vitali ? An nascitur demùm in effuso ? Inest certè materies fibræ , sed coire impedita , dum motu vitali calet sanguis. Nec abesse constat , quia microscopio non detegitur.

341. Rubra pars , per aquam diffusa (339) , plure etiam aquâ in infinitum ferè diluta , dilutiùs quidem rubet , nunquam tamen flavescit : uti nec recentis sanguinis guttula , millecuplo aquæ tepidæ permixta , in flavedinem diducitur , sed rubella manet. An ergò rubor ejus flavedini addensatæ tribuendus ? Vix credibile.

342. Eadem , aquæ intermixta , cum hac per poros lintei trajecta (339) , quamprimùm igne acta bullit , secessum molitur , inque floccos pallidè rubentes co-

acta, colo separata, aquam rubore carentem reddit. Quippè serum ex parte, una cum rubrâ sanguinis portione, vi aquæ ablutum, calore in albidos floccos coagulatum, dum deserit aquam, secum trahit inviscatam simul rubedinem, alboque & rubro permixtis pulticulam pallidiorē nasci oportet. Non igitur rectè dixeris, rubrum aquâ verè solutum fuisse. Imò fugit aquam, nec, nisi interventu feri, per eam diffusum manet, illo vi coaguli secedente & ipsum secedit.

343. Puls rubella (342), leni calore siccata, massam dat attrorubram, friabilem, igne majore liquecentem, ardentem, quæ Chemico apparatu explorata magnam vim olei, ac tantillū terræ ferruginosæ, promit. Naturam igitur resinæ habet.

344. Undè liquet, dari in sanguine, præter spiritum (335), triplicem materiem contrectabilem, serum, rubrum & fibrā. In sero aqua prævalet; in rubro phlogiston; in fibrâ terra. Priori fluiditas debetur; alteri rubor; posteriori crassities. Adeò autem inter sese discrepant ut motu vitali quidem æquabiliter permixta conserventur, intimè tamen cohærescere, ac chemicè soluta esse dici non possit.

345. Nonne igitur magna est sanguinis cum lacte similitudo? Major certè, quàm cum alio quovis nostro humore. Compara cum sero lactis serum sanguinis.

nis, cum cremore rubrum, cum caseo fibram! Multa invenies utrinque communia, siue materiem spectes, siue cohæSIONem & secessum (330, 331.). Ut fortè non ineptè lac sanguinem album, sanguinem lac rubrum appellaveris. Disparitatem, quæ lac inter & sanguinem obrinet, utcunque explicant vires circulationis, pressionis in canalibus, caloris, aëris, conjunctæ, quibus sal acescens in alicalescentem, fermentabile in putrescibile mutatur, phlogiston magis evolvitur, terra densatur.

346. Rubra hinc materies quæ in sanguine præcipua habetur, non est nisi oleum ejus nativum, tenuissimè divisum, intertritum reliquis particulis, nec tamen vi saponaceâ ita solutum, ut non cum aqueo liquore divortium faciat, quamprimùm remittens calor & motus miscere desierunt.

347. Ita tandem constat, quid de naturâ & ortu globorum, quos microscopium in massâ sanguineâ detegit, sentiendum sit. Rubræ hi portioni proprii non sanè sunt, nisi oleum, quod cum aquoso latice permistum subactumque, pro mutuo inter has materias dissidio, sese in sphaerulas colligit, interfluente inimicâ aquâ separatas, & ne confluere queant, impeditas. Indè in lacte etiam visuntur, & qualicunque oleo cum aquâ agitato perducì facilè possunt: nec torno
Mechanico

Mechanico opus est, ut rotundentur. Hinc & attentus videas molles esse, compressiles, figuram, cum in vasculis premuntur, mutare, cum à pressione liberantur, in globularem resilire.

348. Nec obstat, quæ prædicatur æqualis singulorum globorum moles eademque diameter. Limitatæ circulationis vires in infinitum usque discerpere nequeunt particulas olei certâ vi inter se coherentes. Dabitur ergò meta, ultra quam progredi nefas. Cur autem rei, quæ ipsa parùm firmo talo nititur, rationem anxie quæramus?

349. Divisibiles porrò esse in minores globulos, hosque separatos dilutiùs rubere, vix dubium est. At senarium esse numerum globorum minorum, ex quibus componuntur, in quos secedunt, incertum. Nihil autem minùs credibile, quam istâ secessione rubrum in serum mutari, hujusve senos globulos inter se compactos globulum rubrum efficere. Repugnant experimenta (331, 341.) & diversissima utriusque materiæ natura (343 ad 347.)

350. Nec licet ex pondere specifico materiæ rubræ majore, quam seri, aliquid pro hoc asserto (349.) concludere. Precariò enim illud assumitur; quum pars crassamenti rubra nunquam sincera obtineri queat (342.).

351. Integrum ergò fuerit Physiolo-

gis, pro lubitu, id genus speculationibus indulgere: at Pathologis nihil inde bonæ frugis.

352. Ex datâ sanguinis analysi intelligere est, quibusnam vitiis obnoxius esse possit, siue partes ejus singulæ seorsim spectentur, siue ut unâ junctæ universam massam constituunt.

353. Verosimile est dari certam aliquam trium sanguinis partium (344.) proportionem mutuam, quæ sanitati perfectæ maximè conveniat. Nec credendum tamen adeò hanc esse necessariam, ut quicumque ab eâ recessus impunè ferri nequeant. Quotidiana potiùs vel in sanissimis quoque videtur innoxie fieri posse mutatio. Quin & temperamentorum, sexuum, ætatum, &c. diversitas non eandem in omni homine ponit, aut postulat. Vitium itaque demùm fuerit, si major est recessus idemque à singulari sui hominis constitutione multum alienus.

354. Enormis feri abundantia aquam in sanguine auget; undè aquosa tenuitas (288.): morbique ex colluvie ferosâ oriundi.

355. Exsuperans fibra densitatem inducere debet, tenacitatem, immeabilitatem, lentum circuitum, obstructions, &c. Vid. (284, 285.)

356. Rubræ portionis excessus, cum phlogiston in sanguine abundans notet, quâvis occasione nociva caloris augmen-

ta, immodicas expansiones, inflammationes, &c. creat.

357. Hi excessus tam moderati, ut sanitatis munia non turbent, utrunque explicant diversam sanguinis crasin, quæ in diversis temperamentis occurrit. Prior enim (354.) Phlegmatico, alter (355.) Melancholico, tertius (356.) Cholericus proprius est, Sanguineo nullus.

358. Majoris momenti vitia sunt, quæ ad singularum sanguinis partium qualitates pertinent: quamquam negari nequit, plura fortè nos latere; quum Physiologia humorum multis etiamnum defectibus laboret.

359. In sero quidem excedere aqua potest, ut justò minùs tardiùsque igne concreseat (338.): quod vitium simile prioribus (287, 354.) iisdem quoque causis nascitur, eisdemque hinc effectus Producit.

360. Est & ubi mucii inertis copia in eodem crescit: quo fit, ut reliqui humores indè secreti inviscantur tenacitate antè expositâ (283.)

361. Vim concrescendi quoque augeri in hoc latice frequens est, & eo quidem gradu, ut stagnans ac frigescens, citò, more fibræ (340.) creat, inque hanc veluti mutatus dici possit. Hæc diathesis inflammatoria, quam paulò post inter morbos fibræ sanguinis exponemus.

362. Salinæ materiæ sive propriæ, sive
F ij

alienæ, superpondio ferum præcipuè inficitur: pollet enim & amicâ salibus aquâ, & inviscante mucò, cumque iis quæ à foris in massam humorum subvehuntur, proximum alit commercium. Pleraque idè acria hic sedem figunt, hocque quasi vehiculo per corporis partes sese diffundunt (307 ad 317.)

363. Purpura sanguinis (341.) iusto pallidior, loturæ carniûm similis, ex defectu nascitur materiæ rubræ, compactione hujus minore, phlogisto non sat exaltato, per mucum acidum, aliave peregrina immixta suppresso. Undè comitari solet vitia (283, 287. 307.), easdemque causas agnoscit, nec dispares effectus producit. Quandoquè & corruptioni debetur.

364. Rubor floridior inducitur motu, attritu, attenuatione, permixtione cum ferro, nimis. Hinc circulationem auctam, calorem intensiorem, salinæ materiæ (315, 316.) abundantiam sequitur. Est autem ferè dissolutior hic sanguis, frigore tardius aut vix concreescens, phlogisto nimis evoluto faciliè exardescens, ad elapsum è vasculis, errores loci, phlogoses proclivis.

365. Nigrescens color oritur, si terra exsuperat, aut infixò acido stiptica est, aut ubi crasin sanguinis corrumpunt aliena intermixta ex vitiato chylo, retentis excrementis, miasmate, contagio, ve-

nenò , tabo putrido , rancido , ulceroso , gangrænofo , cancrofo , &c. intromiffis. Varium hinc acre comes est , & major alias spiffitudo , alias diffolutio ; quæ diverfitas proindè & multiplex malorum genus post fe trahit.

366. Fibra sanguinis (346.) nifu ad concrefcendum minore peccat , quo fit , ut tardius , aut vix à fero fecedat , nullamque , aut laxiorem juftò formet infulam , quæ nec rubros globulos ritè coactos fibique adunatos habeat. Fibrofæ materiæ paucitas , compactio minor , aquofa aut mucofa inundatio (83 , 287) , attenuatio nimia per motum , calorem , fales folventes , aliosve ftimulos aut fermenta (365) corrumpentia , confumptio ob defectum neceffariæ per alimenta reparationis , &c. id vitium producant. Sanguis hinc diffolutior noxas infert (287 , 288).

367. Contrarium fibræ vitium , nimia cohærentia , aut ponit simpliciter auctam hujus ad ferum proportionem (355) , tota hinc massa sanguinis quandoquè in grumum coëunte : aut vim concrefcendi intensiorem , quâ & celerior fit per quietem ac frigus concretio , eademque longè tenacior ; ita ut corium denfum , non rubrum , fed albidum , flavescens , quandoquè virefcens , livefcens , variâ crâffitie , citò innafcatur summitati infulæ , hæcque etiam longè compactior , ora ob corii contractionem retorta , sæpè in scu-

tellam excavetur, circumfluente sero copiosiore. Hæc crusta phlogistica, diathesis inflammatoria, corium pleuriticum audit. Quum verò & fibræ ablutæ (340), & sero igne concreto (338), simillima sit materies, credibile est nasci, cum fibra in systemate circulationis nimium densatur, serique portio major, totusve latex, continuatâ densatione, in fibram convertitur spontè, statim concrecentem (361): ut adeò ad eam constitutendam nec pinguedine, nec muco arteriarum, succis multùm diversis, opus esse videatur, nec solâ etiam aquæ dissipatio semper sufficere. Docet certè observatio, iisdem potentiis, quæ sanam sanguini fibram ingenerant, quoquo modo intensioribus id vitium induci. Auctior hinc circulatio, motus febriles, æstus, vasorum angustia, compressio, exercitia corporis nimia, terreorum, adstringentium calefacientium, spirituosorum abusus quotidianæ hujus densitatis causæ fiunt. Mala autem, quæ indè oriuntur, plurima ex dictis (285, 355) patent; si addideris, refractarium hoc gluten, aquosis vix solubile, comite plerumquè febre circumactum, calore etiam magis compingi, aut non nisi corruptum deniquè resolvi (366), hinc Naturæ viribus agrè domabile reddi.

368. His verò (353, ad 368) ritè intellectis, haud difficile est rationem in-

venire reliquarum affectionum, quibus massæ circulantis qualitates pervertuntur, quousque reverà obtinent ac fructuosè indagari possunt; densitatis puta, gravitatis, elasticitatis, divisibilitatis, &c. ultra modum auctæ aut imminutæ. Et multæ forsan aliæ hic dantur aberrationes, quas tamen cum conjecturâ modò assequamur, non est, cur nos morentur.

Succorum secretorum Vitia.

369. Ex uno sanguine per universum corpus distributo multos in diversis partibus succos artificio admirabili secedere, singulosque, ut inter sese & a sanguine differunt, ita diversis quoque œconomix humanæ usibus destinatos esse, Physiologia demonstrat; etiamsi modum, quo sua cuique crasis peculiaris constituatur, haud planè assequitur.

370. Igitur & communia quidem ex communi fonte, undè dimanant, vitia trahent, quæ tamen pro discrepante cuiusvis indole aliquid singulare habeant, aliaque & alia mala inferant: & privata quoque jam secretis evenire poterunt, quæ non admodum in aliis occurrant. Merentur adeò speciatim expendi.

371. Humores aqueo-salini, quo lympham igne non concrecentem, atque hinc secreta menstrua primæ digestionis, tum excrementa aquosa, &c. refero,

præter tenuitatem (287), spissitudinem mucosam (283), & varias acritates (307 ad 317), hoc singulare præ ceteris habent ut nimis faciliè terreas moleculas, interuentu salis per aquam solutas, secedere sinant, hisque datâ opportunitate adunatis calculosa concrementa, multimodis nociva, deponant (320).

372. His quidem valdè dispar, singulari mixtione ac natura humor, bilis, eisdem tamen & vitio (371) obnoxia est. Sed & inertiam patitur amurcosam, mucosam, aqueam, magno actionum naturalium detrimento. Præsertim verò alienis salibus imbuta, aut stagnatione, æstu, motu vehemente, aut inordinato, corrupta, diversas contrahit acrimoniæ species gradusque, & his consentaneas colorum mutationes, flavedine nativâ in vitellinum, porraceum, æruginosum, isatoden, atrum denique colorem abeunte. Undè toridem vitiatæ bilis species, unâ cum suis effectibus a Veteribus sedulò notatæ, enascuntur.

373. Succus mucosus (278), ingenti copiâ, nec minore commodo, per partes corporis diffusus, præter communia consistentiæ vitia (282, 286), & naturali suo lentore, & stagnatione, acrimoniis maximè patet, quæ ejus glutine inviscatæ difficillimè extergentur. Undè, quas Veteres memorant, pituita falsa, acida, vitrea præ aluminosâ acerbitate dira tor-

mina cum sensu frigoris in transitu per intestina inferens, quin & gypsea plure terrâ onusta (320), intelliguntur. Nec infrequens est, virus contagiosum in mucosidulari, taboque sic multiplicato solidis infestum, latè serpere.

374. De succis pinguibus idem dicendum; ut qui naturâ quoque lenti, inque laxâ cellulosæ telâ restagnantes, nec aquoso humore solubiles, quæ semel suscepere, heterogenea, acria, virulenta, tenaciter sibi illigant, menstruorum & circulationis viribus subducunt, foveant, suppeditato velut pabulo augent ægerri-
mè extricanda.

375. Propria pinguedini corruptio, rancor, hic maximè notabilis; quum semel susceptus vix emendari queat, ac virtute quasi fermentali sese propagans, pessima acrimonia, quæcunque tangit, rodens urensque, vel ipsis etiam ossibus cariem inferat. Ingesta (328), humorum putredo (312), intensior circulatio & calor, stagnatio, contagia & venena septicæ, hoc malum inducunt.

376. Nascuntur in pingui quoque consistentiæ vitia. Etenim secundum naturam non mero oleo, sed aliquâ etiam parte mucis (373) constat. Hujus igitur si proportio suis ex causis (283) ultra modum augeatur, liquidior jussu adeps cellulosam tumore inerte, non elastico distendit, ca-

demque aquæ magis amica hanc ex humoribus præterfluentibus attrahit, retinet, sic leucophlegmatiam, hydropem *ανασαφα*, œdema, &c. producit. Abit & contra in sebum æquo durius, cum exsuperante terrâ, hæve acore austero styp-ticâ (284, 310, 326), infarcitur. Undè panniculi adiposi indurationes, steatomata, tubercula, mole, formâ, duritie, degeneratione multùm diversa.

377. Ex his utcunque intelligi possunt morbosæ affectiones succorum, qui ex mucî ac pinguedinis confluxione nati similitudinem gummi-resinæ vegetabilis præ se ferunt. Reducuntur quippè ad spissum, tenue, acre deniquè varium.

378. Inter succos nutritioni destinatos Lac sua quoque peculiaria vitia habet, quæ cum Chylo potissimùm debeantur, ex dictis (323 ad 331) spontè patent.

379. Gelatina firmas partes nutriens, ex crassamento feri (338) & fibrâ sanguinis (340) nascens, aut abundante, aquâ nimis diluitur (287), aut obruitur inertis mucî copiâ (283, 329), aut variâ inficitur acrimoniâ. Undè replendo magis infirmat, quàm roborat, aut rodendo etiam destruit. Salino-terreum hic abundans, secessione nimis facili (320), incrustationes partium atque indurationes calculosas, osseas, producit.

380. Liquor genitalis, sin moleculis animatis, at virtute perquam singularis,

an, præter communes affectiones, privam sibi contrahit acrimoniam, quâ facilitatem inducat? An inertiam, sterilitatis matrem? An suo modo degenerans monstra parit? In re obscurâ nihil pronuntiandum, donec plenior lux ex Physiologiâ affulserit.

381. Eadem circumspectio præterire etiam jubet, quæcunque de vitiis fluidi vitalis (187) proferri solent; quum conjecturis tantum nixa, nec solidam Pathologo scientiam pariant, certum in praxi usum præstent.

382. Et quidem ex plurimis paucae sunt singularium humorum affectiones morbosae, quas utcunque cognoscere datur. Credibile est innumeras superesse nunquam plenè detegendas; maximè si quæ in singulo quovis homine, pro ἰδιότητι διαφορᾶς diversitate, quilibet humor propria sibi, in simili humore alius hominis non adeò reperiunda, etiam in statu sano, habere possit, spectaveris, certus non omnem corporum humanorum discrepantiam Medicam sola partium firmarum pro suis dotibus dissimilitudine absolvi, sed fluida quoque suam unâ symbolam conferre. Quum tamen haud aliter nobis innotescant, nisi singularium quorundam effectuum apparitione, quorum veras causas in tantâ possibilium multitudine assignare non licet; tacere satius fuerit,

quam, quæ scientia comprehendendi nequeunt, conjecturis prosequi.

Morbi humorum relativi.

383. PRÆCIPUUM æconomix humanæ fundamentum in mutuâ solidi fluidique actione, suis limitatâ legibus, positum esse Physiologia demonstrat. Datur ergò in sanitate harmonica quædam inter duo agentia proportio, quâ, ne alterum alteri enormiter prævaleat, caveatur. Docet etiam ipsa humorum multiplex diversitas & non promiscua singulorum distributio, non quemvis cuivis aut parti, aut usui, appropriatum esse. Itaque, tametsi crasis vitio careant, peccare tamen & copiâ, & loco, & motu ita possunt, ut perturbatis indè solidorum muniis functionum integritas lædatur (266.). Quia verò morborum qui ex hoc fonte oriuntur idea necessariam ad solida relationem includit (268.), haud immeritò relativi dicuntur.

Quantitas humorum vitiosa.

384. PROPORTIO laudabilis fluidorum ad partes firmas non tam exactè ad pondus determinata est, ut quivis excessus aut defectus morbum inferat. Latitudo sanitatis, quæ ætates, sexus, temperamenta comprehendit, his consentaneas

quoque utriusque materiæ proportionem, etsi multum discrepantes, includit. Nec aliter suam poterat adversus perpetuas ambientium vicissitudines (6.) tueri constantiam sanitas. Maximum igitur & minimum, quod hic impunè fertur, difficulter discernas. Hoc minus, illo majus, illatis noxis se prodat.

385. Quod si universa humorum massa, qualitatis vitio cererum carens, comparata ad firmas partes, ultra modum exsuperat, ut turgens oneri sit turbetque functiones, hæc πολυχυμία dici potest: uti contrà nimia imminutio, ὀλιγοχυμία. Utriusque ideam dat status infantia ac senii naturalis. Undè etiam effectus intelliguntur. Originem autem declarat alienata ingestorum & egestorum ratio.

386. Intemperies humida, potiùs ad cacochymias referenda (287, 354, 359.), ponit aquosi laticis copiam fluida ac solida inundantem, hinc immodicam aquæ in sero, huiusque ad crassamentum sanguinis proportionem. Causæ adeò effectusque ejus ex locis citatis facilè intelliguntur. Quin & oppositi vitii, intemperiei siccae, idea hinc clarescit.

387. Notari præcipuè hoc loco meretur plethora, plenitudo, multitudo, quæ dicitur boni sanguinis ea abundantia, quam systema circulationis absque periculo sanitatis ferre nequeat. Dari id genus superpondii ut omni tempore docuit

observatio, ita ex ritè intellecto humorum circuitu manifestè sequitur. Nec certè audiendi, qui rem tanti momenti ficulneis argumentis explodere vani aggrediuntur. Quum verò vitium proportionis sit, hæcque diversimodè spectari queat, diversas quoque in species id partiri licet.

388. Habetur hinc primò plethora ad molem, quæ & vera dicitur, & absoluta, ponitque molem sanguinis reapsè ita exuberantem, ut partibus continentibus præ nimia distensione incommodet. Hæc propriè *πολυαιμία*, veterum plethora ad vasa. Cùm in temperamenta incidit mollioris habitûs, hic sanguine undequaque perfusus intensè rubet ac turget: in strictioribus contra corporibus vasa majora distenduntur, venæque præ arteriis laxiores ultrà modum tumescunt. Undè recentiorum plethora ad habitum & ad vasa vel venas intelligitur. Eam inducit vigor sanitatis sub vitæ genere lautiotæ, otioso, securo, quo robusta viscera plus generant chyli sanguinisque laudabilis, quàm nutritio ac excretiones necessariæ sibi postulant.

389. Huic affinis altera plethora ad spatium dicenda, quia ex imminutâ systematis circulatorii capacitate oritur, quantitate sanguinis haud pariter imminutâ. Nimirum nec mole, nec volumine, auctus sanguis modum tamen excedit, si, quo contineri debet, spatium

contrahitur. Respectivam ideò vocant. ut cujus origo tota debeat firmis partibus, aut nimium constrictis (195, 209, 5.) in terrore, accessu febrili, frigore magno, subito, &c. aut his ipsis rigiditate (164.), exsiccatione, coalitu (209, 6.), non cedentibus, imperviis, aut denique mutilatis.

390. Est & plenitudo ad volumen, apparens quoque & spuria dicta, quæ aucto rarefacti sanguinis volumine molem veluti auctam mentitur; quanquam hujus nulla est exsuperantia. Quum enim capacitas canalium haud eodem gradu unà dilatetur, expansus humor, quo ante modicè repleti fuerant, majus spatium affectando haud aliter, quàm vera plethora (388.) turgescit. Ingens calor ab aëre, foco, balneo, cibis, potibus, medicamentis, venenis, febribus ardentibus, inflammatoriis, exercitatione, animi pathemate, frictione, &c. in corpore concitatus, magna & subita pressionis atmosphæræ imminutio, motus intestini humorum ob aliena intermixta singulares, &c. huic vitio ansam dare solent. Certius autem nascitur, sicubi & irritabilitas (190.) accesserit, aut feminium dederit sanguinis discrasia ad rarescendum pronior (356, 364.), aut liquatæ pinguedinis, quam calor valdè expandit, copia in massam circulantem recepta.

391. Constare hinc potest, quid de

plethorâ ad vires, veteribus memoratâ, sentiendum? Malè hanc neotericorum nonnulli, ut fictam explodunt; cùm reapsè & multiplici quidem specie notabilis occurrat. Dicatur ergo ea sanguinis abundantia, cui ferendæ regundæque vires naturæ non sufficiant, hinc onere gravatæ opprimantur. Plenitudo quævis (388, 389, 390) ad summum progressa, nec maturè levata, etiam in robustis, sarcina demùm fit viribus major, quæ spontaneam lassitudinem, ad motus torporem, sensumque gravitatis inducat. In debilibus (159.) exiguum quoque sanguinis superpondium, valentiori facilè tolerandum, superatis canalium viribus incommodat, & congestione, oppletionè, eruptione gravat (203, 204). Naturis irritabilibus (190.) levis humorum excessus pro stimulo est, cujus dum sentiunt molestiam, in motus inordinatos ruunt, ut amoliantur, & semetipsas, productis incassum viribus, fatigant. Consuetudo denique mittendi sanguinis, naturalis, artificialis, uti reparandæ jacturæ studium indit, ita reparatæ creat intolerantiam, cui moles aliter haud gravatura oneri est. An igitur plethora ad vires non datur?

392. Manifestum quoque est, posse plures plenitudinis species (388--391.) unâ complicari, hisque insuper adjungi vitiatas humorum qualitates. Undè nonnullorum enchyma & cacochyma ple-

thora intelligitur. Commotam verò vocant, quæ turgens noxas infert, gravioresque minatur.

393. Inopia boni sanguinis, quæ merum defectum, non item discrasiam, ponit, vix nisi subitâ, enormi evacuatione nascitur, nec durare diù potest, quin vitium qualitatis ex prostrato functionum vigore accedat. Hoc & illi jungitur, quam inedia creat. Tardiores humorum jacturæ, etiam prægrandes, ne *νεμεαγγείαν* iuducant, accommodatâ partium contractione (209, 5.) natura cavet. Morbo superato exhaustis apposita nutritio citò succurrit; alioqui in cacochymiam inclinant.

394. Obesitas hujus etiam loci est, nec tamen cum plethorâ, quam sæpè comitatur, aut sequitur, confundenda. Notat enim sanæ pinguedinis, partibus interfusæ, excessum qui functionibus obstat. Sanitas quidem proportionem multum diversas hujus succi absque notabili impedimento fert: at sarcinâ tamen graviore, subitò auctâ, haud minùs quàm multo sanguine, opprimitur. Iisdem verò causis ferè nascitur, quibus plethora (388.), huicque aut supervenit aut substituitur, cum ex pleniori victu multum quotidie laudabilis chyli in vasa deferretur, qui vegetâ circulatione nec dissipari, nec in sanguinem converti, nec nutritioni impendi omnis possit, hinc suum cremorem per

138 QUANTITAS HUM. VITIATA.

interstitia partium in laxam cellulofam deponat. Undè mollior corporis habitus, ætas infantilis & media, sexus fequior, eò inclinât. Materiem fubminiftrat chy- lus blandus, multò abundans pingui, eo- demque facilè fecedente (331.). Elucef- cit hinc, cur partes fingulares fæpè præ aliis hac multitudine graventur.

395. Defectus adipis, macies, vix eo gradu nafcitur, ut morbofa dici poffit, quin aliæ unâ fubfint affectiones, undè ut fymptoma pendet, aut quarum confortio demùm nociva redditur. Acrimonia certè ut fæpiſſimè ipfa emaciat, ita comitem fe facilè jungit; five inopia chyli blandi, oleofi, five immodica evacuatio, aut quovis modo facta diffipatio, pinguedi- nem confumat.

396. Reliquorum fuccorum excedens deficientve copia, vel ad cacochymias (354 ad 368.) pertinet, vel inter caufas mor- borum aut fymptomata aptiorem locum invenit.

Fluida loco aberrantia.

397. QUANQUAM humorum non adeò ftabilis eft in corpore humano, ut par- tium firmarum, fitus, nec certa femper quâ morantur fedes; habent tamen & fuos ſibi à naturâ conſtitutos canales, loculos, receptacula, cava, quibus tan- quam cancellis contineantur, vehantur,

nec egredi sine noxâ possint. Id quidem in succis singularibus, iisque qui in certis partibus collecti restagnant, manifestissimum. At verò nec illi quoque excipiuntur, qui magis universales, non interrupto motu circumacti, toto corpore oberrant: neque enim perindè est ad sanitatem, quo genere vasorum aut cavitatum sanguis, serum, lympa, &c. ferantur.

398. Ex hac igitur contentorum ad continentia relatione classis exsurgit morborum valdè notabilium, qui, quod humores non suo sed alieno loco sint, œconomiam turbant, nec idè malè errores loci appellantur, variasque in species dividi possunt, quarum præcipuas nunc exponemus.

299. Error fluentium mihi dicitur, cum succus corporis inquilinus, e suis in aliena vasa delatus, hæc præter naturæ ordinem permeat, tanquam si propria sibi forent, nullo tamen ceterum obstructionis, effusionis, excretionisve vitio accedente. Evenit hoc multoties in systemate circulationis, ubi motu accelerato, aucto colore, rarefiunt humores, vasa laxantur, ampliantur, ut crassior sanguinis pars, ultra, quam decet, propulsa, in vasculis justò minoribus, non suis, circumeat, errore quidem ut plurimum innoxio, quandoquè tamen & periculoso. Stagnans in cellulosâ pingue, subito in vasa rap-

tum ; bilis suos limites egressa , inque sanguinem diffusa ; urina , materies perspirabilis , &c. , retenta cum in massam circulantem regurgitant , exempla nozarum , quas id vitium infert , præbere possunt. Secretionum certè multifaria hinc perturbatio. An huc etiam retuleris materiæ morbosæ , alicubi stagnantis , receptionem in communes circuitus vias , aut ejusdem permanentem cum humoribus circulantibus mixtionem , quum evacuari vel in parte aliquâ deponi debuisset ?

400. Errorem impactorum voco , quando liquor in canalem alienum delatus , nec permeare potens , impactus , cavitatem illius naturâ angustiores obturat , sibi-que & aliis deinceps appulsis transitum negat , vitio triplici aberrationis , stagnationis & obstructionis (209, 1) concurrente ; quanquam si continentia & contenta in se seorsim spectes , vix admodum à statu sano mutata deprehendas. Nascitur facilè ex errore priore (399) , cum humor crassior , in aliena protrusus vascula , quorum diametri in progressu naturaliter decrescunt , aut superveniente spasmò (209, 5) minuuntur , negato tandem per angustias transitu sistitur. Ex quo fonte multiplex porrò genus infarctuum , tumorum , metastasium , inflammationum , &c. , oriri posse haud difficulter perspicitur.

401. Est & error excretorum memo-

randus, quo fit, ut humor in aliena vasa propulsus, horum ostiis elapsus, præter naturam e corpore ejiciatur. Ejus autem duæ species sunt. Vel enim materies utilis, hinc retinenda, suis è vasculis aberrans, in canales excretorios devecta, tanquam recrementum, exturbatur, dispendio sæpè irreparabili. Chyli, sanguinis, feri, lymphæ, &c. excretiones per alvum, urinæ vias, cutim, &c. in variis alvi profluviiis, diabete, mictu cruento, sudatione nimia colliquante, id ostendunt. Vel, quam Natura excretioni destinavit, materies ad aliud, non suum, delata emuncatorium expurgatur, errore quidem tolerabiliore; ut qui boni humoris jacturam non inferat; at suis tamen & noxis aliunde infesto; quum non cuivis excremento quodlibet emissarium indiscriminatim conveniat. Bilis, urina, perspirabile, fex alvina, sanguis menstruus, &c. ita quandoquæ aberrant.

402. Huc etiam referatur error effusorum, varietate multiplici peccans, quem latiore sensu ἐκχύμωσις dicere liceat. Nimirum suis e vasis effusa materies tum non è corpore elabitur, sed partium interstitiis recepta colligitur ac restagnat. Cujus quidem vitii permultæ sunt species & longè plura etiam mala, quibus œconomiam infestât.

403. Differentiam facit varia vasorum emittentium affectio, quæ effluxui favet,

ἀναστόμωσις, διαπήδησις, διαίρεσις (203, 2, 3, 4, 207). Discrepant & cavitates recipientes, ut majores, minores, naturales aut vi factæ fuerint. Tela cellulosa, quæ partium interstitia undiquè replet, facile distendenda, frequens in commodum effusis receptaculum præstat. Præcipuè tamen notanda est materiæ, quæ effunditur, diversitas; ut ex quâ totidem differentes morborum species, aliis atque aliis symptomatibus stipatæ enascuntur.

Sanguinis e suis vasis effusi errorem videas in sugillatione, aneurysmate spurio, exanthematibus, inflammatoriis tumoribus, hæmorrhagiis internis, &c. Nec diù fertur hæc stagnatio in humore tam mutabili, quin coagulo (336), secessione (337), suppuratione, putredine, crasis vitietur.

Quum Lympha sanguinis effusa, in interstitiis solidorum vi distendente factis in membranâ cellulosâ habitus totius corporis, aut partium singularium, in cavis magnis parvisve accumulatur, pustulæ, bullæ, leucophlegmatia, hydrops ἀνασάρκα, ὑποσάρκα, abdominis, thoracis, capitis, scroti, partium internarum, œdema, &c. oriuntur.

Pingue, bilis, chylus, ceterique succi singulares hunc ubi errorem patiuntur, alia atque alia mala inducunt.

Humor corruptus, pus, ichor, sanies; materies morbosâ, cruda, cocta, cum in

cavitates aut interstitia partium effunduntur, empyemata, abscessus, sinus, fistulas, ulcera, gangrænas, metastases salutares, noxias, &c. inferunt.

Quin & aër, ut suos in corpore canales habet, quos secundum naturam permeat, ita egressus indè si recipitur in aliena cava, aut in cellulofam, tumores aërii, elastici, oriuntur, plus minus, quandoquè per universum habitum expansi. Indè emphysematosis, emphysema, tympanias. Fieri etiam potest, ut latens in humoribus elastica materies, aëri similis, quacunque occasione exsoluta, recuperatâ elasticitate, seorsim sese congregans, locoque veluti errans, tumores expansione suâ flatuosos prioribus similes producat.

404. An & errorem nutrimenti statuere licet, sicubi moleculæ nutritiæ alienis partibus, quarum dissimilis est mixtio, apponuntur; ut iusta solidi consistentia ac textura pervertatur, cure in callum cornuæ, carne musculosâ in tendinem aut cellulofam, parte molli in cartilaginem, os, dentem, lapidem, aut osse retrò in massam molliorem degenerante? Haud sanè credibile est, singulas succi nutritii particulas ejusdem prorsus esse mixtionis (138), & cujuscunque fuerint, quibuslibet solidis nutriendis indiscriminatim quadrare (146, 147). Nec constat Naturæ humanæ datam esse potestatem, mutatâ elementorum proportionem, mixtio-

nes quasvis ex quibusvis pro lubitu fabricandi. Quodsi igitur materies nutriens, ceterum sana, errorem loci patitur, vitiatâ indè assimilatione, substantia partium mirificè alienari eâ de causâ posse videtur.

405. Denique & secretorum error haud infrequenter obtinet; at qui cum priorum (399, ad 404) modo effectus ac sequela sit, singularem titulum vix meretur.

Motus vitia in humoribus.

406. CONSTAT humores nostri corporis & intestino suarum molecularum, & progressivo totius massæ motu secundum naturam cieri. Neutro carere sanitas potest, quæ tamen & moderatum utriusque gradum requirit, nec quosvis excessus defectusve, aut alienationes, impunè ferre potest.

407. Intestinus, qui ad fluiditatem pertinet, hujus quoque auctæ vel imminutæ rationem sequitur; hinc, quæ patitur, vitia ad nimiam tenuitatem aut tenacitatem referre, atque ex dictis (371 & seq) intelligere licet. Alias ejusdem species, quarum in mutandâ humorum crassi major ac singularior sit potentia, cum in sanitate, tum in morbis, excitari, multiplices liquorum ex uno sanguine nascentium discrepantiæ & plures etiam degeneratio-

nes



MOTUS VITIA IN HUMORIBUS. I
nes haud obscurè innuere videntur. Et
credibile quidem est alienorum, quæ
pus subeunt, mixtionem cum humoribus,
aut singulares in solidis vibrationes
cunque occasione ortas, producendis id
genus motibus multùm conferre: at dif-
ficile fuerit peculiare cujusvis horum in-
genium ac determinatas undè singuli pro-
fluunt causas harumque agendi modos
explanare. Chemicorum fermenta, sano
sensu applicata, illustrant quidem, nec
tamen solvunt quæstionem. Nec multò
plus efficiunt, qui à variatis duntaxat
solidorum motibus omnem efficaciam hujus
originem repetendam esse censent.

408. Manifestior alter humorum mo-
tus (406), quo per vasa vecti locum mu-
tant, trifariam vitari potest, auctâ nimi-
rùm, aut imminutâ nimis velocitate, tum
directione abnormi.

409. Motus major debetur intentiori
solidorum in fluida actioni. Hanc verò in-
tendunt, quacunque vel vires illorum
motrices incitant, irritamenta multivaria
(171, ad 181), sive directè in corpus, sive
per mentem in corpus agentia; vel quæ
resistentias ab humorum mole, spissitate,
adhæsione, aut a carnalium rigiditate,
angustiâ (209) &c objectas minuunt: cu-
jusmodi plurima habentur. Nec minor
numerus est effectuum, qui indè conse-
quuntur, quique ob mirabilem œconomiam
humanam consensum suas vicissim cau-

fas sæpè producunt, augent, multiplicant. Generaliorum præcipui sunt solidorum a fluidis nimio impetu actis major irritatio, agitatio; hinc attritus validior, caloris augmentum; rarefactio humorum; subtiliorum dissipatio; crassamenti inspissatio; resolutio putris; blandiorum acritas; acrium exacerbatio; canalium expansio, ruptura; humorum aberratio omnigena (399, ad 405), & , quæ porro ex his sequi possunt, innumera acuti præsertim generis mala. Utitur tamen & Natura quam frequentissimè hoc ipso excessu, ut remedio efficaci, quo cruda subigat, noxia corrigat, expellat, acria mitiget, coacta solvat, obstructa referet, aliaque plurima in corporis sui salutem molliatur (99).

410. Ex oppositis causis nascens humorum tarditas hinc intelligitur, quæ cum decrescente per varios gradus solidorum ac fluidorum mutuâ actione ad quietem tendat, ipsâ vi vitali torpente (196, 198, 5) functionibus omnibus languorem inducit, multas suspendit aut planè delet. Undè morborum chronicorum origo multiplex, intractabile ingenium & difficilissima ob prostratas Naturæ vires sanatio.

411. In statu sano quælibet corporis pars suum accipit humorum demensum, sive massæ spectes copiam, sive motus quo fluit quantitatem. Nec moles adeò partium hanc portionem determinat, sed

naturæ functionisque, cui destinantur, diversitas. Itaque tamen levior quilibet excessus, defectusve haud illicò lædit, gravior tamen diùque durans noxas parit. Nimius certè affluxus impulsu enormi aut vasa irritat, in motus fortiores ciet (170, 195); undè attritus, calor, transfluxus intensior, attractio novi humoris uberior, revulsio ab aliis partibus, harum depletio, & similia: aut vim parietibus insuperabilem infert; undè dilatatio, ἀναστομωσις, διαπύλνσις, διαίρεσις (203) & quæ ex his sequuntur, infinita (207). His contraria mala deficiens influxio producit. Nec difficile est ex dictis (409) utriusque immoderationis causas eruere; ut quæ in perversa virium motricium & resistantiarum ratione potissimum quæri debeant.

412. Quos porrò Natura habet, motus humorum magis determinati, ad circuitum, secretionem, excretionem, effusionem in cava corporis, resorptionem ex his, &c. pertinentes, ita pendent a prioribus (406), ut indè, tanquam effectus ex suis causis, profluant, adeòque & aberrationes quas patiuntur, tanquam symptomata (90), quæ horum vitiis superveniant, spectari, neque hoc loco seorsim exponi debeant.

Morbi compositi.

413. ATQUE hæc summa est affectionum simpliciorum (125 ad 412): quæ cum

perrarò solitariae Medico tractandae offerantur, (123) pro multivariâ suâ combinatione, quâ demùm in veros morbos abeunt, cum maximè considerari merentur.

414. Morbus compositus dicitur is, ad quem constituendum diversae affectiones simplices ita concurrunt, ut unum faciant. Hic ergò tot partes habet, quot affectionum simplicium confluxu nascitur; in has resolvitur; his demùm intellectis & ipse intelligitur: nec harum ulla tolli mutarive potest, quin morbi, quem componunt, natura quoque alienetur.

415. Undè generatim quidem triplex hic locum habet compositio, prout aut solidorum, aut fluidorum, diversa vitia inter sese, aut hæc cum illis unâ confluunt. At utriusque generis tam multæ porrò dantur species, ut possibilium combinationum numerum inire, exque singulis nascentes morbos ordinatè exponere vix liceat.

416. Naturæ prætereà morborum nondùm satis liquido demonstratæ sunt (44). Superest hic plurima disceptandi ac disentiendi materies; undè difficulter sese expedire valeat, qui doctrinâ syntheticâ uti velit.

417. Rectius idcirco ex parte status morborum manifestiore, quæ in sensus incurrit (45, 86, 88), ordo desumitur pertractandæ huic materiæ appositus. Sic

characteres certi, quibus & conveniunt inter sese, & discrepant diversi morbi, horumque classes, genera ac species, legitimâ methodo constitui possunt; ut dignotio in praxi facilius reddatur, & confusio ac litigandi occasio evitetur. Morbi itaque compositi spectantur potiùs, ut totidem diversæ symptomatum concursiones, ac, pro more Systematicorum, ad Pathologiæ specialis eam sectionem, quæ de Symptomatibus singulatim agit, commodè relegantur.

418. Accidentariæ quoque morborum differentiæ (121), quanquam proximè subjungi essentialibus solent, hoc loco tamen cum plenè intelligi nequeant, infra demùm aptiùs enarrabuntur. De principiis itaque ac fontibus, undè morbi promanant (74 ac 79), speciatim nunc dicendum est.

De Potentiis nocentibus (76).

419. QUUM morbi in C. H. possibiles tantoperè inter sese naturâ discrepent, vires quoque potentiarum, quibus oriuntur (63) diversissimas esse oportet. Merentur adeò seorsim singulæ exponi, ut quam efficere quælibet mutationem possit, compendio invenire liceat, cum opus est (71, 79).

420. Triplex quidem fons est, undè potentiæ nocivæ nobis proveniunt; uti

totuplici virium genere legitimè conspi-
rante sani servamur (7.). Mens, corpus,
res externæ, suas hic singulas partes ha-
bent (4, 5, 6.). Nec multum refert utrum
hâc ipsâ utaris in pertractando divisione,
an cum aliis numerum præferas quater-
narium aut senarium, vel cum PITCAR-
NIO potius dichotomiam malis, atque
omnia reducas ad aliorum actionem in
hominem, hominisque actionem in se-
metipsum. Quæcunque huc pertinent,
vocari Medicis solent res non naturales,
quasi tu dicas res medias, quæ ex se, nec
secundum, nec contra naturam sint (2.),
nec salubres, nec noxiæ, at usu vel abusu
tales fieri queant. Hæc vocis technicæ
ambiguitas facilè expedienda neminem
morari debet (3.).

421. Agunt autem ista omnia (420.)
utroque & generalium & singularium vi-
rium genere. Juvabit itaque Mechani-
cis, Physicis, Chemicis, Medicis uti de-
monstratis ad eruendos intelligendosque
quos producunt effectus.

De nocivis Atmosphæræ potestatibus.

422. FLUIDUM aërium, quo viventes
circumfundimur, quod respiramus, de-
glutimus, amplissimæ corporis nostri su-
perficieî externæ, internæ, perpetuò con-
tiguum est. Debet ergò pro virium qua-
litateque suarum diversitate multimo-

dis nos adficere ; maximè quum tot tantisque vicissitudinibus obnoxium esse Phisici ostendant.

423. Aër calidus, quàm ambit aut penetrat, corpora ad suum gradum calefacit; rarefacit; particulas, quibus constant, in mutuâ cohæsione relaxat; in motus intestinos ciet; quàm volatiles sunt, dissipat; vires morrices insitas ad agendum concitat; fermentationem, putredinem ciet ac promovet.

424. Ex his (423.) intelligitur, quænam evenire homini debeant, qui æstui aëris nimio diù exponitur.

1. Pro intensiore mediæ ambientis calore, quo, non suo, corpus calefcit, caloris nativi imminutio, extinctio, extranei substitutio.

2. Ex rarefactione augmentum voluminis, & majus quidem in fluidis, quàm in solidis; undè plenitudo vasorum & turgor (390.), & multiplex humorum aberratio (399. & seq.).

3. Ob relaxatam cohæsionem debilitas solidorum (157.) spongiosus carniū contextus, articulorum infirmitas, laxum, iners, flexile (ibid.).

4. Ob eandem rationem humorum spissiorum tenuatio, inertium agitatio, motusque per vasa minùs resistentia (2, 3.) liberior.

5. Vis vitalis (170, 194.) sensilior quidem & agilior, at robore, tenacitate,

hinc duratione minor, faciliùs in suis motibus turbanda, brevi fervore torpens, deficiens.

6. Humorum pars tenuior, volatilis, spirituosâ, aquosâ, de poris superfâciei corporis externæ, internæ, aëri expositæ, dissipatur. Undè defectus subtiliorum, crassamenti inspissatio (274, 275, 284.), immeabilitas, diathesis atrabilaria, inflammatoria, solidi exsiccatio, vasculorum obstructio, &c.

7. Salinæ, oleosæ, materiæ agitatio major, attenuatio, evolutio, ad putredinem & rancorem dispositio, alcalescens, amarum, adustum, fœtidum, flavum, fuscum, nigricans, inducit, atque hinc oriundas febres biliosas, putridas, ardentes, malignas, morbosque acutos, multivariâ functionum generis nervosi læsione stipatos.

8. Ea, quæ primis viis continentur, sicubi ad fermentandum, aut putrescendum prona fuerint, æstuoso aëre tantò citiùs in hos motus concitantur, ac ructus, inflationes, dolores, spasmos ventriculi & intestinorum, anxietates, vomitum, choletas, diarrhœas, dysenterias, &c. producant.

9. Pars corporis singularis, præ ceteris nimium excalefacta, æquabilem circuitum turbat, humores ad se trahit, rarefactos in aliena vascula admittit, irritatâ vi vitali inordinatas suarum fibrarum

agitationes concipit : indè infarctus , dolores , rubores , erysipelas , inflammatio , phrenitis , ophthalmia , angina , peripneumonia , &c.

425. Manifestum itaque est calorem atmosphæræ prodesse quidem corporibus senilibus , torpidis , frigidis , mucosis ; colluvie serosâ obrutis , inopiâ humorum laborantibus : at contrâ vehementer nocere plethoricis , obesis , biliosis , calidis , ficcis , in hæmorrhagias pronis , irritabilibus , cibo animali potuique spirituofo deditis , multisque cacochymicis ; præcipuè autem generi nervoso , pulmonibus , primis viis ac systemati bilioso infestum esse , harumque partium functiones multimodis turbare.

426. Atmosphæræ frigus corpora densat , in minus volumen redigit , fluida quidem eodem gradu magis , quàm solida , ad congelationem usque ; solida rigefacit , magis elastica reddit ; motus intestinos fluidorum minuit , suspendit ; majore gradu aquam & liquores aquosos in glaciem vertit , quæ dum nascitur , rarefcens , levior , majus affectat spatium , magnâque vi , quæ expansioni resistunt , obstacula amolitur : liquores non simplices , si congelascunt , pars à parte secedit , crasis totius mutatur , nec regelando semper restitui potest . quæ vasa succosque his contentos habent , molliores præcipuè vegetantium ac animantium partes

gelu constrictæ, si subito calore regelantur, irreparabilem contextus ac mixtionis dissolutionem passæ corrumpuntur.

427. Hæc (426.) generatim à Phycis demonstrata, si ad hominem applicentur, consequitur frigore intensiore.

1. Solida corporis contrahi, rigeferi, elatere augeri, fragiliora reddi (165, 3.), canalium cava arctari, hinc contentis spatium minui, resistantias crescere. Tantò autem major constrictio erit, quia sensus frigoris etiam stimulo agit in vim vitalem (171).

2. Humores cogi, inertes, immeabiles, ad stagnandum pronos reddi.

3. Mutari ergò rationem continentium ad contenta (424, 2. 426.), & ceteris paribus corpora succis exhausta deterius, quàm pleniora habere.

4. Robustis porrò ac motu animali valido utentibus mutuam inter solida ac fluida actionem, attritum, increfcere, calorem internum augeri, circuitum, coctionem, attenuationem, dissipationem, & reparandæ per alimenta ingesta jacturæ necessitatem intendi, appetentiam acui, huicque, nisi maturè satisfiat, accedere debilitatem, animi deliquium & vel mortem ex fame subitanæam.

5. Debilibus contrà & quiescentibus, ob constricta vasa ac spissos humores, circulationis vigorem imminui, nativum calorem, vim vitalem decrefcere, om-

nium functionum torporem induci, suppressis evacuationibus non defacari humores, inde acre mucus, aquam, augeri, scorbutum, morbos articulares, leucophlegmatiam, hydropes nasci: obui præterea nimia humorum copia partes interiores, cum ad superficiem corporis aëri expositam resistentiæ ob frigus ultra modum crescunt (411.); hinc cordis, pulmonum ac encephali functiones præcipuè impediri: penetrante autem introrsum gelu insuperabili omnem suspendi motum, & vel sanguine in pulmonibus coacto, interceptâ respiratione, subitam inferri mortem, aut encephalo congelascente invincibilem nasci somnum, quo vita demum extinguatur.

6. Extremis corporis partibus, quæ minus à frigore densæ sunt, contrahi vascula, spissari humores, occludi poros, suppressi perspirationem; hinc livores, rubores, tumores, pruritus, perfrictiones, fissuras, ulcera nasci; aut frigore glaciali penetratis, sensu motuque suffocato, gangrænam, sphacelum, & ab imprudenti excalefactione putredinem (426.), loco sanationis, induci.

7. Cavum narium, fauces, tracheam, quæ spiritus meat, similia pati, hinc gravedinem, coryzam, anginam, raucedinem, tussim, &c. creari.

8. Pulmones maximè, ut amplissimâ superficie contactum spirati aëris libere

admittunt, stringi, minùs perspirare, pituitam accumulare, obstrui, coacto sanguine inflammari, exsiccari, suffocari. Undè anhelitus, tussis, catarrhus, mucus, pus, gangræna, sphacelus, mors subita.

9. Malè præsertim affici & corpora & partes, in quibus vis vitæ minor inest, aut justò irritabilior, debilior humorum circuitus, caloris nativi languor, sensûum motûumque torpor, aut & nimia agilitas, fibrosi contextûs teneritudo, aut excedens rigiditas, humorum inopia, aut inertia aquosa, glutinosa, terrestris, frigida, vappida.

428. Quibus perspectis haud difficile est rationem reddere, cur frigidum inimicum ossibus, dentibus, nervis, encephalo, spinali medullæ? Cur senibus, climati calidiori adsuetis? Cur uceribus mordax, cutim obdurèt, dolorem qui pus non moveat producat, convulsiones, tetanos, nigrores, rigores, febri es concitet? Quin patet etiam, cur subitæ caloris ac frigoris permutationes insuetis incautisque adeò noceant, & quæ mala efficiant?

429. Aër humidus, multâ gravidus aquâ, elatere ac pondere suo minùs efficax, impressos motus receptasque qualitates sensibiles suffocat magis, quàm propagat; minùs aptus novos vapores de corporibus, quæ ambit, recipere, absor-

bere, dissipare, hæc potius humectat, humore insinuato replet, laxat, mollit, solvit, diluit; situm, putredinem, promovet, calore præsertim adjutus; frigidus simul difficilius calefcit, ad sensum frigidior est.

430. Liquet adeò in atmosphærâ humidiorè diù versanti.

1. Superficiem corporis minùs premi, canalium parietes hinc parte suæ fulturæ externæ privari, nec plenâ vi in contentos humores agere.

2. Humores inundante aquâ nimis dilui, colluviem ideò serosam nasci, & quæ indè sequuntur mala (287).

3. Solida humectata laxari, flaccescere, inertia reddi.

4. Itaque circuitum vitalem in universum, trajectum sanguinis per pulmones, attritum, calorem, coctionem, nutritionem torpere, ac repleri quidem, non roborari corpus.

5. Supprimi perspirationem, præcipuè pulmonalem: undè augmentum colluviei serosæ (2.), infarctus vasorum pulmonalium, tussis, peripneumonia notha, excretio per sputa, urinas, alvum, copiosior aquosi laticis in cellulosâ & cavitatibus restagnatio, lentor, corruptio acris, prægravati corporis torpor, febris, rheumatismus, cachexia, &c.

6. Sensuum aciem obtundi, languere motum animale, genus nervosum in-

firmari, vim vitalem minui (298, 3, 4.) :
undè omnium functionum inertia.

7. Humori junctum frigus si fuerit, modò memorata, etiam majore gradu nasci, difficiliùs superari, omnem ideò naturæ vigorem cadere.

8. Calor contrà magnus si accesserit, summam induci solidis laxitatem, aperiri poros, attrahi humores, attenuari, in alienâ vascula admitti, quâ datâ portâ erumpere, aut & retentos celerrimè ad putredinem disponi : undè habitûs externi distensio, sudatio enormis, interiorum inanitio, virium lapsus, morbi putridi, contagiosi, pestilentes.

9. Ætati igitur teneriori, sexui sequiori, temperiei frigida, humida, corporibus laxis, aquâ, mucò, plenis, humentis aëris usum valdè nocere.

431. Siccitate peccans aër oppositos edere effectus debet : absorbendæ quippè humiditati aptissimus, corpora quidem siccet, siccando roborat, exsucca tamen & reddit, rigefacit, ac tenuiores humorum partes abripiendo morbosam his spissitatem inducit, inflammatoriam, attrabiliariam (282, 284, 367). Præ ceteris tamen utrique hominis principio amicior habetur ista aëris qualitas, ac saluberriima, maximè si caloris excessus abfuerit.

432. Aër, quâ gravis, efficax est in comprimendis, densandis, quibus circumfunditur, corporibus, eoque magis,

quò gravior, figitque simul materiem quæ liquoribus continetur, elasticam, sub minore aëris pressione sese expedientem. Baroscopiis autem constat, crassiorē aëra, qui humidior est, ferè minùs gravitare, magis contrà sereniorē, & multas magnasque perpetuò esse hujus dotis vicissitudines in nostrâ atmosphærâ; ut, quæ inter maximum & minimum terminum intercedit, differentia etiam partem decimam exæquet.

433. Indè atmosphæra quæ corpus humanum ambit ac subintrat, pondere suo hoc ipsum in omni puncto æquabiliter, pro more fluidorum, premit, solida fulcit, roborat, continentia ad contenta apprimat, mutuam inter hæc actionem attritumque auget, canalium diametros tuetur, humores ne evagetur coërcet. Viget adeò sub justâ harum potentiarum æquilibrata circuitus vitalis, respiratio, calor natus, sanitas.

434. Aucta quidem per causas naturales aëris pressio, sicubi æqualiter agit, fertur facilè, quin sanum robur auget: at majore momento in partem singularem directâ nocere potest comprimendo, arctando vasa, exprimendo humores atque in partes alias, minùs pressas, determinando. Id cum pulmone intensiore gradu evenit, canalibus ejus compressis, auctâ cordis resistentiâ, trajectus sanguinis impeditur, suffocatur, retentisque

humoribus gravantur aliæ partes, non sine multiplici noxâ.

435. Imminutæ gravitatis perniciosior vis est: solida enim fulturæ defectu laxat, humores, exsolutâ materie elasticâ, rarefacit, vasa replet, dilatat, debilitat, hinc tumores, eruptiones, aberrationes humorum producit, circulationem infirmat, vires ad motum animale prostermit, pulmonum præcipuè actioni obest: undè respiratio laboriosa, non satians, ab accumulato sanguine peripneumonia, hæmoptoë, &c.

436. Innotescit hinc leviolem, calidiorcm, humidiorcm aëra multis effectibus inter se convenire (424, 429, 435.), itemque gravem, frigidum, siccum, (427, 431, 434.); ideoque pro diversâ harum qualitatum concursione noxas indè oriundas multum intendi, aut mitigari quoque & averti posse. Nec dissimilis est ratio aëris nimis rari, aut densi, minusve aut magis justo elastici.

437. Quùm verò atmosphæræ pondus in diversâ locorum altitudine, aut in eâdem, diversis temporibus, maximoperè discrepet, huicque idè proportionata corporum pressio plurimum quoque variare debeat; pronum est colligere, cur magnæ subitæque hujus etiam dotis permutationes insuetis tam intolerabiles sint? Cur periculosissimæ debilibus, irritabilibus, & quorum humores multum

ac facilè rarefcunt? Cur adeò incommodæ iis quos morbi pectoris tenent? Cur aſthmaticis imminentis boni vel mali index Barometrum?

438. Haud aliud tamen vitium exitiâlius eſt , quàm quod diuturnâ ſtagnatione in locis undiquè occluſis , puteis , cryptis , contrahit aër , cum nullâ ventilatione renovatur. Torpore enim veluti putrefcens , qui vitæ cibus fuerat , velox fit venenum , vitæ non minùs quàm flammæ inimiciſſimum.

439. Nec diſpar corruptio eſt , quam ſubit aër , ubi ſemper idem , nec renovatus , circa hominem ſtagnat , multoties reſpirationi vitali adhibetur , præcipuè autem multitudini hominum circumfuſus in uſu eſt. Sive enim amittat inſpiratus aliquid , quod non , niſi permixtione cum aëre recente , recuperare queat ; ſive receptis à corpore vivo vaporibus inficiatur ; ſeu demùm propriâ inertîâ ſitum contrahat : certiffimis hodiè obſervatis conſtat , in carceribus , caſtris , noſocomiis , navibus , & in quocunque multorum hominum diverſorio haud ritè ventilato , ob eam cauſam virus innâſci aëri , quo febres peſſimi generis , putridæ , malignæ , exanthematibus ſtipatæ , citò lethales , contagio quoque latè ſerpentes , oriantur. Hæ verò cum putrorem in humores inductum (312 ad 314.) multis indiciis oftendant , vim ſepticam aëris

fic corrupti quoquo modo contractam
clarè testari videntur.

440. Qui porrò considerat, in atmo-
sphæram perpetuò recipi diffundique om-
nivarum quarumcunque corporum efflu-
via subtilioresque moleculas, quæ quo-
vis demùm modo volatiles redditæ, mul-
tifariam inter sese & cum aëre permixtæ,
divisæ, conjunctæ, pro suo quævis inge-
nio alias atque alias agendi vires habeant:
exferantque in corpora humana, quæ
unà cum aëre alluunt ac subintran; is
facilè videt, innumera ex hoc fonte pro-
manare morborum principia ac materias:
quæ frustra quis ab ipsomet aere, aut à
communibus ejus qualitatibus repetat,
perque observationes meteorologicas uni-
cè detegere, atque explicare conetur.

441. Quocircà sanè difficillimum fuerit
plenam exhibere aëris historiam patholo-
gicam, quæ examussim omnes & singulas,
quas contrahere potest, noxias vires enar-
ret, & ad peculiare ejusdem constitutio-
nes in quibusvis locis ac temporibus ap-
plicari valeat; maximè, quùm tanta sit
multitudo ac frequentia occasionum, qui-
bus & qualitates ejus & contenta ne-
cessariò permutari debeant.

442. Corpora cælestia; meteora, cli-
mata, anni tempestates, soli diversitas,
montes, mare, lacus, paludes, flumina,
vegetantia, animalia, subterranea, ho-
minum numerus, vitæ genus, alimenta.

potulenta, ignis pabulum, opificia, artes, commercia & alia plurima, suam quæque eo symbolum conferunt.

443. Ventorum præcipuè insignes sunt in variandâ aëris efficacîâ partes, & multiplex hinc in corpora humana agendi modus. Impetu suo allisi urgent premuntque fortius, quasi pondus aëris increvisset (433, 434). Plus dein aeris intrâ datum tempus homini applicant: quo plerumquè fit, ut & communes atmosphæræ qualitates, & quæ continet aliena tantò intensius pro suis quæque viribus agant. Renovant quoque, nec torpore corrumpi sinunt (438, 439) tùm aërem, tùm aquas. Agitando prætereà miscent inter sese varias aëris regiones: indè alias qualitates aliis substituunt, diversas mutuâ confusione contemperant, contenta quoque permutant, diluunt, diffundunt, æquabiliùs distribuunt, inter se effectum vario committunt. Vapores præsertim, effluvia, miasmata, de locis in loca transferunt, sic purgant, aut inquinant. Nec aliâ ferè potentiâ datur naturalis, quæ ut ipsamet sæpè admodum variabilis est, ita fluido aërio tam magnas & universales mutationes tantâ celeritate inferat.

444. Ex his quidem (443) in genere perspicere datur boni malique plurimum adflare ventos homini posse. Ut autem cognoscatur, quid quisque ventus speciatim valeat, non satis est generalibus in-

hærerè ; quandò idem diversis temporibus ac locis salubris & insalubris esse potest. Diversus aëris status (442) in locis , undè spirant , per quæ feruntur , quorundam venti , varia eorundem duratio , successio , & similia , longè alias , & velle oppositas quoque vires ciere solent. Ut adeò non nisi his una consideratis limitior quæstio demùm ex verò utcunque solvi queat.

445. Quum igitur tanta sit in diversis habitati orbis regionibus atmosphæræ discrepantia , & longe plurimi à statu exquisitè salubri recessus ubivis ferè perpetuò obtineant ; ut ex hoc solo fonte innumeros quotidie morbos profluere necessum videatur : mirari omninò quis possit , ubique tamen & homines vivere & sanitate frui , & vel sub jove malo etiam longævitatis haberi exempla , ac valetudinis infenium usque sine morbis protractæ. Nimirum natiuitate & consuetudine durantur corpora , ut malignum aëra non modo innoxie ferant , sed semel aduëfacta vel faciliùs quoque , quam mitiorem insolitum. Ipsa aëris inconstantiâ & frequens variatio sæpè pro remedio est , quo vis nociva obtundatur. Magnis demùm subitisque mutationibus difficillimè resistitur. Natura denique & cuius ferè climati propria dedit temperamenta , quibus , quod intolerabili gradu noxium habet aër , utcunque mitigetur.

Noxa ex Cibo & Potu.

446. MANIFESTUM vitæ sanitatisque nutrimentum in esculentis & potulentis est, quæ idcirco non minùs, quàm aër, inter res necessarias reteruntur. Rei tamen optimæ pessimi sunt & valdè multiplices abusus, undè plurimorum morborum materię causæque succrescunt. Merentur ergò speciatim considerari.

447. Docet quidem observatio stupendam ab humano genere admitti ferrique in victu varietatem; ut ferè diceres nihil admodùm constans certumque esse, quod usum atque abusum disciminet. Ferrea quorundam natura nullo ferè excessu læditur. Alios vitæ genus à noxis tutos præstat. Durantur alii adsuétude. Nonnullos frequens in opposita extrema relapsus, atque adeò ipsa errorum permutatio juvat. Ist hæc tamen cum ad paucos modo pertineant, quæ maximæ parti evenire ex abusu solent, nequaquam possunt.

448. Alimentorum copia major, quotidie ingesta, etiam quæ vires coctrices non superat, consuetudine tamen inducit voracitatem, &, nisi vita interveniat laboriosa, crescente chyli, fecum, pinguis (394), sanguinis (388), omnium humorum (385) multitudine obruit, tandemque nocet.

449. Eadem tanta, ut oneri sit ac ritè

digeri nequeat, fractis canalis alimentarii viribus, impedito menſtruorum digeſſivorum affluxu & actione, hinc perturbata coctione, cruditates parit, ſpontaneas ingeſtorum corruptiones, multiplex hinc chyli vitium (325, ad 330), & quæ ex horum quovis, tum in primis viis, tum in reliquo corpore, naſcuntur, mala innumera, præcipuè multivarias cacochymiaſes (283, 284, 288, 307, ad 322), ac vitia nutritionis.

450. Quodſi verò enormi ſarcinâ ita diſtenditur ventriculus, ut nato ſpasmus ora ſua claudat; diſtractis fibris, vaſis arctatis, ſuppreſſo motu, ſuſſaminato humorum affluxu, prohibeatur contritio, permixtio, ſolutio, dilutio, expulſio; preſſis, irritatis partibus vicinis dyſpnoea naſcitur, anxietas, humorum circuitus perversus, impetus malè directus, excitata cum encephalo conſenſio, cephalalgia, vertigo, ſenſuum hebetudo, apoplexia; aut & cardialgia, naſea, vomitus inanis, rariffimisquæ exemplis ruptura œſophagi aut ventriculi; niſi maturè laxato alterutro ore gravans materies, vel vomendo excutiat, vel cruda devolvatur in inteſtina, commotaque alvo tandem exeat.

451. Repletio autem à cibo, quam à potu, ferè nocentior eſt, tolerabilior, quæ lentè & gradatim fit, quàm quæ ſubitò.

452. Copia ingestorum minor, quam vitæ ac sanitatis ratio postulat, ob defectum necessariæ refectionis, languorem functionibus infert, minuit humorum quantitatem, adipem consumit, emaciat extenuat corpus, refrigerat, ventriculum ac intestina contrahit; ut ægrè dein plus alimentiferant, quin molestia, dolor, nausea, vomitus, oriatur: sic consuetudine inducitur demùm mensæ parcissimæ necessitas, atque intolerantia ejus etiam demensi, quo natura eget.

453. Absoluta autem a cibo & potu abstinencia si diu fertur, liquores menstrui, qui in primæ digestionis officinam confluunt, ingestis novis non mixti, diluti, temperati, pro suâ indole admodum acres fiunt: indè anima fœtens, ingens appetentia, vel ad summam quoque crudelitatem impellens, ructus, borborygmi, nausea, vomitus materiæ acris, salinæ, biliosæ, putridæ, animi deliquia, fami demùm prostratæ succedens immanis sitis, siccitas, debilitas. Dùm verò blandi chyli nihil in interiora devehitur, & interea tamen vitæ actiones perseverant, oportet solidis detritis, nec refectis, dissipatâ parte humorum tenuiore, quæ non reparatur, vasa inaniri, circulationem fatiscere, & cum mole corporis immutâ vires cadere: indè levitas ad stateram, pulsus debilis, caloris nativi decrementum, squalens macies ac siccitas bibula.

habitus corporis. Succedit denique defectu mitis nutrimenti atque attritu continuato, salium oleorumque in humoribus summâ acrimoniâ, volatilis, putrida, rancida, pestifera, ex quâ spasmi, convulsiones, febres acutæ, furibundæ, mors.

454. Hæc quidem (452, 453) sæviora sunt ac citiùs necant, si potus simul ac cibi, inopiâ genius defraudetur: defectus cibi utcunque portione levatur. Et quò circuitus humorum intensior est, motus animalis fortior, auctior calor, copiosior excretio ac dissipatio, eò graviores ab ânediâ noxæ.

455. Liquet igitur abstinentiam nimiam magis etiam lædere, quam nimiam repletionem, & delinqui gravius in victu nimis tenui, quàm in paulò pleniore. Quin constat etiam, cur senes facillimè inediam ferant; dein ætatis constantis homines; nequaquam adolescentes; omnium minimè pueri; & inter hos quidem illi, qui id ætatis fuerint alacriores? Quare animalia hyeme sopita vitam sine alimento protrahant? Cur & quales ægroti diutiùs inedinam, quàm sani, tolerant? Quare macilenti faciliùs, quàm humoribus pleni? Quæ causa subitæ ematiacionis in acutis? Cur à fame pestis?

456. Proportionem cibi solidi ac potus mutuam non adeò exquisitam postulat sanitas, ut non diversissimâ utentes rectè valeant.

valeant. Suadet etiam ratio, cuiusvis ætati, sexui, temperamento, vitæ generi, tempestati, climati, &c. non eandem æquè convenire. Videtur tamen enormior alterutrius excessus posse lædere, si conditionibus hominis incongruus diù protrahatur. Abundantior certè potio aquosam inducere tenuitatem (287) humoribus debet, urinas, perspirationem, sudores ultra modum augere, sic elutâ simul materiæ utilis parte suo fraudare corpus nutrimine; aut & retentâ aquâ debilitare, torpescere, varias hydropis species creare (ibid). Contra ubi alimenta, ex se non liquida, iustò parcior potu humentantur, nec humidior est temperatura hominis, spissâ sarcinâ gravatus ventriculus ægrè digerit, tardè expellit, crassioris intestini tradit chymum, qui & per hæc difficulter mobilis, horum muco magis invisatus, fece multâ, spissâ, siccâ, restagnante opplet, chylum parcioris, spissioris, lacteis tradit: undè mesenterii obstructio; sanguis glutinosus, densus, atrabilarius; similes alii humores; salis non diluti acritas major; excrementi secessio & expulsio difficilior; cacochymia multiplex; viscerum infarctus, multique alii, quos aquæ defectus pedisequos habet, effectus morborum (Conf. 166, 167, 198, 282, 285).

457. Materialium, quibus vitam, nec ægrè, sustentant homines tam diversa

sunt qualitates, ut penè videatur perindè esse, qualibuscunque utaris, modò valeas; sanis omnia esse sana, & palato impunè indulgeri posse, dùmne quantitate peccetur. Suadet tamen luxus plurimis, alios penuria cogit ejusmodi ingerere, quæ etiam modicè assumpta nocent. Sunt & quorum rarior usus innocens est, quotidianus demùm lædit. Sunt quæ insuetis tantùm obsunt. Quin & ingens illa hominum inter sese discrepantia, quam sanitatis latitudo comprehendit, uti non eundem in singulis virium coëctricium gradum ponit, ita aliam atque aliam, quæ cuique consentanea sit, victus rationem postulat. Doceat lac, quod natura infanti destinavit. Juvat itaque & varia mala, quæ ex hoc fonte promanant, speciatim exponere.

458. Viscidum in cibis abundans, sicubi valido naturæ robore non subigitur, chylum producit nimis glutinosum &, quæ indè porrò sequuntur, mala suprà memorata (285, 329). Pulmonum oppletio, glandularum tumores, telæ cellulosæ infarctus, systematis quod ad bilem pertinet inertia, generis nervosi languor, torpor vis vitalis (196, 198), præcipua ferè sunt, cum gluten, ex primis viis in interiora devectum, universam humorum massam inundat (283). Glutinoso autem & acre quandoquæ jungitur, quod aut manifestum continent alimenta, aut corrup-

tione, ob defectum coctionis inductâ, concipiunt; ex vegetabilibus quidem acidum (307), acerbum (309), ex animalibus putridum (312, 313), ex pinguibus rancidum (375). Sic pituitæ acres (373) nasci queunt, suis singulæ effectibus diversis notabiles.

459. Pinguium abusus, dùm blanda sunt, primas vias lubricat, laxat, debilitat, chylum præbet nimio obrutum cremore, qui minùs etiam subactus facillè secedat (331). Undè prægravans obesitas (394). Quin & si virium coctricium torpidior fuerit actio, qui in esculentis pinguedinibus naturâ inest mucus (376), facillè in viscidum (458) degenerat, ac inertem pituitam in universum corpus diffundit. Utraque de causâ debilitas solidorum (152), ac torpor (198). Oleosa insuper sincera, minoribus vasculis impacta, aquosis humoribus introitum transitumque negant; sic obstructions, ac secretionum & excretionum impedimenta creant.

460. Eadem, vel spontaneâ corruptione, vel præparatione coquinari, vel vitio coctionis, ex nativâ blanditie in acrimoniam versa nocent vehementiùs (328); maximè si diuturno abusu rancor primarum viarum in secundas admissus adipem corporis demùm quoque infecerit (375). Indè pessimæ notæ cacochymia acris, atrabilia, scorbutica, cadaverosa, vix exter-

genda, quæ ad inflammationes, exanthemata, herpes, ulcera maligna, cancrios, gangrænas, sphacelos, cariem disponit.

461. Eorum, quæ ingerimus ex numero vegetabilium præsertim, multa acidum habent manifestum, plurima latens quod evolvi potest. Hoc si validâ vi coctrice non vincitur, & vel suas ob causas extricatum magis acuitur (307), chylum, menstrua primæ digestionis, sanguinem denique ac reliquos humores acore inficit, qui multimodis ubique (308, 325) nocet.

462. Acidi austeri, quod præcipuè in fructibus minùs maturis residet, effectus morboſi ex (309, 320, 326, 376) innottescent.

463. Acidum subtilius, quod in fermentatis plùs minùs acre & manifestum inest, spiritu perquam volatili stipatum, citiùs per massam humorum se diffundens, cum nimio usu vires coctrices eludit, delatâ in lympham acritate irritante, rodente, solvente, diversimodè cum terrâ concreſcente (320, 371, 372, 379), dolores, spasmos, vasculorum contriotiones, stases humorum, catharros, rheumatismos, arthritidem, calculos & similia insuper producit.

464. Alcalescentia acria, cibi, potus, condimenti titulo largiùs ingesta, quid mali inferant, ex (310, 311) liquet.

465. Quæ de nocivâ falsamentorum acrimoniâ hoc loco memorari possent, antè (315, 316) occupata videantur.

466. Aromatum vis ignea, ab alimentum ingenio (296) longè aliena, acri oleo, sali, spiritui rectori inhærens, naturæ humanæ vix domabilis, urente lædit sanos stimulo, tenaciore, pinguedini amico, difficulter abstergendo: producit adeò in primis viis sitim, cardialgiam, ardorem stomachi, pinguium unâ ingestorum rancorem, nauseam, ructus, vomitus; bilem exasperat; intestina inflammat: in secundis viis motum humorum intendit, calefacit, subtiliora dissipat, adipem eliquat, sales acuit, acrimoniâ alcalificante attenuat sanguinem (310, 311), corpus torrefacit. Indè siccitas, macies, febres calidæ, contracturæ, spasmi, exanthemata, inflammationes, dolores arthritici, & plura alia nascuntur.

467. Quod habent vina, cerevisiæ veteres, præcipuè meraciores, liquores ardentes ex his, similibusve igne prolecti, simplices, aut diversimodè compositi, acre spirituosum, fermentatione natum, sui generis est, in bonam malamque partem famosissimum privâ sibi efficaciam singulare, & abusu magis etiam nocens, quò penetrat altius, ac diluente vehiculo per emunctoria corporis emisso, meracius semet in humores ac solida defigit. Agit autem fluida densando, spissando, partes

firmas constringendo, fibras stimulando, vim vitalem, vim sentientem, impetum animale incitando, in turbas adigendo. Ita què necessum est immodicâ potione induci sitim, temulentiam, circuitum acceleratum, calorem auctum, rarefactionem humorum, subtilioris dissipationem, humorum coagulum, sanguinis diathesin inflammatoriam (367), vasorum constrictionem, dilatationem, rupturam, errores loci (397 & seq.) obstructions, inflammationes; sed & systematis nervosi vibrationes enormes, delassantes, pessumdantes, nimiam humorum ad superiora determinationem, encephali hinc commotionem, oppletionem; diffuso deniquè stimulo, ac sedato impetu insequi subsidentiam humorum, collapsum vasorum, circulationis torporem, frigus, vires exhaustas, omnium functionum languorem, contraria prioribus omnia.

468. Hæc ritè consideranti haud obscura potest esse ratio eorum, quæ ebriosis accidere quotidie observantur. Cur natam ab hesternâ crapulâ ægrimoniam nova pocula solvant? Cur hic abusus ex diuturnâ consuetudine in necessitatem abeat, ac ferò, aut nunquam dediscatur, imò paulatim increscens à lenioribus ad fortissima tandem perveniat? Quare junioribus tantò, quàm provectis, perniciosior sit? Quamobrem primæ digestionis officinam adeò labefactet; ut, prostratâ

omni ciborum appetentiâ , solo tandem potu vivatur? Quid humores , tantâ spirituum copiâ jugiter nutritos , in vappam mutet? Undè cachexia , macies , leucophlegmatia , hydrops in ebriosis? Undè oculorum rubor , exanthemata faciei? Cur proni sint in morbos acutos , inflammatorios , hisque periculosissimè decumbant? Cur tremores , paralyfes , apoplexiam , & quæ sunt alia sensuum motuumque vitia toties experiantur? An podagra & calculus huic quoque acri debeantur?

469. Eiusdem quidem originis , at naturæ diversæ est acris , Gas HELMONTIO dictum , quod vigente fermentatione vinosâ nascens exspiransque afficere eos potest , qui magnam valdè fermentabilitum , aut reipsâ fermentantium copiam subito in se ingurgitant. Acritas hæc , vi elasticâ prægrandi stipata , stimulo non tantum , sed expansione etiam nocet : undè ructus *creat* , spasmos ventriculi & intestinorum , inflationes , anxietates summas , vomitum , choleram , diarrhœam , dysenteriam , ileum , &c. Hæc tamen leviora modo sunt , si plurima spectes exempla hominum , quos aëris isthac aurâ infecti usus subitanæ morti dedit.

470. Dulciaria , saccharata , mellita , hisque similia , usu immodico , per occultam acrimoniam dentibus inimica sunt ; pro vi suâ fermentante , acidum ingenerant , & quæ ex hoc profluunt mala (461) ;

præterea solvunt tenuantque humores (288.); horum minutâ densitate & firmas partes relaxant; non uno hinc nomine generi nervoso infesta, infantibus, sexui sequiori, debilibus, hystericis, hypochondriacis obsunt.

471. Flatulentum, quod olera, legumina, radices, fructus varii esculenti similiaque, diù multùmque, sine interpositis aliis, ingesta, fotu, actione menstruorum digestiorum, fermentatione, &c. evolvunt, sicubi vi validâ coctrice non subigitur, ructus, flatus, borborygmos, colicas creat, primarum viarum fibras distrahendo enervat, irritando in spasmos ciet, ordinatos motus pervertit: undè cruditas alimenti, diaphthora, varia chyli degeneratio, impedita defæcatio, paucum ac debile nutrimentum, virium lapsus, cachexia, &c.

472. Principium terreum in ingestis exsuperans, sive acido infectum (462.), sive viscido (458.) pinguive (459) permistum fuerit, ni motu animali vincatur, potuque multo diluatur, oneri est primis viis, dyspepsiam producit (456.), multitudine ac siccitate fecis ventrem infarcit, alvum constipat, hæmorrhoides tumentes, dolentes, fluentes infert, auctâque per chylum nimis terrestrem proportionem hujus elementi in sanguine, ceteris humoribus, firmis etiam partibus, cohæsionem nimiam, quietem, inertiam (142.),

rigiditatem (166.), torporem (198, 4.), spissitudinem (284.), concretiones varias (320.), obstructions (209, n. 8.), & quæ hinc præmanant, mala innumera efficit.

473. Polytropha, succosiora, jurulenta, quàm justò uberius nutriant, corporibus minùs exercitatis illatâ plethorâ (388.) nocent; augent & adipem non sine molestiâ (394.), & quandò ab animalium partibus præcipuè petuntur, ex multitudinis vitio tandem in cacochymiam acrem, putridam (313, 327.), rancidam (328, 375.), viscidam (329, 458.) devehunt.

474. Damnosa præprimis est aquæ in victu exsuperantia, quam calidæ potiores admittunt, abusu hodiè nimis pervulgato. Inundata hoc potu viscera primæ digestionis laxantur, infirmantur, menstruum salia nimis diluta enervantur, anorexia, apepsia nascitur: multâ insuper irrigatione mucus (373.) has partes intùs obliniens abstergetur; undè nudarum sensilissima teneritudo, dolores, spasmi, intolerantia ingestorum, vita sine cibis &c. Chylus verò aquosior, in systema circulationis delatus, tenuitatem aqueam (287.) per humores diffundit, pallorem sanguini (363.), colluviem ferrosam universo corpori inducit (354, 359.): undè nutritio prava, solidorum debilitas (262.), carnis effeminatio, nervorum impotentia, vis vitalis (196.),

sensuum, motuum, circulationis torpor, frigus, hydropum variæ species ex restagnante aquoso lentore; eodem verò ad emunctoria determinato, horum relaxatio, excretio aucta, maximè per renes, diabetes, fluor albus, sitis, defectus nutrimenti, virium lapsus, emaciatio, tenuatio corporis, tabes & similia.

475. Si, quæ ingeruntur ceterum salubria, ultra modum igne fervent, vias quas pertranseunt, fauces, laryngem, œsophagum, & in quem descendunt, ventriculum, fervore nimio affici necesse est, amburi, crispari, inflammari, excoari; hinc dolores, spasmos, siccitatem, indurationem, abscessum, ulcus, fungum, schirrhum, cancerum in istis partibus nasci. Ex quo fonte multiplex deglutitionis, respirationis, loquelæ, concoctionis læsio; præcipuè autem tristissimæ illæ ex œsophagi angustia anginae, quæ impedito alimenti in ventriculum descensu miseros, fame sitique exhaustos, fato vix eluctabili perimunt. An etiam vini adusti abusus (367.) huic malo favet?

476. Oppositi excessus haud minores, nec multum dispares sunt noxæ. Immodicè frigentia cum partes internas, calore nativo jugiter fotas, contingunt, fibras earum irritando, poros stringendo, vasa arctando, humores coagulando, dolores, spasmos, obstructions, inflam

mationes, variaque circuitûs, secretionis, excretionis impedimenta tûm in his ipsis, tûm consensione etiam in aliis partibus efficiunt: undè toties ex hâc causâ anginæ, pleuritides, ventriculi, diaphragmatis, jecinoris &c. inflammationes, dolores colici, hydrops, aliaque mala nascuntur; eoque ferè certius, quò corpus paulo ante, quovis demùm modo, magis incaluerit. Liquet adeò, quàm malè sibi consulant, qui dùm aëre, foco, motu, ingluvie, vinis, condimentis, æstuant, cibis potibusque glaciatis refrigerationem captare in deliciis habent: noxas enim frigoris subitæque permutationis (428) sat graves etiam, quod glacies habet, acre ac mordax vehementer auget.

477. Qui præ voracitate cibos solidos, tenaciores, priusquàm deglutiant, commandere prætermittunt, ventriculo plus facessunt negotii, quam natura imposuit. Minus expedita hinc menstruorum in offas non emollitas actio, pinguium subactio nulla, difficilior succi extractio, digestio tardior, tardior de ventriculo expulsio, plures reliquiæ, quas mora longior diversimodè corrumpit, novum cibum vicissim corrupturas: undè multiplex chyli vitium (323 ad 331), saburra primarum viarum, nidus vermium, fex multa tenaciùs cohærens, ægrè mobilis, adeoque diutiùs restagnans. Hæc tamen

debilibus ac desidibus magis , quàm robustis & exercitatis eveniunt.

478. Denique & in temporibus cibandi potandique peccari potest. His quidem indicandis non minùs , quàm moderandæ quantitati , famem sitimque natura constituit. At multa sunt in vitâ civili , quæ ab homine , non soli ventri nato , determinatiùs aliquid & uniformiùs , quàm stimuli naturales dare possint , postulant. Itaque ea est œconomix humanæ facilitas , ut aliis atque aliis legibus sese adstringi patiatur , hisque semel receptis consuecat , nec ideò tamen leviores quasvis ab his recessiones ægrè ferat. Intervallis ita quidem multùm diversis benè vescimur. Nihilominùs nocent sibi , quorum perpetuò in patinis aut poculis animus est ; ut semper pleno ventri nunquam induciæ concedantur. Etenim , si digestio felix est , quantitatis tamen vitium ingruit (448) : plerumquè verò non interrupto opere lassantur viscera ; ut tardè ac malè coquant : (undè varii generis cacochyliæ , hujusque pedissequa cacochymia ac cachexia 449).

479. Atque hæc præcipua sunt istius argumenti capita , undè intelligere licet , quod in usitatiore victus ratione noxium inest. Plurima quidem præterèa ab hominibus nonnunquàm , cibi potusve causâ , ingeruntur singularia , insolita , cruda , inquinata , corrupta , horrida , venenata ,

non alibilia , ἀτοπα , quæ suis singula longè diversis modis obsunt. Eo alios compellit penuria , alios depravatus ex graviditate aut morbo appetitus , luxus aut avaritia alios. Quandoquè imprudens delectus , neglecta præparatio , incongrua conservatio , casus , aut malorum hominum artes , minusve favens anni constitutio , alimentis ceterùm salubribus vitium induunt , quo vim morbiferam , & vel virulentam quoque consequantur. Hæc tamen cum nimis & multa & specialia sint , alienum institutis meis videtur hoc loco exponere.

De Intempestivo remediorum usu.

480. MEDICAMENTA quùm ægris sanitatem restituant , morbosas corporis conditiones in sanas mutandi virtute instructa esse debent (29, 42 , 43). Eò igitur ab alimentis differunt , quæ in naturam corporis mutari fas est , ut hoc nutriendo conservare queant.

481. Pertinent adeò remedia ad res sanis non necessarias ; ut quos , quales sunt , conservari , non mutari oporteat. Proindè supervacuum est eorum , quibus sani cominodè caremus , usus , dumne detrimentosus : ingesta enim , quod mutandum sit , non inveniunt : inertiam ergò per corpus transeunt ; aut naturæ robore subacta in alimentum convertuntur ; aut si

pro suis agunt viribus, etiam periculum est, ne, quod sanum est mutando, morbum faceffant.

482. Nec obtentui est, quod varii dentur sanitatis gradus, quodque, quorum imperfectior sanitas est, cum veluti pro ægris haberi possint, ad valescendum medicinâ ægeant. Neque enim in arte est quas natura constituit omnes sanitatum differentias cœquare; tutiusque, quod hac in parte præstari potest, consentaneâ vitæ ratione, quam medicamentis, obtinetur.

483. Idem de prophylaxi dicendum, quæ si continuò per remedia, præprimis, ut fieri solet, valentiora quæritur, haud rarò in prophasin morborum convertitur.

484. In universum itaque hic abusus nocet sanis, præsidia adversæ valetudinis in secundâ consumendo, adsuetudinem cum menti, tum corpori inducendo, quâ tandem necessaria reddantur, particulis alienis, indomabilibus, succos inficiendo, vi non propriâ partes laceffendo, fatigando, regulares naturæ motus interturbando, ejusque pensum ingestâ materie non alibili aggravando. His si adjungas singulares insuper agendi vires, quibus diversa remediorum genera pollent, haud difficile est colligere, cur hoc errore impliciti toties suo scopo excidant, morbosque, ac mortem properatam pro latiore

sanitate reportent. Alterantia quidem ,
 quæ dicunt , nisi drasticæ fuerint potesta-
 tis , utcunque tolerabiliora sunt , minùs-
 que ac tardiùs nociva. Evacuantium verò ,
 ut frequentior abusus , ita effectus pessimi.
 Obsunt certè eò , quòd aut plus justo eji-
 ciant , aut cum inutili etiam utile , quod
 retineri debebat , aut nimis præcipitan-
 ter , aut tempore , modove incongruis , aut
 non suis locis (401). Nocent & emuncto-
 riis stimulo , attritu , dilatatione , anasto-
 mosi , diapedesi (203 , 1 , 2 , 3 , 4) , infir-
 matione , incontinentiâ , infarctu , confu-
 sione. Naturæ prætereà ordinem turbant ,
 intentiones frustrantur , sollicitant impar-
 tam , stimulis extraneis adsuefaciunt , ad
 suos surdam reddunt , incitant ad id quod
 malè ejectum est reparandum , nec alio-
 fermè fine , quàm ut præstò sit ad excer-
 nendum (391) : undè , ubi reparati excre-
 tio tardat , multitudine angitur , expel-
 lere molitur , urgetque irrequieta. Sic tota
 demùm huic studio addicta vires succos-
 que corporis , & alimoniam consumit
 in conficiendâ materie mox oneri futura.
 Hæc si vel valentissima corpora tandem
 pessumdare debent , quantò citiùs certiùs-
 que valetudinarios , debiliores , qui ni-
 mis frequenter ex hoc abusu robur sibi
 vani promittunt ?

485. His addi potest , nocere etiam
 haud rarò remedia , tametsi cæterùm
 congrua , sicubi ad affectus naturæ per-

consuetudinem familiares, qui medicati quid in se habent, tollendos temerè adhibentur: sanati enim longè deteriora sæpè mala post se trahunt.

De Potentiis, quæ virus habent.

486. Si quid perexiguâ mole ingestum corpori humano, aut a foris admotum, vi singulari, nec moli respondente, effectus producit expectatione longè majores, qui in perniciem vitæ ac sanitatis tendunt, id venenum dicitur.

487. Tantus quidem id genus rerum numerus est, & tam differentes agendi modi, ut speciatim singulas hoc loco exponere vix sinat instituti ratio. Merentur tamen in genere considerari.

488. Venenorum nonnulla acritate mechanicâ (292) infestant, æquiparandâ potentiis, quæ fracturas ac vulnera (217, 218) inferunt. Ingesta igitur partes internas, exquisito sensu præditas irritant, pungunt, scindunt, lacerant. Undè dolores, spasmos, vulnera, hæmorrhagias, inflammationes, ulcera creant certò ferè lethalia; quum domari, detergeri, aut ad inertiam redigi in visceribus perpetuò motis vix queant.

489. Inest aliis acre Chemicum (293), manifestum, occultum, multiplex, quod quidem & similibus, ac priora (488), injuriis favire in partes, & humoribus so-

lutum , motu ac calore corporis actum , etiam altiùs penetrare & multimodis intendi potest (301). Horum adeò effectus intelliguntur ex (306).

490. Quædam vi septicâ tam vehementer in humores grassantur , ut latè diffusâ putredine corpus indè colliquescat diffluatque , solidis non minùs , quàm fluidis ; suâ cohæsione destitutis ; Conf. (161 , 2 , 288 , 310 ad 314) : undè & quas inferunt , noxas perspicere datur.

491. Aliorum deleteria potestas vasa constringit , humores inspissat , meatus occludit , motum supprimit , circuitum vitalem , secretiones , excretiones retardat , sufflaminat ; ita ocyùs aut seriùs mortem infert.

492. Longè plurima tamen , eademque perniciosissima , ipsum vitale principium (169 & seq.) invadunt , hujusque motus aut irritatione violentâ perturbando , aut vehementissimè incitando , aut & injecto torpore suspendendo (195 , 199) , functiones vitæ pessumdant. Quin credibile est , reliquos etiam venenorum in solida & fluida effectus (488 ad 491) magnâ ex parte iisdem vitalium virium motibus vitiatis deberi ; hos certè pedissequos habere , eoque magis esse exitiales. Hâc igitur potestate imprimis virulentæ gradus malignitatis videntur metiendi.

493. Ex quo intelligere licet , quamobrem sensum motuumque , qui volun-

tati parent, facultates plerumquè tristissimas in turbas conjiciantur; ut ipsam mentis arcem ab isto hoste oppugnari dixeris (179, 209, n. 3)? Et cur naturæ vires rarò hic multum valeant (180)? Et quàm propè à venenis absint medicamentorum efficacissimorum permulta, ut omninò ambigere inter utrumque genus videantur, ad utrumque pertinere? Vires medicatæ & venenatæ, quæ proximis gradibus sese contingunt, exiguâ molis differentiâ invicem convertuntur.

494. Hæc verò uti sic satis appositè generalem toxicorum efficaciam declarant; ita nequaquàm tamen sufficiunt ad privam singulorum exponendam, quâ fit, ut alia præ aliis velociùs aut lentiùs, inque alias & alias partes ac functiones, modisque longè diversissimis, inexplicabili planè varietate, suam sævitiam exerçant. Parùm profectò vel acutissima etiam ingenia hic promoverunt.

495. Nec minùs difficilis indaginis istud quoque est, quod venena quælibet non cuivis indiscriminatim homini æquè noceant, nec & eidem quovis demùm modo admota. Alia quippè vapore aëri permixto, in spiracula corporis admissò operantur; alia maximè, cum deglutuntur; alia in vulnere tantùm, quæ quidem inertia reddere vis ventriculi valet; alia aliis modis; nonnulla etiam quibuscunque. Hæc uti observando discimus, ita,

quâ fiant ratione , explicatu arduum est.

496. Miasmatum noxiorum , quæ aëra inficiunt (440) , haud absimile est ingenium : quanquam enim non adeò semper vi deleteriâ agunt ; agunt tamen parvâ mole , ac materiâ sæpè sensibus vix manifestâ , modisque singularibus , & morbos creant refractarios , malignos , quos vis naturæ difficulter superare valeat (486). Nec infrequenter corporum virulentorum effluvia sunt. Quocirca omninò ad venena referri merentur.

497. Hæc inquinamenta quam multiplici origine in atmosphæram subvehantur , utcunque quidem ex (440 ad 444) intelligere est. Nec difficulter perspicitur , ob amplissimum quod viventibus cum aëre intercedit commercium (422) , plurimas patere vias , quibus admitti queant solidaque stimulando , torpesciendo , succorum crasin motumque turbando nocere. At cum propriam singulorum naturam , viresque privas , ac agendi modos eruere aggredimur , effectuumque tantoperè discrepantium rationem reddere , a quâ non minus hæret , quam in historiâ venenorum (494 , 495) , nec præter generalia (488 ad 494) , quidquam certi determinare licet.

498. Hujus etiam loci sunt contagiones , quarum virtute velut genitali id genus morbi suam speciem propagant & communicatâ multimodis labe per homines

grassantur. Agunt certè & virulentâ potestate (486, 496), & suo quæque modo sibi proprio, & in alias atque alias corporis partes (494.), effectusque statos quidem, at longè diversissimos producant. Undè constat, uti origine, ita naturis, magnoperè inter sese discrepare, & suas singulis inditas esse certas vires, quibus, cùm per congruas vias in corpora devenerint actioni faventia, suam quælibet morbi formam distinctam constanti lege haud aliter procreent, quam plantarum animaliumve semina, aptis concepta locis, in suam singula determinatam speciem evolvuntur. Quo fit, ut diverso cuiusvis contagio suus respondeat singularis morbus, horumque totidem differentia genera, quot contagiorum numerentur, nequaquàm inter sese confundenda.

499. An igitur omnis contagio animata est, suamque quælibet habet singularem, undè oritur ac multiplicatur, animalculorum speciem? Quod peculiare nonnullis est, haud satis tuiò per analogiam universo generi tribuitur. An vis phantasæ, an metus, contagiorum mater? violentos animi motus ad virus generandum, acuendum, conferre posse indubium est: at si vel soli etiam meticulosi tantùm inficerentur, ipsis tamen sensibus constat, singularem in veris contagiis materiem intervenire, quâ sine re-

liqua vix quidquam possint. Utrum immutabilis est, rerumque principiis hâc dote æquiparanda contagiorum natura? Et, si est, an indè sequitur eadem oberrare chordâ, & qui specificum quærat antidotum veneno contagioso oppositum, & qui de metallis vilioribus in aurum transmutandis satagat? Dubia propositio, conclusio falsa BOERHAAVIUM non tangit, etiamsi ab Archiatro Regio pronunciata.

§ 500. Attendi præcipuè meretur, quâ contagia pollent, mirabilis illa facultas sanos humores in sui similitudinem convertendi. Hac nititur stupenda eorundem multiplicatio. Nec sese tamen exserit, nisi vi vitæ in corpore idoneo excitata; ut omninò dubites, utri potior effectus pars debeatur.

Data certè est naturæ humanæ potestas assimilandi, quâ in augendo sustentandoque per alimenta corpore suo utitur. Nec facile tamen dixeris, hanc esse, quâ gliscit contagium vitæ tam inimicum, nisi corruptionem neges quidquam à coctione differre, & quod natura violenter patitur, perindè habeas, atque illud, quod deditâ operâ in corporis sui conservationem peragit.

Qui vim generandi contagiis inditam ponunt, hypothesei utuntur nondum demonstratâ (469).

Nec magis satisfaciunt, qui unicè à solidis vivi corporis per virus in singulares

insolitosque motus stimulat omni hanc efficacitatem repetunt; quasi parum constaret, posse etiam effluvia, odores, fermenta, stupendas subito inducere mutationes liquoribus, in quos continentium nulla est vasorum actio. Ecquis autem credat priorem clariùs intelligi, quàm posteriorem agendi modum, inque corpore, cujus & partium & virium tanta est conspiratio, mixtioni nihil, oscillationibus omnia deberi in permutandâ humorum crasi?

Fermenta quoque, latiore Chemicorum sensu accepta, quanquàm propriam sibi habent assimilandi virtutem, quæ ab actione contagiorum minùs abluere videatur; minimè tamen hanc rem conficiunt, ut quorum idea haud universè quadrat, nec ratio minùs, atque stimulorum, inexplicabilis est.

Quare credibile potiùs, non uno eodemque modo omnia & singula sese multiplicare & vero forsan propiorem fore, qui diversarum sententiarum nulli seorsim addictus omnes in unum colligat. Nihilominùs cum ne sic quidem certa hujus materiæ explicatio tradi queat, inutile fuerit vagâ incertâque ratiocinatione multa moliri, quæ opinionem modò nec scientiam parere valeant.

Errores in motu animali.

501. MOTUS muscularis, quem homo pro arbitrio exercet, ita cum reliquis corporis vivi motibus cohaeret, ut excessu defectuve paulo majore peccare nequeat, quin ocyùs, feriùs œconomia conturbetur. Ex iis igitur, quæ alternanter musculorum actiones comitari ac consequi in corpore observantur, mutationibus spontè innotescunt, quos motio aut quies modum excedens inducit, effectus morbofi.

502. Musculus vi suâ sese contrahens brevior fit, crassior, durior, turgescit, figuram suam situmque ratione partium vicinarum mutat, movet sese & totâ suâ mole, & quavis fibrâ suâ movet & partes, ad quas pertinet, quasque contingit, & si quem habet antagonistam, & quæ huic contiguæ sunt partes. Cùm verò deindè contentionem suam remittit, & ipse in statum pristinum redit, & restituantur, quæcunque dimota fuerant. Itaque ab initio contractionis ad ἀκμὴν usque, & indè ad plenam usque relaxationem omnes illæ partes in continuo motu sunt eoque multùm variante.

503. Nec constat voluntariam musculi contractionem ita a motibus vitalibus pendere, ut, quæ accrescit musculo velocitas de summâ illorum decedat. Imò verò novus veluti hic motus illis super-

additur. Univerſa ergo motus atque adeò attritus quantitas in corpore tùm auge-
tur pro numero ac vi agentium reciprocè
mufculorum.

504. Quocirca multiplex ſub exercitio
mufculari infertur vicinis canalibus, lo-
culis, receptaculis, preſſio, remiſſio,
distractio, arctatio, agitatio, quæ cum
indè in contenta tranſeunt, his quoque
motus ſuperpondium conciliatur, quo
fit, ut ſtagnantia moveantur, fluentia
promoveantur, mutua ſolidorum fluido-
rumque inter ſe actio, & quæ hinc con-
ſequentur, intenduntur.

505. Ita quilibet mufculus, alternè
contrahens ſeſe & remittens, ſuo ſyſte-
matis vaſorum tractui novam applicat
vim, quæ humores urget pellitque for-
tiùs, quò circulationis legibus determi-
nantur. Eorundem motus ergò accelerari
debet.

506. Eadem cauſa ſanguis venarum,
copiâ ac impetu majore protrufus infu-
ſusque cordi irritamentum fit, quo hujus
contractionum numerus ac vis intendi-
tur. Indè conſenſu expedito & respira-
tio incitatur, & arteriarum properantur
motus per univerſum corpus.

507. Continuata igitur mufculorum
actione vires vitales, quibus humores
circumducuntur, quaquaverſùm animan-
tur, novisque (503, 504) jugiter augen-
tur. Crescit adeò circulationis vigor,
attritus,

attritus, calor, quæque ex his pendent, cum conditiones corporis, tum functiones intenduntur.

508. Magnum præsertim, nec uno nomine, adjumentum nascitur officinis instrumentisque, quibus alimenti coctio, defæcatio, distributio, assimilatio perficitur; ut adeò nutritionis opus feliciter procedat. Atque hæc sunt publica exercitationis modicæ emolumenta.

509. Undè constat, quasnam immodica noxas inferat œconomix humanæ. Quippè, quo ipsa excedit gradu, eodem velocitatem circumeuntium humorum auget (409): quocirca, quæ indè oriuntur mala in genere reduci queunt.

1. Ad caloris nativi augmentum enorme, quo agitati attenuatique succi, dissipatâ parte subtiliore, spissantur, serum ac fibra sanguinis diathesin inflammatoriam (367) induunt, sales dein ac olea continuato attritu acuuntur, solvuntur, volatilia, acria, putrida, rancida, foetida, ambusta redduntur (424, n. 7), circuitui vitali ineptissima.

2. Ad partium continentium læsiones valdè periculosas. Etenim rarefacti magnoque impetu propulsi humores sua vasa ultra modum dilatant, irritant, deterunt, rumpunt, destruunt: undè errores loci (397 ad 406), dolor, inflammatio, febris acuta, suppuratio, gangræna, hæmorrhagia, aut vitalibus visceribus sanguine ac-

accumulato obrutis suffocatio ac mors subitanea.

3. Ad succorum, qui sub moderatâ circulatione restagnant, commotionem, ut suis excussi sedibus evagentur.

4. Ad multivarias denique secretionum excretionumque turbas, quarum vi omne genus vitiorum qualitatis, quantitatis, motus, loci, in materias quæ fecerni & excerni debent invehitur.

510. Mobilior itaque & volatilior fluidorum, quam solidorum, natura facit, ut exercitio immoderatiore jactura inæqualis inferatur, hinc mole illorum decrescente solida prævaleant, exsucca corpora arefcant, rigescant. Aquâ & spiritu, parte humorum tenuiore, difflatis, crassamentum superest (284) iners, tenax, immeabile per vascula minora: undè horum ac parenchymatis exsiccatio, contractio, concretio, universæ adeò compaginis rigiditas major (164, 166). Pingue, quæ stagnat in suis loculis, commotum, eliquatum, sanguini redditum, attritu & calore ex blando in acre, rancidum, degenerans (3-5), per emunctoria expellitur: hinc celeris emaciatio (395). Gelatina nutriens (379), solidorum fibris undique interfusa, deteritur, exprimitur, acrior per motum facta excernitur, parte tenuiore expressâ solidescit: indè defecrus nutritionis, augmentum rigiditatis. Bilis quoque nimium commota, adusta,

in summam acuitur acrimoniam, quâ & primas vias infestat, & suos egressa cancellos in reliquum etiam corpus suâ malignitate grassatur.

§ 11. Ex dictis (509, 510) liquet, solum motus animalis excessum solida fluidaque corporis tam vehementer à statu sano alienare posse, ut vel venenatis etiam viribus (486) agere videatur, & cum in universum ferè semper & cuivis noceat, ac rarò profit, nocere tamen maximè, inter sanos, ætati teneræ, sexui sequiori, temperamento bilioso, sicco, calido; tum verò plethoricis, valdè obesis; cacochymicis, in hæmorrhagias, aut abortus proclivibus, & quibus viscus aliquod totumve corpus contabescit, & qui spiritus laborant difficultate, & calculosis, iisque, quorum circulationi pertinaces obstant canalium obstructions, tumores, humorum congestiones, &c. His ubi & insuetudo accedit, aut ingens aëris æstus, aut ex cibi potusque defectu inanitas, aut subitus à statu quietis ad vehementem motum transitus, tantò peiores inferri noxas necessum est.

§ 12. Minoris momenti sunt, quæ ipsis musculis nimium exercitatis eveniunt mala, lassitudo, debilitas, tremor, dolor, spasmus, impotentia ad motum. His tamen quies ferè pro remedio est. Siccitas autem, rigiditas, tendineæ naturæ multiplicatio, quas labor excedens carnibus

musculorum inducit, non æquè facile tolluntur.

513. Haud lætior est illorum sanitas, qui in opposito errore versantur. Nimia quies & potentias morrices, & , quæ movendæ sunt, partes in torporem conjicit. Vis musculosa desuetudine contractionis, congesto pingui, languore influxus vitalis, minuitur, suffocatur; articuli, rigescentibus per otium ligamentis, axungia cœunte (222), aptitudinem ad motum amittunt; antagonistæ magis renitentur. Ita neglectus animalis motus demùm impotentiam parit.

514. Plus tamen damni & humorum circuitus ob hanc causam patitur; ut qui solis commissus vitæ viribus, extraneis destitutus suppetiis (507), per vascula minora primum, dein per universum systema languescit: undè humorum stagnatio, accumulatio, inviscatio, caloris nativi imminutio, secretionum ac excretionum impedimenta, & quæ ex his oriuntur mala quamplurima. Ex hoc fonte igitur polichymia (385), plethora (387), obesitas (394) profluunt, quæ sarcinis corpus gravant firmarum partium mole ac vi majoribus. Plenitudini citò succedit cacochymia iners, glutinosa (283), aquosa (287), frigida, universum corpus inundans, quâ laxum, molle, flexile (160, 162), solidis inducitur, vis vitalis torpet (196, 198), vigor nerveus perit, collu-

vies serosa, leucoflegmatia, hydrops varius, pigritia ad motus, sensuum hebetatio, ἀναισθησία, omnium functionum suffocatio tandem nascitur.

§ 15. Præ ceteris pessimè afficiuntur, quæ abdomine continentur, organa primæ digestionis; maximè si etiam prono corpore sedenti comprimantur, atque alimenti copia & qualitas haud respondeat vitæ desidi. Namque respiratione vegetâ, motu externo, succussione non adjuncta in opere suo tardant, alimentum imperfectè coquunt, lentè propellunt, morâ longiore corrumpi sinunt, utile haud satis emulgent, nec depurant, fæces accumulunt: undè omne genus vitiorum chyli (323 ad 232), ructus, flatus, spasmus, anxietas, alvus tarda & tumens, anorexia, universæ officinæ infirmitas, menstruorum inertia, degeneratio varia, mesenterii vasculorum obstructio, aliaque innumera mala nascuntur. Ingens præterea succorum multitudo, quâ viscera illa perfunduntur, solis eorum viribus, extraneâ ope destitutis, haud satis promoveri potest: languet ergo circuitus; fit humorum congestio, stagnatio; sanguis tardè redux, rariùs pulmonum aëre animatus, nec vigore cordis incitatus, in vappam abit, infarcit venæ portarum systema, splenem, hepar, cetera. Nec mirum adeò bilem deniquè vitiari (372), cacochymiam, scorbutum, cachexiam,

icterum, hydropem, malum hypochondriacum, & alios id genus morbos inde produci.

Damna exposituris & motibus singularibus.

516. QUAM in plerisque rebus suis affectat amatque natura, variatio & mediocritas in partium corporis motione ac positu quoque conducit. Nocet, quidquid hic justo violentius est, aut nimis diuturnum sine remissione; nec in ægris tantum evitari debet, sed vel in sanis etiam causa morborum fieri potest.

517. Status, ultra modum protractus, artus inferiores humoribus tardè ad cor redeuntibus gravat: undè infarctus, œdema, varices, ulcera. Lumborum quoque, renum, coxarum passionibus hoc situ contrahuntur: ut & genitalium vitia ex humorum congestione, & herniæ inguinales (233), crurales (234), in feminis fluxus uterinus, fluor albus, abortus, uteri vaginæque procidentia (250 ad 254); maximè sicubi & nixus subindè accedens pressionem auxerit ac partes gravitate deorsum vergentes etiam protruserit. Sanguine autem difficilior & versus cor remeante, & inde ad caput ascendente, cum homo diu stat immobilis, haud mirum, magis, quam aliis exercitiis, lassari & vel animo linqui.

§ 18. Sessio quieta , immodica , ut minus fatiget , nihilo tamen salubrior est , præsertim corpore pronato multùmque flexis genibus. Similia hinc mala artubus inferioribus , lumbis , renibus , coxis , fiunt (617) : tum & curvitas dorsi , obliquitas spinæ , crurum stupor , ischias , claudicatio : ex impedimento denique abdominis viscerum vitia modo (615) enumerata.

§ 19. Decubitus excedens , systemati uropæo nocivus , renes comprimit , obstruit , inflammat , secretioni , propulsioni , excretioni lotii obstat : undè mucus , sabulum , calculus , horumque sequelæ. Officit & situs horizontalis caput humoribus replendo : undè cephalalgia , ophthalmia , hæmorrhagia , sensuum hebetudo , vertigo , sopor , &c.

§ 20. Multos præprimis ac graves affectus producit subita , violenta musculorum contractio , diu continuata , absque remissione , accedente etiam , qua nixus intendatur , spiritus inhibitione. Etenim vehemens tractio , pressio , distentio , arcuatio , propulsio , vim infert partibus , mutuam inter continentia & contenta rationem omni modo variat , motum ac directionem humorum valdoperè mutat ; maximè cum , animâ etiam compressâ , sanguinis per pulmonem trajectus suspenditur. Indè musculorum tendinumque de

fuis fedibus excussio (243), armillarum, vinculorum, ipsorumque tendinum relaxatio, ruptura, articulorum distortio, subluxatio, luxatio (226, 227), ossium fractura (217) aliaque nexus situsve vitia (224, 229), herniæ (230), prolapsus (248 & seq); meatûum ac receptaculorum dilatatio, anastomosis, diapedesis, diæresis (203), aneurysma, varix; fluidorum aberratio omnivaria (397 ad 405), hæmorrhagia, hæmoptoë, mictus cruentus, sugillatio, emphysema, tumores varii, & quæ ex his oriuntur, mala innumera.

§21. Hæc si quis ad varias corporis partes, ut suis singulæ musculis mobiles sunt, aut, ob viciniam consensumve qualemcunque, illis agentibus diversimodè affici debent, applicat, is facile intelligit, quot qualesque noxas inferre queant tussis, cachinnatio, sternutatio, oscitatio, pandiculatio, declamatio, vociferatio, cantus, tubarum inflatus, saltus, lucta, cæspitatio, bajulatio, gravium elevatio, aliæque id genus motiones, sicubi enormes fuerint.

Exercitationes Mentis immodicæ.

§22. ATTENTIOR contemplatio eorum, quæ quisque in semetipso facile experitur, affatim docet, mentis actionibus haud minùs, quàm corporis exercitiis.

vires dissipari, alternamque requiem illis æquè, ac his, interponendam esse, ut sanitas perstet.

523. Mens nimirum corpori suo, dum vita viget, intimè implicata est, ut difficulter concipere liceat tam exquisitè puram ejus operationem, quæ prorsus nihil corporeæ mutationis quoquo modo sibi innexum habeat. Præterquam enim, quod multas cogitationes determinati sequantur motus corporis, sensoria quoque cum externa, tum interna, materiem occasionisque cogitandi vix absque aliquâ motionis suorum staminum specie subministrare posse videntur. Oportet itaque, cum mens in suâ officinâ actuosa est, hujus organa plùs minùs cieri, tendi, laxari, oscillare, inter sese agitari, quomodocunque saltem aliter se habere, quam ubi ab opere feriat.

524. Præterea verosimillimum est systema nervosum, quâ sensui præest, vili quadam motrice animari, vitali muscularive virtuti (179; 502) forsitan æquiparandâ, quâ agente stamina ejus tendi, rigescere, turgere, concipiendis ad irritamenta oscillationibus aptari queant, vicissimque remitti ac flaccescere, cum oriatur. Nec refert, utrum à spiritu, quem vocant, animali, per nervos diffuso, eandem repetas, an quoquo alio modo ab ortu putes inditam, mecumve in re obscurâ opinando nihil augureris. Agnosc

ce dum tamen videtur, aliquod menti in eam concessum esse imperium, quo excitare silentem pro lubitu possit ad agendum tam in universo corpore, quàm in singulari parte, perindè ut muscoli etiam arbitrio parent.

§ 25. Constat autem sentiendi illam vim (§ 24) cum vi vitali communicare, ut altera alteri pro irritamento esse possit (179). Quin & mutuum fortè inter eandem & muscularem vim commercium viget, quo fit, ut nervorum interventu iussa mentis ad musculos deferantur: nisi mavelis idem utrobique motus principium dari, at quod pro differente partium, quas animat, conformatione diversimodè agat. Utraque certè & nervorum & musculorum virtus non inexhausta est; nec continentem fert laborem; nec fatigari altera sine alterius detrimento potest.

§ 26. Quanquam igitur quæ in sensoriiis cientur agitationes motibus musculorum longè minùs manifestæ sunt, facit tamen summa medullæ nerveæ teneritudo, ut hæc vel gravius etiam, certè nihilo levius, ab immodicâ exercitatione affici mutarique debeat, quam muscoli ab excessu motus animalis (§ 12), nec dispares indè contrahere læsiones. Mollissima nimirum stamina quovis demùm modo (§ 23) frequentiùs, diutiùs, vehementiùs commota, inter sese attrita, lassantur, tonum amittunt; tremores irregulares,

injussos concipiunt concitantque præter ordinem in vicinis, spasmo velut obri-
gescunt, aut flaccida resolvuntur; vis ipsa
nervea (§ 24, § 25) elanguescit, dissipatur.
Ex quibus, nisi tempestivâ requie leven-
tur, sensuum externorum internorumque
hebetudo, impotentia, idearum confu-
sio, somni turbulenti, pervigilium, ima-
ginatio depravata, delirium, fatuitas
An &, quæ musculis assiduo labore eve-
nit (§ 12), siccitas, rigiditas, in his quo-
que organis nasci potest, quâ senile vitium
in facultates mentis ante tempus in-
vehatur?

§ 27. Ingravescunt autem hæc mala,
novisque augentur, quum sensorii com-
munis agitatio etiam apparatus ence-
phali vasculosum in motus enormes ciet,
ac majore sanguinis copiâ caput opplet.
Undè partium distensio, dolor, calor,
inflammatio, atque ex his nascens actio-
num mentis multiplex perturbatio. Quin
& consensus mutua principiorum motus
(§ 25) facit, ut viribus nerveis (§ 24) ni-
mium intensis, lassatis, dissipatis, reli-
quorum systematum vires similia patian-
tur, hinc corpus absque labore suo fatige-
tur, omniumque ejus functionum conse-
quatur læsio.

§ 28. Accedunt vitia ex motu animali
neglecto (§ 13 ad § 15), vitâque sedenta-
riâ aut statariâ (§ 17, § 18), litterarum flu-

diosis familiari, quæ uti ex se fat gravia sunt, ita magis etiam properantur ac invalescunt, ubi robur corporis inquietâ cogitatione minuitur.

§ 29. Excessus tamen cum varietate studiorum tolerabilior est: at vehemens cogitationum in eandem rem intentio, non interrupta, rari sunt, quibus non magnoperè noceat. Etenim pars illa sensorii communis, quæ sola tum in actione est, & in quam tota veluti mens omni suâ vi incumbit, violentiam patitur haud minorem, quam muscoli singulares fortiter diùque contracti (§ 20, § 26). Itaque aut stamina ejus tam pertinaciter arriguntur, ut remitti dein nequeant, aut oscillandi finem non faciunt acriùs commota, aut nimium distracta tenorem denique amittunt. Undè omne genus mentis perturbationum, melancholia, *εγασις*, mania, catalepsis, fatuitas, sensuum impotentia, virtutis nerveæ resolutio, & similia nascuntur.

§ 30. Neglecta mentis cultura organis quidem sensoriis torporem inducit, vim nerveam habet ac exstinguit, facultates animi, aut omnes, aut singulas, labefactat, ut vel universæ, vel aliquæ inertes otiantur. Ceterum tamen, nisi & motus animalis intermissio accesserit, reliquis functionibus haud adeò obest, ut non ignavos videas stupidosque crebrius.

ferè, quàm ingeniosos, ad ultimam usque senectutem firmâ corporis valetudine perfrui.

531. Ex his (508 ad 530) inter se collatis manifestum est, exercitationes mentis, quàm corporis, suo excessu longè magis infirmare sanitatem. Patet etiam, cuinam ætati, sexui, temperamento, acriora studia & lucubrationes minimè convenient? Cur profunda meditatio magis fatiget, quàm motus muscularis? Quare iis, qui gravi morbo exhausti revalescunt, tam perniciofa plerumquè animi intentio, saluberrima autem corporis moderata exercitatio?

Vis noxia Animi perturbationum.

532. INEST in animo impetus, quo fertur in ea, quæ, quod vel bona, vel mala, vel insolita sint, saltem talia videantur, placent, displicent, aut percellunt. Is sicubi commotionem in homine excitat majorem, quam quæ rectæ rationi conveniat, hæc animi perturbatio dicitur.

533. Comitatur adèò hanc (532) & prodit actionum illarum, quæ ex mutuâ animi corporisque conjunctione fluunt, major minorve à justo tenore alienatio. Undè consequitur, ut in eo statu organa quoque, sensibus motibusque voluntariis dicata, turbis agitentur, viresque quibus

animantur (502, 524) in vitiosos motus aberrant.

534. Quin docet etiam observatio, cordis arteriarumque motus, calorem, colorem, habitudinem corporis, unà tùm alterari; universum ideò circulationis ambitum, &, quibus hæc nititur, vires vitales (170), quasque sub se habet, quarumvis partium actiones præter ordinem affici.

535. Quæ si quis, prout latissimè patet, rectè perpendit, ei dubium videbitur, utrum animi ea magis, quàm corporis, perturbatio dicenda sit; quandò totius œconomix humanæ functionum nulla est, quæ ab hoc impetu immunis perverti nequeat.

536. Quocunque autem modo isthæc (532 ad 535) in homine fieri concipias, sive mente imperante, sive cæco instinctu, seu incitante quadam vi, menti inditâ, à reliquis ejus facultatibus distinctâ; illud certum, deberi ea quidem mirabili, quod inter bona hominis principia viget, commercio: at hoc ipsum tamen leges limitesque, quibus in statu tranquillo adstringitur, tùm adeò excedere, ut, qui eduntur effectus prorsus insoliti, ejusque viribus longè superiores videantur, saltem, quo minùs datâ occasione nascantur, impediri, aut nati suppressi pro arbitrio vix possint.

§ 37. Nimirum, quæ homini data sunt, bina actionum systemata, alterum menti cum corpore commune, alterum si non merè corporeum, certè à conscientia fectum, etsi diversis legibus reguntur, contubernalia tamen in uno corpore sunt, ac mirabili commixtione per singulas partes diffusâ, instrumentis inter se contiguus, connexis, aut & communibus gaudent, viribusque animantur, aut iisdem, aut inter se consentientibus (§ 25). Quocirca, quæcunque in alterutro cientur, insigniores commotiones quo minùs in alterum quoque transferantur, fieri haud potest.

§ 38. Quæ quidem Medicè considerata docent, in animi motibus impetuosas dari agitationes, quæ in principio cogitante, hujusque adeò officinâ, primum natæ, indè in reliquum corpus protrusæ, exque hoc vicissim eò, undè venère, revolutæ, celerrimo itu redituque tam vehementer augefcunt, ut, quidquid est virium facultatumque in toto homine, conturbare, atque hinc universæ œconomix humanæ fundamenta concutere queant.

§ 39. Quanquam igitur in moderatis, qui ratione diriguntur, sua inest eximia utilitas, haud minùs physica, quam moralis, magnoperè tamen vitæ ac sanitati nocere etiam possunt valdè violenti; maximè sicubi & subito erumpunt, aut

pertinaci duratione inolefcunt, aut intus favientes nequicquam comprimuntur, aut alii aliis celerrimè superveniunt five affines, five inter feſe oppoſiti.

540. Indè ſenſum, motum, circulationis, reſpirationis, ſecretionis, excretionis, coctionis, nutritionis, generationis, &c. innumera ex hoc fonte vitia profluere quotidianum eſt, quæ alias quidem naturæ viribus ſpontè rurfum ſuperantur, nec rarò tamen in omne etiam morborum genus, & in ſubitaneas lentæſve mortes abeunt.

541. Uti verò affectionum mentis quæque pro ſuâ diverſitate diverſas externis corporis partibus actibusque mutationes inducit, quibus, tanquàm propriis characteribus, foris expictæ ſeſe diſcognoscendas produnt; ita ſuo etiam ſingulæ modo peculiari internas vitæ fanitatisque conditiones convellunt, vires corporis motrices opprimendo, exagitando, perturbando. Atque hinc præcipuè multifaria illa naſci videntur motus humorum vitia (406 ad 413), quæ in pathematis, prout aut læta, aut triſtia fuerint, alia atque alia etiam ex pulſu ſeſe manifeſtant.

542. Principia videlicet atque inſtrumenta motus conſenſione accuratâ ſeſe accommodant propenſionibus & averſationibus mentis emotæ, huiusque ideò ſtatui diverſo reſpondentes quoque in

corpore mutationes excitantur. Indè gaudii comes auctior, expeditior, circulatio, secretio, excretio: sed & insomnia, infania, virium resolutio, quin mors apoplectica, ubi nimium est & improvisum. In amore non absimilia insunt: protractum autem rei amatae desiderium, & ægritudo de perdendâ, aut non obtinendâ, inquietem, languorem, anorexiam, chlorosin, tabem, nostalgiam, melancholiam, erotomaniam, &c. inducit. Ira impetu efferato nervos, musculos, sanguinem, bilem, exagitat; hinc furorem, inflammationes, febres ardentes, viscerum primæ digestionis turbas enormes, errores fluidorum omnivarios (397 & seq.), & vel veneniferam quoque vim creat. Odium ac livor perseverans pervigilio, febre lentâ, appetitu prostrato, inedia, pallorem, torporem, maciem, cachexiam infert. Mœrore vis nervea languet, tonus partium fatiscit, motus vitales imminuuntur: undè pulsus tardus, contractus, circulatio lenta, inviscatio humorum, sanguinis coagulum, coctionis ac nutritionis defectus, diarrhœæ, obstructions, scirrhî, melancholia, icterus, hydrops somni diuturni, lethargus, catalepsis, &c. Metu vis muscularis infirmatur, tremunt membra, sphincteres resolvuntur; minuto cordis vigore, ambitus circulationis contrahitur, repressis intrò humoribus

pallor fit, ficcitas, perspirationis suppressio, attractio major, anxietas, viscerum vitalium oppilatio, naturæ ad munia sua impotentia. Terror, præ ceteris perniciosus, systema nerveum violentissimè quassando, spasmos, convulsiones, epilepsiam, stuporem, imaginationem depravatam inducit; constrictis subito vasculis minoribus humores versus vasa majora cogit, cor in palpitationem, pulmones in angorem conjicit, pallorem, frigus, congestiones, abortum parit, evacuationes suppressit, subito necat.

§43. Quocirca manifestum est, animi motus violentiâ, frequentiâ, duratione enormes, multò quàm corporis, graviùs œconomiam humanam affligere: nocere autem præprimis, sicubi & immodicas mentis exercitationes comitantur (§22): posse tamen & plurimùm prodesse, quum ægris accidunt; hinc medicamenti non minùs, quàm veneni vim exserere: difficillimum denique esse, quos creant foventve morbos sanare, nisi animo in tranquillitatem restituto, hosque propterea heteroclitos, aut malignos quandoquè videri, cum quæ subest, compressa mentis perturbatio latet; physiognomiam igitur Medico tum maximè conducere, ne frustra laboret.

Excessus somni ac vigiliarum.

544. VIGILANTI quæ per functionum exercitationem de corporis cùm materiâ , tùm viribus decedunt , non ità cibi potusque usu reparari queunt , ut non interpositâ etiam quiete opus sit. Indè naturalis somni necessitas & consentaneus sanitati modus.

545. Tametsi igitur & somni & vigiliarum , in longissimum tempus , sine interruptione protractarum exempla profant ; uterque tamen excessus præter naturam est , nec impunè tolerabilis. Non durabilis vita est , quæ alternâ requie caret ; nec nisi umbra vitæ perpetuus somnus.

546. Facit nihilominùs ætas , sexus , temperamentum , vitæ genus , clima , tempestas , consuetudo , &c. multiplicem in his rebus inter homines discrepantiam ; ut difficile sit , suam cuique mensuram per certa tempora definire. Oportet ideò quæ de excessuum noxis dicam , non nisi congruâ limitatione ad singulos homines applicare.

547. In vigiliis nonnulla semper datur sensuum externorum , internorum , motuumque voluntariorum exercitatio , minor , major ; expedita certè virium organorumque , quæ his functionibus dicata sunt , ad agendum alacritas adest. Univerfa ergò mentis officina aut agit ,

aut saltem agere gestit. Contra somnū tempore, quies horum omnium, relaxatio instrumentorum, virium torpor.

548. Quum verò post aliquanti temporis vigilias sano hebescant sensus, membra graventur, musculorum vis labascit, ipsa mens langueat, mutuique cum corpore commercii pertasa somnum appetat; liquet, istud hominis systema non ita comparatum esse, ut perpetim vigere possit.

549. Vigilanti præterea, ob continentes emporii animalis agitationes, reliquæ etiam corporis partes stimulantur (179), vires motrices quæcunque excitantur (507, 508, 525, 527, 537). Undè circuitus sanguinis, attritus, calor, attenuatio humorum, mutatio, secretio, excretio intenduntur, quæ hoc incitamento destituta in dormiente imminuuntur.

550. Intelligitur indè, pervigilio noxas inferri organis sensoriiis motoriisque, vires horum exhauriri, stamina atteri, vibrationes in his cieri inordinatas, à mente non regundas: undè series cogitationum malè cohærens, phantasia luxurians, impressio idearum non delenda, delirium, vertigo, cephalalæa, agrypnia.

551. Auctiore insuper humorum motu (549) subtilia dissipari, crassa cogi, sales & olea asperari, bilem acui, solida

deteri, pingue consumi, adeòque corpus exsiccare, emaciari, bilem atram generari, hæmorrhoides, febres, delirium melancholicum, inquietudinem perpetuam, somni fugam induci. Hæc verò prioribus (550) juncta quam vehementer universam œconomiam turbare possint, quisque videt.

552. Et magis quidem isthæc omnia (550, 551) properantur augenturque, si cubi non interrupta facultatis mentis contentio, studia non variata, aut violentus animi motus, vigiliis accesserint. Laborem corporis nata ex lassitudine somnolentia tempestivè satis ut plurimum abrumpt.

553. Contraria igitur mala nimium dormientibus accidere debent. Universæ functionum animalium officinæ torpor, in hujus organis viribusque, quin & in ipsâ mente, agendi desuetudo, ineptitudo; hinc omnium sensuum hebetatio, motuum inertia, ἀνασθησία. Ex lentore verò circulationis crescente obesitas, polychymia, spissitudo humorum frigida, leucophlegmatia, capitis oppletio, effeminata carniū mollitudo, secretionum ac excretionum suspensio, excrementi accumulatio, defectus coctionis, depurationis, nutritionis, vigoris denique vitalis in universo corpore extinctio, ac sopor lethalis.

554. Ex quibus (550 ad 553) inter se

collatis patet , præcipua , quæ ex hoc fonte profluunt mala ad exercitationes corporis animique nimias , aut intermissas (501 ad 530) pertinere , hinc pro variâ similium vel dissimilium potentiarum combinatione plurimum intendi minuire posse. Tum cui ætati , sexui , temperamento , vitæ generi , alteruter excessus magis aut minus noceat ? Quodsi verò inter duo tantum extrema eligendi optio daretur , quodnam præferendum ?

Excretio ac Retentio inordinata.

555. UT suus corpori vigor constet , egestorum non minus , quàm ingestorum , certa quædam ratio & modus esse debet , nec externi retinenda , nec retineri excernenda. Utrumvis enim acciderit , id nocumento est.

556. Magna tamen pars eorum , quæ hoc titulo comprehenduntur , naturam potius morbi aut symptomatis (34 , 41 , 86) referunt. Quare hoc loco de illis duntaxat dicemus , quæ causarum nomine venire possunt.

557. Salivæ , uti secundum naturam jugiter in os confluit , exspuitio sano homini coctionem alimenti infirmat , exhauriendo unâ omnes liquores salivæ similes , quos natura in primas vias convehit , ut has humectent inque ciborum digestionem adjuvent. Undè sitis , siccitas ,

chyli spissitudo , difficilior à fæce separatio , absorptio minùs prompta. Excipit hæc defectus nutritionis , emaciatio , debilitas. Sanguis autem suâ lymphâ orbatus , concretus , atrabilarius , obstructions , melancholiam , hujusque sequelas parit.

558. Alvi suppressione diuturnâ stercus accumulatum , exsuccum , durefcit , ægrè dein promovendum : intestinis hinc distentis , ἐμπεραξι imperviis , fibris eorum infirmatis , vasis compressis , tumet venter , molestia nascitur hypochondriaca , pertinax alvi constipatio , hæmorrhoides , capitis gravitas , dolor , vertigo , angina , ophthalmia , vomitus , ileus , putror fecis , æstus , febris , spasmus , inflammatio intestinorum , &c. Hæc quidem in naturis debilioribus , quæ plurimum excrementi generant. Robustis pauca , quam quotidie ex alimentis parant , fæx , etiam per multos dies retenta , non nocet.

559. Qui urgens lotium reprimunt , nisi invitis tandem effluit , vesica his ultrà modum turgens hypogastrium ac lumbos tumore , dolore , angit ; cavitas vesicæ immanis fit , fibrarum ejus atonia , sphincteris spasmus invincibilis , ischuria tardè aut nunquàm sananda , πῆξις quandoquè (203 , 4) aut κυστίτις (238 , aut ex stagnantis urinæ acrimoniâ inflammatio vesicæ & gangrena. Hæc mala topica. Accedunt ex impeditâ simul lotii secre-

tione feri urinofi in fanguine retentio, putrefactio, lymphæ, &, qui ex hac fecernuntur, liquorum corruptio fimilis (313): undè anxietas, fitis, naufea; vomitus, faliva, perfpirabile, fudor, urinofa; tremor, vertigo, delirium, convulfio, lethargus, mors.

§60. Perfpiratio ultrà quam per eft aucta, vires profternit, animi deliquium, mortem fubitaneam (427, 4) infert. Suppreffa eadem ficcatur intègumenta ac rige facit, vafcula obruit, humorum molem auget, gravitatem ad ftateram & ad fenfum, laffitudinem, anxietatem, animi torporem, congestiones in partibus, tumores, dolores, inflammationes creat; nifi maturè benignum aliarum excretionum augmentum confequatur. Accedens autem retenti excrementi acrimonia etiam febres, eryfipelas, rheumatifmum, arthritidem, inducit.

§61. Sudatio nimia exficcat corpus, debilitat; fubductâ aquâ, humores cogit (282), diathefin inflammatoriam (367), atrabilariam (284, 365) fanguini conciliat, cohærentiam inter lympham & craffamentum infirmit (319), alia excrementa infpiffat, minuit, immeabilia reddit, poris nimium patulis periculofam ad frigus fenfilitatem parit. Hæc quantum noxæ inferre queant, ex locis citatis intelligitur. Sudor admiſſo frigore subito cohibitus fimiliter, ut fuppreffa perfpiratio

tio (§60), nocet. Sudandi autem consuetudo tempore in naturam conversa, si spontè, aut arte, abrumpitur difficillima sæpè mala producit.

§62. Immoderata feminis profusio non solum utilissimi humoris jacturâ, sed ipso etiam motu convulsivo quo emittitur, frequentius repetito, imprimis lædit. Etenim summam voluptatem universalis excipit virium resolutio, quæ crebrò ferri nequit, quin enervet. Colatoria autem corporis quò magis emulgentur, eò plus humorum aliundè ad se trahunt, succisque sic ad genitalia derivatis reliquæ partes depauperantur. Indè ex nimia venere lassitudo, debilitas, immobilitas, incessus delumbis, encephali dolores, calores, convulsiones, sensuum omnium, maximè visus hebetudo, cæcitas, fatuitas, circulatio febrilis, exsiccatio, macies, tabes & pulmonicâ & dorsalis, effeminatio. Augentur hæc mala atque insanabilia fiunt ob perpetuum in venerem pruritum, quem mens non minùs, quàm corpus tandem contrahit, quoque efficitur, ut & dormientes obscena phantasmata exerceant, & in tenebrarum pronæ partes quavis occasione impetum concipiant, onèrique & stimulo sit quamlibet exigua reparati spermatis copia, levissimo conatu, & vel sine hoc, de relaxatis oculis elapsura. Quocircà liquet, quare adolescentiæ florem adeò pessumdet iste excessus? Cur senibus

tam pernicialis? Discrepant tamen hoc virium genere homines etiam ejusdem ætatis inter sese plurimum; aliis vel modicâ venere languentibus; aliis immoderatissimâ vix exhauriendis.

563. Abstinencia nimia rariùs quidem obest; obesse tamen visa hominibus naturâ falacibus, *πολυσπέρμοις*, pollutione debilitante, gonorrhœâ; oppletionem, tumore, dolore, inflammatione partium feminiferarum; stagnantis feminis inspissatione, corruptione; satyriasi, spasmi, melancholiâ, maniâ venereâ. Sexui sequiori ex hoc fonte quandoquæ languor virium, fluor albus, chlorosis, malum hystericum, furor uterinus. Cohibita autem succi feminalis ad exitum concitati ejaculatio *σπερματοκήλην*, *κισσοκήλην*, scirrhum, cancerum testium inducit.

564. Lactis excretio, nutricis viribus major, subducto corpori nutrimento, debilitatem, pallorem, maciem, circuitum vacillantem, febrem hecticam, tabem, sudores profusos, utero gravido abortum creat: frequentiore insuper uberum sucu etiam vis nervea labascit, irritabilitas (190), animi dejectio, deliquium, cordis palpitatio, vertigo, sensuum, maximè visus teneritudo, hebetudo, spasmi hystericici nascuntur. Parati autem lactis suppressionem mammarum sequitur dissentio, tumor, dolor, febris, inflammatio, suppuratio, scirrhus, aut impetu ali-

orsum verso dolores rheumatici, humorum in partibus aliis congestiones, harumque sequelæ; nisi maturè salutaris per transpirationem, sudorem, urinas, alvum, lochia, menstrua, evacuatio supervenerit.

565. Nimix sanguinis jacturæ, per quascunque vias factæ consecutiones sunt inopia liquidi vitalis (393), virium defectus, circulationis languor, caloris nativi extinctio, pallor, omnium actionum infirmatio, crudi, aquosi, pallidi, mucosi, in humoribus accumulatio (283, 287, 354, 360, 363, 366), solidorum debilitas (157), cachexia, leucophlegmatia, hydrops. Contra haud minùs periculosum est, sanguinis effluvium aut naturale, aut cui natura dudùm adstuevit, suppressi. Etenim plerisque sanitatibus ad colligendum aliquod humorum superpondium inest pronitas, qua cùm necessariarum tolerabiles redduntur evacuationes, & , quod per has amissum est, continuò reparatur. Ita vel præter necessitatem institutæ sanguinis detractiones etiam in consuetudinem abeunt, nec intermitteri impunè possunt (384). Plethora indè multiplex (387 ad 392), universalis, particularis; vasorum distentio, circuitus suffocatio; varia naturæ ad excernendum molimina, motus irregulares, spasmi, enormis humorum in partes singulares congestio (311), inflammatio, error fluen-

tiun (399), impactorum (400), excretorum (401), effusorum (402, 403), secretorum (405); præcipuè autem mirabiles per insolita loca hæmorrhagiæ.

De Calculi origine & nocumentis.

§66. RETENTORUM classi haud incongruè calculum annumerare licet; tametsi nec malè aliorsùm referri soleat. Habet enim probasi terram, cujus uti plurimùm in fluidis firmisque partibus corporis humani (137), inque alimentis (148), quibus vescimur, inest; ita, quod superfluum est, lege sanitatis tempestivè foras ejici unà cum ceteris excrementis debet. Terra igitur retenta, stagnans, si, secessione ab aliis principiis factâ (320), suas moleculas adunaverit, in calculum concreescere potest.

§67. Medica quidem historia docet, vix ullam corporis partem dari, quæ non aliquandò huic concretioni obnoxia fiat; maximè tamen primas, quas vocant, vias, &, quæ tùm bili, tùm lotio, destinatæ sunt, officinas, cum primis viis proximè communicantes. Dixeris ideò, humores, qui crudorum permixtioni præ reliquis patent, præcipuè lithiasin contrahere.

§68. Terrestris ingestorum particula, acido præprimis infixio stipticæ, in ven-

triculo aut intestinis retentæ, solidum aliquod corpusculum ibidem pro basi nactæ, cui adhærescere queant, succis eò confluentibus glutinatæ, volutatione jugi addensatæ, calculum in his partibus formant augentque agrè excutiendum, homini tamen, quàm brutis, minùs familiarem. Documento sunt ægagropilæ & lapides Bezoar.

569. Lotium coctum, sanissimum, limpidum, etiam per bibulam colatum, in vase quiescens, ad contiguam hujus superficiem affigit minima granula, quibus dum ex recenti lotio, subindè infuso, alia atque alia accedunt, crusta tandem nascitur ex veris calculi elementis composita.

570. Corpus solidum, insolubile, cavo vesicæ urinariæ vivi hominis, aut animalis, detentum, citò obducitur crustâ simili, quæ in dies augescit; etiam si vitio careat urina. Crescit eodem modo semel in viis urinæ natus calculus, restitansque immeabilis redditur.

571. Indè & quivis ferè calculus in centro nucleum monstrat, primæ crustæ basin, quam orbes alii aliis appositi, externi internis majores, ambiunt, incrementi paulatim facti indices.

572. Analyti Chemicâ tamen constat, non meram terram esse, quæ sic coit; sed aquæ etiam, salis ac phlogistæ aliquid, & materiæ elasticæ plurimum accedere,

mixtione simili, qualis in firmâ corporis compage obtinet (132, 133, 146). Accuratio quoque detegit, crustas ex micis componi, quæ salium crystallos referunt. Extimæ certè superficiei quandoquè distinctæ ac grandiores id genus massulæ insident.

573. Ex quibus (569 ad 573) colligere est, elementa calculi, ut sales in aquâ, verè soluta in lotio sano fluctuare, indè per modum crystallisationis Chemicæ excuti, mutuâ attractione in granula majora & hæc porrò inter sese, concrever, obviisque corporibus sese affigere, sic repetito sæpiùs eodem opere crustas calculumque urinæ formari, tam intra, quàm extra hominem. Illustrat hanc lithogenesin confirmatque generatio tartari ex vino, stalactitæ ac trophi ex aquis.

574. Nec contrà facit, quod materies, priùs aquâ soluta, post excussionem aquâ insolubilis sit, nec, pro naturâ salium, sapida. Historia naturalis & Chemia id genus exemplis abundant.

575. Quocirca & ratio reddi potest, cur vita sedentaria, diuturnus in dorsum decubitus, temperamentum frigidius, immanis aqualiculi pinguitudo, varia systematis, utinarii vitia, obstructio, inflammatio, ulcus, scirrhus, callus, occurfus corporum heterogeneorum in viis urophoris, adeò faveant calculi generatio.

ni? Ponunt hæc omnia conditiones, quibus excussio salium quorumvis ex suis muriis promovetur.

576. Nequaquàm igitur hic opus est fermentatione, putrefactione, spiritu Gorgoneo, clavulis ferreis, mucò glutinante, aut spiculis alcalinis, volatilibus, quæ terram ferruminent. Fingi hæc faciliùs, quàm demonstrari queunt.

577. Agnoscenda tamen insuper est dispositio quædam singularis, interna, hæreditaria, connata, aut post nativitatem acquisita, quâ, ceteris paribus, aliud præ alio magis in lithiasin propendat. Solida quidem systematis urinarii sic comparata, ut lotium nimis morentur, aut adhæSIONem justo faciliùs admittant, eò conferre possunt. Maximè verò incusandum videtur illud urinæ vitium, quo terreæ ejus particulæ ultrà modum abundant, aut citiùs, quàm par est etiamnum intrà corpus secessionem moliantur (371). Indè minguntur arenulæ, aut majore numero, citiùsque a mixtione excutiantur; nisi intùs adhærendi opportunitatem nactæ in calculum concrecant.

578. Quùm igitur observatio doceat, pueros, senes, quiescentes, frigidos, acidis aut acescentibus cibis, vinis austerebus utentes, acido laborantes, hypochondriacos, hystericas, arthriticos, præ aliis frequentius calculo infestari; credibile est materiæ acido-terreæ in urinis ex-

superantiam eò disponere. Nec sanè refragatur huic sententiæ natura lithonthropitorum, nec, quæ de acidis in terram absorptis Chemia demonstrat.

579. Calculi fellei, etsi diversum paulo ingenium est, origo tamen haud absimilis censeatur. Ponit ferè certam bilis a naturali suâ indole degenerationem; ut quæ sana nequaquàm, lotii instar (569) terram excutiat. Indè differentia multiplex colorum, flavi, viridis, lividi, atrii, albi, cinerei (372), & vis ardendi non omnibus eadem, & diversa gravitas. Solvuntur & alii aquâ calidâ pro magnâ parte, alii non item. Nec satis constat, utrum ab ipsâ bile semper atque unicè materiem suam habeant; licèt in hujus officinâ inveniantur. Alimento ceterùm sicciori ac vitæ desidi concretio ista præcipuè debetur; quum crassamentum fellis, quod alvo excerni fas est, retinetur.

580. Quæ porrò in aliis succis partibusque corporis nascuntur, varii generis concrementa lapidea (567), ex his (568 ad 379) ritè applicatis haud difficulter intelligi & exponi possunt.

581. Quacunque autem corporis parte hæreant, facultas nociva, quâ lædunt merè mechanica est, effectusque producit admodum manifestos. Moles nimirum, pondus, durities, premit vicina, gravat, comprimit, canales obstruit: undè humorum transitus intercipitur, circula-

tio, secretio, excretio turbatur, impeditur. Motus, allisio, frictio atterit, irritat tenera solida, allicit humores, lacerat vasa: sic dolor, calor, inflammatio, suppuratio, gangræna, callus nascuntur. Continuum verò calculi, dùm in corpore manet, incrementum etiam hæc mala adauget. Quæ quidem si ad singulas partes, harumque functiones, & mutuos consensus applicantur, plurimarum sanè magni momenti affectionum originem promunt.

Potentia morbifica animata.

§ 82. ANIMALIS vitæ plena omnia. Aër, aqua, tellus, communia naturæ habitacula, animantibus undiquè scatent. Stupendus præsertim minutiorum animalculorum numerus est, & vis sese multiplicandi ferè tantò major, quantò minoribus sunt corpusculis. Accedit eorundem summa voracitas ac mirabilis, cùm in pabulo conquirendo, tùm in nidulando, sagacitas & industria. Undè fit, ut non in omne modo vegetantium genus grassentur, sed vel majora quoque animalia in escam nidosque convertant, horumque adversùs robur suâ se parvitate ac numero tueantur.

§ 83. Multifaria igitur occasio est, quâ & homini ab istis hostibus inferri injuria possit; nisi fortè admissi in tempore sus-

focentur, rejiciantur. Patet extima superficies, cui se affigant, porisque cutis, aut inflictis vulnusculis, se suave ovula insinuant. Nec defunt meatus externi, quos subeundo in interiora deveniant. Aëris potissimum, cibi, potus, vehiculo in primæ digestionis officinam facile invadunt.

§84. Practicorum ideò observatis & compertum est, multiplex animantium genus quandoquæ in homine & extrâ & intùs nidulari, neque ullam corporis partem, externam aut internam, planè ab isto onere immunem esse; ita tamen, ut quarum facilior est a foris aditus, præ ceteris frequentius obsideatur.

§85. De illis quidem animalculis, quæ extrâ hominem etiam obvia sunt, sicubi in homine reperiuntur, vix cuiquam dubium est, quin extrinsecùs eò devenerint, sive jamjam evoluta, sive in femine suo etiamnum latentia, quod, congruas intùs condiciones nactum, sui generis animal demùm excluderet.

§86. An autem lumbricorum intestinalium, teretis, plani, ascaridis, alia quæri debet origo? Quia proprii velut & domestici sunt, animalium, ac præcipuè hominum intestinis, raròque, aut nunquam, alibi inveniuntur. An æquivocam ex putredine nativitatem habent? An spiritus mundi arbitrarie facultati debentur? An potius humano generi indè a primo ortu congeniti per traducem veluti in eodem

propagantur? Utrum verò ex femine quidem nascuntur, at non suo, aut ex infectis alienigenis, quæ intra corpus humanum recepta, ob pabuli, aliarumque conditionum diversitatem, in aliam speciem degenerant? Nimis hæc omnia repugnant communibus generationis legibus, quas observatio fidelis in minimis æquè ac maximis animalibus detexit, quam ut admitti queant.

§87. Quum itaque suum & genus & speciem tueantur isti vermes; primasque modo vias (§83) obsideant; & pro ætate, sexu, temperie, vitæ genere, aëre, cibo, potu, regione, anni tempore, &c. diversis, alios præ aliis magis, minùs, aut & nunquàm infestent; neque tamen & singulos iidem, sed hos teres, illos ascaris, alios iterùm tænia: suadet profectò analogia, eosdem quoque a foris in hominem deferri (§83), & consimilem prioribus (§85) ortum habere, seseque intùs more ceterorum animalium multiplicare, nisi validis naturæ viribus superentur. Quamquàm verò & hæc sententia suis vexatur dubiis, quæ expediri ægrè queant, non sunt tamen ista tanti momenti, ut non sperare liceat, ulteriore scrutinio tandem ad liquidum perductum iri. Quod ipsa natura dictavit, systema non illicò turbandum, si quâ forsan parte ob cognitionis humanæ angustiam hiat.

§88. Sanitas quidem id contubernium

sapè haud ægrè fert. Nec rarò tamen multimodis indè læditur ; maximè ubi interiora occupantur. Primis hinc viis à mole, numero , conglomeratione vermium , gravitas , infarctus , obstructio , ileus : à motu , reptatu , suctu , irritamenta nervorum , nausea , vomitus , singultus , anxietas , motus ventriculi & intestinorum inordinati , spasmi , ructus , flatus , borborygmi , dolores ventris varii , tumores , alimenti coctio perturbata , chyli absorptio impedita , alvus irregularis , alias stric-ta , alias laxa : quandoquè & rosio accedens excoriat , inflammat , exulcerat , perforat : ex consumptione chyli esuries , bulimus : ovula vermium , recrementa , cadavera , mucum naturalem inviscant , accumulunt , menstrua primæ digestionis inspissant , corrumpunt , ac faciem facie acervando putrorem latè diffundunt. Hæc quidem topica sunt mala.

589. Facit autem multiplex hujus officinæ cum universo corpore consensus , ut & reliquæ partes unà afficiantur. Etenim subtractio nutrimenti maciem , pallorem , debilitatem , atrophiam creat : chyli nec ritè cocti , nec defecati , alienis etiam intermistis corrupti vitium , in secundas vias delatum , in cacochymiam & cachexiam degenerat. Irritatio deniquè , per instrumenta motus ac sensus , horumque vires , quaquaversum sese extendens , omne genus affectionum spasmodicarum

inferre potest. Hinc circuitus humorum turbatus, cordis palpitatio, pulsus exilis, deficiens, intermittens, animi deliquium, horripilatio, febris, dolores varii, vertigo, cæcitas, aurium tinnitus, insomnia turbulenta, terrores, deliria, aphonia, paralyfis, catalepsis, apoplexia, tetanus, motus convulsivi præsertim, atque insultus epileptici omni modo mirabiles.

590. Ex his (588, 589) porrò spontè innotescit, quænam nasci mala possint, quum in aliis corporis vivi partibus, externis vel internis (584), aliquod animantium genus nidulatur.

De ceteris, quæ forinsecùs admota obfunt.

591. MULTA insuper casu, vel consilio, corpori externè admoventur, aut in illud incurfant, quæ, prioribus titulis non comprehensa, præteriri tamen nequaquam debent; quia in producendis morbis plurimum valent.

592. Vestimenta, quæ consuetudo magis, quàm natura, homini necessaria fecit, mole, pondere, adstrictione quas ambiunt partes premunt, vasa arctant, appulsis humoribus resistunt, contentos repellunt, solidorum fibras inter se compingunt. Quæ quidem si moderata fuerint, sanum robur, vigorem circuitus vitalis, mutuam continentium & conten-

torum actionem, attritum, calorem nativum augent (433, 434), tegumenta, nervos, fibras, musculos, fulturâ juvant, debilibus hinc saluberrima. Excedens autem pressio, ut vario est gradu, mala plurima ac diversissima inducit. Humoribus indè diathesis inflammatoria (367), putredo (313); reditus per venas, influxus per arterias impeditus; virtutis nervæ interceptio; nutrimenti, hinc nutritionis ac incrementi æquabilis defectus; materiæ solidorum degeneratio; coalitus eorumdem multiplex (209, 6). Hæc dùm pressioni expositæ partes patiuntur, contraria in reliquis eveniunt; humorum affluxus, accumulatio, impetus major, canalium distensio, ἀναστόμωσις, διαπρήδεσις, διαίρεσις (203) omnifarix fluidorum aberrationes (397 & seq.), incrementum nimium (261) tumores varii, proportionis ac æquilibrîi inter partes, vires, actiones, destructio, &c. Indè anxietas, dolor, œdema, inflammatio, gangræna, stupor, paralytis, apoplexia, hæmoptœ, mictus cruentus, abortus, varia conformationis, sitûs, nexûs vitia, in teneris præsertim ac debilibus corporibus nascuntur.

593. Eadem, atmosphæram inter & cutim media, hujus calore fota, illius frigus arcent, calorem extremi corporis augent, molliunt partes calefactas, humores eò trahunt, ab aliis partibus abstra-

hunt. Quo nomine ut sæpè multùm juvant , ita alias & vehementer nocent (424 , 425). Interest tamen , utrùm lineæ , xylineæ , coriacea , serica , lanea , plumæa , pilosa materies sit , ex quâ constant : neque enim in omnibus par caloris tenacitas datur.

594. Combibunt etiam humidum retinentque plùs , minùs ; magis quidem , si de animali parata sunt , quàm de vegetabili materie. Ita diversimodè in vascula cutanea agunt , suctuque aut repulsu excretionem ac absorptionem cutaneam multimodis , nec semper innocuè variant , augent , impediunt. Eo quoque haud parùm frequentior aut intermissa vestium mutatio facit.

595. Ex his (592 ad 594) collatis ad (428 , 445) intelligere est , cur intempestiva hyberni aut æstivi vestitùs mutatio , subitave partium tectarum denudatio , aut neglecta tegumenti ad aëris vicissitudines accommodatio , tot & tam gravia sæpè mala , infuetis præsertim , inducant ? Et quid efficere stragula , culcitraë , fasciæ , ligationes , &c. possint.

596. Epithemata liquida , mollia , solida , quæ corporis partibus multoties , non sine fructu , superdantur , quandoquè tamen & nocent frigore , calore , pressione , humiditate , siccitate , singulari materiæ suæ virtute , penetrabilitate , applicandi modo ac tempore , partium-

que, quibus imponuntur, diversâ constitutione. Balneorum vires agendi pariratione eruuntur.

597. Pinguia autem vario nomine forinsecus admota, aut illita, obesse insuper possunt emolliendo, transpirationem occlusis poris supprimendo, tum, sicubi acria simul fuerint, irritando humoresque alliciendo. Undè dolor, febris, inflammatio, erysipelas, pustulæ, &c. Nec obstat lentor, quo minùs absorpta introeant, stimuloque latè diffuso proprias sibi vires per universum corpus, aut in partibus longè diffitis, effectum multum variante exferant, ægriùs denuò extergenda.

598. Quæcunque porrò impetu acta a foris in corpus incursant, hujusve motui rutiliùs resistunt, actione mechanicâ cohesionem, situm, nexum partium turbando, morbos creare solent, maximè instrumentarios (212), fracturas (217), vulnera (218), luxationes (226), hernias (230), prolapsus (248), vitia numeri (258), conformationis (259), magnitudinis (260), multiplicesque istorum consecutiones. Moles itaque adacti corporis, pondus, figura, celeritas, directio, comparata cum partis affectæ cohesionem, fabricâ, positione, &c. modum gradumque læsionis determinant.

599. Huc etiam referri possunt injuriæ, quas impedimenta in partu, impru-

dens obstetricatio , nutricis custodisve ruditas ac negligentia , premendo , trahendo, distorquendo, quatlando, sauciendo, infanti inferunt, eò deteriores, quò tenellum corpusculum minus est resistendo. Nec fœtus etiam uterinus ab id genus violentiis planè immunis est.

600. Neque tamen hinc intellexeris, quæ gravidarum phantasiæ vulgò tribui solet, multipotentem in corpore fœtus mutando efficacitatem : uti nec quæ de incantamenti perhibetur vim morbiferam. An igitur utriusque eadem est ratio? An & æqua fides?

601. Ignis quùm vi majore , quàm quæ ferri queat, in partem corporis agit, motu vehementiore, expansione, effusione, dissipatione, exsiccatione humorum, fibrarum vasculorumque crispatione, rupturâ, omnium in escharam informem colliquatione, singulos inflammationis gradus ad sævissimum usque sphacelum celerrimè producere potest.

602. Subeunt quandoquè & res alienæ, solidæ, ad interiora corporis, quæ cùm nec digeri à naturâ possint, nec commodè permeare, aut rursus ejici, ocys, ferius, nocivæ redduntur. Hujusmodi sunt ossa, lapilli, acus, festuæ, clavi, glandes, fragmenta metallica, vitrea, pili, ossæ grandiores, & similia, quæ alias per meatus naturales, foris patentes, alias per vulnera, intro deveniunt.

603. Lædunt hæc mole suâ, pondere, duritie, figurâ, motu, obstruendo, gravitando, comprimendo, irritando, atterendo, vulnerando. Quodsi verò ejus naturæ sunt, ut, quibus alluuntur humoribus solvi possint, latius etiam sese diffundere, ac vi singulari nocere solent. Nec rarum est terrea, mucosa, amurcosa, coagula, iis adhærescere, sic varii generis concrementa nasci (568, 570, 571).

604. Pro partium igitur quas occupant diversitate omnivarios effectus producere debent. In adipem per vulnus demersa, per annos sæpè innocua, variè mutatâ sede, aut foras demùm protruduntur, aut irritando inflammant, exulcerant, aut improvisò hæmorrhagias intus, convulsiones, paralyfes, subitam mortem inferunt. Laryngi impacta, aliusve in tracheam detrusa, repenti suffocant, aut violentâ tussi, inflammatione, exulceratione, tabe, paulatim necant. Deglutita, dum in faucibus, œsophago, stomacho, pyloro, intestinis, hærent, obstructione, inflammatione, perforatione, ulcere, calculi generatione (568), diversimodè hanc officinam turbant. Utrùm & ex primis viis nonnunquàm in vesicam urinariam deferuntur, & quâ viâ? Quæcunque alicubi detenta lotio alluuntur, crustas calculosas morâ contrahunt (570). Nec obscurum est,

quid mali in nares, oculos, aures, immissa creare debeant.

605. Et hæ quidem præcipuæ sunt, inter quas corpus humanum versatur, potentiæ nocentes. Uti verò multæ lædendi facultate inter sese conspirant, multæ contrà pugnant; ita, quas inducere valent noxas pro variâ similium vel dissimilium concursione intendi, aut mitigari, ac destrui necessum est.

De Seminiis morborum (75).

606. SEMINIA morborum non minùs, quàm potentias nocentes, multifariam inter se discrepare, docet, quæ has inter & illa requiritur, mutua affinitas (75, 78), magnusque numerus morborum, quos vi unitâ produciunt (120 ad 418). Merentur ideò speciatim hoc loco etiam considerari (79).

607. Insunt in homine secundum naturam quamplurimæ affectiones, ipsis vitæ ac sanitatis principiis necessariò innexæ, quibus fit, ut corpus humanum non quarumvis potentiarum impressioni resistere, eoque nomine etiam naturaliter ad morbos dispositum dici queat. Hæc igitur naturalia vocabo morborum seminia.

608. Quorum quidem alia ubique & semper in omni homine obtinent, ideòque universo generi humano communia

ac perpetua sunt ; alia verò propria , quæ in singulis tantum inveniuntur , nec in iisdem omni tempore , aut eodem constanter modo.

Semina morborum naturalia , communia.

609. COMMUNIUM præcipua hæc sunt. Firmarum C. H. partium cohesio nexuque haud insuperabilis ; succorum multitudo & crasis faciliè mutabilis ; canalium numerus, mollitudo, subtilitas, implicatio ; superficies meatibus undiquè patens ; principium vitæ valdè sensibile (171), fugax (187) ; functionum omnium ac singularum generale fundamentum in motibus harmonicis positum ; mirabilis universæ tum compagis , tum œconomiae consensus ac conspiratio ; mutui denique mentem inter & corpus commercii leges statæ , nec pro lubitu variandæ.

610. Naturam hominis ita comparatam qui confert multiplicibus potentiarum , quibus per vitæ munia exponitur, viribus (419 ad 605), is faciliè videt , non imparem modo esse quibusvis noxis repellendis , sed pronam quoque in nonnullas ruere.

Semina morborum naturalia , propria,

611. LATITUDO sanitatis uti multam admittit differentiam , ita , quod quisque sanus sibi ex naturæ instituto privum habet , quo fit , ut magis , quàm alii , ad aliquos morbos proclivis sit , horumque idcirco occasionibus minùs resistere queat , inter seminia haud ineptè referre licebit (75).

612. Quæ vitæ humanæ periodum variant ætates hujus loci sunt. Nascitur , crescit , perstat , decrescit , moritur homo ex lege naturæ. Cuique horum statuum sua quidem propria est sanitas : at partium , facultatum propensionumque cum animi , tum corporis , magna in singulis discrepantia. Ex hac igitur & diatheses profluere debent , quæ quamlibet ætatem in alios atque alios morbos proclivem reddant.

613. In sexu haud minor dissimilitudo est ; sive , quas privas sibi & mas & femina habent partes spectes , seu reliqui etiam corporis habitudinem , aut universam œconomiam. Indè uti alia est maris , alia feminae sanitas , ita & cuique sui sunt , in quos per sexum magis inclinât , morbi , masculini , feminini. Posteriorum præcipuè tantò major numerus est , quò plura sexui sequiori munia incumbunt ; ut meritò uterus sexcentarum in muliere ærumnarum auctor dicatur.

614. Temperamentum ponit singularem C. H. sani in solidis succisque suis diathesin ac proportionem, viriumque motricium gradum, undè singularis profuit functionum tenor, qui dùm sanitatis modum non excedit, in diversimodè temperatis tamen longè diversus est. Multiplex hæc discrepantia uti totidem deflexiones ab unâ sanitate perfectissima indicat, ita haud pauciores ad statum morbosum appropinquationes. Ex quo consequitur, ut quæque temperies in illud morbi genus, quod proximè contingit, propendeat, hujusque idcirco feminium continere haud immeritò dici possit.

615. Eadem ratio est *ἰδιοσυγκράσις* ac privatae partium singularum habitudinis, quâ hæc à generali corporis sui temperaturâ abluunt, discrimine ut plurimum vix, nisi per effectus quosdam, observabili, nec & œconomiam in ceteris admodum turbante. Mirabilis hinc sæpè oritur sensibilitas, quâ potestates rerum, quas alii faciliè ferunt, e millibus uni fiunt nocentissimæ.

616. Istorum verò feminiorum (611 ad 615) pars præcipua sedem videtur habere in principio vitali (170), quod, cum per universum corpus latè diffusum sit (175), amploque polleat consensu (178, 179), & multum de quaque functione sibi vindicet (180), si quo gradu,

in homine ceterum sano, agilius aut torpidius fuerit, potentias nocentes in morborum generatione plurimum adjuvare posse indubium est (195, 199). Atqui sanitas multifariam admittit virtutis vitalis tam in corpore toto, quam in singulis partibus discrepantiam (176, 177).

Morborum Seminia, quæ sunt præter naturam.

617. INGENS prætereà numerus est eorum, quæ sive congenita, seu post nativitatem contracta, præter naturam corpori ita insident, ut, quum ipsa morbosæ sunt, etiam per potentias nocentes concitata alios insuper excludere morbos queant, meritò hinc seminiis annumeranda.

618. Primum quidem huc referantur affectiones occultæ, quæ, etsi nihil admodum vitiosi in ullâ corporis parte aut facultate prodant; neque etiam ad naturalia seminia, communia (609), aut propria (611 ad 616), pertineant; nihilominus, datâ occasione, in manifestos erumpendo morbos, vires suas noxias declarant. Istiusmodi videntur diatheses hæreditariæ, tum & in utero materno, aut ex nutricis lacte prognatæ, quæ, feminum similes, per annos sæpè, absque sensibili labe aut functionum læsione, sopitæ latent; at suo demum tempore, fa-

ventes naturæ conditiones, in analogam sibi morborum speciem efflorescunt. Morbosæ igitur habendæ sunt; quum generalibus sanitatis differentiis (611) non comprehendantur: quanquam cujus generis alienatio à statu naturali singulis sublit, haud satis constat. Morborum, qui per accessiones & intermissiones circuitum faciunt, eadem fortè ratio est.

619. Alterum genus est affectionum mediarum, quæ reapse quidem præter naturam sunt, talesque se per sua signa produnt; nec tamen ita graves, ut vulgò pro morbis habeantur (123); quum functiones haud turbent (38). Quandoquè igitur diu absque noxâ feruntur, ac tantisper a Pathologis ad morborum causas potius relegantur (58, 123, 124); dùm proprio incremento auctæ, aut accessione aliorum vel feminiorum, vel potentiarum adjunctæ, veros demùm ac palam agnitos morbos pariant.

620. Morbi itaque simplices, supra enumerati (125 & seq), ad hunc locum pertinent omnes & singuli, quot aut propriis viribus, aut complicatione cum aliis, nondùm eò magnitudinis creverunt, ut sanitatis munia manifestè perturbent: at qui proclivem modo ad ægotandum reddunt hominem. Cujusmodi sunt solidorum debilitas & rigiditas (157, 164), irritabilitas & torpor (190, 196), nonnulli cavorum morbi (202),

(202), ut & instrumentarii (213); potissimum verò vitia fluidorum, cum absoluta (269 ad 302), tum relativa (383 ad 412). Totidem hæc feminia sunt, quæ ocyùs, seriùs, datâ occasione, sui generis morbos excludere valent: prout locis citatis est videre. Nec fanè plethora & cacochymia hunc fontem penitus exhauriunt.

621. Tertium genus est vitiorum manifestorum, quæ uti morbosis effectibus palàm sese declarant, ita vel spontè, vel aliarum potestatum concursione, in morbos alios, specie diversos, degenerare queunt, nequaquam cum symptomatibus confundendos (97, 105). Eo igitur nomine feminiis omninò annumerari debent, quòd proclivitatem ad sui generis affectus ponant; tametsi ipsa nec immeritò inter morbos referuntur. Naturæ simpliciorum morborum, antè (150 ad 412) expositæ, id per effectus suos abundè ostendunt; quùm ex plerisque sibi permixtis alii atque alii scaturire soleant. Intelliguntur hinc morborum metaschematismi, exitusque in alios morbos. Nec fanè minima hæc pars est eorum, quæ ad diagnosin ac prognosin in praxi ritè instituendam requiruntur.

622. Quocircà patet, feminiarum multa, quæ præter naturam sunt, in hominem invehì, actione potentiarum nocentium, adeòque ut harum effectus,

242 MORBORUM SEMINIA QUÆ, &c.

supra (419 ad 604), ordine jam enumerata esse, eandemque rem, ut diversimodè spectatur, potentiæ nocentis, seminii, aut morbi loco haberi posse.

De differenti causarum morbificarum constitutione.

623. ITA demùm perspicere datur, quàm multiplici modo veræ morborum causæ (62) constituentur. Tametsi enim hoc commune omnibus est, nasci ex potentiis nocentibus & seminis inter se concurrentibus (77); hæc ipsa tamen principia multùm diversæ sunt originis, nec eadem semper ratione alia aliis sese adiungunt.

624. Primùm quidem potentiarum nocentium multæ sunt tantâ vi præditæ, ut non nisi seminio naturali, communi (609), aut proprio (611), opus habeant ad causam morbi constituendam, hinc vel sanissimos ceterùm statim in morbum conjiciant. Mechanicæ potestates (598), ignis (601), venena (486) & plura alia hujus loci sunt.

625. Quodsi seminia, quæ præter naturam sunt (617), intus alit homo, res non naturales, etiam innoxie, cum his in morbi causam concreescere valent; ut adeò tum præcipua morbi pars seminio potius, quàm potentiæ nocenti, adtribuenda videatur.

626. Quum verò potentia nocentes etiam feminia morbosa creare soleant (622), quæ nata, dein cum illis rursus concurrento, in morbos tandem abeant; manifestum est, easdem solas, continuatâ diu actione, quidquid ad morbum constituendum requiritur, inducere posse, nullo licet feminali vitio prægresso. Incongruus rerum non naturalium usus vel perfectissimas sanitates ita haud rarò pessumdat.

627. Quandoquæ feminiis morboris accedere debet naturale feminium, proprium (611), quo maturescant veluti, atque apta reddantur ad generandum morbum, si potentia nocens supervenerit. Decent feminia hæreditaria, quæ una cum homine ad certam usque ætatem adolescunt, priusquàm sese explicent.

628. Morborum, qui ex aliis morbis, tanquàm ex feminiis suis (621), nascuntur, multiplex origo est. Etenim alias morbus primarius, sibi permissus, vi suâ in aliud genus sese convertit, singulari hominis, partisve, quam occupat, constitutione adjutus. Alias naturæ hoc opus est, cujus dum motus (98 & seq.) morbo superveniunt, hunc mutari oportet. Nonnunquam congrua vel incongrua medicatio, rerumve non naturalium casu aut consilio accedens potestas mutationem inducit. Morbi quoque materies, benè vel malè e sede suâ in alias delata partes,

pro harum diversitate morbum variare potest. Quandoquē symptomata sunt potentia nocentes, quæ morbum morbo aggravant (97, 105, 109). Nec rarò quod de morbo utcunque sanato reliquum est, seu materies fuerit, seu vitium solidis fluidisve illatum, seu virium motricium labes aliqua, seminium ponit, quod neglectum levi occasione denuò in morbum prorumpat. Consensus etiam atque conspiratio (609) facit, ut, malo in alias atque alias partes diffuso, ex morbis morbi orientur.

629. Pro multitudine autem seminiorum, quæ in homine insunt, crescit & numerus potentiarum nocentium, & morborum possibilium occasiones multiplicantur, augeturque adeò proclivitas ad ægrotandum. Quum igitur a seminiis naturalibus, tum communibus (609), tum propriis (611), nemo immunis sit; naturâ illi quidem ad morbos pronissimi præ ceteris esse debent, qui & propriorum multa ac gravia habent, & morboris insuper cujusvis generis (617 ad 621) laborant. Undè patet, quænam sit constitutio debilis, quæ robusta, qui status valetudinarius, quænam debilitas partis singularis? Cur debiles, exacto rerum non naturalium regimini addicti, sæpè minùs ægrotent, diutiùsque sani vivant, quam robusti excessibus quotidianis impliciti? Dissolutam juventutem haud ra-

rò senectus manet miserabilis, & contra.

630. Liqueat porrò, quàm utilis hæc doctrina sit Medico, rationalem autem proficenti, ad ea, quæ morbum præsentem faciunt, rectè cognoscenda. Qualiscunque ille fuerit, simplex, an compositus; origo certè ac natura ejus vix ritè intelligitur, nisi constiterit, ex quibusnam tum potentiis, tum seminibus, inter se conjunctis profluxerit. Et quanquam feminiorum consideratio non in omnibus æquè momentosa videri possit, est tamen in plurimis; eoque magis, quàm non diatheses adedò merè passivæ, quæ potentiarum actionem modò excipiant, huc referantur; sed vel maximè activæ, quarum vires, a potentiis nocentibus tantùm excitatæ, his ipsis sæpè longè validiores, totum quandoquæ morbum, aut potiorē certè ejus partem, sibi solis vindicant (51, 99, 102). Quin minùs etiam a Practicis præteriri debent, ut qui inter morbos singularium hominum versantur.

631. Medicum igitur ægri examen, quo vera causæ morbi cognitio nititur (72), non classes modò singulas rerum non naturalium, vitæque antè actæ rationem, complecti debet; sed & universam hominis constitutionem, quæque in hac cùm communia, tum propria, & quæ secundum, aut præter naturam insunt. Ita nimirum utrumque genus princi-

piorum, quibus morbus efficitur (630); sese demùm manifestat. Quodsi verò alterutrum fortè ex se lateat, detegi id tamen quandoquè potest alterius noti principii comparatione ad morbum, per suos effectus cognitum (45, 117), factâ. Potentia nocens sæpè seminium, aut hoc vicissim illam, sic prodit.

632. Atque hac demùm methodo etiam felicissimè invenitur eorum, quæ Practico agenda sunt, ratio modusque, cum in prophylaxi sanorum, tum in ægrotantium curationibus. Intuta sanitas est, cui non cavetur, ne aut succrescant seminia, aut nata sese explicent. Nec morbus planè tollitur, nisi sublatâ universâ complexione conditionum, quibus fovetur: quod cum in morbis multum complicatis, aut inveteratis, rarissimè simul obtineri possit, aliarum post alias correctio suscipi debet; ut minutatim deteratur, quæ uno impetu ejici nequit, causa mali. Si quæ porro morbosa seminia supersunt, quæ tollere nefas, sopire tamen & hæc averfis nocentibus potentiis (59, 77) licet.

Vires Natura medicatrices.

633. In tantâ rerum nocivarum multitudine cum rari sint homines, qui satis circumspectè vivant, pronum est credere, longè frequentiores fore morbos, quam observatio doceat, nec cuiquam

diu incolumem perstare sanitatem posse. Conferre quidem potest, neque sufficit tamen ad avertendos morbos, requiri feminii ac potentiæ nocentis analogæ concursionem, ut nascantur (75 ad 78): quando concurrendi occasiones adeò multiplices sunt. Oportet itaque alias subesse causas, quas operæ pretium est considerare.

634. Quemadmodum natura humana morbos mortemque averfatur & horret (2); ita suis quoque viribus instructa est armisque, quibus sese ab illis tueatur, quæque non minùs in corpore, quàm in mente insunt, & quanquam diversa, in eundem tamen finem omnia conspirant (18, 51, 99).

635. Continuis vitæ actionibus expositum corpus, proprio suarum partium motu attrituque, citò destruitur. At facultate etiam nutriente gaudet, quâ materiem extraneam sibi appropriando jacturam jugiter reparat, inque perpetuo suæ materiæ fluxu ac mutatione ident tamen atque incolume sese conservat. Sic inevitabili morborum mortisque causæ certissimum opponitur remedium.

636. Eiusdem quoque ordinis est facultas admirabilis, quæ solidæ compagis vulnera, fracturas, ulcera, vexata, mutilationes, artificio inimitabili consolidat, redintegrat, refarcit. Ea quamvis majori gradu nonnullis animantibus indita sit,

quam homini; huic tamen & tam eximia inest, ut meritò universæ Chirurgiæ fundamentum habeatur.

637. Præterea uti corpus suis viribus alimenta coquit sibi que assimilât; ita non minùs facultatem nactum est morbosa, & quæ præter naturam sunt, subigendi atque contemperandi. Hic ille tam salubris *παρασμός* quo conditiones noxiæ eorum, quæ morbum intentant aut faciunt, ita mitescunt, ut vel innocuæ fiant, vel ad commodam ejectionem expeditæ. Quidquid in crisis salutare est, hac potissimum virtute nititur.

638. Inter præcipuos hujus facultatis (637) effectus memorari meretur suppuratio, solius naturæ opus, arte quavis superius, præstantissimum adversus cruda, acria, obstructa, inflammata, vulnerata, ulcerosa, emortua quæ aliter sanari nequeunt remedium.

639. Emunctoriorum insuper summa hic est utilitas (299); ut quorum beneficio nocentia, aut nocitura, sive a foris ingesta fuerint, sive intùs nata, maturè ejici possint. Nec ordinaria tantùm usu veniunt, quandò materies morbosa expelli debet; sed inconsuetas etiam vias modosque adhibet natura: uti hæmorrhagiæ, vomitus, cholera, diarrhoea, sudatio, &c. docent.

640. Multifariæ autem, quibus corpus vivum pollet, vires motrices, quum

rebus nocivis irritatæ semet exserunt, præcipuum præstant vitæ ac sanitati præsidium. His certè nituntur facultates modò allegatæ (635 ad 640). Indè profluunt motus automatici, irregulares quidem multimodis, at sæpè beneficentissimi, certâque determinatione ad salutarem finem tendentes; etiam si mente nec imperante, nec consciâ, & vel invitâ quoque fiant, hujusque adeò consilio nequaquàm tribui possint (51, 99, ad 105). His si careret homo, nulla vel sanitati constantia, vel morbo medela foret.

641. Id genus motibus præsertim febris annumeranda est. Licet enim commotio ista, perturbato circulationis systemate, gravibusque symptomatis molesta, haud rarò perniciem inferat, hinc meritò morbus appelletur; sæpè tamen & mirificè adeò salutaris est, ut certius aliud potentiùsve cùm ad sanandos, tum ad præcavendos morbos auxilium natura, vel ars, vix agnoscat. Indè vel intemperantia quoque Medicorum in laudandâ febre, qui nonnunquam ejus faciendæ magis, quàm abigendæ, potestatem sibi negatam dolent.

642. Accedit partium facultatumque consensus ac conspiratio (99), quâ mutuam sibi opem ferunt, aliæ aliarum vice funguntur, sanæque pro afflictis in motus medicatos ruunt; ut horum junc-

ris viribus tantò minùs resistere imminens præsensve morbus possit.

643. Nec menti humanæ sua defunt conamina, quibus periclitantem sanitatem tuetur. Etenim molesta perceptio iminantis mali, aut olim tolerati memoria, non modò impellit eam ad quærendum præsidium, sive id evitatio causæ cognitæ dederit, seu usus auxilii experimento, ratione, aut conjecturâ inventi: sed suos etiam animus, formidine periculi inquietus, concipit impetus, motusque in systemate suarum functionum concitat, qui, licèt ex instinctu potiùs, quàm ex consilio profluere videantur, certissimum tamen tutaminis, aut levamenti afferendi scopum, atque efficacitatem manifestè declarant. Hujusmodi sanè sunt musculorum, qui voluntati parent, motus spontanei, cogitationem prævertentes, nec pro arbitrio retundendi: præcipuè autem, quæ præter rationem toties sese efferunt, determinata rerum noxiarum fastidia, aut medicatarum appetentiæ, quibus obsequendo imminentes morbi sæpissimè avertuntur, refractarii etiam sanantur.

644. Postremò memorabilis quoque est facultas adfuescendi, quâ utrumque hominis principium gaudet. Hac si caret natura humana, paucissimis profectò sanis esse contingeret. Duramur nimi-

rùm consuetudine ad innoxie ferendum innumera, quæ minùs adfuetis obsunt. Uti verò universim in quarumvis actionum exercitatione multùm juvamus consuetudine; ita hæc ipsa quoque medicatrices cùm mentis, tùm corporis, vires (633 ad 644) quascunque in facilitatem agendi disponit, quâ potentiis nocentibus sese opponere, noxas ab his illatas corrigere, partes affectas in integrum restituere promptius, commodius, felicius queant. Ita vel morbi etiam adfuetudine magis & tolerabiles & tractabiles redduntur, ipsaque venena mitescunt. Quocircà patet, cur ex vêtustissimâ observatione, quæ à multo tempore in consuetudine sunt, etiamsi deteriora, insuetis minùs turbare soleant? Cur consueti morbi mitiores? Cur valetudinarii sæpè præter expectationem longævi?

645. Hæc summa est remediorum naturalium, quæ data homini sunt, ut se adversùs plurimas morborum causas tueri incolumem queat. Horum virtute efficitur, ut morbo longè frequentior sit sanitas; ut multi perrarè morbis affligantur, nonnulli etiam in sanitate nunquam interruptâ consenescant, magnus denique ægrotantium numerus spontè, absque Medici ope, convalescat.

646. Merentur autem ideò quoque accuratius perpendi, quandò indubium est, artem medendi non prima solum inde

cepisse initia ; sed & his ipsis naturæ viribus ita inniti (18, 19), ut sine illis exquisitissima ceterum Medicorum omnium industria ne unum quidem servare sanum, ægrumve sanare possit. Iisdem qui prudentissimè uti novit , artis fastigium attingit.

647. Arque ista cum perpetuæ observationis sint , a nemine quidem in controversiam vocantur. Verum de illo disceptatur acriter , ex quonam hominis principio ea omnia profluant : utrum pars corpori, pars menti , anne huic soli debeantur universa ? Utraque sententia suos habet patronos , claros viros , qui magnæ contentionis disputationibus inter sese litigando nec vincere tamen , nec vinci , potuerunt. Undè constat , rationes utrinque afferri non improbabiles quidem , at quæ nec liquidò demonstrent ; litemque adeò , quæ intrà meras opiniones consistat , haud posse dirimi. Nec fermè spes est unquàm prorsùs diremtum iri , quandò nimis ignorantur vires ac fabricatio corporis , mentis natura & facultates , mutuique , quod inter sese alunt , commercii fundamentum ac leges.

648. Dixeris sanè potiora esse illorum argumenta , qui utrique hominis principio suam inesse agendi vim contendunt ; si cogites , multos in nobis fieri motus (640) , non insciâ solùm , sed & refragante animâ , quosque contra vellet an-

xiè , non fieri ; alios , quâcunque causâ suppressos , ejus imperio nequaquàm resuscitari posse , at stimulo corporeo facile : ex superstitie autem in partibus de corpore vivo resectis vi vitali (169 , 181) liquere , dari in corpore vires motrices , quæ non a mente pendeant : neque porrò intelligentem a stulto , aut adultum ab infante , hâc re vel minimùm differre : quin & in brutis animantibus id genus motûum instinctûumque dari ; nec vel vegetantia iis carere : neque tamen eosdem semper adeò rationales esse , ut non & plurimum sæpè noceant (104) : denique in illis ipsis etiam moliminibus quæ indubiè ad mentem attinent (643) ciendis hanc non magis sui compotem esse , quàm in animi perturbationibus (532 & seq.) ; appetitusque ejus ac fastidia non modò præter omnem deliberationem nasci , sed vel invitæ quoque abs corpore malè affecto veluti obtrudi , pro legè sensibus præscriptâ , quâ ad certas corporis mutationes definitæ in animâ cogitationes , constanter eadem exoriuntur.

649. Hæc tamen cuncta (648) , multaque alia , quùm aliter sentientes non sint convincendo , neque etiam solidè ab his refutari queant ; superest , ut quisque , quæ maximè placeat , sententiam amplectatur , aut , quod fortassè consultius , universa quæstio in medio relinquatur , Pa-

thologos saltem, aut Practicos nan amplius exercitura, donec a Physiologis ad liquidum perducta fuerit. Utrum tanti interest, an Naturæ cum HIPPOCRATE morborum medicatrices appellentur; aut verò cum aliis Anima, aut Archeus? Quando, qui diversa de his sentiunt, ad eandem tamen sanitatem homines perducunt, & vel medendi methodo etiam convenire possunt.

De Symptomatibus Singulatim.

650. SYMPTOMATA quum partem status morborum efficiant, cum aegro, tum Medico manifestissimam (88); videri possit, nullo ad ea cognoscenda opus esse negotio; ut quæ sponte in sensus incurrant. Neque profectò opus foret, si sufficeret nosse, quanam adsint, nec penitior eorundem requireretur inspectio.

651. Præcipuum nempè fontem continent, undè, quæ ad detegendam morbi naturam, diagnosin & prognosin faciunt, depromuntur (45, 111, 117, 118). Oporteret itaque Medicum, qui iisdem legitimè uti velit, singulorum causas, sedes, variasque ad morbum relationes ritè intelligere.

652. Adde, quod morbi etiam compositi, cum in symptomatibus suis, quorum diversâ concursione constant, spectantur (417), distinctam horumce notitiam

exigant, ut verè ac enodatè explicari possint.

653. Pathologia igitur rationalis ordinatam primò tradere expositionem debet omnium & singulorum alicujus momenti symptomatum, in quâ inveniri, cum opus est, queat, quænam cujusvis sit natura, quam diversa origo, & quæ aut partes, aut vires, in quoque afficiantur. Nec sanè priùs multiformes eorundem complicationes, etiamsi curatissimè digestas, rectè, aut proponere, aut cognoscere licet.

654. Ingens autem numerus, ut molestiam creët in ordinando, satis tamen commodè, receptâ dudùm divisione tripartitâ, ad actiones læsas, vitia excretorum, ac qualitates sensibiles alienatas refertur (119). Ulteriorem singularum classium digestionem major minorve simplicitas, mutuusque aliorum cum aliis nexus haud difficulter determinare potest. Idcirco vitiositates qualitatum sensibilibum præmittemus.

Qualitates sensibiles alienatae.

655. QUIDQUID, præter actiones & excreta, in corpore ægroti, vi morbi à statu naturali mutatum, ope sensuum a Medico percipitur, id ad hunc titulum referri debet. Cujus modi plurima sunt, quæ, etsi quandoquè parum, aut nihil in-

commodant, notari tamen atque intelligi debent, ut latentes intus causæ morbique, ex quibus profluunt, indè cognoscantur. Præcipua tantùm attengemus.

656. Color superficiei corporis, quæ visui patet, ex permixtis integumentorum &, qui proximè subsunt, translucentium succorum, aut & solidorum coloribus constans, uti multâ etiam in sanis varietate ludit, ita pluribus causis modisque vitari potest. Interceptus, aut nimius humorum influxus; eorundem fluentium (399), impactorum (400), effusorum (402), secretorum (405), nutrientium (404) errores varii; cacochymia multiplex; crasis per *παραμυδν* (637), admixtionem, separationem, coagulum, attenuationem, corruptionem, mutata; vitium ipsius substantiæ integumentorum aut, quæ subjacent partium, maximo-perè eo faciunt. Indè omne genus morbosæ decolorationis in pallidum, rubrum, flavum, virescens, lividum, purpureum fuscum, nigrum, sive universum, seu in singulari modo parte obtineat, explicari potest.

657. Fætor acidus, putridus, rancidus, fracidus, animam, perspirabile, sudorem, sputum, alia excrementa, humores, parteseve, præter naturam inficiens, quam multiplici materiâ causâque nascatur, ex supradictis (307, 310, 312, 313, 314, 325, 327, 328, 375) elucescit.

658. Calor sani corporis natus, circuitus vitalis comes, excessu supra calorem atmosphærae mensurandus, sicubi in morbis ad enormem gradum intenditur, ponit impetum humorum vehementem, magnam vasorum resistantiam, sanguinem copiosum, valdè densum, diathesin hujus inflammatoriam (355, 367), aut nimis oleosam (356, 364), cacochymiam acrem, putredinem, rancorem, motum vitalem auctum (170), hinc irritamenta a foris ingesta, applicata, aut intus concitata (171). Augescit etiam magis, cum calor externus, aut prohibita ventilatio, accesserit. Potest adeò pro conditionum concurrentium numero, intensitate, duratione, sede, magis aut minus excedere, totumque corpus, aut partem modò occupare. Undè patet non infrequens id symptoma esse, nec paucos morbos comitari. Effectus autem, quos producit, ex (424, 425, 476, 467, 509, 1) perspicuntur.

659. Spontè hinc fluunt, quæcunque ad caloris imminuti intellectum pertinent. Nec latent causæ atque consecutiones caloris ac frigoris alternantis, aut in diversis corporis partibus eodem tempore inæqualis.

660. Utrum morbosa affectio etiam in homine ignem ciere electricum potest, qui fulgurante ictu sese manifestet, cum corpora aliena contactum minantur?

Symptomatis inauditi suspicionem novissimum quidem exemplum movit, nec plura tamen deinceps confirmarunt. An huc referri quoque debent spontanea hominum incendia, & vel ad cinerem usque conflagrationes, quæ in historiâ Medicâ memorantur?

661. Duritia partium morbosa nascitur ex rigiditate (164); intemperie sicca (386); contractione (209); errore nutrimenti (404); distensione ab humoribus multis (385, 387, 394), valdè motis (409), spissis (282, 280, 67), congestis, impactis (209, 1), errantibus (400, 402), concretis; emunctoriorum obstructione; luxatione (226); herniâ (230); fracturâ (217); tumore vario, &c. His autem contraria mollitudinem inducunt. Renixus justo major aut minor, qui auctam minutamve elasticitatem (160, 165), ut symptoma, comitatur, indè quoque intelligitur. Nec obscura est ratio humiditatis & siccitatis nimiae, quam morbi aliquandò inducunt.

662. Superficies partium levitate vitiosâ peccat, cum in callum durescunt integumenta, aut contentis ultrà modum distenduntur, aut, quæ plenitudine protuberant vascula, ob influxus vitalis defectum collapsa subsidant. Inæqualitatem contrà efficiunt succorum distendentium subductio; vasculorum turgor ab humoribus nimia copiâ appulsis, aut ob conf-

stricta oscula elabi impeditis; erosio ab acri; substantiæ degeneratio; eruptiones multivariæ, &c.

663. Magnitudo corporis partive præter naturam aucta vel imminuta; quam supra (260) inter morbos instrumentarios memorari debuit; frequentius tamen symptoma est, quam morbus, locumque ideò inter qualitatum sensibilibum vitia meretur (262, 263).

664. Excessus, omnis generis tumorum (262), qui aut universam corporis superficiem, aut partem singularem occupant, comes, ponit vel volumen materiæ auctum, vel exsuperantem ejus quantitatem, nititurque contentorum ad continentia ratione ultra modum auctâ, atque ex doctrinâ de morbis solidorum continentium (200 ad 211) ritè applicatâ maximam partem intelligitur. Adjungit sese fractis (217, luxatis (226), herniis (230), prolapsis (248), aberrantibus (256), malè conformatis (259), luxuriantibus in exofossi, condilomate, sarcomate, fungo. Est & consecutio distensionis à rarefactis, ab obstructis (209, 1), ab humorum abundantia (385 & seq), a multiplici cacochymia, ab errore fluentium (399), impactorum (400), effusorum (402, 403), nutrimenti (404), ab affluxu in partem nimio (411), stagnatione (410), refluxu impedito, &c.

665. Minuta quantitas à contrariis.

conditionibus pendet. Succorum inopia (393, 395, 396), deficiens influxio (411), solidorum collapsus, contractio (209, 415), erosio, maximè huc faciunt. Unde evacuationes enormes, marasimum, tabem, ἀτροφίαν, totius, aut partis committatur. Memorabilis præcipuè est, quæ subito in morbis sese prodit subsidencia, vel habitus universi, vel partium singularium, quæ tumuerant. Spasmus humorum intro compellens, κενεαγγεία, circulatio elanguida aut cessans, vis vitæ defetiscens, metastasis, gangræna, tum ferè in causâ esse solent.

Excretorum vitia.

666. MULTIMODIS quidem vitiari excretiones possunt, sive actum excernendi spectes, sive partem undè excernitur, seu materiem denique, quæ foras prodit. Horum tamen quamplurima non ad eò propria sunt huic titulo, ut non rectius alio referantur. Haud pauca sanè morbi nomen merentur, supra (401) inter errores humorum jam exposita. Plura ad causas morborum pertinent, suo quoque loco, (555 & seq) antè tradita. Alia, etsi symptomatum rationem habent, potiori tamen jure actionibus læsis annumerantur qui a non id, quod excernitur, sed ipsa excretio peccat. De retentorum vitiis, quæ hoc quoque loco ab auctoribus commemorari

solent , eadem valent. Quùm igitur & quantitas materiæ excretæ, deficiens, aut excedens, commodè inter excretionum læsiones tractari possit; supersunt modo, quæ in qualitatibus excretorum a statu naturali mutata sese produnt, hic exhibenda. Atqui horum multa variis locis (401, 515, 566, 582, 602) jam tradita sunt: omnia verò & singula, cùm præcipuam habeant in doctrinâ signorum utilitatem, specialior eorumdem expositio, ad Semioticam Pathologicam (16, 11) potius ableganda, cum maximè nos morari non debet.

Actiones læsæ.

667. SYMPTOMATUM, quæ in morbis sese manifestant, haud alia majoris momenti sunt, magisque aut ægros, aut Medicum urgent, quàm quæ functionum exercitationem perturbant. Undè accuratam singula, prout suis ex causis profluunt, expositionem merentur.

668. Difficile tamen est in tantâ rerum multitudine, tamque arcto nexu, ordinem invenire, qui justæ methodi legibus examissim respondeat. Quæ molestia, gravis Physiologis, Pathologis etiam gravior, nec prorsus superanda, dissensionem inter Systematicos haud minùs tolerabilem, quam inevitabilem, reddit. Ordinem itaque à vitiis illarum facultatum,

quæ per universum corpus diffusæ, aut multis partibus communes sunt; ut quæ deindè sequentur, singularium actionum læsiones clariùs intelligi queant.

Sensationes moleste ex morbo.

669. SENTIRE mentem dicimus, cum ex corporis sui affectione ideas concipit. Id qua ratione fiat, explicare non est Medici (65). Aptitudo autem ad ciendas sensationes latissimè per corpus diffusa est: uri & permagna datur rerum, quæ sentiuntur, varietas. Organa nacti sumus sensoria, singulari quæque apparatu, suis disposita locis, quorum interventu qualitates sensibiles rerum extranearum nobis, suo quolibet modo, exhibentur. Inest præterea in multis partibus sensibilitas quædam, quæ de naturæ necessitatibus monet, cumque opus est, ad satisfaciendum iisdem compellit. Denique & sensus aliquis universo corpori communis datur, cum prioribus nequaquam confundendus, morborum præcipuè comes, quo fit, ut mens doleat, angatur, agitur, quum injuria partibus quibusvis infertur. Is igitur, etsi peculiare organum nullum habet, præ ceteris tamen primo loco considerari meretur, tum ob frequentiam symptomatum, quibus obnoxius est, tum quia & reliquis sensationibus sese immiscet.

Dolor.

670, DOLOR, qui ad Medicum pertinet, est tristis sensatio sui generis, quam ita percipit mens, ut semper ad aliquam sui corporis partem, tanquam quæ vim patiatur, referat. Dolet itaque, quia corpori suo malè est; hocque restituto præteriti doloris sine dolore reminiscitur. Immodicum verò, quod in eâ sensatione est, facit, ut mens non minùs indè, quàm corpus, agrè habeat, malletque non tam vehementer affici.

671. Quum igitur dolor ponat sensationem nimis intensam; patet eum niti mutuò inter mentem & corpus commercio; sedemque habere non magis, quam sentiendi facultatem, limitatam, quæ per universum hujus systema, perque omnes & singulas corporis partes sensiles diffusa sit; &, quæ ad sentiendum in utroque hominis principio generatim requiruntur conditiones, ad dolendum quoque requiri. Has ideò, quousque a Physiologis legitimè exponuntur, tironi notas hoc loco postulare licet (27).

672. Corporeum verò, quod in quâvis sensatione concipi potest, reducitur solummodò ad certas partium sensilium mutationes, cursu non interrupto, per continentes nervos, in commune sensorium ordinatè perlatas. Undè consequens est, ut affectio, quâ dolemus, sita

fit in motatione partium sensilium nimis violentâ , quæ cohæSIONEM , tenorem , vires earumdem , in periculum adducat , injuriamve continuis nervorum fibrillis , vel & ipsi , undè hæ oriuntur , medullæ inferat , aut saltem intentet. Oportet sanè mentem contristari , ubi horum aliquid evenit in illo systemate , cujus integritas naturæ humanæ tam utilis ac necessaria est (532). Potentiæ dolorificæ , consecutiones gradusque varii dolorum , id ipsum quoque confirmant.

673. Quippè dolor nascitur , cùm partes sensiles , vi externâ internâve , ultrâ , quam commodè ferre queant , distrahuntur , aut percutiendo , contundendo , comprimendo , stringendo , contorquendo , vulnerando (218) , læduntur , aut deniquè acri vario stimulantur , roduntur , uruntur. Quocircà innumeris morbis , ut symptoma , & quod præ ceteris potissimùm urgeat , supervenit. Morbi cavitarum excedentium (203) , deficientium (209) , fracturæ (217) , vulnera (218) , luxationes (226) , herniæ (230) , procidentia (248) , tumores (262 , 664) , cacochymia acres (289) , plethora (387) , errores fluidorum varii (398) , vitii humorum motus (406) , doloremplerumque comitem habent.

674 Est tamen , ubi sola etiam sensorii communis mutatio , aliundè nata , haud aliter dolere facit , quàm si pars aliqua

aliqua corporis injuriam pateretur, nullâ interim potentiâ dolorificâ (673) extra sensorium ibidem præfente. Cujusmodi fallaciam in alias quoque fensationes cadere poffe, infomnia atque deliria manifestè docent.

675. Efficit dolor, si vehemens est, in mente inquietudinem, laborem, angorem, pervigilium, impotentiam, delirium, vitæ desperationem: in parte affectâ vis vitalis irritamentum, vibrationes tremulas, tensiones, spasmos (195), auctum humorum affluxum, congestionem, transitum impeditum, frigus, calorem, inflammationem, gangrænam, insensibilitatem, torporem, (196), resolutionem. Mutuâ autem consensione etiam in aliis partibus dolores, spasmi, convulsiones, imbecillitas, paralyfis, circuitus humorum universalis perturbatio, febris, motuum vitalium languor, syncope &c. creantur. Tot malorum auctor simul tamen vitæ custos est, qui & de præfente noxâ, ejusque consecutionibus, maturè monet, & compellit ad medelam quoquo modo quærendam.

676. Indè magnitudini injuriæ, periculive, plerumquè respondet doloris gradus, qui tantò ferè vehementior est, quantò potentiæ dolorificæ actio intensior proximam minatur destructionem. Augmentum quoque addit partis affectæ fibrarum gracilitas (161, 1), tensio na-

turalis major, irritabilitas (190), sensus tener; quibus si jungitur temperies corporis sicca, animusque impatiens, dolor in immanem excrescit. Summus ideò brevis, nec corpori nec menti diu tolerabilis, citò aut solvit, aut solvitur.

677. Præterea, quoniam sensationi tristi, quæ in quibuslibet doloribus inest, sese insuper in singulis ferè adjungere solet idea modi, quo vis dolorifica in partem agit, præcipuæ sic dolorum differentia, ac totidem veluti species constituuntur: uti sunt distendens, gravans, stringens, contundens, pulsans, scindens, pungens, terebrans, rodens, mordax, urens, &c. Nimirum ob perceptionum similitudinem comparamus, quas dolentes in corpore patimur injurias cum læsionibus, quas vires Mechanicæ, Physicæ, Chemicæ, foris admotæ, nobis inferunt. Nec improbable est, similes sensationes similibus cieri fibrarum sensilium mutationibus, atque ideò abditæ ex manifestis posse explicari. An verò & rectè hinc inferas, cujusvis doloris causam nunquam non potentia, quæ continui solutionem inferre partibus minetur, deberi; aut saltem in solidorum potius violentâ affectione, quàm in fluidi per nervos impedito motu, ponendam esse?

678. Ἀνοδυνία igitur, quâ ægri, in quos vis dolorifica agit, non dolent ta-

men, inter morborum symptomata non minus, quàm dolor, referenda est. Etenim aut pars affecta sensu caret, pressis, stupefactis, destructis nervis ob tumorem, luxationem, fracturam, contusionem, vulnus, sphacelum, &c. aut, sensorio communi impedito, universa vis sentiendi labascit in apoplexiâ, sopore, epilepsiâ, convulsione, catalepsi: aut, eodem perturbato, mens alienata est in deliriis: aut denique languente vi vitali, ac vigore circulationis, sensibilitas partium collapsarum unâ torpet in extremâ debilitate, animi deliquio, syncope. Ex tranquillâ tamen doloris patientiâ haud satis tutum videtur concludere, partibus irritatis sensum vel negasse naturam, vel morbum abstulisse.

679. Pruritus, sensatio dolori proxima, voluptas ex mutato corpore nimis intensa, hinc doloris initium, ponit irritationem, sensu quidem non tristi, sed inquietante tamen, molestant, quâ fit, ut partem affectam scalpere, fricare, aut quovis alio modo agitare veluti cogamur. Uti igitur leves motus mechanici, tactio, reptatio, frictio, vellicatio, partibus, quæ, quia tangi non consueverunt, delicati sensûs sunt, titillationem inferunt; ita pleræque potentiaë dolorificæ (673), cum mitius agunt, partemve minus teneram afficiunt, pruritus creant. Acre præsertim multiplex, leni

rosione morſuve in cutim agens, ſapiffimè hunc ſenſum movet. Undè in ſcabiè, impetigine, herpete, eryſipelate, variis exanthematibus, pernione, phtheiriâ, aliisq; vitiis cutaneis, tùm & in variis cacochymia acris ſpecièbus, frequens hæc moleſtia. Eſt etiam in hac affectione locus conſenſui, quo fit, ut irritamenta, quæ in alias partes agunt, in aliis pruritum cieant. Docent vermes inteſtinales & veſicæ calculus.

680. Quandò autem plerisque naturæ neceſſitatibus ſua quoque indita eſt pruritûs ſpecies, quâ nos admoneant invitentque ad motus ſibi competentes; patet iſtam ſenſationem non ſolius eſſe ſuperficièi, ſed ad internas etiam partes pertinere, inque his ex morbo incitari vehementiùs poſſe, ut tempore graduque incongruis urgeat. Referre igitur huc licebit multifarios illos ſtimulos, qui ex cauſâ morboſâ oriundi, ægrotantes ad tuſſim, ſternutationem, oſcillationem, pandiculationem, excretionem varias alvi, urinæ, &c. compellunt.

681. Eſt & interior quidam pruritus, abſque frictione, aut motu animali intolerabilis, quem in hyſtericis & hypochondriacis quandoquè membra ſingularia intùs concipiunt, nullo licet ſtimulantis acrimoniæ indicio. Irritabilitati (190) hunc attribuas, quâ fibræ partis, in oſcillationes immoderatas actæ, facul-

tatem sentiendi inquietant. Is aliquandiù durans spontè tandem, more spasmorum, solvitur; at nonnunquam periodicus statis intervallis denuò accedit.

Anxietas.

682. Uti præsentè malo dolemus; ita imminentis quod averti aut superari nequeat idea meticulosos sollicitat angitque, eò quidem vehementiùs, quo malum gravius, minùsque aut evitabile, aut eluctabile videtur. *Anxietas* idcirco tristis quidem pariter, ac dolor, sensatio est, at cum hoc minimè confundenda, longè terribilior; ipsâ quandoquè morte intolerabilior.

683. Quodsi igitur *anxia* mens redditur ex corpore suo affecto, credibile omninò est, causam subesse corpoream, quæ commune sensorium ita mutet, ut ideæ excitentur, quas mens nec absque horrore percipere ac contemplari, nec tamen & a se depellere possit.

684. Perindè autem fuerit, utrum sensorii communis illa (683) mutatio debeat respondeatque statui corporis reverà periculoso, cujus perceptione animus meritò angatur; an conditioni minoris momenti, quæ panicum modò terrorem incutiat (674). *Anxietatis* gradus utrobique idem esse potest; quamvis consecutiones multùm diversæ sint. Ita mu-

tui inter mentem & corpus commercii leges ferunt. Indè verò notabilis oritur anxietatum differentia.

685. Quum delirantes, idearum confusione, tristitia quæque & calamitosa sibi fingunt impendentia, mens in extremum sæpè angorem conjicitur, corpore licet non, nisi ex turbis sensorii communis, laborante. Hinc & plerumquè mala a foris potiùs, quàm ex morbo, sibi imminetia imaginario metu prospiciunt. Hæc species in phrenitide & melancholiâ frequens, dolori imaginario (674) similis, molestior, quàm periculosior (684).

686. Verior ex corpore nascitur anxietas, sicubi obstaculum quoddam conatibus, quibus natura uritur ad expellendum aliquid, quod sibi intùs incommodat, magnopere resistit; ut metus sit, ne non sufficiant. Anguntur ideò, quibus, cum materies excernenda præsto est atque urget, excretio tamen alvi, lotii, perspirabilis, sudoris, sputi, sanguinis &c. impeditur. Indè & molimina ad hæmorrhagias, vomitum, partum, evacuationes criticas, metastases, exanthemata, aut ad calculum, venenum, aliave heterogenea noxiæque eliminanda, nec non flatus conclusos, & subitò, ante tempus, suppressas excretiones, vel intrò repulsas eruptiones, angor comitatur.

687 Porro frequentissimam anxietatis causam ponunt impedimenta respiratio-

nis, quæ cum & sanguinis per pulmones trajectui obstant, ancipiti vitam periculo premunt. Multiplex itaque vitium pulmonis variâ materie infarcti, spasmò constricti, tumore, tuberculis, vomica, ulcere obsessi, aut aëre, aquâ, sanguine, pure, tumore, aliove thoracis affectu extrinsecus compressi; fistulæ item æriferæ fauciumque, quâ spiritus meare debet; tum diaphragmatis ac ceterorum, qui respirationem adjuvant, muscutorum; aëris denique frigore, calore, levitate, humiditate, elateris defectu, situ, inquinamento, peccantis multifaria labe (422 ad 445) huc faciunt.

688. Paris efficaciæ sunt, quæcunque cordis actionem, atque adeò circuitum vitalem vehementer turbant; siue vitium subsit cordis, spasmò, inflammatione, erysipelate, ulcere, polypo, aneurysmate, hydrope, tumore quovis, concretione, affecti, alienave materiâ obsessi; siue aliundè nata obstacula impediunt, ne cor moderatâ contractione sanguinem satis liberè cavis suis expellere queat. Imminens hinc circulationis suffocatio naturam urget, ut motibus duplicatis, non sine summâ anxietate, contra insurgat.

689. Quocirca & spasmi, repletiones, distensiones, obstructions, compressiones viscerum, quæ abdomine continentur; sicubi humorum per vasa motum

valdè impediendo resistantiam cordi augent; eò quidem certius in angere con-jiciunt, quo magis unà & diaphragmatis pulmonumque motui obstant, & proximum cor lacessunt. Huc igitur anxietates hypochondriacæ referuntur.

690. Postremò quoque angimur, cum, ob vim vitæ quacunque causâ deferiscentem (170), motuum vitalium ac circuitus humorum extinctio intentatur. Docent violentæ nervorum affectiones, cordis debilitas, ingruens animi deliquium, sphacelus vitalia invadens, &c.

691. Ex quibus (68; ad 691) ritè consideratis perspicitur, plurimis ac valdè diversis morbis istud symptoma sese comes adjungere; &, quanquam haud æquè semper periculosum est, nunquam tamen a prudenti Medico negligendum esse. Systemati vitali datus hic monitor magis etiam, quam dolor (67.), attendi mere-tur; quum sæpè aut periclitari vitam annunciet, aut hac quoque mortem reddat præstabiliorem.

Exercitationes sensuum læsæ.

692. OFFENSIS sensus communis, proximum est subjungere quæ ad sensus singulares, quos externos internosque vocant, pertinent symptomata. Verius hæc, quàm priora, ad actiones læsas referuntur; quum vitio organorum sensu-

tion non, ut decet, perficiatur. Uti verò officina sensoria pro diversitate qualitarum sensibilibum, quas aliis atque aliis partibus excipere debet, multum discrepante apparatu est instructa; ita multiplex hic a statu sano alienatio, nec ubique eadem, accidere potest. De singulis igitur seorsim agendum. Istud tamen omnibus commune est, ut, instar ceterarum actionum, sanitatem suam in mediocritatis quodam ambitu, congruoque tenore, positam habeant; a quo cum ultra citrave deflectunt, in vitio esse rectè dicuntur. Læsiones adeò in universum ad defectum, excessum ac depravationem commodè reducere licebit.

Tactus Symptomata.

693 TACTUS, in suo genere præ reliquis sensibus latissimè diffusus, aut valdè imminuitur in stupore, aut planè aboletur, idque vel in parte singulari, vel in multis simul, totove undiquè corpore. Utrumque vitium causis ferè iisdem, at gradu diversis debetur. Epidermis, tactus organum contegens, callo, elephantiasi, leprâ, corticosâ, squammeâ, corneâ degeneratione indurata, incrassata, aut in fugillatione, bullis, pustulis, interposito sanguine, sero, pure, &c. a subjectâ cure distans, in culpâ esse potest. Alias cutis variâ labe nimix rigidit-

tatis, laxitatis, collapsus suorum vasculorum, contractionis, infarctus aquosi, mucosi, laborans, aut constrictione, contusione, gelu, igne, gangrænâ, emortua, organum unâ adficiendo, sensum obtundit aut delet. Nervi denique in originibus, progressu, aut extremis suis, pressione, vulnere, contusione, rosione, exsiccatione, emollitione, extenuatione, vis vitalis defectu, humoris boni inopiâ, materiæ morbosæ depositione, usu narcoticorum, aliisve noxis inhabiles redditi, huc quam maximè faciunt. Quo & referri debet, quæ morbos sensorii communis, apoplexiam, lethargum, epilepsiam, catalepsin, &c. comitatur, insensibilitas universalis. Tum verò & virtutis motricis vitiositas accedit, quâ tamen correctâ sensus impedimentum quandoquè perstat, aut hoc ablato illa superest.

694. Acuitur etiam tactus ultra modum, magno incommodo; quum attrectatio modica in dolorem vertitur, ut eam quoque refugiant partes. Id fit, ubi organum tegmine suo caret, aut hoc nimis tenui vestitur, aut ipsum justo tenerius, mobilius, plusve justo tensum est. Intertrigine, vulnere, ulcere, inflammatione, erysipelate, abscessu, contusione, dolore hysterico, podagrico, vario spasmus, affectis hinc accidit. In morbis spasmodicis quandoquè universa ferè corporis superficies ita tenerescit; ut vel in-

tentatus modò attractus etiam formidinem incutiat.

695. Depravati tactus speciem tum imminutio ejus (693), tum nimium acumen (694), in se habet : in utroque enim casu organi minor majorve affectio facillimè qualitatum perceptionem confundit. Alia erroris species est, cum sensatio ad perverfam partem refertur (674).

Gustus Symptomata.

696. TACTUI proximè affinis gustus similia patitur ex similibus causis. Id tamen privum linguæ, principi hujus sensus instrumento, creberrimè in morbis, etiam non suis, fordes, mucum, crustam, contrahere, obsedere aphthis, &c. Saliva quoque, quæ plurimùm ad gustatum facit, permultis obnoxia est cùm quantitatis, tum qualitatis vitiis. Adde, quod appetentia, quæ saporum gratiam mirè augere potest, rarò in ægris vigeat, fastidium contra & nausea sæpè subnasca-
tur. Indè frequens origo multiplicis læsionis hujus sensus intelligitur.

697. Præ ceteris notabilis est gustus alienatio; quùm ægri conqueruntur de sensu saporis falsi, amari, urinosi, acidi, æruginosi, dulcis, rancidi, cadaverosi, quo sibi videantur imbuta esse quæcunque ingerunt. Causa plerumquè in salivâ hæret vitiosâ materie infectâ, sive hanc

ex lymphâ sanguinis attulerit, sive ori infusa demùm contraxerit ex quacunque partium, quas alluit, aut vicinarum, labe. Indè, quæ serum maximè affectant, cacochymix acidæ, biliosæ, putridæ, rancidæ, falsæ, aliæve acres; tum sordes, crustæ, ulcera, oris, linguæ, dentium, gingivarum, palati, narium, faucium, œsophagi, ventriculi, trachææ, pulmonum, &c. hoc symptoma producant. Organi quoque gustatus & papillarum varius tensionis aut laxitatis status, vel superstes à priore sapore affectio, quin & sensorii communis perturbatio eò conferre possunt. Liquet adeò, cur alienus sapor sæpissimè quidem ex morbo, quandoquè tamen & bono omine ex perfectâ materiæ morbosæ correctione profluat.

Olfactus Symptomata.

698. OLFACTUS nonnunquam ex causâ morbosâ nimium acuitur, ut vix odorata etiam percipiantur, odorata autem & ad majorem distantiam, & longè fortius, hinc sternutationem, convulsiones, animi deliquia aliquandò inducant. Membranæ narium, ob muci defectum, nuditas, siccitas, nimia tensio, papillarum olfactus excedens mobilitas, delicata aut nervulorum hujus sensus propriè, aut universi systematis sensorii, teneritudo, in acutis & chronicis malis id efficere va-

lent. Indè in hystericis , hypochondriacis , phreniticis , ex morfu rabidi canis hydrophobis maximè occurrit.

699. Frequentior est olfactus obtusio ac abolitio , qui ἀνοσμία. Obstructio membranæ narium in gravedine ; humiditas nimia in coryzâ ; muci abundantia , crassitudo ; heterogenea intrò admissa , lapis , gypsum , vermis , &c. ; tumores quicunque , polypus , scirrhus , cancer , exostosis , vulnus , contusio , ulcera depascencia , caries , callus , alarum nasi concretio ; vitia conformationis , &c. variis modis istas læsiones inferunt. Quæcunque porrò aëris per nares transitum inhihent , impedimenta multifaria : ut & odoratus nervulorum , quâ in papillas abeunt , aut altiùs , compressio , induratio , resolutio , emollitio , destructio : quo referri etiam potest , quæ ex perpetuo saniei cancrofæ halitu contrahitur , sentiendi impotentia. Denique , quæ ceteros etiam sensus opprimunt , sensorii communis mala , apoplexia , epilepsia , catalepsis , morbi soporosi , &c. huc faciunt.

700. Depravatio ponit vel alienum eorum , quæ odorata sunt , odorem , vel odoris in atmosphærâ inodorâ perceptionem. Nascitur ergò , quum organum olfactus a materie olente , quæ in corpore hæret , ita afficitur , ut odor à foris afflari videatur. Mucus , saliva , pus , ichor , tabus , fordes , corrupta , putrida , rancida ,

in cavernis narium, ore, dentibus, gingivis, linguâ, faucibus, œsophago, trachæâ, pulmonibus, stabulantia; aut olidi vapores è ventriculo ascendentes, istam fallaciam inducere valent. Facit & longior mora inter res valdè odoratas impressio-
nem permanentem, quæ tardè demùm eliditur. Turbis sensorii communis hoc vitium quoque nonnunquàm deberi analogia docet (674): tùm verò rariùs in solum olfactum cadit.

Auditus Symptomata.

701. LÆDITUR auditus quadrifariam, augmento puta, abolitione, hebetatione ac depravatione. Undè ὀξυνκοία; κώφωσις, surditas; βαρυνκοία, gravis auditus, tintus, bombus, echo, susurrus, sibilus. Quæ symptomata tantò quidem majoris momenti censenda sunt, quo & sensum disciplinæ nobiliorem infestant, & causas sedesque magis abstrusas habent, & minùs ad sanandum facilia sese præbent.

702. Ὀξυνκοία dicitur auditus summa sensilitas, quæ vel leves quoque sonos vix ferre queat, quin ægritudo, dolor, convulsio, delirium, aut deliquium oriatur. Debetur nimix tensioni, siccitati, mobilitati organi acoustici, cerebri, nervorum, membranarum. Supervenit ideò morbis istarum partium acutissimis, inflammato-

riis, spasmodicis, dolorosis, otalgia, phrenitidi, cephalalgia, &c. Comitatur & deliria febris expertia, maniam, melancholiam. Hystericis ceterum, hypochondriacis, puerperis, ex gravi morbo etiamnum teneris, in pervigilium pronis, summatim irritabilibus (190) familiare malum.

703. Causarum, quæ auditum obtundunt, longè major & numerus est & diversitas, nec minùs multiplex sedes. Plurimæ nimirum partes sunt, & plures etiam singularum conditiones, quæ cum ad integritatem hujus sensus faciant, vitiari nequeunt, quin functio impediatur. Physiologia igitur hinc potissimum præluere Pathologiæ atque ordinem dicendorum monstrare debet.

704. Organi maximoperè compositi, quæ huc referri merentur, vitia fere hæc sunt. Auriculæ defectus, meatus auditorii angustia, ab alienâ materie repletio, obturatio, concretio; membrana tympani relaxata, callo rigens, in os durata, foribus obfessa, luxuriante carne crassescens, rupta, adefa, aut quoquo modo deficiens; auditus ossiculorum luxatio, anchylosis, caries, dissolutio, absentia; cavea tympani sero, pituitâ, cruore, pure, ichore repleta, sorde inquinata; vestibuli, cochleæ, labyrinthi infarctus, conformatio perversa; membranarum, quæ hic expansæ sunt, laxitas, siccitas, indu-

ratio, degeneratio, destructio; vasculorum à congestis humoribus tumor, obstructio; musculorum internorum paralysis, spasmus; tubæ Eustachianæ constrictio, *σπρωχάρις*, obstructio, concretio, exessio. Horum singula seorsim, plurave complicata, quàm obstant, ne tremores sonori, ut decet, excipiantur, colligantur, reflectantur, transmittantur, imprimantur, vibrationes harmonicas cieant, modis sanè gradibusque diversis auditum hebetare, aut & omninò abolere possunt.

705. Organo tamen inviolato, apparatus etiam nerveus, huic sensui datus, indè ab organo ad sensorium usque commune, toto itinere, pressus, destructus, marcidus, rigidus, stupidus; aut ipsum cerebrum labe universali, apoplecticâ, epilepticâ, &c. oppressum, relaxatum, exhaustum, aut quovis modo inhabile redditum, quandoquè in culpâ sunt.

706. Liquet autem ex usu partium, alia quidem istorum vitiorum (704, 705) gravem modo auditum inducere; alia aut hunc, aut surditatem ipsam, ut variâ fuerint intensitate, complicatione, duratione; alia ocys, ferius, certò tamen, surditatem. Hinc porrò, nisi naturâ vel arte maturè tollatur, loquelæ ignorantia, aut desuetudine oblivio ferè accedere solet.

707. Depravatè audiunt, quibus, cum

nihil sonat, aures tamen tinniunt, susurrant, strepunt, aut, instar echûs, sonos repetunt. Fugax symptoma etiam sanis sæpè numero accidit, levibus ex causis oriundum. Perseverans diutiùs, sive solitarium fuerit, sive morbis aliis adjunctum, majoris momenti, variique ominis est. Nascitur autem, quando tremores, sonoris similes, in meatu auditorio, membranâ tympani, hujus caveâ, parietibus atque aëre interno, ossiculis, membranis, ceterisque interioris organi partibus cidentur a vasculis hic distributis, ob plenitudinem, pressionem externam, obstructionem, inflammationem, solito fortius pulsantibus. Undè plethoram, morbos febriles, acutos, inflammatorios, maxime qui caput infestant, catarrhos, evacuationes suppressas, decubitus humorum in has partes vicinasve, eorundem impetum fursùm versùm, hinc delirium, sanguinis ex naribus profluvium, parotides, &c. imminet, sæpè comitatur. Musculorum quoque, ac fibrarum motricium in his locis spasmi, tremores convulsivi, in hysteriis, hypochondriacis, epilepticis, &c. idem efficiunt. Quocircà aut relaxatio, aut tensio immodica partium hujus organi, quâ nimis facile agitantur, aut motû diutiùs quam par est contremiscunt, huc quoque confert; nec non tubæ Eustachianæ varia vitia (677), quæ justum aëris intra caveam tympani

moderamen pervertunt. Denique & multiplex affectio partisve nerveæ, quæ ad auditum pertinet, indè ab organo usque ad origines suas; tùm & encephali, pressione, irritatione, commotione, aut primariò, aut ob mutuam cum aliis partibus consensionem, læsi: ut sæpenumerò hæc etiam causa subsit, quare capitis morbis inflammatoriis, soporosis, catarrhosis, spasmodicis, nec non ventriculi vitiis, &c. istud symptoma sese adjungat.

708. Ceterùm vix alia functio datur, cujus vitiatæ naturam, causas, partesque affectas difficilius sit cognoscere, certasve curationes determinare. Nec mirùm: quandò tam parum est, quod de organi abditissimi statu sano, partiumque ejus singularum usu, intelligimus.

Visus Symptomata.

709. INTER sensoria compositissimus oculus etsi quàm plurimas patitur vitiositates; symptomata tamen, quæ ad functionem ejus attinent, itidem ad quatuor genera, aucti, imminuti, aboliti ac depravati visus referre licet. Nec alio fanè nomine hujus sunt loci. Undè hunc quoque ordinem in eorundem expositione sequemur.

710. Visu nimis acutò laborant, quorum tam sensiles oculi sunt, ut lucem refugiant, & vel modicam ægrè ferant,

hinc debiliore quidem videant, fortiore perstricti caligent. Φωτοφοβίαν vocaveris. Nonnulli ἡμεράλωπας appellant, qui facultate videndi noctu, quàm interdiu, magis valent. Hos tamen contra alii potius, νυκτάλωπας dicendos esse censent.

711. Causæ hujus vitii intelliguntur ex iis, quæ de simili auditus ceterorumque sensuum læsione supra (694, 698, 702) tradidimus; modò ad organum visus applicentur. Indè frequens occurrit in similibus (702) oculorum, capitis, nervorum, affectionibus cùm acutis, tùm chronicis, assiduus præsertim ophthalmiæ comes. Desuetudo lucis hanc teneritudinem fanis etiam oculis infert. Maximè tamen huc quoque facit imbecillitas, aut impedimentum potentiae, quâ pupillam in luce majore constringimus; ut ideò hæc perpetuò dilatata sit, μυδρίασι laborans aut saltem ad constrictionem non satis parata. Quum enim pupillæ moderamine lucis appulsæ quantitati sese accommodet oculus, patentior introitus clarioris lucis intolerantiam creare debet. Undè patet, cur magno virium dispendio accedens nimia sensibilitas istud symptoma tantoperè intendat. Quod cataracta minor, ad margines tenuior, in medio spissior, producit, vespertini visus genus imminutam potius, quàm intensiorem ponit aciem, nec adeò hujus est loci.

712. Cæcitatis causæ cum & numero plurimæ sint, & naturâ ac sede multum diversæ, distinctam merentur expositionem. Aliæ quidem hærent in partibus, quæ antè oculi globum sitæ sunt, alia in hoc ipso, iterumque alia ponè eundem, indè ad encephalon usque.

713. Priores nec facultatem videndi, nec organum, afficiunt, sed conditiones modo, sine quibus exerceri visus nequit. Sunt igitur externa tantum impedimenta, quæ oculum luminì inaccessum reddunt, nec adeò, nisi notham pariunt cæcitatem. Huc referuntur vitia palpebrarum: tumores ab humorum confluxu, inflammatione, erysipelate, œdemate, emphysemate, grandinibus, tegumentorum exuperantia, carne luxuriante, tumoribus cysticis, &c. diductioni obstans; cohærentia a pituitâ, gramiis, pure, sanie ulcerosâ, porriginosâ, venereâ interpositis; concretione congenita, aut ex inflammatione, ambustione, excoriatione, vulnere, ulcere, nata, quod ἀγκυλοβλέφαρον (223); constrictione ab orbicularibus musculis spasmo affectis; πτώσις denique palpebræ superioris ob resolutum aut transversè dissectum ejus levatorem. Caruncula quoque lacrymalis, &, quæ juxta hanc est, laxioris adnatæ lunula, quum congestis humoribus, inflammatione, abscessu, turgent, aut degenerare augmento suæ materiæ in panniculum, pterygium, &c. abeunt,

ita supra corneam sese quandoquè expandunt, ut lumen intercipere possint. Alias & vicinarum partium tumores, qui oculo superimminent, simile obstaculum creant.

714. Quæ cæcitatem inferunt, globi oculi vitiositates pro multitudine ac diversitate partium, ex quibus componitur, perquam numerosæ sunt. Cornea ex inflammatione, ambustione, pustulis, abscessu, sarcofi, cicatrice, humorum coagulo, &c. varii nominis, coloris, crassitie, sedis, extensionis, maculis obscurata, luci impervia: humoris aquei defectus; ejusdem sanguine, pure, sordibus mixti, aut in spissamentum mucosum, membraneumve, cataractas spurias recentiorum, coacti opacitas: pupillæ ob varia uvæ, congestis humoribus turgidæ, luxuriantis, flaccidæ, convulsæ, prolapsæ (255) vitia, obstipatio, *συνίχνσις*, *σύνκρσις* constrictio: lentis crystallinæ, aut in corpore suo, aut in velamento opacatæ, arefactæ, suppuratæ, colliquesactæ, suffusio multiplex; ejusdem tumor, unâ cum obscuratione glaucâ, vicina pressa sensu motuque privans: humoris vitrei similia vitia, cum prægressâ, aut pedissequâ lentis affectione conjuncta: retina tandem compressa, callosa, infarcta, marcida, resoluta, aut quavis demùm affectione, sive propriâ, sive aliarum partium, insensibilis. Etenim horum singula

seorsim, aut plura inter se complicata, multiplices cæcitatis species, cataractas, glaucomata, ἀμαύρωσιν, diversis quidem modis atque phænomenis, producere posse cuique facilè liquet, qui Physiologiam hujus sensationis ritè intellexerit.

715. Ad tertium genus (712) pertinent, quæcunque simili ratione, ac mox de retinâ dictum (714), afficiunt nervum opticum, huicque impotentiam inferunt uti & cerebri læsiones multivarix, sive universales, apoplecticæ, epilepticæ, cataleptiæ, &c. seu magis singulares, quæ videndi facultatem præcipuè opprimunt, liberum sensorii communis cum externis sensoriis commercium intercipiendo. Inde, organo licet nullâ conspicuâ labe vitiato, cæcitas tamen consequitur, quum ex vulnere, fracturâ, contusione, obstructione, congestione, effusione, corruptione humorum, tumore vario, abscessu, liquidi vitalis defectu, virium languore, spasmo, compressio, destructio, inundatio, exesio, extenuatio, collapsus, marcor, constrictio, istis partibus accidit. Qui affectus ἀμαύρωσις audit, cum ex causâ stabili oriundus permanet; σκότωμα, scotomia, ubi, postquam aliquandiù afflixit, citò spontè remittit.

716. Visus hebetudo, ἀμβλυωπία, uti gradu tantum à cæcitate distat, inque hanc sæpenuerò, ocyùs, seriùs transir, ita consimilibus causis, sed levioribus,

nascitur, variosque & ipsa admittit gradus: prout vel sanis quoque non eadem singulis semperque acies obtigit. Ex supra (712 ad 716) dictis ergò intelligitur.

717. Depravatio visûs dicitur, cum imagines cernuntur rerum, quasi ob oculos versantium, quæ tamen nullæ sunt, aut aliter, quam reverà sunt, aut rectè quidem, sed non ad justam distantiam, perversove cum obtutu oculorum. Multiplex itaque vitium, diversissimis è causis oriundum, morborum plurimorum symptoma, vel visionem ipsam ponit alienatam, vel videndi modum.

718. Quodsi causæ internæ retinam in similes agant tremores, uti lux solet ab externis objectis reflexa, pro statis sensationum legibus, ideas similes nasci oportet, & ad objecta externa, quasi ab his oriantur, referri. Undè prima visus fallacia, imaginatio dicta, quæ floccos, scintillas, *μαρμαρυγὰς*, imagines varias, vel adductis etiam palpebris profert. Vascula retinæ aut huic vicinarum partium, humoribus turgida, ultra modum micantia, quùm proximam ejus medullam agitant, plerumquè hoc symptoma pariunt, frequens ideò in oculorum contusione, inflammatione; tùm & in plethorâ, & morbis acutis, febrilibus, inflammatoriis, catarrhosis, spasmodicis, qui nimio humorum affluxu caput affectant; sæpè imminentis desipientiæ aut hæmor-

rhagiæ prodromus. Comitatur & *φωτοφωβία* (710), sicubi tenerior oculus nimîâ luce percellitur. Alias & ponè oculum in nervo optico, ipsove cerebro, sedem habet ex vitiis suprà (307) memoratis nascens.

719. Retinæ aliqua puncta obstructione, ecchymosi, callo, compressione, relaxatione, insensilia; massulæ opacæ per humorem aqueum, vitreum, lentem, sparsæ; cornea maculis obseïsa, imaginem objecti punctis, striis, floccis, nubeculis, cancellis nigricantibus interstinguunt, infuscant, iisque oculo immoto aut stabilibus, aut fluctuantibus, pro variâ vitii fede. Quæ altera est fallaciæ species. Bulbulæ aëriæ, aut guttulæ striæve oleosæ, pellucidæ, seorsim in humore aqueo fluitantes, refractione radiorum dispari, imaginem alienis notis ductibusque mobilibus, etsi non opacis, variare etiam possunt. Oculi quoque madidi, aut palpebrarum tarsi extumidi, reflexâ luce in pupillam admisâ, imagini objectorum alienam radiationem affingendo visum itidem confundunt.

720. Alias & colore non suo cernuntur res, quum corneam, humoresve oculi, integrâ pelluciditate, alienus color inficit. Quandoquæ & vehemens nervei systematis affectio hoc vitium parit.

721. Vertigo, *δίνειν*, hujus etiam loci est, qua objecta, etsi stabilia, in gyrum
agi,

agi, titubare, contremiscere, subverti videntur, ut homo quoque, stare nescius, membris vacillet, aut prosternatur. Sicubi & visus unà obnubilatur, σκοτόδιος, vertigo caliginosa audit. Causæ sunt quæcunque compressione, succussione, agitatione, infirmatione, fibrillarum cerebri, nervi optici, retinæ, motus regulares interturbant; sive proximè in istas partes agant, sive per consensionem. Cujusmodi habentur innumera: uti capitis, aut oculorum, ictus, contusiones, fracturæ, tumores interni, morbi inflammatorii, suppuratorii, erysipelatosi, febriles, spasmodici, catarrhosi; soporosi, dolorosi; plethora; cacochymia multiplex, humorum rarefactio, impetus, congestio ad encephalon; hujus inundatio ab effusis, stagnantibus; retentio excernendorum; metastasis materiæ morbosæ, variæ evacuationes nimix; dissipatio virium per inediam, vigilias, curas, studia intensiora, morbos vehementes; ventriculi, intestinorum, vasorum viscerumque hypochondriacorum, uteri, affectiones; irritationes ab aliis partibus sursum propagatæ, &c. Undè permultos morbos præcedere, comitari, aut consequi solet. Quum verò & intuitus rerum, quæ circumaguntur, aut alias celeriter antè oculos moventur, & capitis corporisve universi in gyrum agitatio, & meticulosus præcipitii prospectus, insuetis vertiginem

inferant; credibile est, causas quoque internas haud dispari ratione agere.

722. Quæ imagines objectorum multiplicat, dividit, mutilat, aut alias pervertit allucinatio quamplurimis diversarum oculi partium vitiis, quæ situm, motum, figuram, substantiam depravant, debetur. Mala præsertim spasmodica, paralytica, musculos oculorum, retinam, nervos opticos, cerebrum afficientia, id genus fallacias perquàm mirabiles producunt.

723. Facultas, quâ oculum diversis objectorum distantis aptamus, multimodis vitatur, in *μυωπία*, *πρεσβυωπία*, *ὕπερ-πρεσβυτία*.

724. Myops oculus, ad objecta remotiora inhabilis, etiam nimis propinqua exigit, ut distinctè videat. Excessu igitur laborat ejus virtutis, quâ lucem admis- sam refringendo cogimus: ita enim fit, ut è longinquo venientes radii, penè paralleli, intra oculum justo citiùs in focos coëant, indèque rursùs dispersi demùm in retinam incidant. Causæ sunt major oculi longitudo, cornea convexior, lens magis gibba, a retina remotior, mediorum, per quæ radii intus decurrunt, major densitas. Myopia spuria, quam angustior pupilla, minor corneæ humorumque pelluciditas, minor iridis ac retinæ sensilitas, inducit, ad visum hebetem (716) potiùs referatur.

725. *Πρεσβυωπία*, vitium priori (724) contrarium, senibus familiare, contrariis etiam conditionibus debetur: quo & lentis defectus referri potest.

726. *Υπερπρεσβυωπία*, quæ lentem adeò propinquam retinæ ponit, ut cujuscunque distantie objectorum radii post retinam suos projiciant focos, neque hinc vel priora, vel remotiora distinctè cernantur, sicubi detur, enormis dicatur visus senilis (725) gradus, imminuti visûs (716) speciebus annumerandus.

727. Mala nervorum spasmodica, paralytica, quandoque & visum ita figunt, ut ne vel minimum quidem aptæ distantie augmentum feratur, quin objectum planè dispareat. Depravationis genus oppidò rarum & singulare.

728. Concretio oculi cum vicinis partibus, pressio a tumoribus, situs alienus, musculorum ejus spasmus, paralyxis, distractio, aliave impedimenta, diversimodè pervertere motum atque directionem in videndo possunt. Undè *πρωπία*, visus lateralis, sublimis, humilis, aspectus trux, torvitas, similiaque mala.

729. Hæc inter præcipuè memorabilis strabismus, quo affecti oculis distortis ac inæqualiter motis vident. Distorsio varia introrsum, extrorsum, fursum, deorsum, unius vel utriusque oculi, differentias constituit. Multiplex hujus vitii sedes ac causa tribuitur visûs potentie in

utroque oculo haud satis æquali , in alterutro multum debiliori, aut & deficienti ; musculis spasmo, paralyfi, vulnere, contusione, ulcere, pressione, contractione, adhæsione, læsis, ut æquabiliter ambos dirigere oculos nequeant; adsuetudini obliquè aut uno tantùm oculo videndi; corneæ, malè conformatæ, parte aliquâ opacæ; obliquo lentis situi; processum ciliarium inæquali actioni; discordi denique retinarum harmoniæ.

Lesiones sensuum internorum.

730. SENSUS externi quidem materiam subministrant, in quâ sese exerceat virtus sentiens : at præstantissimum, quod ista functio habet, internis, quos dicunt, sensibus debetur. Tametsi verò præcipuam horum partem ipsa ad sese mens vindicare videatur; haud negandum tamen, organa corporis suam quoque symbolam eò conferre, horumque adeò diversitati ex partetribuendum esse differentem id genus sensuum usum, qui in hominibus etiam sanis animadvertitur. Quocirca & pronum est colligere, non minùs hic, quàm in sensibus externis, alienationes dari, quæ cum ex corporis vitiositate profluant, omninò ad forum Medicum sint referendæ (36).

731. Quæ cum sic satis certa sint, abditissima tamen est, in quâ hæc mentis

operationes perficiuntur officina, nec vel probabili conjecturâ assequi datur organorum, quibus instructa est, numerum, situm, conformationem, vires, agendi modum, singulare cujusque pensum, cetera. Quo fit, ut, in tantâ statûs sani ignorance, de naturâ ac sede vitiorum, quæ hic occurrunt, nihil admodum distincti pronunciare liceat. Tantisper proindè in generali doctrinâ acquiescendum, donec Physiologia tenebras dispulerit.

Delirium.

732. DELIRARE dicitur, qui, cum vigilat, somnianti tamen similis, ideas, sibi ab internis causis natas, ad res externas refert, percipitque adeò ac existimat præsentia esse, quæ absunt: tùm qui ideas undecunque ortas præposterè componit, disjungit, judicium ferens à communi sensu aberrans: & qui præter rationem, vi morbi, alienos a suis mores induit, motibusque animi abstrahitur insolitis, effrenatioribus.

733. Delirium ergò ponit facultatem judicandi in vigilante perturbatam vitio organorum. Quamvis enim reliquarum sensationum exercitium pervertatur; nisi tamen erroneum quoque intervenerit judicium; vix pro delirio id haberi potest.

734. Undè perspicitur multiplex hu-

jus symptomatis differentia variusque gradus; prout aut universale est, aut particulare, fixum vel vagum, perpetuum aut interruptum, mite vel ferox, incipiens aut consummatum.

735. Difficillimum autem est, ob extremam hujus materiæ obscuritatem (731), aut partes affectas assignare, aut diversos læsionum modos, quibus singulæ deliriorum species oriuntur. Ex comparatione eorum, quæ in sano statu sunt, istud saltem affirmari posse videtur, quavis demum ratione turbari æquabiles illos, regulares, mentisque moderamini addictos motus organorum sensoriorum, undè ordinatus pender idearum ortus, consentanea disjunctio, combinatio, successio, atque attenta contemplatio, sine quibus sanum esse judicium nequit.

736. Sive igitur, quas causæ internæ excitant idææ tam vividæ sint, ut a foris profectæ videantur, mentemque occupent, abripiantque, nec aliis attendere sinant; sive legitimis ideis sese adjungant aliæ incongruentes; seu denique affinium vel intermediarum idearum quædam suppressæ deficiant, nec produci queant: quidquid horum contigerit, manifestum est, fieri non posse, ut ne facultas judicandi primùm, dein & voluntas, in errorem pertrahatur, ac porro huic etiam convenientes cùm animi,

tum corporis motus nascantur, fallaciâ aliâ aliam trudente.

737. Ingens potentiarum numerus, quas observatio docuit turbarum id genus creare reducitur ferè ad ea.

1. Quæ tenorem medullæ cerebri generisque nervosi infirmando virtutem sentientem labefactant. Cujusmodi sunt evacuationes nimix, morbi graves, diu tolerati, mala hysterica, hypochondriaca, apoplectica, cataleptica, epileptica, exercitationes mentis immodicæ (522), animi motus violenti, diuturni (532), pervigilium (550 ad 552), tum quæ colluvie aquosâ (287), mucosâ (283), encephali stamina inundando flaccida, inertia (160, 1. 2.) reddunt.

2. Quæ humorum circuitu intensiore (409), fursùm directo (411), sanguinem in vasis encephali accumulans, hinc distensione, pulsatione, attritu, æstu, errore loci, proximam medullam præter modum exagitant.

3. Quæ siccitate, rigiditate, infarctu lento, indurante, fibras sensorias minùs mobiles mutabilesque faciunt, statûs semel concepti nimis tenaces. Quo maxime confert atrabilaria humorum crasis, vitio quocunque rerum non naturalium, morbove inducta (284, 320, 355).

4. Quæ irritando motus irregulares, injustos, infrenatos, in sensorio communi cient, sive proximâ in hoc ipsum

actione, seu ex aliis partibus per consensionem eo propagatâ. Stimulorum verò, qui vim sentientem turbare queunt, par ratio est, atque irritamentorum virtutis vitalis, nec minor ferè numerus ac diversitas. Undè ex dictis (171 & seq.) intelliguntur.

5. Impedimenta denique multivaria, quæ partibus encephali vim inferendo, situm, nexum, fabricam earundem pervertendo, canales obstruendo, comprimendo, quassando, lacerando, humorum circuitum turbando, consentaneis medullæ staminum motibus obstant. Conformatio prava ab ortu contracta, commotio, contusio, fractura, vulnus, abscessus, ecchymosis, hydrocephalus, & similia, quæ caput infestant, huc referuntur.

738. Est verò & feminiis hic locus, quæ alium præ alio tùm ad delirium, tùm ad hujus species singulares, procliviores reddunt. Temperamenta certè (614), melancholicum præsertim aut cholericum, atque irritabilitas (190, 606), multùm valent; tùm & gentilitium quid singulare, quod hæreditate propagatur, ex prioribus vix planè explicandum.

739. Phantasiæ alienationes, quæ judicio corriguntur, leviores modò desipientiæ gradus sunt, similesque causas habent. Refractarium quoque & inflexibile, quod vi morbi aliquandò in volun-

tate nascitur, haud minùs, quàm indomitæ animi commotiones (732), huc pertinet.

740. Memoria vacillans, confusa, extincta; puerilitas, fatuitas; mentis distractio; ἀνασθησις sensuum carentia; ἀπάθεια in quâ ob vitium organorum quæcunque animi affectiones delentur, & quæ id genus aliæ sunt noxæ, suo quævis modo læsam ponunt officinam sensoriam, proprietate tamen læsionis vix determinandâ ultra, quam occasiones ægrotandi, morbique prægressi, comites, aut pedissequi docere possint. Ætas, temperamentum, torpor, vis vitalis (196), vitiositates organicæ (737, 5), solidorum laxitas, rigiditas, vasculorum obstructio, collapsus, concretio, humorum spissitudo, inertia aquosa, inopia, abundantia, motus imminutus, mala nervorum paralytica, spasmodica, morbique ex his nati, universales, particulares, præcipuè spectari merentur.

Motricis facultatis Symptomata.

741. FUNCTIONUM corporearum nulla est, quæ non ad motum referri queat. Undè pro illarum multitudine & diversitate innumerabilis est motuum qui in sanitate perficiuntur varietas. Habet idcirco suum quoque animalis machina systema motorium, per omnes partes

diffusum, suis instructum fibris, tùm singularibus, tùm in musculos collectis, quæ tanquàm motus instrumenta, virtute motrice animantur. Ita duplex motuum genus cietur, alterum spontaneorum, alterum eorum, qui voluntate nostrâ reguntur. Hæc verò, etsi diversis legibus adstricta sint, multùmque ideò inter sese discrepare videantur, credibile tamen est, idem motus principium agnoscere, nec dissimili quoque apparatu organico absolvi. Iisdem certè vitiis obnoxia sunt. Communi igitur pertractatione utriusque symptomata proponemus.

Spasmus.

742. SPASMORUM major etiam est, quam dolorum in ægris frequentia: nec rarò morbum universum, certè præcipuam hujus partem constituunt, ipsique, ut suis ex causis profluunt, plurimorum vicissim symptomatum causæ fiunt. Tamen si itaque eorundem energia ultra, quam par est, a nonnullis fortè extenditur; fatendum tamen, vix aliam dari corporis vivi affectionem, cujus aut crebriores incidant occasiones, aut magis universalis sit sedes, aut major ad functiones omni modo turbandas potentia.

743. Spasmus dicitur violenta, invita, inordinata, fibrarum motricium actio. Omnes adeò & singulæ systematis

motorii, qua latè patet (741), partes ei obnoxia sunt. Virtus verò motrix, quæ in fanitate fibras musculosque animat, eadem & in spasmō actionem edit, in quâ illud modo præter naturam est, quod justo intensior sit, nec congruenter legibus œconomia fiat.

744. Quum igitur vis motrix fibrarum a principio vitali (170, 209, 5) repetenda videatur, manifestum est, in eruendis spasmorum causis ad irritamenta (171) potissimum attendendum esse, quæ sanè perquam multiplicia numerantur. Acria mechanica, chemica, noti, ignoti generis; potentia dolorifica (673); immodica tum repletio, tum evacuatio; turbæ systematis circulatorii; affectiones systematis nervei universales, particulares; irritamenta varia muscutorum, tendinum, membranarum. Multum præcipuè hic valet mutua inter vires sentiendi movendique consensio (179, 525, 537), quâ fit, ut immodicæ cuivis sensationi, dolori (675), anxietati (682), quin & animi perturbationibus (532), frequentissimè spasmī superveniant; tanquàm si horum ope avertere, aut propulsare malum, de quo sensus monet (675, 691), natura conetur.

745. Uti verò vis vitalis non in omni homine, nec in quavis hominis parte, eodem gradu inest (175, 176); ita pro hujus differentiâ major, minorve ad spasm

mos proclivitas nascitur. Quocirca qui vitio irritabilitatis (190) laborant, potentissimum hujus symptomatis seminium intus alunt (195).

746. Effectuum, quos spasmi producant, ingens numerus ex dictis (195, 209) intelligitur. Nec tamen adeò constanter nocent, ut non & saluberrima inter naturæ auxilia ad avertendos sanandosque morbos (297, 640, 641, 744) meritò haberi debeant.

747. Spontè etiam patet multiplices dari spasmodorum differentias; prout vel universales sunt, vel particulares, idiopathici, aut sympathici, repentini vel lenti, coarctantes, aut inflantes, qui flatulenti dicuntur, &c.

748. Qui spasmus a convulsione distinguunt, illum vocant continuam, hanc alternantem musculorum contractionem, quam tamen alii malunt motum convulsivum appellare. Perindè fuerit, num eodem, an diversis nominibus utare. Uterque certè affectus ad idem genus pertinet, partes easdem occupat, similesque & causas, & differentias agnoscit; quin & haud rarò alius in alium transit. Intelligitur adeò recentiorum distinctio inter morbos tonicos & clonicos.

749. Inquietudo etiam utcumque hu referri potest: quamvis enim haud planè præter voluntatem ista membrorum agitatio fiat, plerumque tamen nec suspen-

di pro arbitrio potest, cum ex morbo nascitur. Anxietas, dolor, pruritus, æstus, delirium ferè in causâ esse solent.

750. Horror, horripilatio, hujusque vehementior gradus, rigor, concussionis spasmodicæ naturam clariùs præ se ferunt. Accidunt febribus, suppurationi, sphacelo; gravibus nervorum affectionibus; subitis, immodicis evacuationibus; his malè suppressis; laboriosis ad expellendum moliminibus, maximè ubi natura cruda, acri, corrupto, heterogeneo, virulento intùs hærente angitur. Quùm verò & animo ideis injucundis commoto, & repentino corporis æstuantis refrigerio nascantur, sensumque frigoris intercutanei ac pallorem externum habeant comitem; credibile est spasmos subesse cutaneos, qui vasculis constrictis, repulsis intrò humoribus, inæquabilem & circuitum & calorem nativum efficiant.

751. Est &, ubi muscoli, rectè quidem ad voluntatis nutum in actum concitati, injustâ dein agilitate atque impetu non reprimendo motus suos accelerant, mentemque invitam præcurrunt. Vitium loquelæ musculis frequens, nec his solis tamen proprium: vidi enim, qui currere, non gradi, poterat. Habet ista volubilitas aliquid spasmodici, hujusque adeò loci est. An etiam in spontaneis moribus obtinet? Credas, quum ingesta, celerissimo per intestinorum volu

mīna trajectu , ano exturbantur , motum peristalticum ita affligi.

Paralysis.

752. PARALYSIS , Paresis , resolutio ; ~~extinctam~~ ponit facultatem motricem , flaccidam ideò fibrarum motricium inertiam , partiumque indè , quas movere debent , immobilitatem. Affectio spasmō (743) opposita , æquè tamen latè patens , singula quæque motus instrumenta (741) , musculos , fibras , cū spontè , tū ad arbitrium agentes infestat. Exquisita dicitur , si sensus una cum motu deest ; si superest , imperfecta ; ἀτονία , si fibras viscerum vasorumque enervat.

753. Debetur multiplici vitio 1. Cerebri , cerebelli , medullæ oblongatæ , spinalis , nervorumque indè porrectorum in truncis , gangliis , ramulis suis ; quo fit , ut vis nervea torpeat , deficiat , aut sublato istarum partium cum fibris motricibus commercio intercipiatur : 2. Systematis circulationis , quo influxus humorum vitalium in organa motus imminuitur , sufflaminatur : 3. Villorum deniquè muscularium labi propriæ , distractione , pressione , diuturnâ quiete , intensiore actione , relaxatione , siccatione , texturæ alienatione inductæ , quâ ad motum inhabiles redduntur. Horum singula seorsim , aut plura simul , sive ipsam extinguant

virtutem motricem (741), sive conditiones saltem tollant, sine quibus illa in motus consentaneos excitari nequeat; utroque modo paralyfin fieri necesse est.

754. Quocirca haud difficile est istam motus impotentiam ab aliis morbosæ immobilitatis speciebus distinguere. Lique etiam sedem ejus valdè diversam esse, proque hujus diversitate paralyfin dividi in universalem & particularem, idiopathicam & sympathicam. Nec obscura est ratio innumerarum nozarum, quæ ex defectu motus in omne genus functionum promanant.

755. Levior paralyfis gradus est debilitas virtutis motricis, quâ fit, ut motus musculares non nisi ægrè ac languidè exerceri queant. Hæc etsi ad animales motus potissimum referatur, haud minùs tamen vitales quoque & naturales afficit, eademque tum differentias, tum causas, ac paralyfis (753, 754), agnoscit. Humorum inopia, copia nimia, crasis vitiata, circulationis torpor, vis nervea oppressa, exhausta, solida effœta hic maximè spectanda.

756. Hinc intelligitur, quæ toties morbos prænunciat, lassitudo spontanea, hujusque species veteribus memoratæ, tensiva, ulcerosa, inflammatoria.

757. Tremor quoque, qui, cum movere artus conamur, accidit, ad imbecillitatem facultatis motricis (755) perti-

net. Palpitatio autem, quâ quiescentes etiam partes concutiuntur, vitiis spasmodicis (743) annumeranda.

Somni affectiones.

758. PER VIGILIUM, ἀγρυπνία, cum morbi symptoma est, non minus ægris, quam ultronea pervigilatio sanis (550 ad 552), nocet. Nascitur autem, quoties ex turbis interioribus tanta fit emporii animalis agitatio, ut nec relaxari organa sensuum motuumque voluntariorum possint, nec vis nervea feriari, neque adeo mens a mutuo cum corpore commercio sese subtrahere. Dolor proinde (670), (679), anxietas (682), delirium (732), febris, inflammatio, suppuratio, circulatio intensior, raptus humorum versum superiora, æstus ingens, morbike hinc, in quibus istorum aliqua insunt, præcipuè sicubi & irritabilitas (190) accesserit, vigilias inferunt.

759. Immodicæ dormitionis in morbis multifariæ occurrunt species, duratione, gradu, aliorum symptomatum comitatu, hinc nominibus etiam, inter se discrepantes. Causæ generatim reduci queunt, 1. ad languentes sentiendi movendique vires: quo faciunt animi corporisve ex quacunque causâ defatigatio; evacuatio enormis; solidorum debilitas (157); torpor (196); circulationis tarditas (410);

humores præ abundantia aquæ (287), glutinis (283, 373), crassamenti (284), pinguedinis (394), vappidi, effœti; frigus intensum (427, 5), &c.; 2 ad easdem vires oppressas, hinc agere impeditas, ob plethoram multiplicem (387 ad 392), obesitatem (394), nimium sanguinis ad caput impetum (411), reditum haud satis expeditum, vasorum encephali infarctum, inflammationes, erysipelas, evacuationes suppressas, metastases materiæ morbosæ ad superiora. An & hujus loci est, quem spiritus fermentati (469) inducunt, ususque narcoticorum, sopor? 3 ad ea, quæ liberum emporii animalis cum organis sensuum motuumque voluntariorum commercium suspendunt: cujusmodi innumera habentur, commotione, compressione, inundatione, destructione encephali nocentia; uti sunt vehemens capitis percussio, cranii depressio, fractura, exostosis, abscessus, tumores varii intus nati, cerebro imminentes, humores effusi, restagnantes, hydrocephalus; quin & quæ vires opprimendo agunt, mox num. 2 memorata. 4. Forfan & mens, mutui pertæsa influxus, officinæ suæ motus quandoquæ suppressit, & in se ipsam veluti contracta, animalibus organis relaxatis, lubens ab opere feriat. Somnos Endymioneos, diurni mœroris ut plurimum pedisequos, hâc ferè origine natos dixeris.

760. Prout igitur horum (759) singula seorsim, aut plura simul, varioque gradu, in homine insunt, ita vel somnolentiam tantum, vel leves gravioresve somnos inferunt; modò actione suâ systematis animalis limites haud excedant, nec adeò vitam unà opprimant.

761. *Κῶμα ἀγρυπνίον*, luctans somni ac vigiliarum alternatio, quæ nec dormire, nec rectè vigilare sinit, hinc intelligitur: ponit enim causas somni (759) urgentes quidem, at pleno effectu agere impeditas ob pervigilii causas (758) mox succedentes. Nascitur ergò in morbis, ubi dolor, anxietas, delirium, insomnia terrifica, aut quævis alia sensorii communis agitatio intensior, insuperabili in somnum propensione superveniunt.

762. Nec multum dissimilis est somni & vigiliarum permixtio, cui somnia, pavores in somno, somnambulatio debentur. Etenim oriuntur hæc, cum causæ vigiliarum (758) in dormientibus subnascens somni statum haud planè quidem tollunt, sed plus, minus tamen interturbant; ut ideò partem aliquam officinæ sensuum internorum inquietas habeat, quæ & in systema motuum voluntariorum sese nonnunquam effundat. Qui igitur considerat mechanicum illud, quo exoriri ideæ, resuscitari, aliæque aliis sociari, in vigilantibus solent, ei haud difficile est eruere, quam multiplices in ægris

enasci queant somniandi occasiones ; quando vel sanis etiam adeò frequentes accidunt : quin & perspicere possibilem somniorum numerum varietatemque & confusionem infinitam ; etsi mutationis corpore , quæ illorum cuivis respondet , singularem naturam sedemve propriam ne conjectando quidem determinare liceat.

Symptomata motuum vitalium.

763. COMMUNE veluti centrum , in quod vitales motus tendunt conspirantque , humorum circuitus est , princeps œconomiae animalis functio. Quocirca & , quæ motibus illis accidunt vitia , in systemate circulatorio huiusque primariis instrumentis , suis sese effectibus potissimum manifestant , & proinde ad laesas cordis , arteriarum , pulmonumque actiones referri possunt.

Respirationis Symptomata.

764. MENTIS imperio quidem paret respiratio , ut varia , quæ voluntate regantur , obire munia queat : nihilominus tamen & actionibus vitalibus rectè annumeratur ; quum & spontanea sit , & vitae conservandae absolutè necessaria. Plurimarum itaque ejus vitiositatum præcipuè hoc loco exponi merentur ; ut quæ frequentes

admodum sint, atque ob præstantiam signorum, quæ in morbis præbent, intellectu utilissimæ.

765. Pro multitudine conditionum, quæ ad liberam respirationem requiruntur, noxæ quibus impeditur, perquam numerosæ sunt, naturæque ac sede valdè differentes. Aër calore (424, 9), frigore (427, 5, 8), humiditate (430, 5, 5), gravitate (434), levitate (435, 437), stagnatione (438, 439), inquinamenti (440, 442, 496, 497) peccans; narium, oris, faucium, laryngis, tracheæ, bronchiorum, partium, quas aër permeare debet, morbi angustia (209) multivarii, obstructio, obstitio, compressio, spasmus, coalitus; pulmones ipsi inflammatione, erysipelate, pustulis, vomica, ulcere, tuberculis, sanguine congesto, pituita, sero, materie terreâ, polyposâ, podagrica, rheumaticâ, atrabilariâ, aut quavis aliâ morbosâ, in apparatu suo vasculoso, aut parenchymate obsessi, impervii; aër, sanguis, serum, pus, tumores varii, cavitatem thoracis occupantes, ut pulmo liberè explicari nequeat; mala item conformatio, thoracis vertebrarum, costarum, luxatio, fractura, anchylosis; tum & musculorum respirationi intervenientium debilitas, paralyxis, spasmus, aut præ dolore, inflammatione, ecchymomate, emphysemate, vulnere, contusione, impedita actio; musculorum quo-

que abdominalium vitia similia ; obacula denique ex abdomine nascentia , quæ diaphragmatis motum supprimunt , illudve fursùm urgent , ascites , tympanites ; ventriculus , intestina , cibo , potu , flatu , scybalis &c. ultra modum distenta , uterus & , quæ ad eum pertinent partes , foetu , aëre , fero , aut quavis materie alienâ turgentes , tumores viscerum inflammatorii , purulenti , scirrhusi , cancrofi , steatomatosi , &c. Undè liquet , vix aliud symptoma dari , quod tot & tam diversi generis affectionibus sese socium adjungat.

766. In tantâ verò causarum varietate haud mirum est plures etiam difficilis spiritûs species gradusque animadverti : uti sunt *δυσπνοία* , *ἄσθμα* , *ὀρθοπνοία* , respiratio anhelosa , strepens , stertens , sublimis , strangulatio , &c. Quarum quidem ratio atque origo ex dictis (96g) facile eruitur ; maximè si quis perpendat , ex impeditâ actione , vitæ tam necessariâ , anxietatem (687) nasci , quæ naturam urgeat , ut quovis virium suarum adjumento utatur , intensisque adeò ac multiplicatis motibus vitæ periclitanti succurrat.

767. *Ἀπννοία* , suffocatio , respiratio verè vel quasi abolita , causis nascitur iisdem (765) , sed vehementiâ aut duratione majoribus. Indè , aut incrementem dyspnoeam seriùs ocyùs sequitur ; aut su-

bitò invadens, nomine catarrhi suffocantis, mortem minatur, vel infert. Comitatur alias circuitûs vitalis defectionem, hinc gravioribus animi deliquiis, ut symptoma symptomatis supervenit: alias primariò suis ex causis oritur, tumque, ob interceptum sanguinis per pulmones trajectum, inhibita circulatione, vitam unà supprimit. Immania aëris vitia, summa nervorum mala, paralytica, spasmodica, in organis respiratoriis, subita pulmonum oppletio à sanguine, pure, colluvie catarrhosâ, eò præprimis faciunt.

768. Tussis, depravatæ respirationis symptoma, est violenta, convulsiva, reciproca, sonora, aëris inspirati per os elisio. Ponit ergò motus convulsivos musculorum, qui expirationem faciunt, simulque glottidem utcunque contractam; quibus fit, ut aër pulmonicus cum impetu & sono de larynge elidatur, neque plenæ inspirationi locus detur. Rectè autem motus medicatus (640) censetur, quo natura, quod systemati pulmonum aërifero, seu mole, seu acritate incommodat, vehementi spiritûs excussione everrere conatur. Hinc & voluntate cieri potest.

769. Irritamenta adeò tussis sunt, quæcunque pulmoni, bronchiis, asperæ arteriæ, laryngi, molestiam creant, actione quavis mechanicâ, physicâ, chemicâ:

aër vitiosus; ingesta calore, frigore, acritudine, asperitate nocentia; aliena in laryngem recepta (604); materiæ acris in eum, aut vicinas fauces destillatio; muci has partes lubricantis abundantia, crassities, corruptio; sanguis, serum, pus; ichor hic collecta; siccitas, inflammatio, erysipelas, aphthæ, exanthemata, exulceratio, tùm pleraque vitia organorum spiritalium suprâ (765) enumerata, quæ etsi nihil, quod scretu ejici possit habent, solâ quam inferunt spirandi difficultate naturam ad tussendum sollicitant: quo si obstaculum vincere nequeat, moliatur tamen, saltem trajectum sanguinis expediat. Procliviores autem sunt, quibus interior fistulæ pulmonalis membrana ob muci defectum, siccitatem, tensionem, aliasve causas, justo sensilior est.

770. Consensione etiam tussis oritur, cum partium aliarum labes aut stimulo, aut translatâ materie morbosâ, systema respirationis afficit. Undè frequens est in variis primarum viarum, ventriculi imprimis, hepatis, splenis, pancreatis, testium, parotidum, dentium, aurium, cerebri, nervorum, cutis, &c. affectibus.

771. Quocirca liquet, quænam tussis dicatur humida, sicca, convulsiva, idiopathica, sympathica, ferina, catarrhalis, stomachica, &c. Nec latet origo in-

numerarum noxarum, quas vehementior, aut diutius protracta inducit : etenim validis crebrisque pulmonum, viscerum abdominalium, ac universi corporis, concussibus, interruptâ inspiratione, commoto sanguine, impedito ejusdem per pulmones transitu, æquabili, musculis respiratoriis perpetuò irritatis, inordinatè agitatis, oportet nasci defatigationem, coctionem alimenti vitiatam, vomitum, hernias, abortum, congestionem humorum in capite, vasculorum pulmonalium debilitatem, sanguinis eruptiones, convulsiones universales, suffocationem, & quæ ex his sequuntur, mala infinita.

772. Sternutatio quoque huc referenda est, haud absimilis convulsi motûs species, quæ aërem, magnâ prius copiâ inspiratum, unico expirationis fortissimæ, sonoræ impetu, per narium orisque meatus expellit. Spiritus ita, vehementer illis membranæ has cavitates succingenti, superficiem hujus verrit, absterget, expresso humore irrigat, proluitque, ut, quæ molesta sunt, amoveantur, expurgentur. Salutaris igitur conatus irritamenti narium, faucium, oculorum, supervenit, multisque adeò istarum partium morbis. Nascitur &, spasmodum more (744), ex causis magis universalibus, aut quarum a naribus remotior sedes est, præsertim in hominibus irritabilioris naturæ (190, 745). Nec ubique tamen utilis, cum
amoiri

amoliri stimulum nequit, inani concussu fatigans, haud minùs, quàm tussis (771), vehementer nocet.

773. Risus quum convulsio sit musculorum respiratoriorum, quæ spiritum cohibitum citissimis, minimis, reciprocis concussibus, veluti tremulis, in systemate aëriifero agitat, protractâque adeò exspiratione inspirationem plenam suspendit, inter symptomata æquè, ac inter potentias nocentes (521), locum meretur. Accidit enim & invitâ mente, ex stimulis corporeis, qui diaphragma, & cum hoc conspirantes abdominis musculos, ceteraque respirationis organa, & musculos faciei, proximè, vel per consensum commovent. Undè primariò quidem diaphragmatis, tum & ventriculi, splenis, uteri, affectiones, & qui sensorium commune turbant, febriles aliosque motus quandoquè comitatur, hypocondriacis, hysteriis, maniacis, phreniticis, &c. familiare malum. Intelligitur hinc affinis risui fletus morbosus, cujus frequens est cum illo commutatio.

774. Suspirium, adjumento musculorum voluntariorum, profundissimè ad imum usque pectus pertrahit spiritum, solitoque fortius sursum expellit. Ita magno longoque respirationis tractu natura vitale aëris beneficium adauget, æstui suffocanti refrigerium, circuitui pulmonali incitamentum, spirandi difficultati

remedium , anxietati levamen quærit. Causæ hinc sunt , quæcunque angorem inducunt (682 ad 691).

775. Oscitatio sat similis suspirio est (774) inspiratio , vehementior tamen , & intensiore gradu plerumquè iterata , nec nisi per patentissimum oris meatum aëra trahens , junctamque ideò habet violentam illorum muscutorum contractionem , qui maxillas , rictum oris , labia , diducendo , isthmum faucium glottidemque dilatando , amplissimum simul proximumque externo aëri introitum parare queant. Auxiliare igitur symptoma (98, 101), solius naturæ actio , suspirio etiam beneficentior , uti torpentibus , ceterum sanis , salutari fine accidit , ita ægris quoque , quorum vires ob nervei systematis vitia , aut inertiam circuitus vitalis , elanguescunt ; frequens propterea in febrium insultibus , affectionibus hysteris , hypochondriacis , soporosis , chronicis.

776. Comes huic (775) sæpissimè Pandiculatio , quæ spiritu diutissimè cohibito , nixuque per totum systema muscutorum voluntariorum diffuso , artus corporis omnes vehementer distendit , ejusdem generis est , torporis non sequela modò , sed naturale etiam remedium.

Symptomata motûs Cordis.

777. PALPITATIO cordis ponit convulsivas ejus contractiones, quæ vehementi ad partes vicinas illisu naturalem longè superant. Spasmodicæ igitur affectionis naturam habet, & ex (743 & seq.) intelligitur. In summo autem vis vitalis, quæ cordi præ ceteris indita est, gradu (175) occasiones hujus vitii quam plurimæ sunt. Magnæ nervosi generis turbæ in hystericis, hypochondriacis, irritabilibus; turbæ item in systemate circulationis, sive primariò, seu ex prioribus, aut aliundè natæ, ad cor usque deductæ; fortiora quælibet cordis irritamenta, aut & impedimenta, quæ legitimæ sanguinis admissioni, vel expulsionì magnoperè resistunt. Nascitur ideò ex violentis animi pathematibus, subito terrore, venere immodicâ, nimîâ corporis mentisve exercitatione, spasmis aliarum partium, doloribus, anxietate, motibus febrilibus, humorum abundantîâ, inopiâ, lentore, acritate variâ, materie scorbuticâ, atrabiliariâ, arthriticâ, scabiosâ, ulcerosâ, cancrôsâ, virulentâ, suppressis quibuscunque excretionibus; tum & à multiplici respirationis difficultate (765), quâ sanguis ægrè per pulmones trajicitur; à variâ quoque labe viscerum abdominalium, ventriculi præprimis, crudis, acribus,

corruptis, aëre, vermibus, heterogeneis, obstructione, inflammatione, ulcere, compressione, distensione, irritatione, malè habentium; denique & ab ipso corde, auriculis, vasis ejus majoribus, pericardio, inflammatione, ulcere, aneurismate, polypo, vermibus, pilis, calculo, hydrope, ecchymosi, excrescentiâ, texturæ degeneratione ossêâ, cartilagineâ, angustatione quavis, præter naturam affectis. Liquet autem facilè, pleraque istorum etiam pluribus modis eò conferre, atque alia aliis frequenter sese adjungere, neque pauca esse, quæ, suo quidem jure inter causas hujus symptomatis relata, sæpiusculè tamen ejusdem potius sequelæ sint, suâque dein accessione in causas veluti post natas mutantur. Denique & scire juvat, malum, per intervalla recurrens, iis potissimum ingravescere, quæ impetu majore sanguinem versùs cor adigunt.

778. Cordis tremor, sive levior fuerit palpitationis gradus, seu virium imbecillitati debeatur, ex antè dictis (757, 777) cognoscitur. Reliquæ porrò motionum cordis anomalix quùm sese magis in pulsu arteriarum manifestent, aptius ad istum titulum relegantur.

Symptomata Pulsûs Arteriarum,

779. PULSUS oritur, sicubi sanguis;

vī cordis in arterias actus, harum parietes extrorsum urget, distendit. Ut verò appositè ad sanitatis leges fiat, requiritur cor efficax, legitima sanguinis copia & fluor, arteria contractilis, expansilis, via circulationis libera. In horum igitur vitiositatibus quærenda erit ratio alienationum, quæ pulsui in ægris accidunt. Hæc tamen cum valdè multiplices sint, & subtiliùs etiam, quam utiliùs, à Veteribus interstinctæ, omissis, quæ exigui sunt momenti, aut intellectu faciles, præcipuas modò exponemus.

780. Crebrior pulsus, pro ætate, sexu, temperie, varioque rerum non naturalium usu æstimandus, si in universum obtinet, frequentiores ponit cordis contractionem, hujusque adeò causas debetur. Huc referantur quæcunque cordis irritamenta; sive ejusmodi fuerint, quæ venosi sanguinis affluxum augeant, seu quæ acritate stimulent, aut quovis modo cordis actioni obnitantur. Quæ quidem omnia tantò valentiora sunt, ubi cor ipsum quoque præter modum irritabile est. Magna insuper ejusdem cum toto corpore consensio facit, ut turbulentæ etiam aliarum partium, in genere potissimum nervoso, agitationes facile eò deferantur. Hinc pleraque, quibus cor ad palpitandum cietur (777), hic pariter locum habent, innumerisque ideò morbos, maximè tamen omne febrium

genus, comitatur pulsûs frequentia, sæpè salutaris, activis certè symptomatibus (101) annumeranda. An autem & ropica datur in singulari systematis arteriosi parte? Dabitur, si vera febris particularis; neque tùm a corde incitato tantùm repetenda. Rarioris pulsûs natura ex his facilè perspicitur.

781. Arteria, ictu majore, quàm dilatione micans, durum pulsare dicitur. Id fit, cum sanguis validâ quidem & citatiore cordis contractione impingitur, nec pro ratione tamen expandere canalem potest. Subest itaque aut vitium in tunicis arteriæ, ob siccitatem, rigiditatem, spasmus, minùs obsequiosis; aut morbos cavitatis ultra modum distentæ a sanguine copioso, rarefacto, spisso, vel ob impeditum transfluxum accumulato. Undè liquet, cur pulsus durus adeò frequens in morbis inflammatoriis? Nec latet ratio pulsûs mollis.

782. Pulsas intermittit vitio multiplici, graviore, leviori, universali, particulari. Etenim cordis contractio, in modum spasmû (748), diutiùs continuata; ejusdem torpor (196, 755), aut contractio inefficax, minore tùm vi, tùm copiâ, sanguinem in arterias projiciens; influxus sanguinis venosi in cor parcior, inordinatus, vel nullus; arteriosi fluxus inæqualis, impeditior, interruptus; arteriarum varia labes, receptioni, trajectui sangui-

nis, motui tunicarum systolico & diastolico resistens, huc faciunt. His autem producendis innumera apta sunt: cordis partiumque eò pertinentium affectiones topicæ, inflammatio, aneurisma, polypus, calculus, vermes, concretio, induratio, hydrops, &c. (777); arteriarum similia vitia; magna respirationis impedimenta (765); sanguinis abundantia, inopia, cacochymia viscida, acris, varia; primarum viarum turbæ in vomitu, cholera, alvi profluviiis, vermibus, spasms, doloribus, &c; denique & nervosi generis mala in viscera vitalia ac systema circulationis diffusa, virtute vitali, aut torpente (196), aut nimis irritabili (190).

783. Imminuti & deleti pulsus varii memorantur gradus, pro consecutionum quas infert numero ac intensitate diversis. *Ἐκλειψις* dicitur defectus levior, pallorem inducens, calore tamen, sensu motuque superstitie. *Λειποδυμία* cum pallori & motus animalis impotentia accedit. *Λειποφυχία* prioribus auctis etiam superaddit caloris nativi extinctionem. *Συγκοπή* unà cum motu sensuque ferè abolitis, frigus universale, sudoremque frigidum inducit. *Ἀσφυξία* denique, deletis omnibus vitæ indiciis, accedente etiam *ἀπνῶια* (767), mortis imaginem ita refert, ut meritò nonnunquam dubitetur, vitamne, an mortem prædicare fas sit. Quum verò universalis, qui comitatur, virium lap-

fus doceat, vitalem sanguinis circuitum pariter cum pulsu deficere; liquet hæc vitia cordis deliquio deberi, iisque adeò causis nasci, quæ hoc inducere valeant. Hujusmodi sunt vehementes animi affectus, idea rei horridæ, odor infectus, in hysteriis, hypochondriacis, gravidis, puerperis, inedia, pervigilio, labore, morbo gravi exhaustis, irritabilibus; æris insalubritas varia, miasmata, venena, medicamenta drastica, vermes, alimenta pravi succi, cacochymia putrida, scorbutica, atrabilaria, &c. materies morbofa partes vitales, nervos graviter afficiens; inde & sævus dolor, anxietas, æstus ingens, spasmi; tum magna, subita inanitio, nimia liquidi vitalis a corde & encephalo derivatio, parciore, aut interceptus ad has partes affluxus, per eas transfluxus; adeoque encephali, cordis, pulmonum, multifariæ affectiones, memoratis (782) similes. His quippè potentiis aut sanguinis venosi in cordis cava influxus suspenditur, aut ipsa cordis virtus muscularis enervatur. Utraque autem noxa cor quiescere, hinc circulationem deficere oportet. Nec dispar ratio esse videtur animi defectuum, quos pro arbitrio sibimet consciscere qui possint, memorantur; tametsi, quamam voluntatis contentione id assequantur, non liquet.

784. Quodsi arteria singularis pulsare

desierit, mali minus periculosi ratio ex (779, 782, 783) facile invenitur: uti & ceterarum pulsus alienationum, quæ vel in singulis seorsim, vel in plurium consequentium serie, reapse observantur; quales sunt magnus, parvus, validus, debilis, variâ ratione inæqualis, undosus, vermicularis, formicans, ferratus, dicrotus, caprizans, vacillans, myurus, intercicens, &c. Generatim quidem notari meretur, vix aliam dari potentiam, quæ in perturbando pulsu plus valeat, quam spasmos (742), magnamque ideò partem id genus vitiositatum ab his repetendam esse. Specialior tamen hujus materiæ expositio, cum ad Semioticam Pathologicam (16. II.) pertineat, nostri non est instituti.

Symptomata actionum naturalium.

785. SYSTEMA naturale, humani corporis conservationi dicatum, etsi vitalis animalique minùs nobile habeatur, utilitate tamen & necessitudine haud inferius est; quandò vix aut perparùm est, quod non durabile est. Multitudine autem ac diversitate cum organorum, tum effectuum, quos edit, etiam sociis suis ferme antecellit. Ingens ergò numerus læsionum, quæ hic fieri possunt, ordinatam exigit pertractationem.

Appetitum naturalium lésiones.

786. Ut nutrimenti materies, cum opus est, a foris intromittatur, suos quoque ista officina nacta est sensus (669), qui de penuriâ moneant hominem, compellantque ad victum procurandum. Indè fames & sitis naturalis, hæc potum, illa cibum, materiem firmis perindè, atque humoribus, necessariam, desiderans. Utrisque suus est in sanitate modus, sua in ægrotis vitia.

787. Edendi cupiditas, valdè diversa in sanis, multifariam quoque per morbos laborat. Augetur enim præter modum in bulimo, fame caninâ, lupinâ: imminuitur, aut planè aboletur in δυσφορέζια, ἀνορηξία, ἀποσιτία: depravatur in κίττα, picâ, malaciâ.

788. Fames aucta vel vacuitati debetur, quæ repletionem, vel acriori stimulo, qui mitigationem ab ingesto alimento exspectat. Quamobrem inedia, motu animali, immodicâ perspiratione, sudore, alvi profluvio, aliis excretionibus, lactatione, morbis exhaustos, vermibus obnoxios, aut quibus acre acidum, salinum, biliosum, atrabilarium, in ventriculo est, vexat; accedente præsertim animi impotentiâ, imaginatione mobili, sensibilitate nimia, irritabilitate, in junioribus, feminis, hysterics, hypochond-

driacis, epilepticis. Bulimus dicitur, cum esuriem non satiatam animi deliquium sequitur: fames canina, ubi voraciùs ingesta citò revomuntur: si verò celeriter ano rursùs expelluntur, nonnulli lupinam vocant.

789. Appetitus vario gradu proster-
nitur vitio ventriculi, pituitâ, saburrâ,
terreis, alienis, corruptis, onerati, in-
flammati, ulcerosi, scirrholi, callosi,
aphthosi, atoniâ (752), moribus inordi-
natis (743), vel ob propriam affectio-
nem, vel per consentionem laborantis,
menstruorum item primæ digestionis,
salivæ, bilis, defectu, inertîâ aquosâ,
mucosâ, degeneratione variâ; labe quo-
que corporis nimio plus repleti humori-
bus bonis, pravis, ob vitam desidem,
somnialem, circuitum languentem,
evacuationes suppressas; turbis nervei
systematis patheticis, spasmodicis, deli-
riosiis, dolorosis, soporosis, &c. sensum
naturalem obtundentibus; naturâ deni-
que graviore malo, acuto, chronico, im-
peditâ, oppressâ, exhaustâ, ut curam
suscipiendæ coctionis abjiciat. Prout igitur
innumerorum morborum comes hoc
symptoma est; ita liquet alias propter
coctionis impedimenta nasci, alias ex eo,
quod corpus non indigeat alimento, alias
ob suppressam stimuli naturalis percep-
tionem: quæ quidem ritè perpensa osten-
dunt, ab inediâ, anorexiâ pedissequâ,

non continuè tot tantasque noxas ægris perindè, ac sanis famelicis (452, 453), timendas esse.

790. Fastidium cibi, ἀποσιτία, easdem (789), sed graviores agnoscit causas. Putror, rancor, ventriculum inquinans; hujus nimia sensilitas, irritabilitas, imbecillitas, dolori, anxietati, spasmo, nausæ, vomitioni, ab ingestis obnoxia; tum & phantasæ errores, hic maximè spectentur. Cibi singularis averfatio, ex morbo nata, plerumquè naturæ vox (643) est, cui obtemperandum.

791. Malaciæ, quæ cum fastidio aliorum ciborum junctam ponit appetentiam vix superabilem ac voracitatem ad certum edulii genus determinatam; & Picæ, quæ absurda quoque, inusitata, nec esui apta, quin horribilia, concupiscit ac avidè devorat, haud absimile est ingenium. Tametsi enim & vitium imaginationis subesse possit; sæpissimè tamen, quæ appetuntur, pro remedio sunt, quo aut corrigatur quod intus est noxium, aut turbis ex intemperantiâ concitatis ejiciatur, aut succi alibilis inopiâ plus satis onerosæ humorum copię, ne vero alimento magis augetur, occurratur.

792. Sitis, quam indicandæ potus necessitati præfecit natura, in morbis solito plus urget, quoties aut tractus superior primarum viarum, istius sensationis sedes, aut cum hoc etiam corpus reli-

quum, humectatione indiget, quâ vel deficiens humor suppleatur, vel spissior diluatur, vel acrior temperetur, hinc firmis partibus mollitudo, canalibus meabilitas, transfluxuris libertas restituatur. Indè immodica humorum dissipatio, evacuatio, spissitudo, lymphæ extra vias circulationis derivatio, collectio, minimorum vasculorum obstructio, spasmodica constrictio, compressio, acritas muriatica, ammoniacalis, alcalina, spirituosâ, aromatica, putrida, biliosa, rancida, adusta, virulenta, in febribus, alvi profluviiis, diabete, &c. morbis inflammatoriis, purulentis, putridis, biliosis, catharrhosis, exanthematicis, spasmodicis, venenatis, hydrope, scorbuto, rachitide, multisque aliis, sitim creant; quæ tamen utrum ad suum modò sensorium, an verò ad universum corpus pertineat, probè distinguendum.

793. Carentia igitur sitis in morbis, naturâ suâ siticulosis, etiam morbosa est, ponitque sitis officinam (792) tussi, aut ptyalismo, jugiter humectari, aut resolutis nervis sensu privari, aut mentem alienatam esse.

Actiões læsæ primarum viarum.

794. MANDUCATIONIS uti plurima sunt cùm instrumenta, tùm potentiæ ac conditiones, sine quibus rectè perfici ne-

quit ; ita multis diversisque multarum partium vitiis diversimodè læditur. Hujus generis sunt oris , labiorum , buccarum , linguæ , vulnus , inflammatio , ulcus , excoriatio , tumor , ἀγκυλόγυσσον (223) , mutilatio , &c. ; dentium defectus , infirmitas , dolor ; mandibularum fractura , luxatio , caries , ἀγκύλωσις ; musculorum istas partes moventium spasmus , paralyxis , dolor , &c. ; salivæ denique defectus.

795. Deglutitionis etiam plures sunt læsiones. Aut enim iteratis crebrò nixibus incassum fatigat , aut dolet & laboriosa est , aut potionem duntaxat , non item offas , aut has modò , nec illam transmittit ; caduntve in asperam arteriam deglutienda , aut per os naresve redeunt. Multiformis vitii sedes quærenda in linguâ , palato , tonsillis , uvulâ , pharynge , larynge , œsophago , ventriculo , maxillis , vertebis vicinis , musculis harum partium , dolore , vulnere , inflammatione , excoriatione , ulcere , tumore , luxatione , fracturâ , carie , malâ conformatione , spasmo , paralyxi , angustatione variâ (209) , siccitate affectis. Indè enim aut inanem deglutiendi cupiditatem nasci , aut impediri materiæ deglutiendæ meatum , aut legitimam potentiarum motricium actionem , directionem , deficere necessum est.

796. Singultienti videtur momentaneâ

convulsione concuti stomachus & proximum huic diaphragma, cui juncta simul glottidis constrictio faciat, ut subito inspiratus aer sonum cieat. Singultus igitur, spasmis annumerandus, easdem quoque agnoscit causas (743 & seq.) ; sed quæ œsophagum, ventriculum, aut diaphragma, propius, seu aliundè per consensionem afficiant : uti sunt avida ingurgitatio offæ siccioris, asperæ, haustusve grandioris, acris ; immodica ventriculi repletio, aut irritatio ab acri cibo, potu, medicamento, veneno, vermibus, peregrinis, materie corruptâ, acidâ, biliosâ, putridâ, rancidâ, contagiosâ, arthriticâ, catharrosâ, ulcerosâ, cancrosâ, sphacelosâ, ibidem natâ, aut ex aliis partibus eò delatâ ; susceptum ad *καρδίαν* frigus ; œsophagi, ventriculi, vulnus, inflammatio, erysipelas, exanthemata, ulcus, excoarctatio, &c. diaphragmatis inflammatio, vulnus, contusio, intensior per risum fletumve agitatio, costarum inferiorum, vertebrarum vicinarum, cartilaginis ensiformis fractura, luxatio, distorsio ; intestinorum quoque, mesenterii, hepatis, splenis, pancreatis, uteri, &c. affectus inflammatorii, dolorosi, spasmodici ; turbæ deniquè vehementes nervosi generis ob animi pathemata, evacuationes quascunque nimias, encephali læsiones, motus febriles, molimina critica, &c. Quocirca patet, alias materiem subesse,

quam natura symptomate auxiliari excutere conetur; alias nocivis motibus salubre nihil intendi. Quando autem juncta cum stomachi, tum septi transversi convulsio hic datur, an non & levior habetur species, quæ ad alterutram modò partem pertineat?

797. Vomitus est eorum, quæ cavo ventriculi continentur, aut ex vicinis visceribus illuc congeruntur, violenta & fastidiosa per guttur superius expulsio. Hanc efficiunt motus spasmodici faucium, œsophagi, ventriculi, intestinorum, diaphragmatis, muscutorum abdominalium, in molimen laboris angorisque plenum modo mirabili conspirantes. Facit autem eximia ventriculi mobilitas (175), amplissimusque cum corpore universo consensus, ut irritamenta ad vomitum penè innumera sint, aliaque domestica huic visceri, alia extranea. Ad priora referre licet, quæcunque mole, pondere, tenacitate, acrimoniâ, impedito per pylorum trajectu, fibras ventriculi lacerant: tum &, quæ irritabilitatem (190) inducunt; vitia ejusdem topica. Posterioris generis sunt affectiones partium quoquo modo consentientium, tam vicinarum, quam remotiorum, faucium, œsophagi, diaphragmatis, hepatis, vesiculæ fellis, splenis, mesenterii, pancreatis, intestinorum, omenti, peritonæi, renum, ureterum, vesicæ urinariæ, uteri, encephali.

phali, sensorii communis, nervorum. Præcipua igitur inter causas singultus (796) modo enumerata sunt, vomitusque iidem datur idiopathicus, sympathicus cum materie, & sine eâ. Quùm verò intensitatis gradu inter se discrepent vomitiones, credibile quoque est, non omnium, quas suprà diximus, partium nixus spasmodicos semper illuc requiri, licetque adeò dissentientium super hâc re auctorum componi posse. Nausea, quæ fastidiosa est ventriculi commotio, vomitum intentans, iisdem, sed lenioribus causis debetur: uti & materiæ ventriculo contentæ eructatio.

798. Aër, aut huic similis spiritus elasticus, cavo primarum viarum oberrans, ructibus flatibusque, qui hanc officinam maximè infestant, materiem dat, quæ huic aut a foris invehitur, aut intus ex ingestis, indigenisve, effervescentiâ, fermentatione, putredine, calore, motu inordinato evolvitur. Hæc ubi collapsu, convolutione, compressione, spasmodicâ præsertim constrictione gulæ, stomachi, pylori, intestinorum, coercita aliquandiù, novis interim copiis fortè aucta, aut in majus volumen dilatata, parietes claustris sui urgens, ab his vicissim repressa, tandem liberata, imperum concipit, datoque exitu sursùm, deorsùm prorumpit, aut loco saltem mota, per tubum alimentarem vagatur.

ructus, flatus, crepitus, borborygmi, nascuntur. Augere propulsionem voluntarii diaphragmatis & musculorum abdominalium nixus quoque possunt. Indè uti pro vario impetu muta, aut sonora fit explosio; ita, quod prodit, flatulentum pro diversitate materie, quam unà rapit, aut fomitis undè oritur, siccum, humidum, acidum, putridum, rancidum, biliosum, &c. esse debet. Ingesta igitur cruda, flatulenta, ferventia, acria, titulo cibi, potûs, medicamenti, veneni, vitia coctionis, putror in primis viis undecunque natus, vermes, motus inordinati, spasmodici, horum viscerum, ex animi pathemate, affectione cardialgicâ, iliacâ, colicâ, hystericâ, hypochondriacâ, epilepticâ, alvi profluviiis, cholera, vomitu, hæmorrhagiis, vulneribus, febribus, &c. quin & impedimenta liberi trajectus ex obstructione, obstipatione, compressione, &c. huc faciunt, sive flatuosum elasticum subministrando, seu prohibendo, ne tranquillè ire, redire, exhalare, absorberive queat.

799. Alvus adstricta, etsi plerumquè robustam notat sanitatem, excessu tamen ægris sæpissimè molesta est, morbosque non minùs intendit, quàm creat (§§8). Causas habet aut insuperabilem materie resistantiam, aut impedimenta trajectûs, aut vitium in viribus motricibus. Nascitur ergò à fece sicciore, compactâ,

durâ, copiosâ, piceâ; muci lubricantis defectu, aut tenacitate; intestinis obstructione, obstipatione, compressione, spasmō, concretione, intus-susceptione (247), contorsione (256), imperviis, in motum retrogradum actis, nimîâ dilatione infirmatis, resolutis, perforatis, dissectis; bilis absentîâ, inertîâ; motûs animalis defectu; diaphragmatis & musculorum abdominalium actione languente, aut impedito nixu.

800. Ileus, volvulus, in quo pertinaciter occlusæ alvo violenta accedit vomitio quorumcunque tubi alimentaris contentorum, etiam scybalorum, clysmatum, suppositoriorum, ano immissorum, ex (797, 799) intelligitur. Ponit enim ferè obstaculum in canali intestinorum ab inflammatione, abscessu, scirrho, cancro, calculo, fece durâ, vermibus, herniâ, contorsione, susceptione, compressione, concretione, convulsione, natum, quo transitus devolvendæ materiæ intercipitur; simulque supervenientes motus spasmodicos illarum partium, quæ ad vomitum faciunt fursùm directos. Quin & hi soli, sine obstaculo, quandoquè causam faciunt.

801. Diarrhoea, ventris profluvium, est frequens & copiosa materiæ liquidæ per alvum excretio. Ingesta, magna succorum, qui secundum naturam in primas vias assiduè feruntur, copia, latè patens

ventris cum reliquo corpore commercium, quo fit, ut ex omni parte huc de-
 vehi multifarii humores queant, materi-
 riem exhibent, & abundantem, & diver-
 sissimam, undè tùm stupendæ profusionis
 ratio inveniri, tùm præcipuæ hujus sym-
 ptomatis differentiæ constitui possint.
 Data materiæ expulsionem facit motus
 intestinorum inordinatus & citatior, qui
 & obitat, ne ora meatuum bibula liquo-
 rem, ut decet, absorbeant. Irritabilitas
 ideò intestinorum præprimis huc con-
 fert, & quidquid hanc, aut mole disten-
 dente, aut acrimoniâ lædente, aut tur-
 bis aliundè invectis, laceßere potest:
 excedens cibi potusve copia; flatulenta,
 acria ingesta, aut intus nata; impetus
 humorum major in primas vias versus;
 aliarum excretionum, maximè cutaneæ,
 suppressio; absorptionis impedimenta ob
 vascula aphthis, pustulis, sordibus,
 spasmo occlusa, aut mesenterii ob-
 struções; bilis acrior, atra bilis, fe-
 rum hydropicum, materies febrilis, in-
 flammatoria, purulenta, ichorosa, pu-
 trida, cancrofa, catarrhalis, contagiosa,
 scorbutica, arthritica, undecunque huc
 delata; nervosi generis commotio ab ani-
 mi pathemate, frigore suscepto, denti-
 tione, puerperio, affectibus hystericeis,
 dolorosis, convulsivis, &c.

802. Dysenteria, intestinorum diffi-
 cultas, diarrhoea dicitur vehementi do-

lore ac torminibus molesta. Dejiciuntur liquida, acria, putrida, foetida, sanguis, pus, sanies, bilis, serum, mucus, atra bilis, modo cum stercore liquato, interdum & cum carunculis, membranis, &c. Subest igitur aut prius ex suis causis nata, aut acritudine permeantis materiae post inducta, intestinorum inflammatio, excoriatio, exulceratio. Fontem verò acrium haud minùs multiplicem esse, quam valdè diversam naturam, ex (801) facilè innotescit.

803. Tenesmus, qui frequens est & implacabilis desidendi cupiditas, nixu majore, quàm qui materiae excernendae moli respondeat, aliquid pituitae, cruoris, puris, saniei, bilis, stercoreis, &c. exprimens, dysenteriam saepè comitatur. Fit autem, cum ima intestini recti sedes, cui sensum urgentis fecis natura indidit, immodicè irritatur. Undè acria quævis, abstergentia, rodentia, tum quæ duritie suâ defricant, aut acumine lædunt, aliena quæque, ossa, calculi, vermes, undecunque huc devecta, in culpâ esse possunt: maximè tamen affectæ partis ex inflammatione, excoriatione, erysipelate, ulcere, fistulâ, vulnere, hæmorrhoidibus, nimia sensilitas, quæ si prioribus accedit, tormentum quoque intenditur. Quin & consensione id malum supervenit variis vesicæ urinae, urethrae, peri-

næi, intestinorum, uteri, vaginæ vitiiis, ac nervosi systematis turbis.

804. Lienteria, lævitas intestinorum, adest, cum ingesta tam celeriter per primas vias ad anum delata foras ejiciuntur, ut nec coctionem, nec corruptionem expectent. Causas habet ventriculi & intestinorum inertiam ad coquendum, cum nimia irritabilitate (190) conjunctam, pylori laxitatem, impeditam vasculorum absorbentium actionem (801). Refectionis autem inopia ægrum, aut trahit, aut præcipitat.

805. Fluor cœliacus, chylosus, levior lienteriae (804) species, succum alimenti utilem, utcunque coctum, una cum fecce, ano exturbat. Integris igitur ventriculi viribus, in solis intestinis vitium subest, quo & celerius, quam par est, contenta deorsum propellant, & materiem chylosam fugere nequeant, labe vel ad oscula vasorum absorbentium, vel altius hærente (801).

806. Cholera est tumultuosa primarum viarum agitatio, quâ, quidquid continent, fursum deorsumque violenter ejicitur. Malum stomachi atque intestinorum commune, ex vomitu ac diarrhoea compositum, similibus etiam motibus spasmodicis (797, 801) debetur. Hos vero cient innumera: cibi, potusque copia, acritate, flatulentiâ, fermentatione, pin-

guitudine , corruptione , refrigeratione gravantes , stimulantés ; hinc saburra acida , putrida , rancida , biliosa , verminosa , diætæ erroribus contracta ; medicamenta drastica , emetica , purgantia , mercurialia , venena ; bilis exundans ; atra bilis turgens ; materies rheumatica , arthritica , febrilis , scorbutica , sudoris , perspirationis , menstruorum suppressorum , exanthematum repulsorum , huc conversa ; turbæ ab æstu subitivæ æris mutationibus , animi motibus , graviditate , dentitione , dolore , malo hysterico , hypochondriaco concitatae .

807. Cholera , diarrhœa , dysenteria , quas siccas vocant , quia flatulentum potius , quàm humidum est , quod excernitur , ex dictis (798) intelliguntur .

808. Contingit etiam ægris insciis , aut invitis stercus elabi : quæ alvi incontinentia est , morbisque deliriosis , spasmodicis , paralyticis , aut singularibus sphincteris ani vitiis supervenit .

809. Quando autem fex alvina de urethrâ , perinæo , vulvâ , aut sede quavis aliâ ventris pelvisve , præter anum , excernitur , id fit vulnere , ulcere , fistulâ , vel pravâ conformatione , quæ contentis intestinorum alienam viam pandant .

Vitia Mictionis.

810. LOTII, quod intra vesicam est, excretio supprimitur multiplici vesicæ, aut urethræ affectione, quæ aut vim expellentem tollat, aut impedito meatu effluxioni obstet. Hujusmodi sunt innumera: vesicæ, colli vesicæ inflammatio; hujus spasmus; fibrarum illius muscularium ad contractionem efficacem impotentia ob immodicam a lotio retento distensionem, *εὐρυσμα* (203, 1), herniam (238), rupturam, vulnus, gangrænam, nervorum ex medullæ spinalis læsionibus resolutionem, membranas ulcere, pustulis, tuberculis, crustâ calculosâ, callo, fungo, aliove tumore obsessas; meatus urinarii inflammatio, spasmodica constrictio, obstructio a calculo, pituitâ, grumo, pure, verme, &c. (209, 1), obstipatio a callo, cicatrice, fungo, tuberculo, tumore glandularum mucipararum, carunculæ feminalis, varicibus, pustulis, &c. (209, 2), collapsus (ibid. 4), coalitus (ibid. 6), distortio. Sæpè tamen origo mali vicinis modò partibus debetur: uti cum rectum intestinum durâ fece, flatu, tumore hæmorrhoidum, inflammatione, abscessu turget; uterus foetu, sanguine, fero, aëre distenditur, aut scirrho, cancro, osteogeniâ, prolapsu, laborat; aut in vulvâ, perinæo, prostatâ, vesiculis feminalibus,

minalibus, musculis vicinis, cole, hujusve præputio, ejusmodi vitia insunt, quæ collum vesicæ, vel urethram comprimere queant. Atque hæc *ισχυρία* est, quam hodiè veram vocant.

811. Est & alia, notha dicta, in quâ lotium excerni nequit, quia nihil ejus intra vesicam confluit, vitio renum, aut ureterum, quod vel secretionem lotii suspendit, vel, ne ad vesicam perveniat, impedit. Igitur sanguis copiâ, spissitudine glutinosâ, phlogisticâ, atrabilariâ peccans, vasa sua distendens, obstruens, vicina comprimens, aut vasis elapsus, in thrombum coactus, inflammatio, abscessus, skirrhus, tabes, spasmus ab acri huc delato, aut aliundè per consensum natus, obstructio a muco, pure, sabulo, calculo, verme, torpor a contusione, distractione, gangrænâ, nervorum resolutione, compressio a variis partium adjacentium vitiis, in culpâ esse solent; modò labes eadem, aut diversa, in utrumque renem, vel ureterem unâ inciderit. Facit autem proximus istarum partium nexus, ac mutua actionum, quas exercent, conspiratio, ut altera alteram facilè in mali communionem pertrahat.

812. Cum molestè redditur urina, nec sine magno conatu, aut & cum dolore, hæc urinæ difficultas, *δυσσπρία*, dicitur, quæ uti gradus quidam est ad ischuriam (810), ita ex similibus vitiis, at leviori-

bus, ortum habet. Si dolor abest, causa mali debetur, aut spissitudini materiæ, quæ expellitur, mucosæ, purulentæ, cruentæ; aut indecunque natæ meatus angustia; aut flaccidæ rigidæve virium expellentium inertia. Sin & unâ dolet mictio, acre subest lotium, acribusve alienis, vel asperis mixtum, aut partium ex muci defectu, inflammatione, ulcere, nimia sensilitas.

813. Στραγγυρία, tenesmo (803) similis est assidua ad mejendum proritatio & conatus, quo tamen parum modò lotii, & guttatim, plerumque cum ardoris sensu exprimitur. Causæ ex (803, 812) intelliguntur. Primariæ sunt; acrimonia urinæ multiplex ex cibo, potu, medicamentis, venenis, materie febrili, catharrosâ, arthriticâ, scorbuticâ, purulentâ, ichorosâ, aliâve morbosâ, in vesicam undecunque depositâ; calculus atterens; muci defectus, aut acritudo; vesicæ, urethræ, inflammatio, excoriatio, ulcus, spasmus; consensus denique cum intestino recto, ano, perinæo, utero, vaginâ, &c. diversimodè affectis.

814. Urinæ incontinens dicitur, cui lotium in vesicæ cavo non moratur, sed sensim sine sensu & nixu, spontè, jugi stillicidio, de urethrâ elabitur. Spurcum symptoma ponit facultatem quâ retinetur urina planè abolitam, atque adedò impotentiam fibrarum, quibus ostium

vesicæ comprimitur. Hanc inducunt paralyſis, vulnus, contuſio, dilatatio, ulcus, gangræna, calculus, vis in partu illata.

815. Altera hujus vitii ſpecies eſt, cum ſcienti quidem, at invito, lotium expellitur, nec pro neceſſitate retineri, cum urget, poteſt. Oritur ex urinâ copioſiore, valdè aquoſâ, aut præter modum acri; veſicâ ob inflammationem, herpetem, ulcus, excoriationem, muci defectum ſenſiliore, ſpaſmo contractâ, rigente, propter impedimenta externa non dilatabili, aut compreſſâ; oſtii veſicæ relaxatione (814), accedente nixu diaphragmatis & muſculorum abdominalium in vomitu, tuſſi, riſu, partu, alvi egeſtione, tenefmo. Nec obſcura ratio, cur ſexui ſequiori, pueris, ſenibus, crebriùs accidar. Intelligitur etiam involuntarium illud ſtillicidium, quod à miſtione ſuper eſt, lotii-que reliquias tardiùs excernit, ſenio familiare, reſolutis, aut infirmatis muſculis acceleratoriſ deberi.

816. Immodici urinæ profluvii, qui Διαβήτης vocatur, plures numerantur ſpecies, aliæ quidem aliis rariores, atque ob id haud æquè certò ab omnibus agnitæ. Etenim vel tenuis, aquea urina ſupra portionum modum mingitur; vel quod profuſè excernitur, craſſius eſt, turbidum, albidum, veluti chyloſum; alias & ſapore, odore, colore melleo: quin perhi-

bent interdum, more lienteriae (804),
potum, præ siti, avidè magnâque copiâ
haustum, celerrimò per corpus, tanquàm
per siphonem, transitu, crudum, qualis
sumptus est, ad vesicam deferri, expelli-
que. Indè distinctio in verum & spu-
rium diabetem, inque varios gradus.
Origo quoque multùm diversa. Aquosa
humorum tenuitas (287, 354, 359), spif-
situdo inflammatoria; atrabilaria (282,
284, 355, 361, 367), mixtionem stabi-
lem cum aquosis ægrè admittens; crassa-
menti cum portione aqueâ justo laxior
cohesio (319); acrimonia attenuans, dis-
solvens, colliquefaciens (288 ad 317),
multiplex; aquosa fortè bilis inundatio
(372), mixtionisque hinc ac virtutis sa-
ponaceæ destructio; pinguedinis & gela-
tinæ nutrientis (376, 379) in laticem
aquosum degeneratio; magna laxitas vas-
culorum renalium; impetus humorum
versùs renes vehementior ob abusum diu-
reticorum, veneris, suppressam excretio-
nem cutaneam, habitum corporis exter-
num strictiorem, obstructions aliorum
viscerum, aut irritationem quamcunque
attrahentem, præcipuè huc faciunt. An
etiam humor ex atmosphærâ attractus stu-
pendæ urinarum copiæ materiem quando-
què suppeditat?

Vitia Excretionis Cutaneæ.

817. SUDORIS magna profusio, quam nec intensior corporis exercitatio, aut animi motus, nec calor externus, aut quæ ingesta sunt vel foris admota creant, causas agnoscit spiraculorum cutis laxitatem, circuitum sanguinis acceleratum, auctum versus superficiem impetum, aquosæ materiæ in humoribus abundantiam (287, 354, 359), aut nimis facilem à crassamento secessionem (318, 319). Undè patet, quibusnam morbis, & quam diverso omine, supervenire soleat.

818. Singularium quoque sudorum, qui de aliquâ modo parte corporis prodeunt, tum & calidi, frigidi, tenuis, visceridi, diversimodè colorati, sanguinei, foetidi, &c. ratio ex (817, 657, 658, 659, 401) aliisque locis haud difficulter eruitur.

Symptomata functionum Sexus.

819. NATURA, quæ singulis hominibus suam in conservandâ vitâ & sanitate operam præstat, erga humanum genus quoque benefica, in propagationem speciei haud minore curâ incumbit. Indè condita sexus diversitas, partiumque, quæ ad hunc pertinent, ac functionum, quibus suo quælibet modo ad procudendam prolem concurrunt. Videri quidem

possit facultatem istam à ceteris ita sejunctam esse, ut vix in morbis considerari mereatur; quandò nec vigor ejus in omnem ætatem cadit, nec languor adeò constanter reliquam œconomiam turbat. At dantur tamen in hoc etiam systemate viria, quæ aut in semetipsis, ob actionis quam lædunt dignitatem, momentosa censentur, aut quia aliorum morborum consecutiones sunt, noxasve aliis quoque functionibus inferunt, nequaquam prætermitti debent.

Sexus Virilis Ações Læsæ.

820. CUM vir ad arrigendum languidus aut impotens est, id fit vel facultatis quæ nervus intenditur torpore, vel feminis, quod pro stimulo est, inopiâ, vappidâve inertia. Utrumque vitium, aut proprium modò est genitalibus, aut his aliundè per consensionem infertur, plurimisque & diversissimis nascitur causis, quæ facilè ex (196, 198, 732 ad 755) eruuntur, additis præsertim, quæ huc etiam facere queunt, tum instrumentariis, tum humorum affectionibus ante expositis. Quum verò & imaginatio, & animi turbationes, tantum hic valeant, nec quivis virium gradus ad hanc actionem sufficiat (819), mirum non est, id symptoma permultis sese morbis adjungere.

821. Incidit & coles in oppositum violent-

ta tentiginis affectum, qui ubi citra veneris appetentiam est, priapismus dicitur; satyriasis, si cum inexplibili salacitate: huic voluptas, illi dolor comes. Spasmi (743, 747) annumerandum vitium; ut hi, aut idiopathicum est, aut sympathicum, causisque similibus (744) nascitur. Præcipuæ sunt liquoris feminalis abundantia, acritudo, virulentia; genitalium inflammatio, exulceratio, irritatio a vicinis partibus, maximè vesicâ urinariâ, ac intestino recto, inflammatis, distentis, rosis, calculo attritis, acri transeunte stimulis; dolor podagræ, lumbaginis, morbi convulsivi, deliria lasciva.

822. Impotentia ad semen ejaculandum debetur aut hujus defectui, aut impedimento meatuum, aut virtutis motricis imbecillitati. Fit igitur multiplici vitio organico testium, epididymidum, vasorum spermaticorum, deferentium, vesicularum feminalium, prostaticæ, urethræ, penis, scroti, inguinum: hisve integris, nervus languidior (820), aut paralyxis musculorum acceleratorum, cremasterum, spincteris ani, ceterorumque, qui huc fortè faciunt, in culpâ esse potest. An & abundantia feminis lautiore vitæ genere inducta nonnunquam incusanda? Videtur.

823. Incontinentiâ feminis laborant, quibus ad primam surgentis membri rigiditatem, aut per nocturnas ex imagi-

nibus pollutiones ejicitur, aut citra voluptatem effluit continuo stillicidio, miti, acri, virulento in gonorrhœis. Semen copiosum, turgescens, tenuius, acre; genitalium major irritabilitas, nimiaque ductuûm laxitas, immoderatæ veneris, præcipuè juvenilis consecutiones (562); abstinencia nimia (563), abusus aphrodisiacorum, diureticorum; virus venereum, id mali inducere solent.

Sexus Fæminei Symptomata.

824. MENSTRUUA sanguinis per uterum evacuatio uti sexui sequiori, certâ ætate, secundum naturam accidit, ita cum non satis maturè provenit, aut citra graviditatem vel lactationem, ante tempus supprimitur, id præter naturam est, ac multimodis sæpè nocet (565). Consequitur autem sanguinis ex prægressis evacuationibus, inediâ, morbis gravioribus, inopiam, crassitudinem, inertiam aquosam, impuritatem scorbuticam, cachecticam, quin & plethoram; solidæ compagis debilitatem, aut rigiditatem nimiam; circuitum languidiorem, intensiorem, aut aliorsùm malè directum; vasorum viscerumque abdominalium ex cacochyliâ, cacochymia, infarctum, vasorum uterinorum torporem, obstructionem, rigiditatem, coalitum, constrictionem à spasmis, frigore suscepto, adstringentium

abusu, compressionem ab externis, internis; impedimenta denique effluxionis multifaria ab ore uteri, vaginae, mœatu introituve, constrictis, obstipatis, compressis, coalitis, imperforatis. Immunitas aut tardatio mensium haud absimiles causas agnoscit.

825. Immoderata contrà profusio, suis quoque noxis haud rarò in junioribus, vetulis, nuptis, innuptis infesta, variis debetur cùm sanguinis, tùm canalium uterinorum vitiis: uti sunt sanguinis abundantia, orgasmus, tenuitas, acritudo, motus incitator, ad genitalia maximè directus, reditus per venas ob spasmos, obstructions, constrictiones impedior, vasorum debilitas, irritatio, erosio, ruptio, ex fotu suppedaneorum, veneris abusu, crebrâ prægatione, ulcere, heterogeneis utero contentis, stimulis externis, &c. nata. Indè & quæ hæmorrhagiam uterinam pariunt, intelligere licet.

826. Quæ suppressa menstrua quandoquè consequi, horumque vicaria esse solet, errans sanguinis per aliena loca evacuatio (401) ex perversâ motus humorum directione, ac incongruâ resistantiarum ratione nascitur, collatisque adeò (203, 2, 411, 824) facilè explicatur.

827. Mensium decoloratio, leucorrhœa, fluor albus, gonorrhœa in fœmi-

nis, vel cacochymiam consequuntur universalem, vel affectiones topicas genitalium, feri in his colluviem, contextum flaccidum, vasa debilia, inertia, mensium vitia, acre catarrhosum, scorbuticum, purulentum, saniosum, virulentum aliundè advectum, aut hic natum, veneris abusum, salacitatem cohibitam, irritamenta quævis interna, externa, quæ affluxum ad has partes intendunt, aut & impedimenta, quæ refluxui obstant.

828. Sterilitatem morbosam hæc inferre apta: pudendorum, vulvæ, vaginæ, uteri, morbi angustiae & vitia organica, ob quæ vir admitti nequit: uteri, tubarum ovarii, ovulorum, compressio, obstructio, concretio, hydrops, ulcus, scirrhus, marcor, exsiccatio, induratio, relaxatio, inviscatio, conformatio perversa, defectus, & similia, quibus fit, ut semen masculinum ritè recipi, subire, retineri, quo decet, permeare, suamque vim exserere, aut fœmina, quod suum est, conferre haud possit: inde & menstruorum vitiositates fluoresque incruenti (824 ad 827) venus immoderata, intemperies frigidior, torpor (196), irritabilitas enormis (190), cacochymia aquosa, glutinosa, acida (283, 287, 307) cachexia, obesitas (394), humorum inopia (393), firmior corporis constitutio in

viraginibus , & multa alia huc faciunt.

829. Prægnans occasione multifariâ abortum patitur ; uti quamplurima sunt , sine quibus fœtus ad maturitatem usque utero geri nequit. Horum inter præcipua meritò habetur legitimum fœtus cum materno utero per placentam commercium ; ut quo sublato natura plerumquè , ocyùs , ferius , sarcinam ad frugem haud perventuram elidit. Quæcunque igitur sive matris , sive fœtûs vitia placentam ante tempus ab utero separant , inter causas abortionis numerare licet. In matre quidem eò confert plethora ; impetuosior humorum ad uterum affluentia ; congestio immodica ; aut & deficiens commeatus , nutrimentique ob inediam , evacuationes , motumve alio directum , detractatio ; cacochymia ; turbæ ingentes nervosi generis ex animi pathematis , lei-
pothymiâ , spasmis , febribus , morbis gravioribus ; vehemens corporis concussio , maximè ad uterum determinata , in saltatione , cursu , exercitatione , vocatione , lapsu , tussi , vomitu , risu , ster-
nutatione , singultu , vociferatione , coitu immoderato , petulantiore , &c. nixus violenti in elevatione ponderis , extensione artuum , excretionem alvi , urinae , tenesmo ; uteri compressio à constricto ventre , vicinisve partibus malè affectis , contusio , vulnus , inflammatio , erysipelas , convulsio , laxitas , angustia

rigida, humiditas mucosa, contenta heterogenea, morbi alii. Fœtus in culpâ esse potest, cum iusto grandior fuerit, aut numerosior, hydrope tumens, motu violento molestus, malè situs, morbo inquietus aut languens, mortuus, ejusve placenta marcore, obstructione, degeneratione in hydatides, &c. affecta. Debilibus verò, irritabilibus, partum difficilem, sæpiùs præsertim abortum passis, malum familiare. Partûs præcoci, quo fœtus quidem vitalis, sed ante consuetum tempus excluditur, causâ hinc intelliguntur.

830. Prægnatio ultra naturæ modum protracta, si reapsè obtinet, gracilem, imbecillum, extenuatum fœtum, uterumve torpidiorem, videtur ponere: perpetua autem visa fœtu a morte arefacto, indurato, crustâ gypseâ obducto.

831. Quæ partum laboriosum, δυσκολίαν, inferunt, vitia innumera aut ad parturientem pertinent, aut ad fœtum hujusve secundinas. Priorum præcipua sunt, cum prægnans iustò junior, annosior, primipara, delicatior, debilior, animo fracta, impatiens, irritabilitate aut torpore laborans, obesior, plethorica, humoribus exhausta, vitio organico, aut quovis alio morbo, affecta, conamina ad partum nulla, spuria, languidiora, nimis violenta experitur: uteri dein affectiones variæ ex debilitate, con-

tractione spasmodicâ , compressione a vicinis partibus illatâ , ruptione , situ obliquo , hysterocele (238), orificio angustiore , indurato , calloso , contracto , distorto , tumore occluso , compresso , nimis sensili : vaginæ quoque angustia , obturatio , concretio , excoriatio , siccitas & similia , quæ viam transitûs impediunt : pelvis denique arctior , malè conformata. Fœtus in causâ est , si habitior fuerit , ventriosus , capite enormi , humerosus , deformis , languens , mortuus , situ perverso extra-uterinus. Alias placenta incongruæ uteri sedi adhærens , aut fœtum prævertens , præmaturâ aquæ puerperii ex ruptis secundis effusio , umbilicus propendens , aut fœtum implicans , &c. obstaculo esse possunt. Nec infrequens est , cujusvis generis plura concurrere , tantòque magis difficultatem pariendi ex eo augeri.

832. Lochia puerperæ immoderata , decoloria , parcius fluentia , aut planè suppressa , quas causas habeant , ex illis , quæ de catameniis vitiatis diximus (824 ad 827), innotescit.

833. Cum lac deficit , aut mæmæ suctionem non admittunt , fœmina ad lactandum impotens redditur. Humorisanopia ex inediâ , vitiatâ concoctione , evacuatione quavis immodicâ , vires à morbo graviore , acuto , chronico exhaustæ , uterus gravidus succum alibilem

ad se trahens, mammarum inflammatio, obstructio, scirrhus, cancer, exulceratio, marcor, rigiditas, defectus, aut materiæ subtractione, aut vitio organorum, lactis secretioni officiunt. Suctioni autem obstat ductuûm galactophororum à lacte in grumos spissato obstructio, coalitus, papillæ deficientes, nimis subsiduæ, aut ob fissuras, vulnera, rhagades, inflammationem, ulcuscula, justò teneriores; quin & universi corporis major sensilitas.

De ordinandis Morborum Differentiis.

834. ATQUE hæc hætenùs de singulis symptomatibus. Quæ si quis rectè animo comprehensa, pro multifariâ concursione ac successione, quam alia atque alia inter sese admittunt, & pro partium, in quas incidere queunt, diversitate, diligenter perpenderit, ei quam plurimæ occurrere debent formæ, differentes, plùs minùs compositæ, quæ totidem distinctos morbos exprimunt.

835. Habet nimirùm sua morbus quilibet symptomata, sibi propria, necessaria (87, 112), semper eadem, quæ & præsentem declarant, & cum ex naturâ ejus profluant, inque diversis ideò diversa sint, ab omni alio distinguunt. Neque profectò existimandum est, illud, quo homines ab hominibus in statu sano discrepant, morborum naturas pervertere, aut turbas quæ in morboſis affectionibus

se produnt, mutuam causarum effectuumque relationem posse abolere.

836. Tametsi igitur natura morbi fortè lateat, aut variantes inter Medicorum opiniones ambigua sit (416); ex syndrome tamen symptomatum, quibus stipatur, haud minus certò eundem internoscere, suumque ad titulum referre licet: nec enim post cognitās demùm naturas denominati plerique morbi sunt, sed post imposita nomina quæsitæ naturæ.

837. Atqui symptomata partem morbofi status evidentissimam efficiunt (88). Præ ceteris ergò rebus, quæ ad morbum pertinent, aptissima meritò censentur, ex quibus characteres stabiles, iidemque manifesti, differentium quorumvis morborum constitui queant (417): dummodò diligenti observatione, acrique iudicio, quæ necessaria sunt, sive perpetua, sive temporaria (112 ad 117), exquisitè colligantur, ab adventitiis, non necessariis (114), accuratè segregentur, & quosese offerunt, modo, concursu, ordine, sede, consideratè digerantur.

838. Quum verò & diversa morborum genera (837) haud ita prorsus inter se discrepent, ut non & mutua detur aliorum cum aliis affinitas; licebit ideò ex illis etiam, quæ multis generibus communia sunt, pari ratione (837), per characteres ritè limitatos, summa condere genera, seu classes numero pauciores,

ad quas , utilissimo compendio , affinia quæque genera referantur.

839. Quin & ulteriori in species distributioni hic locus erit ; sicubi , quod in quovis genere (837) diversum esse solet , ratione partium , in quas incidere potest , aut potentiarum evidentium , unde nascitur , vel & symptomatum accessoriorum , aliarumve conditionum , seorsim spectetur.

840. Ex quibus (834 ad 839) apparet , non esse , cur desperent Medici , fore aliquandò , ut ingens morborum humanorum numerus , exemplo ab Historiæ Naturalis scriptoribus petito , in ordinem systematicum redigatur , qui ab omni hypothesei sectarumque commentis liber , solâ nixus fideli observatione , classes , genera , species exhibeat , suis singula characterisimis , certis , manifestis , plenè interstincta. Specimina jam nunc à Recentioribus edita potiùs in spem erigunt , tentaminibus multiplicatis haud defuturos successus , remque tanti momenti , ac Bonis ideò omnibus exoptatissimam , sic tandem feliciter perfectum iri , ut non in nominibus duntaxat morborum inveniendis sese utilem præster , sed præcipuè facilem ad eruendas curationes viam expediat.

Differentia Morborum Accidentales.

841. Nunc tandem de morborum dif-

ferentiis, quas vocant accidentales (121, 418), dicendi tempus locusque est. Possint hæ quidem parùm fortassis momentosæ videri, ut quæ ad naturas morborum non pertineant: at eximiæ tamen in praxi utilitatis esse, ipsa earum pertractatio docebit. Nec certè in systemate condendo (840) præteriri quoque debent. Præcipuas igitur in capita quædam distributas exponemus, missis, quæ subtilitate magis, quàm usu sese commendant.

Differentiæ Morborum ab Origine.

842. PRO diversitate originis morbi dividuntur in hæreditarios, congenitos, & acquisitos, vel adventitios.

843. Hæreditarius dicitur, qui à parentibus simili morbo, hujusve seminio, affectis, genituræ vitio in sobolem propagatur, gentilitiâ labe per plurimas quandoquè generationes ad feros usque nepotes transeunte. Paternus ille, aut maternus est, multiplex, alias mox à natiuitate manifestus, alias postea, ferius, ocyùs, statò sæpè vitæ tempore, prorumpens. In tantâ autem modi quo gignimur ignorance, vix satis tutum fuerit, de ratione hujus traducis aliquid asseveranter statuere, nedum communem perpetuamque ejus sedem aut in firmis partibus tantùm, aut in humoribus, aut in viribus motricibus ponere;

quandò vel similitudo innocens, quam liberi cum parentibus habent, incomprehensibilis est.

844. Quum fœtui morbus in utero adnascitur, qui nec manifestus, nec in feminio latens, parentum alterutri ante conceptionem inhæserat, neque adeò ab hereditate (843) repeti queat, is congenitus vocatur. Ejus hinc differentia ab hæreditario liquet. Præter cetera, nævi materni potissimum, vitiositates organice, monstra huc referuntur, quorum origo phantasie matris (600) injuriis fœtui intra uterum illaris (599), genitalis denique materie labi primordiali (380) tribuitur.

845. Adventitiis morbis, qui homini nato ex quibuscvis potentiis accidunt, annumerandi, quos infans ex nutrice, cujus ubera fugit, contrahit, hæreditariis connatisque (843, 844) simile quid habent, altiusque radicati monstrant, ista affectionum genera etiam per humorum vitia communicari posse (843).

846. Memorabilis præcipuè est distinctio inter morbos primarios, πρωτοπάθειαν, & secundarios, δευτεροπάθειαν, quæ obtinet, cum morbus, ex suâ causâ natus, aut perdurans, aut desinens, alius generis morbum ex se producit. Secundarius tamen cum symptomate non confundendus (97, 105, 109); licèt ceterum parem habeat rationem, nec minùs

multiplices sæpè, quàm symptoma symptomatis (95, 96), successiones. Indè ejusdem morbi, prout vel primariò nascitur, vel ex diversis aliis, variæ exsurgunt species, quas inter sese distinguere, cum in praxi, tum in historiâ morborum condendâ (839) apprimè necessarium est. Huc etiam pertinent, quæ de morbo à causâ externâ, vel internâ producto (58) perhibere Practici solent, & quæ de feminis præter naturam supra (617 ad 622) proposuimus.

847. Pandemii porrò dicuntur, qui ex communi causâ oriundi per populum aliquem grassantur. Sunt autem vel endemii, singulari regioni addicti, vernaculi, plùs minùs perpetui; vel epidemii, ἐπιχώριοι, qui, cum ex communi quidem, at inconsuetâ causâ profluant, non nisi ad tempus sese exserunt. Constat igitur, istis generibus subesse vitia earum rerum, quæ in communi vitæ usu sunt, aëris potissimùm, aquarum, victus, &c. manifesta, occulta, familiaria, insolita, inquilina, exotica; novos sic morbos inauditosque nonnunquàm sese efferre, cognitorum alias mutari ingenium moresque, nec tamen adeò indiscriminatim iis affici quoscunque, ut non quandoquè in certæ conditionis homines duntaxat sæviant. His oppositi morbi dispersi, quos sporadicos vocant, non ex communi quadam causâ, sed ex uniuscujusque homi-

nis proprio vitio & errore nati, diversorum generum sunt.

848. Quæ diversis anni temporibus accidunt, æris, cibi, potus, vitæ generis mutationes totidem quoque potentia sunt aliis aliisque morbis excludendis aptæ. Horum indè divisio in vernaes, æstivos, autumnales, hyemales; qui tamen & ipsi multum variant, ut suo quævis tempori vicissitudo congrua aut incongrua fuerit. Epidemiorum (847) præcipuè notabilis est differentia, quæ binis debetur anni periodis solstitialibus; cum hæ indè a metâ quæque suâ, hibernâ aut æstivâ, aliquousque provectæ nocivas vires exserunt, sibi que proprias creant morborum populariter grassantium constitutiones, longè diversas sæpè, quin & inter se pugnantes, suo singulas æquinoctio maximè vigentes. Undè in vernaes modò & autumnales rectè distinguuntur.

849. Nec contemnenda est quæ à temperamentorum diversitate petitur morborum differentia. Conducit certè plurimum ad regundas singularium hominum sanitates. Et quanquam de sede ac ratione temperierum magna est inter auctores dissensio, non diffitentur tamen eas dari, & seminiorem vim habere (614, 615), propriaque idcirco esse affectionum genera, in quæ quis ob istam corporis sui conditionem magis propendeat (78).

850. Huc quoque referuntur variorum vitæ generum morbi, illi maximè quos artificum vocant. Momentosa, nec prodignitate adhuc evoluta classis originem debet partim materiæ quam quis quotidie tractat, quâ inquinatur, quave infectum aëra spirat, aut sibi perpetuò circumfusum habet; partim posituris, motibus, contentionibus, quibus in opere suo utitur. Hi fontes sunt, undè, quæ ad hoc thema pertinent, depromere licet. Videantur (440, 441, 442, 486, 501 ad 531).

851. Ætatum morbi audiunt, qui ex eo, quod cuique ætati proprium est, quoque alia ab aliâ differt, oriuntur. Hos igitur declarat series mutationum in partibus firmis, humoribus, viribusque motricibus, quas duratio hominis indè ab ortu ad obitum usque ex naturæ instituto subit (612).

852. Ante nativitatem quidem morbi obtinent feminis ac fœtus uterini, qui, hæreditariis (843), aut congenitis (844) annumerandi, indè quoque intelliguntur.

853. Recens natus quum maximas subito mutationes a partu subeat, corpore priùs perpetuo calore humido foto, molissimo, valdè irritabili, organis atmosphæræ, respirationi, circuitui mutato, egestioni, nondùm adfueris, systemate pulmonali, primis viis, mucos, meconio obsessis, ventre minùs a foris fulto,

umbilico resecto, multivariis patet affectionibus, a quibus paulò provectior deinceps ferè immunis est.

854. Infantia, ob corporis laxitatem ac teneritudinem (853), sceleti præprimis ac articulorum infirmitatem, primæ digestionis instrumenta debiliora, voracitatem, usitatum alimenti genus, vitam otiosam, humorum abundantiam, denritionem, sui quoque morbi nascuntur. Indè &, qui pueritiam ad pubertatem usque infestant, intelligere licet: debentur enim ex vario victu natis cruditatibus, cacochyliæ, vermibus, cacochy-miæ, suppressis excretionibus, calculo, sensilitati magnæ, circuitui incitato, incremento ac evolutioni partium.

855. Juvenes ex sanguinis copiâ impetuque majore, ac auctâ quidem, nec satis tamen roboratâ corporis compage, quin & ex maturescente genitalium organorum vigore, ægrotant.

856. Ætati constanti vis vitæ valida, solidorum robur, sanguis densus, polychymia, obesitas morbos pariunt.

857. In corpore senili solida siccescunt, rubuli concallent, nervi marcent, vis vitæ ac movendi sentiendique facultas elanguescit, circulatio torpet, calor nativus defervet, excretiones tardescunt, humores mucosâ, salinâ, terreâ fece impuri, subtilioris materiæ defectu vappidi, vitiantur. Ex his plurimorum malorum,

quæ senectutem comitantur, origo faciliè perspicitur.

858. Ceterùm nec inutile est notasse, morbos, qui ex congestione humorum nascuntur, maximèque naturæ molimina, quibus, quod superfluum noxiumve in humoribus succrevit, foras expellit, aut ex systemate circulationis ejectum in parte quadam singulari deponit, pro ætatum diversitate in diversas corporis regiones cum plurimùm incidere; ut videas in junioribus partes superiores ferè impeti, in adultis, quæ in thorace & proximè sub hoc sitæ sunt, in senescentibus ima ventris viscera ac artus. Neque tamen adeò vel constans, vel benefica semper hæc lex est, ut prudenti animæ consilio potiùs, quàm conditionibus merè corporeis attribuenda videatur.

859. Cum sexus etiam ad seminia (613) pertineat, pro hujus differentiâ morbi dividuntur in masculinos & femininos, hique porrò in morbos virginum, gravidarum, parturientium, puerperarum, lactantium ac vetularum, pro varietate conditionum, quibus natura sexum sequiorem subjecit. Lucem his affundunt, quæ supra (820 ad 833), habentur.

860. Denique & huc referre licet morbos congruos & incongruos; legitimos & spurios; tum qui materiales dicuntur, aut sine materie.

Differentiæ Morborum a Sede.

861. NATURA idem morbus , prout diversas partes obsidet , symptomatibus , duratione , eventu discrepare potest ; hinc & diagnosi , prognosi , methodo medendi. Quare Medici interest sedes morborum curatè distinguere ; nec suâ caret utilitate quæ ab hac conditione petitur differentia.

862. Hujus classis sunt morbi externi , interni ; fixi , qui in unâ sede morantur ; vagi , qui ex parte in partem migrant ; retrogradi , qui , cum aliquamdiù partes extremas obsederunt , his derelictis , introrsum recurrunt.

863. Præ ceteris tamen idiopathici & sympathici notandi veniunt. Prioris generis sunt , quorum causa in eadem parte residet , in quâ symptomata sese manifestant. Posterioris , quum diversa est causæ ac symptomatum sedes , nec propriâ , sed alienâ labe , per consensionem , pars aut functio laborat. Sympathicæ igitur affectiones , more symptomatum (86), haud ultrâ vitium undè pendent perdurant , eoque differunt a morbis , secundariis (846), quorum naturam demùm consequuntur , cum sympathia in idiopathiam transit.

864. Consensus iste quidem inter œconomix humanæ systemata , functiones , partesque omnes universalis est : at propiorem

piorem tamen magisque peculiarem aliorum cum aliis insuper dari certâ observationum fide constat ; etsi rationem ejus legesque haud satis liquidò perspiciamus. Credibile, non unâ modò, sed pluribus niti conditionibus, harumque principem in genere nervoso sitam esse ; deindè in systemate circulationis ; porrò in continuitate membranarum ; tum in vasorum communitate ; fortè & in fabricæ, aut humorum quos partes fecerunt accipiuntve similitudine. Quin & huc facere potest vicinia partium, & collocatio declivior, aut ex diametro opposita, actionumve aliqua cognatio. Prout igitur plura, aut pauciora horum unâ concurrunt, ita varii sympathiæ gradus nasci videntur. Nec prætereunda vis vitalis (170), quæ cum & latissimè per universum corpus diffusa sit, nec æqualiter tamen, aut in singulis partibus, aut in quibusvis hominibus, vigeat (17, 176), & amplissimo simul polleat consensu (178, 179), quamplurimùm sanè hic valere debet. Elucescit indè, cur tam multifaria privatarum id genus consensionum differentia inter homines occurrat, aliique præ aliis magis, neque omnes eodem modo, sympathicè afficiantur.

865. Qui universum corpus obsident morbi, universales dicuntur ; qui singularem modo partem, particulares. Illorum tamen duplex genus distingui po-

test; proprium nempe, cujus causa aut materies quoquoersus diffusa est; improprium verò, quod sede quidem privata continetur, at turbis suis totam œconomiam infestat. Quod igitur in hoc genere universale dicitur, alias ad affectus sympathicos (863), alias ad morbos secundarios (846) referri debet. Est etiam ubi morbus universalis in particularem, aut hic in illum, omine vario, transit.

Differentia Morborum à Cursu.

866. MORBUS quilibet, suâ ex causâ natus, determinatas quoque ab hac acquirit vires, quibus & agat, & in agendo perseverans cursum suum conficiat. Hunc igitur, pro differente morborum naturâ, & ipsum differre necesse est, nec duratione, celeritate, ténore, eundem singulis contingere. Ex quo differentia perquam notabiles habentur.

867. Qui celeriter decurrunt, brevissime adeò durationis sunt, breves dicuntur, si mites unâ fuerint; sin vehementes & periculosi, acuti. Hi porrò pro celeritatis gradu distinguuntur in acutissimos, qui ultrâ quatrimum non excurrunt; peracutos, qui septem diebus terminantur; acutos, qui tertiâ hebdomade; subacutos denique, aut acutos deciduos, qui ad XL etiam dies sese extendunt. Fortè his addere quoque licet acutos recidivos, qui sexagesimo demùm

die, aut & seriùs planè desinunt. Qui ultra hunc terminum protrahuntur, etiamsi ex acutis fortè nati, longi vel chronici audiunt. Et multa quidem sunt, quibus velocitas ista, discriminis plena, acutorum debetur: natura mali, sedes affecta, functionis læsæ dignitas, sympathia, corporis intemperies, &c. maximè tamen turbæ febriles in circuitu humorum. Undè, quos febris continua comitatur morbi præ ceteris propriè huc referuntur.

868. Rursus morborum alii tenore jugi a primâ invasione ad finem usque decurrunt, continuique ideò audiunt: aliorum mitior natura, diviso impetu, per repetitos quidem infestat insultus, at mediis cessationibus interruptos; ut morbus ac sanitas veluti alternent. Hi intermittentes. Hos inter & illos ambigunt continui remittentes dicti, vel exacerbantes, qui continuè quidem, sed per intervalla remissiùs afficiunt.

869. Utriusque autem generis recursuûm intervalla, multiplici varietate, alia aliis breviora, aut longiora sunt. Ex quo novæ iterùm differentiæ. Circuitus quoque ut regulares sunt, in tempora æqualia, vel inter sese analogia partiti, aut irregulares, ordine incerto, morbi dicuntur periodici regulares, aut anonomali; typici, aut erratici, vagi.

870. Inter periodicos (869) febres qui-

dem variæque generis nervosi affectiones præ ceteris eminent. Quum igitur natura periodorum (70) causam ferè ponat non simplicem, sed ex pluribus conditionibus compositam (69), quarum aliæ perseverent, aliæ temporariæ adesse, aut abesse possint; credibile omninò videtur, diathesin hic dari permanentem, quæ seminii loco (75) haberi queat, huiusque sedem esse in systemate nerveo, certè sensilitatis aut mobilitatis nimix speciem argui posse, quæ tamen sola aut nihil, aut mitius agat; dari hinc etiam potentias nocentes (76), illam quæ quovis demùm modo excitent, nec verò perpetuæ sint, sed paroxysmo ipso mitigentur, tollantur, postliminio reversuræ. Nihilominus difficile fuerit, cum naturam seminii, ut in diversis id genus morbis variat, determinare, tum potentias nocivas omnes singulasque, & quâ quæque ratione oriantur ac concurrant, exponere. Quin & dubitare licet, an non seminium semetipsum propriâ vi aliquandò excitare possit, absque novæ potentiæ accessione, saltem absque manifestæ; maximè si quadam occasione semel motum conceperit, qui deinceps modò iterandus sit. Complicatio autem plurium diversi generis periodorum, uniusque generis in aliud transmutatio, quæ toties observatur, istam materiem vel magis quoque in-

volvit. Nec hypothesium quæ excogitatae sunt ulla adhuc satisfacit.

Differentia Morborum à Gradu.

871. PLANTARUM animaliumque vitæ æquiparanda morborum duratio suas, ut illa, ætates habet differentes, quas gradus vocare liceat. Etenim adoritur, crescit, perstat, decrescit, tandemque desinit morbus; nec æquabili semper tenore, sed variato virium gradu per ista tempora procedit. Indè stadii morborum divisio in principium, augmentum, statum, declinationem ac finem, quæ quidem non adeò morbum à morbo, sed partes ejusdem morbi inter sese distinguunt.

872. Principium, pro morbi diversitate, brevius aut longius, neque hinc ad punctum temporis, quo quis ægrotare cœpit, modo restringendum, indè a primâ invasione usque ad notabile symptomatum incrementum æstimatur. Augmentum fit, cum morbus, numero ac magnitudine symptomatum incrementum, œconomix turbas manifestè aggravat ac multiplicat. Status, ἀχμῇ, tempus morbi vehementissimum est, quo summam virium consecutus nec crescit porro, neque tamen & minuitur. In declinatione, detritis morbi viribus, impetu defervescente, symptomata mitescent, finisque instat.

873. Plerisque omnibus quidem morbis hæc tempora (872) competunt, modo cujufvis naturæ consentaneo; maximè tamen illis, qui solutione salutari defunguntur. Tum vel symmetria quædam inter diversos gradus sæpè animadvertitur prædictioni certæ aptissima. Contra fatalis morborum exitus, crises, metastases, mutatio in aliud genus, complicatio variorum, recta aut perversa curatio, ordinem istum non rarò abrumpunt, alienant, obscurant. Acuti ac breves (867) præ chronicis, febriles præ ceteris, sua tempora manifestiùs distinguunt. Periodici (869) autem & duo genera habent; universalialia, quæ ad morbi curriculum pertinent; particularia, quæ ad singulos paroxysmos.

Differentiæ Morborum ab Indole.

874. MORBI indoles potissimùm ex satellitio symptomatum, quibus stipatur, sese prodit. Indè magnus dicitur, qui multis magnisque symptomatibus œconomiam turbat, sive unà subsit periculum, sive absit: parvus contra ac levis, qui parùm molestiæ infert.

875. Benignus, etsi forsan magnus (874), aptâ tamen medicatione tractabilis, nec funestis, nec insolitis symptomatibus terret.

876. Quæ de morbis prædicatur malignitas, quanquam haud rarò ignorantia

asylum, erroribusque Medentium operculum præstat, cum tamen reapse detur, omninò attendi debet. Proprio ea sensu morbum notat, qui insidiosè mitis, sub phænomenis non ominosis, aggressus ex improvise, gravissimis symptomatibus naturæ vires opprimit. Alias & talem, qui præter morem suum inusitata symptomata turbasque vehementiores, quam quæ naturæ ejus convenire videantur, excitat. Denique & refractarii, qui expertorum quoque remediorum vires eludunt, ac curatione vel magis exacerbantur, huc referri solent.

877. Cadit autem ista feritas (876) in morbos quidem acutos potissimum; sed tamen ad chronicos quoque pertinet, ortumque debet potentiis virulentis (486), miasinatis (496), contagiis (498), noxis, epidemiis (847), vitio humorum multiplici, irritabilitati (190), torpori (196), plurimum morborum confluxioni, pravo ægrorum regimini, aut perversæ curationi. Undè liquet malignos quidem rectè dividi in virulentos, pestilentes & contagiosos; sed divisione non completâ: neque enim potentiæ nocentes modò spectandæ, sed seminia quoque & accessoria.

878. Quum morbus, phænomenis sibi consuetis stipatus, modo naturæ suæ conveniente, sua tempora (871) percurrit, iis regularis, exquisitus dicitur: anoma-

lus contra, qui symptomatibus insolitis, typoque ac decursu alienis, sese effert. Anomalia autem refractarium quid ferè foveat, causasque agnoscit cum malignitate communes (876), nec hujus ipsa plerumquè expers est. Morborum, qui genuini, aut corrupti audiunt, eadem est ratio.

879. Hujus etiam loci cenfetur, quam recentiores haud temerè superaddiderunt, morborum divisio in passivos & activos. Hi sunt, quorum partem, nec rarò præcipuam, symptomata activa (101) constituunt. In illis naturæ isti motus absunt, vitali quippe principio languente, aut per potentias nocentes oppresso. Conf. (98 ad 105, 630, 633 ad 649).

Differentia Morborum ab Eventu.

880. INTEREST Medici præscire, an morbus sanari possit, nec ne; an in totum, an ex parte modò; an vi naturæ, an artis auxiliis. Indè generalis morborum divisio in sanabiles & insanabiles, variosque utriusque classis gradus. Sunt, qui naturæ & artis potestatem superant, absolutè insanabiles; sunt, qui artis tantum, non naturæ, aut hujus, non illius; sunt, qui sanationem quidem admittunt, nec tamen integram, sed parte quadam reliquâ, aliove morbo substituto. Quandò autem naturæ virium modus in diversis hominibus variat, nec ad

ultimos artis fines adhuc perventum est ; liquet , multùm hic ambiguitatis superesse , neque omnes & singulos morbos , qui ad unamquamque classem pertineant , exquisitè posse enumerari.

881. Qui morbus , postquàm in speciem sanatus aliquamdiù emanfit , denudò adoritur , recidivus vocatur , cum periodico (869) nequaquam confundendus. Ponit tamen & imperfectam sanationem , partemque adeò causæ suæ residuam (69, 70), quâ quovis demùm modo aucta , vel resuscitata revertatur (870). Indè materies morbi haud prorsùs devicta vel expulsa , debilitas , irritabilitas , torpor , a priore morbo relicta , una cum evitatione potentiarum nocentium neglecta , recidivas parere solent.

882. Morbi salutare a ceteris beneficâ indole distinguuntur. Tametsi enim molestias inferunt ; tantùm tamen abest , ut vitæ ac sanitati noceant , ut etiam prosint , liberentque a gravioribus malis , corpusque sanius dimittant , quam aggressi sunt. Huc referenda melior pars morborum activorum (879), in quibus natura medicatrices suas vires (633 & seq.) pro œconomix suæ salute explicat , intenditque. His quippè motus excitantur , inordinati quidem , ast illuc directi , ut , quæ in corpore insunt quoquo modo noxia , corrigantur , assimilentur , expellantur , aut saltem a partibus nobiliori-

bus avertantur. Major autem hujus classis morborum frequentia ut salutis generis humani magnoperè prospicit, ita Medentibus haud parum commodi præstat.

883. His (882) oppositi sunt detrimetosi, qui, vario nocuenti gradu vitæ infensi, alias citò, vel tardè, certò tamen, absque ullâ sanationis spe perimunt, absolutè lethales dicti; alias naturâ quidem suâ lethales, at verò promptâ rectâque curatione superabiles sunt; ancipites alii, non sine periculo, modò in sanitatem, modò in mortem terminantur; aliorum accidentaria est lethalitas, ad conditiones externas internasve singularem hominum magis adstricta; sunt denique, qui etsi vitam non adimunt, pedissequas tamen noxas post se trahunt sanitati inimicas, sæpè immedicabiles. Liquet autem hujus distinctionis magnam esse cùm in prædictionibus, ùm in medicinâ forensi utilitatem.

884. Generatim igitur morbi quidem, ratione eventus, quadrifariam modo inter sese differunt: sanescunt enim, aut occidunt; transeunt in alios morbos, aut immutati perdurant & ad mortem usque aliundè conscitam inhærent. Verumtamen, quod animadversione dignissimum, uniuscujusque horum exituum ratio modusque multiplex est.

885. Perseverantium sedes ac natura talis est, ut, quæ ad vitam faciunt, func-

tiones haud perturbent. Sunt autem vel insanabiles (880), vel quos sanare nefas; quia salutare (882), longâve consuetudine familiares, aut curatione irritati etiam exacerbantur.

886. Morborum, in alios morbos transeuntium, ingens & numerus & diversitas est. Duplex autem hic obtinet genus, alterum accessionis, alterum successione, prout vel permanet prior morbus, vel desinit, quum alius nascitur. Utriusque species differentes ex (621, 628, 846, 863, 864) intelligi queunt. Quin & liquet, in his non minus, quam in primariis morbis, differentes exitus (884) locum habere.

887. Qui naturæ viribus, artisve auxilio sanescunt morbi, vel correcto quod subest vitio, assimilata materie, motu in ordinem redacto, restituto circuitu, functionibus redintegratis, placidè solvuntur; vel salutari nocentis materiæ excretionem desinunt; vel mutata specie in alium abeunt morbum (886), mitiorem, qui suo dein modo ad sanitatem tendit.

888. Nec minus diversa sunt mortis genera, quam morbi lethales inferunt. Senectus, morbus naturalis, solidorum siccitate, rigiditate, feculentâ humorum inertia, vi vitæ fatifcente, mortem naturalem necessario inducit. Veri morbi alias retrâ humorum corruptione, nobilium

labe , prostrato nervorum vigore , respiratione impeditâ , oppressis exhaustisque viribus , circuitu sufflaminato , citò tardè interimunt ; alias immoderatâ atque incongruâ evacuatione , atque adeò fluidi vitalis inopiâ , aut & prolapsu in morbum deteriore (883) vitam pessumdant.

889. Præ ceteris autem sedulò animadverti merentur repentini ac perturbationis pleni morborum acutorum (867) eventus , quæ κρίσεις , judicationes , a veteribus appellantur ; quum salutem , mortemve ægrotantis decernant , excretionem quadam , aut translatione materiæ nocentis , post prægressas turbas , sese subito manifestante , quam insignis morbi in melius , aut deterius mutatio proximè consequatur. Indè crises excretoriæ , κατ' ἐκρίσιν , translatoriæ , κατὰ μετάστασιν , bonæ , malæ , perfectæ , imperfectæ , simplices , compositæ , repetitæ , perturbationis critica , materies critica , &c. prædicantur. Dierum quoque , in quos hæc magis vel minùs , diversoque successu , incidunt , varia potestas distinguitur : undè alii critici primarii , alii indices , alii subincidentes , alii vacui dicuntur.

890. Quæ (889) si quis cogitet propria modò esse morbis activis (879) ; ei apparere debet , aliquam hic dari similitudinem mutui inter naturam & materiem morbosam conflictûs (51 , 99) , crisiq; decerni , utra pugnantium pars

victura aut succubitura sit. Si verò & addas non nisi febribus, morbisve quos febris comitatur (867), hæc evenire; credas profectò, intestinam tunc subesse humorum, aut in toto corpore, aut in singulari parte commotionem, motu vitali ac calore auctis excitatam, quæ, conturbatâ ad tempus mixtione, vel in salutarem despumationem, vel in corruptionem perniciosam exeat.

891. Quocunque tamen modo ista fieri opineris; de re ipsâ per fidelissimas cùm veterum, tùm recentiorum observationes tam certò constat, ut nullus videatur dubitationi locus relinqui: quamquam negari nequit, rariora hodiè inter nos crîsum exempla prostare: quod quidem cœlo frigidiori ac intemperantiæ in victu non solum, sed vel magis etiam anticipanti turbantive medendi rationi & nimis a plerisque Medicorum neglecto observantiæ studio tribuendum.

892. Utrum verò & diebus criticis (889) tuta fides? An naturæ judiciis debentur? An potius superstitionis Pythagoricæ commentis? Judex non esto, nisi qui viderit, seriem criticorum dierum, a veteribus traditam, haud usquequaque hebdomadi congruere; didicerit porrò ex periodis (807 ad 870) temporibusque (871 ad 873) morborum, perperam hos pro confusis inconditisque naturæ malè se tuentis & de statu suo dejectæ effectis

haberi ; ex phænomenis autem vuln-
 rum , inflammationum , suppurationum ,
 exanthematum collatis ad ea quæ fer-
 mentatio , putrefactio , fructuum matu-
 ratio , incubatus , incrementa anima-
 lium , catameniorum periodi , &c. exhi-
 bent , succorum permutationes & com-
 motiones suis ubique definiri gradibus ac
 stadiis ; agnoverit denique , regulas ge-
 nerales exceptionibus non tolli , nec adeò
 ordinarias naturæ in sanis ægrisve leges
 fortuitâ quavis aberratione infirmari !

893. Dum igitur lis sub iudice est , ju-
 bet profectò rei dignitas veros quoscun-
 que artis magistros , junctis viribus , eo
 conniti , ut , semotis tantisper rationum
 argutiis , exquisitarum observationum
 exemplorumque pondere solidè tandem
 dirimatur. Fallor , ni sua constiterit
 HIPPOCRATI auctoritas , GALENO fides ,
 NATURÆ virtus & ordo.

F I N I S.

OPERIS

ARGUMENTA.

INTRODUCTIO AD PATHOLOGIAM.

De disciplinâ medicâ. pag. I

PATHOLOGIA. 9

PATHOLOGIA GENERALIS.

De Naturâ morbi. 10

De causâ morbi. 17

De symptomate. 26

PATHOLOGIA SPECIALIS.

De naturis singulorum morborum. 38

Morbi simplices. 40

Analysis chemica generalis corporis
humani. 41

Morbi partium solidarum simplicif-
simi. 47

Morbi solidi vivi. 53

Morbi solidorum continentium. 61

Morbi solidorum instrumentarii. 70

Morbi fluidorum. 93

Morbi coherentiæ in humoribus. 94

Acritates morbosæ humorum. 101

Morbi humorum ex secessione parti-
cularum. 110

Morbi humorum singularium. 111

<i>Chyli vitia.</i>	pag. 112
<i>Sanguinis affectiones.</i>	115
<i>Succorum secretorum vitia.</i>	127
Morbi humorum relativi.	132
<i>Quantitas humorum vitiosa.</i>	132
<i>Fluida loco aberrantia.</i>	138
<i>Motus vitia in humoribus.</i>	144
Morbi compositi.	147
De potentiis nocentibus.	149
<i>De nocivis atmosphæra potestatibus.</i>	150
<i>Noxæ ex cibo & potu.</i>	165
<i>De intempestivo remediorum usu.</i>	181
<i>De potentiis quæ virus habent.</i>	184
<i>Errores in motu animali.</i>	191
<i>Damna ex posituris & motibus singularibus.</i>	198
<i>Exercitationes mentis immodicæ.</i>	200
<i>Vis noxia animi perturbationum.</i>	205
<i>Excessus somni ac vigiliarum.</i>	211
<i>Excretio ac retentio inordinata.</i>	214
<i>De calculi origine & nocumentis.</i>	220
<i>Potentia morbifica animata.</i>	225
<i>De ceteris quæ forinsecus admota ob- sunt.</i>	229
De seminiis morborum.	235
<i>Semina morborum naturalia, commu- nia.</i>	236
<i>Semina morborum naturalia, propria.</i>	237
<i>Semina morborum, quæ præter naturam sunt.</i>	239

De Differenti causarum morbificarum constitutione.	242
Vires naturæ medicatrices.	246
De symptomatibus singulatim.	254
Qualitates sensibiles alienatæ.	255
Excretorum vitia.	260
Actiones læsæ.	261
Sensationes molestæ ex morbo.	262
<i>Dolor.</i>	263
<i>Anxietas.</i>	269
Exercitationes sensuum læsæ.	272
<i>Tactus symptomata.</i>	273
<i>Gustus symptomata.</i>	275
<i>Olfactus symptomata.</i>	276
<i>Auditus symptomata.</i>	278
<i>Visus symptomata.</i>	282
<i>Lesiones sensuum internorum.</i>	292
<i>Delirium.</i>	293
Motricis facultaris symptomata.	297
<i>Spasmus.</i>	298
<i>Paralysis.</i>	302
Somni affectiones.	304
Symptomata motuum vitalium.	307
<i>Respirationis symptomata.</i>	307
<i>Symptomata motus cordis.</i>	315
<i>Symptomata pulsus arteriarum.</i>	316
Symptomata actionum naturalium.	321
<i>Appetitus naturalis læsiones.</i>	322
<i>Actiones læsæ primarum viarum.</i>	325
<i>Vitia mictionis.</i>	336
<i>Vitia excretionis cutaneæ.</i>	341

Symptomata functionum sexus.	341
<i>Sexus virilis actiones læsæ.</i>	342
<i>Sexus fœminei symptomata.</i>	344
De ordinandis morborum differentiis.	350
Differentiæ morborum accidentales.	352
<i>Differentiæ morborum ab origine.</i>	353
<i>Differentiæ morborum a sede.</i>	360
<i>Differentiæ morborum a cursu.</i>	362
<i>Differentiæ morborum a gradu.</i>	365
<i>Differentiæ morborum ab indole.</i>	366
<i>Differentiæ morborum ab eventu.</i>	368









